



C. f.
48.

C

f:48.

1 m 21.

V. h. 10.



LECTIONES
PHILOSOPHICAE

DISTRIBVTAE

IN LOGICAS, PHYSICAS,
ET METAPHYSICAS.

AVGVSTINI DE ANGELIS
CONGREGAT. SOMASCHAE

S. Cong. Librorum Indicis Consultoris, in Ro-
mana Sapientia Publici Professoris.

Editio Tertia.



Donum



Autoris.

ROMAE, M. DC. LXV.
EX TIPOGRAPHIA FABII DE FALCO.

SVPERIORVM PERMISSV.

LECTIO III

PHILOSOPHIAE

DE NATURA


ET PRINCIPALITATE

ADVERSUS ARIANOS

CONOMEGAT. SUMMARIA

ET ALIA QUAE AD HANC CAUSAM PERTINENT

ETC.



ROMAE, MDCCLXX

IN AEDIBUS SOCIETATIS REGIAE

ADVERSUS ARIANOS



Eminentissimo Principi

IVLIO ROSPIGLIOSIO

S. R. E. CARD. AMPLISSIMO.

AVGVSTINVS DE ANGELIS F.



Amplissimum Philosophiæ Theatrum tanquam illud Curionis per manus Tyronum versatile contraximus in Enchiridion, auribus Discipulorum spectandum proposuimus, & diu suspendimus à Typographijs, ut litteratorum animos traheret ad Votum, & desiderio contabescerent Homines, dummodo niterentur in veritum, cuperentque negatum.

Verum quia sæpe numero, quod concupiscimus, consequimur, nè spes operis fallat amantes, iam Typis consignauimus nostram Philosophiam, ut æternitatis inusta notis, seruiat Orbi, ut non deficiat operi manus, dedimus contrectandam studiosis: Tibi, Emin. Princeps,

ceps, florentis ingenij calathos, tanquam Virtutum Aræ seruandos censuimus, Tu enim intelligentia Romani Cæli, mouisti Alexandri Septimi Astra, vt mihi benignius influerent, Tu mihi suis in Montibus palam fecisti fodinas Sapientiæ, & nobilior Pegaso excitasti prodigioso operis vngue veros Sapientiæ latices. Ingrati Animi vitium putarem, nisi saltem voto rependerem grates, laudaremque operibus meis Te meæ laudis Auctorem; Verum quia tunc laudibus pretium est, cùm à laudato fonte prosiliunt, nec sapiunt Vina Palato, nisi falerna, commodabis tuam nobis virtutem, vt per suos attactus, tanquam alterius Mijdæ Sapientia, & nobilitate ditissimi pretiosa euadant mei oris encomia. Vellem per tuas laudes excurrere, sed me sorbet virtutis excessus, & dum quæro operis Comites, & Assceclas per ambages ad memetipsum recurro, meque solum terret opus. Hortantur animos nostros virtutes tui animi Comites, & Sodales pectoris. Sileo tuam Prudentiam, cuius Hæredem Te instituerunt Catones, quam Roma suspicit, & admiratur; Sileo Sapientiam, qua in plerisque Sacris Cardinalium Coetibus adscitus, orbem illustras vniuersum. Silentio prætereo summam illam grauissimis in Rebus dexteritatem, qua ad Tagum Hispanum, vt Sol in occasu lucidior, entuisti, illuc ab Urbano Sacratissimo Principe missus, tanquam Mercurius Hominum mores, & nostri Regij Philippi IV. animos non alia virga aurea, quàm tui oris lingua mellita concilia-

7
ciliaturus, quod sanè tanto cùm Ecclesiæ bono
felicissimè contigit, vt meritò Tibi Purpuram
donaueit Alexander VII. Pontificum Sapien-
tissimus, Teque viuentem litteram rubra cera
obsignauerit in Vaticano; Pluribus non vtor
verbis, quia vber~~ius~~ meritorum annona me
facit inopem. Vale, & viuè diu.


APPROBATIONES:
D. BONIFACIUS ALBANUS
Præpositus Generalis Congregationis So-
maschæ.

L *Eccliones Philosophicas R: P. D. Augustini de
Angelis nostræ Cong. Theologi Typis mandari
presentium tenore concedimus præhabita virorum gra-
nium, quibus illarum examen commisimus, Approbatio-
ne. Et in fidem has litteras manu propria subscriptas,
Sigilloque nostri Officij munitas dedimus. Venetijs in
Collegio S. Mariæ de Salute kalendas Iulij 1665.*


D. Bonifacius Albanus Præpositus Genera-
lis Cong. Somaschæ.

D. Io: Antonius Serbellonus à Secretis.

Imprimatur,
Si videbitur Reuerendissimo Patri Magistri Sacri
Palatii Apostolici.



O. Episc. Vicesg. Patrac.



Imprimatur,
Fr. Hyacinthus Libellus Sac. Pal. Apost. Mag.
IN-

LECTIONES PHYSICAE. PROOEMIUM.



Ignitatem, vilitatemque *Philosophiæ* (cuius Pars prior est *Physica*) suprà reliquas scientias, & disciplinas longa commendatione, prosequi, non est eius, qui se breuitatem sequi (quam adeò studiosè Moderni quæ-
runt, & amant) initium huius operis professus est. Quare sufficiat vobis, *Audito-
res Optimi*, loco consuetæ huius commendationis exordium Libri de Mundo, quem ad ALEXANDRVM MACEDONIAE REGEM, & Auditorem suum scripsit olim, Philosophorum Princeps Aristoteles. Est autem. *Philosophia* sæpè numero, *Alexander*, visa est mihi res quadam *Sacra*, & planè *Diuina*, potissimum in ijs, quibus illa sola ad res contemplandas elata cognoscere studuit, quæ in illis verè haberentur. Cumque alij propter sublimitatem, & magnitudinem ab eadem ipse re procul recederent, illa eiusmodi negotium, nihil reformidauit, nec seipsam rerum honestissimarum intelligentia indignam censuit: imò earum ipsarum *Disciplinam* sibi ipsi cognitam, & in prius natura sua consentaneam existimauit, nam cum minùs corpori liceret in cœlestem migrare sedem, & relictâ Terra ipsum Cœlum inspicere, quod olim dementes *Aloide* facere cogitarunt, *Animus* post mentem beneficio *Philosophiæ* Ducem sibi assumptam per omnia transijt, peregrinèque professus est: cumque in viam quandam, ex qua nullam lassitudinem sensurus foret, ingressus esset, quæ locorum interuallo plurimum inter se discreta essent, cogitatione una comprehendit: ac paruo quidem, ut arbitror negotio ea, quibus cum natura cognatione tenebatur, nouit, & *Diuinæ* mentis acie percepit, mortalibusque præfagiuit. Sit ergo huius *Sacræ*, ac planè *Diuinæ* Scientiæ.

DISPUTATIO I.

DE PRINCIPIIS RERVM

NATVRALIVM.

Physicam, quam, Phylis, Græci Naturam Latini appellant; esse scientiam speculatiuam, est aded certum, & ab omnibus concessum, ut probatione non indigeat; habet enim pro sui Obiecto Corpus Naturale, quod est Obiectum necessarium, & in suo esse, fieri, & conseruari à nobis non dependens; tale est Cælum, & Elementum. Quia verò omnis scientia speculatiua in sui Obiecti contemplatione occupata, tria de illo considerat; nempe Principia, & causas: Proprietates, & Passiones. Denique Partes, & Species. Ided prima hæc Disputatio est de Principijs corporis naturalis; ubi nomine corporis naturalis venit compositum substantiale, resultans ex materia prima, & forma substantiali; licet enim in Physica considerentur etiam composita accidentalialia, quorum altera pars est forma accidentalialis, tamen hæc non per se primò, sed per accidens; & in ordine ad aliud, idest in ordine ad compositum substantiale considerantur, ideòque composita accidentalialia non sunt Obiectum per se, & attributionis, seu Ordinationis, sed Obiectum per accidens, & considerationis. Caterum eo ordine, & methodo tractat Arist. de corpore naturali, ut primis Octo Libris, quos inscribit de Physico auditu, tractet de corpore naturali, ut sic, & in communi: deindè de corpore naturali in particulari, videlicet de corpore Cælesti, & incorruptibili, de corpore corruptibili; de Elementis, de Mixtis, tum inanimatis, tum animatis.



LECTIO I.

Definitio Principiorum assignatur.

Praemitto: nomine Principij latissimè, & generalissimè sumpti venire omne id, ex quo primò aliquid fit, originatur, seu incipit esse, ità fundamentum est Principium Domus, quia à fundamento incipit esse, & originatur Domus. In qua acceptio- ne Principium omninò differt à causà, nam causà non solùm est id, à quo effectus incipit esse, & originatur, sed etiam à causà accipit effectus suum esse, suum existere, & ab ea dependet, at à principio potest aliquid originari, & incipere esse absque eo, quòd ab illo accipiat esse, ab eoque dependeat, sic in Divinis. Pater est Principium Filij, sed non est causà filij; priuatio, ut mox videbimus, est principium mutationis, & compositi naturalis, & tamen, nec mutatio, nec naturale compositum accipit esse à priuatione, quæ est nudum non ens.

Praemitto secundò: Principia esse duplicis generis, nempe principia intrinseca, quæ sunt intrà rem principiatam; Principia extrinseca, quæ sunt extrà rem principiatam, ut causà efficiens, & finalis. Iterum principia intrinseca, alia sunt perfectè intrinseca, vel quia sunt partes, ex quibus componitur res principia in facto esse, ut anima, & corpus respectu hominis, Materia, & forma respectu cuiuscunque compositi naturalis, vel essentialiter respiciuntur à composita in fieri, nimirum, ab ipsa compositi generatione, uti sunt materia, forma, & priuatio, quæ communì phrasi dicuntur principia mutationis; mutatio enim, generatio compositi, & compositum in fieri idem sunt.

Alia sunt imperfectè intrinseca, quæ sunt extrà rem principiatam, ità tamen, ut intrinsecè, & essentialiter illa exigat res principia; ità materia prima est principium intrinsecum formæ, quia ità est extrà formam, ut tamen intrinsecè exigat habere formam, tanquam sui complementum: ideòque etiam forma dicitur intrinsecum principium materiae primæ, quia intrinsecè exigat illam, tanquam sui subiectum.

Definiuntur ab *Arist. I. Physic. 5. t. 42.* Principia, esse illa, quæ non fiunt ex alijs, nec ex alterutris, sed ex his fiunt omnia. Ex qua definitione communiter in Scholis recepta, eliciuntur

tres conditiones requisitæ in principiis ad hoc, vt verè sint, & dicantur esse principia corporis naturalis. Quarum prima est, vt non fiant ex alijs principiis, alioquin non essent prima principia. Secunda conditio est, vt non sint ex se inuicem; seu ex alterutris, si enim vnum principium fieret ex altero, iam singula non essent principia, sed vnum eorum esset principium, alterum principiatum. Tertia denique conditio est, vt ex ipsis fiant omnia; idest; omnia corpora naturalia, de quibus in presenti est Sermo.

Quia verò in hac definitione ter repetitur particula, ex; non vna est omnium Philosophorum sententia, in quo sensu accipienda sit. Sed hæc difficultas simul cum alijs argumentorum solutione mox explicabitur.

Conclusio sit: Definitio Principiorum posita hic ab Aristotele sufficiens est, & accurata.

Probat: quia est adequata definito, conuenit omnibus, & solis principiis corporum, seu rerum naturalium, ergo est sufficiens, & accurata; quæ ratio magis firma manebit ex solutione Argumentorum in oppositum.

Obijcies primò: In definitione non debent assumi voces æquiocæ, sed *Tò*, ex, est vox æquioca, & plures habet sensus, ergo. Minor probatur, quia *Tò* ex, non potest significare solam habitudinem partis componentis, Priuatio enim est vnum ex principiis; & tamen cum non sit ens, non potest esse pars componens corporis naturalis, neque potest importare solam habitudinem termini à quo, quia hac ratione non verificaretur, principia non fieri ex se inuicem, seu ex alterutris, vere enim, forma sit ex priuatione, tanquam ex termino, à quo, ergo particula, ex, debet sumi in duplici sensu, & prout importat habitudinem termini à quo, & prout importat habitudinem partis componentis, si enim sic accipiat, omnia conciliantur, saluatur enim; forma, & corpus naturale fieri ex priuatione, tanquam ex termino à quo, sed non tanquam ex parte componente; corpus verò naturale fieri ex alijs principiis putà materia, & forma tanquam ex partibus componentibus.

Respondeo: non esse magnum absurdum, vsurpari aliquando in definitionibus voces æquiocas, quando aliter fieri non potest, cum enim rerum essentia occultissimæ sint, eo modo meliori quo possunt, debent explicari: imò vix reperies definitionem, cui non desit aliqua conditio ex requisitus: ad bonam definitionem

nem satis est, ad hoc vt sit sufficiens, & accurata, quòd sit adequata definito, & rei essentiam, quo quo modo explicet, & declarat.

Dico præterea: quod si, Tò ex, accipiatar semper in eodem sensu, prout, scilicet, importat solùm habitudinem partis componentis, adhuc verificatur tradita definitio; Forma enim propriè, & in rigore philosophico non dicitur fieri ex priuatione, compositum enim solum est id, quòd fit, & fieri dicitur, vt patet ex *Aristot. 1. Physic. cap. 7. s. 26. 7. Met. c. 8. s. 26. & 27. non forma ignis, nec candor, nec frigus fieri dicendum; sed ignis, candidum, frigidum, & 1. Moralium cap. 1. omnis productio, & effectio terminatur ad suppositum.*

Obijcies secundò: Materia prima, vt potè diuisibilis in suas partes, componitur, & fit ex illis tanquam ex partibus omnino sibi intrinsecis, ergo iam principia fiunt ex alijs.

Confirmatur: quia materia prima, & forma componuntur ex genere, & differentia, tanquam ex partibus intrinsecis, tam enim materia prima, quàm forma, est species, & omnis species constat ex genere, & differentia, ergo.

Respondeo: Materiam primam componi ex suis partibus intrinsecis integrantibus, non subiectiuis; vbi nomine partium integrantium veniunt illæ partes, quarum qualibet ablata, adhuc remanet denominatio totius, vt ablato pede, adhuc remanet homo; ad differentiã partiũ essentialiũ, quarum qualibet ablata, non remanet amplius totum, & ablata anima, non remanet amplius homo. Dixi materiam non componi ex suis partibus subiectiuis, quia partes eius non se habent, vt subiectum respectu materiæ, quo modo se habet ipsa materia respectu compositi naturalis, cuius est principium.

Ad confirmationem dico: Genus, & differentiam esse partes Metaphysicas, & in alio ordine, quòd non obstat, quò minus materia sit primum principium in genere Physico; de quo hic est sermo.

Obijcies tertio: Elementa non fiunt ex alijs, nec ex alteris, imò potiùs ex elementis fiunt omnia, & tamen Elementa non sunt prima principia, ergo definitio principiorum conuenit alteri à definito.

Respondeo: Elementa non esse prima principia, imò ipsa constare ex materia prima, & forma. Imò & elementa fiunt ex

alterutris, ex aere enim fit ignis, ideo eam definitionem non verificari de elementis.

Obiicies quartò: Etiam vnio partium constituit intrinsecè totum, seu compositum naturale, ergo iam etiam vnioni competit definitio Principiorum, sed vnio inter principia non enumeratur, ergo definitio Principiorum competit alteri à definito.

Respondeo: Vnionem non esse principium constituens, sed esse rationem formalem, qua principia constituunt, & faciunt compositum; seu esse principium, quo, non principium quod, sicuti etiam actio est principium, quo agit, & producit agens effectum.

LECTIO II.

Statuitur numerus Principiorum.

Praemitto: statuendum esse numerum Principiorum in ordine ad duo, idest, in ordine ad compositum in fieri, & in ordine ad compositum in facto esse: Compositum in facto esse dicitur, quando iam est completè factum, & perfectè productum. Compositum dicitur esse in fieri, quando est in suo fieri, & produci, portò ipsum fieri, & produci naturalis compositi vnico verbo, mutatio dicitur, sicuti compositum in facto esse, venit simpliciter, & sine addito nomine compositi.

Praemitto secundo: Sermonem esse in praesenti de principiis intrinsecis, non de principis quomodocunque, & extrinsecis, quo sensu etiam causa efficiens, & finalis possunt dici principia.

Conclusio prima sit: Principia compositi naturalis in fieri, seu mutationis naturalis sunt tria, materia prima; forma, & priuatio.

Ita Arist. hic cap. 7. 1. 67. D. Thomas ibidem, & Opuscul. 31. Arriaga dis. 1. Phys. sect. 3. & alij omnes Philosophi Antiqui, & Recentiores.

Probaturs Conclusio: quia naturalis mutatio est formaliter, & essentialiter transitus subiecti de non esse formæ, ad esse formæ substantialis, quatenus subiectum de non habente sic habens formam substantialem, in quo transitu essentialiter tria interueniunt; subiectum, quod transit de non esse ad esse formæ, hoc est materia prima, non esse formæ, & hoc est priuatio formæ; deni-

denique esse formæ, & hoc est ipsa forma; ergo iam tria essentialiter interueniunt in tali transitu substantiali, & consequenter tria sunt principia intrinseca, & essentialia naturalis mutationis.

Sed posita Conclusio magis firma manebit ex solutione argumentorum in oppositum.

Obiicies primò: Priuatio est mera carentia formæ, seu non esse formæ, atque adeò est non ens, ergo non potest esse principium naturalis mutationis, quæ est ens reale, & positium.

Respondeo: mutationem non esse adequatè ens reale, sed inadequatè, quia ex parte etiam est non ens, quia est essentialiter transitus de non esse formæ ad esse formæ, ideò benè priuatio, & non esse formæ, potest esse principium mutationis. Præterea priuatio est principium mutationis, non quia sit eius intrinseca pars componens, aut influens aliquòd esse in mutationem, sed per modum termini à quo, terminus autem à quo non debet esse ens reale positium.

Obiicies secundò: Potest esse productio, & generatio formæ, atque adeò productio, & generatio composiri sine priuatione, ergo priuatio non est principium mutationis, seu compositi in fieri. Antecedens probatur, quia possunt produci simul à Deo materia, & forma, vt de factò creata, & producta simul fuerint materia, & forma elementorum, in quo casu ad talem productionem non concurrit priuatio, tanquam terminus à quo, quia in nullo priori est assignare materiam sine forma, supponuntur enim esse simul creata, & producta materia, & forma, ergo iam priuatio cum in nullo priori præcesserit formam, non potest esse principium productionis formæ, & consequenter productionis compositi.

Respondent nonnulli, quòd licet in priori temporis non posset assignari priuatio in generationibus Elementorum, imò & in omni generatione, in qua producantur simul materia, & forma, sufficere tamen, quòd in aliquo priori naturæ sit priuatio, quia tunc etiam benè intelligitur materia pro illo priori naturæ sine forma, quæ deindè est in posteriori naturæ, licet simul sit simultate temporis cum materia, vt supponitur in argumento.

Sed contra est: quia in nullo instanti reali possunt esse simul priuatio, & forma, si autem valeret ista responsio de priori, & posteriori naturæ, iam ista duo instantia naturæ clauderentur in vno, eodemque instanti reali, atque adeò in eodem instanti rea-

li essent priuatio, & forma, quod est impossibile, quia sunt contradictoria, non esse, & esse formam, priuatio enim est, non esse formam.

Respondeo : igitur in præsentī nos loqui de generatione formæ, & compositi, quæ de facto, ordinariè, & regulariter fit, non de generatione formæ, quæ fieret in illo casu, neque de generatione formarum elementorum, aut etiam formarum Cœlestium, quæ quia producuntur simul cum materia, non habent pro sui principio priuationem, tanquam terminum à quo.

Obicies tertio: Dispositiones ad formam præcedunt formam, & ad illius productionem omninò requiruntur non minus, ac requiratur priuatio, ergo vel etiam ipsæ sunt principia, vel priuatio non est principium.

Confirmatur : quia non potest intelligi generatio, & productio formæ sine causa generante, & producente, ergo etiam causa produciens, seu efficiens, vniuo verbo, ipsum agens debet numerari inter principia.

Respondeo : dispositiones ad formam reduci ad materiam primam, tanquam ad causam materialem; quia non exercent distinctum munus ab ipsa materiali causa, è contra priuatio, quæ exercet munus termini à quo.

Ad Confirmationem dico : Agens esse merè extrinsecum, productioni, generationi formæ, idè esto sit principium, non tamen est principium intrinsecum, de quo in præsentī est sermo; sed est principium extrinsecum, quale etiam est Finis, seu causa finalis, sicuti enim omne agens agit propter finem, ità omnis actio est ordinata ad aliquem finem.

Colligite ex his primo; omnia, quæ hic sunt dicta de generatione substantiali dicenda esse quoque de generatione accidentali, per quam scilicet produciuntur forma accidentalis, dummodò soli termini varientur; sicuti enim generatio substantialis est productio formæ substantialis, ità generatio accidentalis est productio formæ accidentalis.

Colligite secundo : Rationem principij, vt sic, non esse communem vniuoce, sed ad summum analogicè respectu materiæ, formæ, & priuationis, quia enti, & non enti non potest dari vnus conceptus vniuocus.

Colligite tertio : aliqua principia ex assignatis esse inuicem contraria, imò & contradictoriè opposita, huiusmodi sunt priuatio, & forma; priuatio enim est non esse formæ; idè contradicto-

dictoriè opponitur formæ. Dixi formæ, non Materiæ: quia priuatio non est, non esse materiæ, sed est, non esse formæ.

LECTIO III.

Definitur Materia Prima.

Premitto primò: dari materiam, eamque non solum esse primam inter omnia naturalia, sed etiam esse primam respectu principiorum, certum est, & inconfesso apud omnes; priuatio enim est prior forma, sed materia est prior priuatione; itaq; nomine Materiæ primæ venit primum quoddam ens Physicum, & naturale, quod omnia entia naturalia, & alia duo principia, priuationem, formam, antecedit.

Premitto secundò: materiam primam varijs nominibus fuisse appellatam; quæ nomina ad duas classes reduco, nam aliqua spectant ad explicandam eius imperfectionem, & alia spectant ad explicandum eius munus, & officium, seu effectum, quem materia præstat. Primò igitur materia à *D. Augustino 12. conf. ap. 7. appellatur propè nihil* & *cap. 8. esse propè nudam rem; à Platone in Timæo appellatur non ens. Ab Arist. hic 1. 59. appellatur propè, & quodam modo substantia; his nominibus explicatur imperfectio Materiæ. Secundò, Materia prima appellatur à Platone in Timæo gremium, seu sinus omnium formarum: ab Arabicis Scriptoribus, origo, Massa, Sylua, Seminarium, locus formarum, & nutrix. Ab Aristot. hic appellatur 1. 82. Elementum, & subiectum, quibus nominibus explicatur munus, & officium materiæ primæ esse primum subiectum, in quo recipiantur.*

Premitto terriò: dari materiam primam, probatur primò, quia ut est commune axioma, ex nihilo nihil fit; & sensus est, quod Agens naturale, & finitæ virtutis per hoc contradistinguitur à Deo, ut agente supernaturale, & infinitæ virtutis; quod agens naturale operatur in subiecto; & in præiacente materia, & si nullum subiectum supponatur, nihil operatur: è contrà agens supernaturale, & infinita virtutis operatur nullo præsupposito subiecto, & nulla præsupposita materia, imò ex nihilo omnia producit, & creat.

Secundò probatur ex transmutatione, vel ipsis sensibus obuia, & nota; videmus enim ex aqua fieri aerem, ex ligno fieri ignem,

quæ

quæ transmutationes fieri non possunt absque aliquo communi subiecto, quod intelligatur transire à forma aquæ ad formam aeris, à forma ligni ad formam ignis, non enim tota aqua perit & totus aer de nouo producitur, quando ex aqua fit; alias ista non esset transmutatio, sicuti non fieret, nec intelligeretur fieri transmutatio Angeli verbi graua, in formicam, si Deus destructo Angelo produceret formicam, non nisi quia non daretur subiectum commune Angelo, & formicæ. Porro tale commune subiectum omnium fornicatum est materia prima.

Definitur ergo materia prima ab Arist. duabus definitionibus; prima est negatiua, quam tradit 2. Met. 10. 8. *Dico autem materiam, quæ per seipsam non est quid, nec quale, nec quantum, nec quicquam aliud dicitur, quibus ens determinatur.* Qua definitione declaratur imperfectio materiæ primæ, & excluditur è numero prædicamentorum, cum enim materia prima sit ens incompletum, & parziale non ponitur in recta linea prædicamentali.

Altera definitio, quæ ad Physicum spectat institutum; traditur hic 1. 82. *Etenim Materiam id dico, quod primum est vniuscuiusque subiectum, e quo quidpiam eo sit pacto, ut non per accidens insit. Si corrumpitur, ad hoc ultimum sanè proficiscitur.* & sensus est, materiam esse primum subiectum formarum substantialium, & quæ vnitæ cum materia prima faciunt vnum per se substantiale, non accidentale: idest, compositum substantiale, non accidentale: idest, compositum substantiale; quod quando corrumpitur in materiam, tanquam in vltimum, & commune subiectum, resoluitur, & corrumpitur.

Conclusio sit: Optima est, & accurata vtraque definitio materiæ primæ allata ab Arist. locis citatis.

Conclusio probata, & simul explicata manebit ex solutione Argumentorum in oppositum.

Obiicies ergo primò: ab Aristotele. 6. Topicorum, prohibentur definitiones negatiuæ, ergo non bene definiuntur materia prima per negationes.

Confirmatur; quia si materia non est vnum ex decem prædicamentis, ergo iam non datur in rerum natura, quicquid enim in rerum natura datur, includitur in numero decem prædicamentorum vno excepto Deo.

Respondeo: Definitiones negatiuas in duobus generibus entium esse necessarias, nimirum, quando definiuntur res perfectissimæ,

simꝫ, vt Dēus, qūi quo modo potest à nobis cognosci per negationem, & remotionem omnium imperfectiōum; & quando definiuntur res imperfectissimæ, vt est materia prima, quæ, quia difficile cognoscitur, traditur eius definitio per negationem & per remotionem omnium perfectiōum tanquam per quid notius, & manifestius.

Ad Confirmationem dico: materiam primam poni in linea transuersali, & laterali prædicamenti substantiæ, quia ens est incompletum, & patiale.

Obiicies secundò; in prima definitione de materia dicitur, quod non sit quid, id est, substantia, ergo ex materia, & forma non potest fieri vnum per se, seu compositum substantiale.

Respondeo: Materiam non esse substantiam completam, atque perfectam, sed substantiam incompletam, ideòque aptè posse ex illa, & forma substantiali, tanquam altera parte incompleta fieri vnum per se substantiale; imò si esset substantia completa, non posset ex illa, & forma fieri vnum per se, quia ex duobus entibus completis non fit vnum per se, sed vnum per accidens.

Obiicies tertio; Materia est subiectum formarum etiam accidentalium, imò & modorum, tam substantialium, quam accidentalium, sed cum illis non facit vnum per se, ergo non bene in definitione materiæ apposita est illa particula, per se.

Respondeo: Materiam fuisse definitam in ordine ad formam substantialem, quam principaliter, & per se respicit, nam formas accidentales, & modos siue accidentales, siue substantiales non respicit per se, & primariò, sed secundariò, & per accidens; sicuti & ipsam compositum accidentale non per se intendit natura, sed per accidens, in ordine, scilicet, ad compositum substantiale, quod primò, & per se respicit, & intendit.

LECTIO IV.

An potentia passiva materiæ sit essentialis.

Definita est materia prima per esse subiectum receptivum formatum, tam substantialium, quam accidentalium; porro materiam primam esse subiectum receptivum formarum, & esse potentiam passivam idem est, recipere enim est pati: quare videtur esse extra controuersiam, potentiam passivam materiæ esse.

esse illius essentialē prædicatum, ex definitione enim patet, eam esse essentialiter subiectum passuum formarum; verum, quia posset quis eam definitionem non recipere tanquam rigorosam definitionem, sed potius tanquam descriptionem, aut etiam negare, quòd esse subiectum receptuum formarum, & esse potentiam passuam, idem sint, idèò habet locum præsens controuersia; ad quam soluendam:

Præmitto primò: in materia assignari communiter ab auctoribus duplicem potentiam passuam; remotam, scilicet, & vniuersalem, proximam, & particularem. Potentia passua remota, & vniuersalis est in materia nudè considerata, & absque vllis particularibus dispositionibus ad particulares formas. Potentia passua proxima, & particularis est in materia, prout affecta, & vestita particularibus, & peculiaribus dispositionibus ad formas particulares recipiendas, & sanè certum est, potentiam passuam particularem non esse essentialē prædicatum materiæ, quia talis potentia includit dispositiones, & accidentia, quæ realiter distinguuntur à substantia, & essentia materiæ. Quare difficultas, & controuersia est de potentia remota, & vniuersali.

Præmitto secundò. Potentiam passuam materiæ vniuersalem, & remotam posse considerari tum in ordine ad formas accidentales, seu etiam in ordine ad modos rerum, siuè substantiales, siuè accidentales, materia enim est commune subiectum, seu commune receptaculum omnium formarum, vel entitatum se habentium ad modum formarum; & sanè nonnulli, quamuis admittant potentiam passuam materiæ in ordine ad formas substantiales esse illius prædicatum essentialē, negant tamen eius potentiam passuam in ordine ad formas accidentales esse prædicatum essentialē materiæ primæ.

Conclusio mea: potentia passua materiæ ad recipiendas formas, siuè substantiales, siuè accidentales, est prædicatum essentialē materiæ.

Ita Auerr. lib. de Substant. Orbis cap. 1. Simplicius 1. Physic. 1. 82. D. Thomas 1. Physic. circa 1. 64. Capreolus in 1. d. 42. q. 1. Soncin 8. Met. q. 9. Henricus in summa ar. 35. q. 8. Conimb. cap. 9. q. 8. Ruuius tract. 1. q. 6. Masius cap. 9. Lect. 2. qu. 7. Hurtardus disp. 2. Physic. sect. 2. Fonseca 1. Met. cap. 8. sect. 3. Juarez disp. 13. sect. 7. Arriaga disp. 2. Physic. subsect. 4. Quiedo contr. 1. pun. 3. Franciscus le Rees, saltem de potentia passua in ordine ad formas substantiales, & alij. plures, quos citat, & sequitur Auerf. 1. Philos. q. 20.

Con-

Contrà Thomistum in Digress. circa t. 61. Toletum q. 14. Ian-
nuum q. 25. & lib. de substantia Orb. t. 14. Zobel. lib. 1. de
Materia cap. 9. Peret. lib. 5. cap. 22. Contaren. in quest. de Po-
tentia materia, Raguserum disp. 4. Peripat.

Probatur conclusio primò: quia id est rei essentiale, sinè quo
res, nec intelligi, nec explicari potest, sed nec intelligi, nec ex-
plicari potest, quid sit materia, nisi eam intelligas esse subiectum
receptivum formarum, seu potentiam passivam, ergo.

Probatur Minor: quia si per intellectum præscindas rationem
potentiæ à materia, seu, si concipias materiam, ut sic, & indiffe-
rentem ad habendam, vel non habendam, istam potentiam pas-
sivam, non formabis conceptum materiæ primæ, sicuti si præ-
scindas rationalitatem ab homine, & concipias hominem, ut
indifferentem ad habendam, vel non habendam rationalitatem,
non formabis conceptum hominis.

Respondabis, posse concipi materiam, ut essentialiter exigiti-
vam talis potentiæ passivæ, & ita essentialis ista exigentia, vel
radicale principium talis potentiæ passivæ, erit prædicatum es-
sentiale materiæ, ipsa verò potentia passiva erit Proprietas.

Sed contrà est quia si ita intelligere, & loqui fas esset de es-
sentia materiæ primæ, similiter posset dici, non rationalitatem,
sed radicale principium, & exigentiam hominis ad habendam
rationalitatem esse eius essentiam, rationalitatem verò esse eius
proprietaem, quod nemo admittit, ergò nec talis exigentia,
aut radicale principium potentiæ passivæ, debet poni tanquam
essentiale prædicatum materiæ primæ.

Probatur secundò conclusio: quia potentia informativa for-
mæ, seu actualitas formæ, est prædicatum essentialis formæ, er-
go potentia passiva materiæ, est eius prædicatum essentialis; an-
tecedens est certum, consequentia tenet à paritate rationis, quia
sicuti forma habet ex sui essentia, & quidditate informare, &
actuare materiam, quia est essentialiter forma, seu actus; ita ma-
teria habet recipere, & subiectare passivè formam, quia est es-
sentialiter subiectum, seu passiva potentia.

Probatur tertio conclusio. quia omnino superflue ponitur ista
potentia passiva, tanquam proprietas, & qualitas accidentalis
contradistincta à materia, ergo connaturalius est, seu conformius
naturæ, quæ superfluitatem semper execratur, & odit, non pone-
re istam potentiam passivam contradistinctam à materia.

Antecedens probatur: quia ista qualitas poneretur ad hoc, ut
mater-

materia reciperet formas substantiales, illisque vniretur, sed iam tali qualitati materia immediatè vniretur, immediatè illam reciperet, ergo etiam potest immediatè recipere formam substantialem, illique immediatè vniri.

Confirmatur: quia data ista qualitate, iam forma substantialis non vniretur immediatè materiæ primæ, neque illi immediatè communicaret suum effectum formalem, sed potiùs immediatè vniretur huic qualitati, illi communicaret suum effectum formalem, & consequenter simul cùm ista qualitate faceret vñum per se substantiale, quod, esse absurdum, de se pater; Compositum enim substantiale non ex aliqua qualitate, & forma accidentali, sed ex duplici substantia coalescit.

Obiicies primò: inter species qualitatis secundo loco ponitur potentia, tam actiua, quàm passiuà, ergo potentia est accidens de prædicamento qualitatis, ergo non est de essentia materiæ.

Confirmatur; quia in quolibet Ente contradistinguitur esse, & posse, ergo potentia materiæ contradistinguitur ab essentia materiæ.

Respondeo: ibi nomine potentiæ intelligi eam potentiam, quæ est accidens distinctum à substantia, non verò potentiam substantialem, qualis est potentia actiua in Deo, & potentia passiuà materiæ.

Ad confirmationem respondeo: falsum esse vniuersaliter antecedens, nam in ipsa potentia non distinguitur esse, & posse: vel ad summum verificari de esse, & potentia in creatis; non verò de potentia passiuà: dixi in creatis, quia in Deo etiam potentia actiua non distinguitur realiter à Diuina essentia, vt enim est commune axioma apud Theologos; quicquid est in Deo, est realiter ipsemet Deus.

Obiicies secundo: si potentia ad recipiendas formas non esset distincta à materia, sequeretur materiam primam, etiam nunc habere potentiam ad formas iam corruptas, & consequenter earum reproductio non esset miraculosa, quòd est contra omnes, ergo vnam potentiam materiæ amisit, & consequenter illa potentia est distincta à materia.

Respondeo: quòd licet in materia sit potentia passiuà ad formas corruptas, non proinde sequitur, quòd earum reproductio non sit miraculosa, nam etiam in causa effectiua manet eadem vis, & efficacia ad producendum effectum corruptum, & tamen eius re-

productio adhuc est miraculosa; & ratio est, quia non sufficit illa potentia passiva materiae ad reproductionem formae corruptae, sed aliud requiritur, quod à solo agente supernaturali praestari potest.

Obijcies tertio: essentia rei consistit in priori, sed in materia prius est, esse ens imperfectum, quam esse potentiam, ergo materiae non est essentialis potentia.

Confirmatur: quia saepe Materia dicitur transire de potentia ad actum, materia est una, potentia est multiplex, & diuersa, iuxta multipliciter, & diuersitatem formarum, quas recipit, ergo potentia passiva est distincta à materia.

Respondeo: Essentiam rei consistere in priori, quando valet subsistendi consequentia, at quando non valet subsistendi consequentia, ratio prior se habet, ut ratio essentialis incompleta, & specifica.

Ad confirmationem dico: vel nomine potentiae venire priuationem formae; vel nomine potentiae venire potentiam proximam, & particularem, non communem, & vniuersalem.

Obijcies quarto: Causa efficiens causat mediante accidente, ergo & materialis, ergo materia causat, & recipit formam mediante potentia passiva à se distincta.

Respondeo: disparitatem esse, quia causa efficiens non vnitur cum effectu suo, at materia causat, & recipit formam, cui vnitur immediate. Praeterea difficilius est agere, quam pati, ideo causam efficientem indigere potentia activa à se distincta ad causandum, causam verò materialem seipsa causare, seipsa recipere formas.

L E C T I O V.

An Materia prima habeat propriam Existentiam.

TAm imperfecta, manca, & vilis visa est materia Thomistis, ut illi propriam negauerint existentiam, & vix essentiam concesserint. Thomistis contradicunt Schola Scoti, & recentiores communiter; est ergo famosa, & nobilis controuersia, an materia prima propriam habeat existentiam, per quam in rerum natura constituatur, an verò existat per existentiam, quam accipiat, & mutuet à forma. Pro huius Controuersiae intelligentia, & decisione,

Præmitto primò : In qualibet re, Metaphysicè loquendo, esse distinguenda tria saltem per intellectum. & ex nostro modo concipiendi; sunt autem essentia, existentia, & subsistentia; Essentia est id, per quod formaliter res ponitur extrà nihil, & inter entia numeratur : Existentia est id, per quod formaliter ponitur res extrà sui causas, & per quod dicitur formaliter existere : Subsistentia demum est quidam modus substantialis, per quem substantia fit independens à subiecto, ad differentiam inhaerentiæ; quæ est modus, per quem accidens inhaeret subiecto, vnde patet subsistentiam, & inhaerentiam opponi, sicuti opponuntur substantia, & accidens.

Præmitto secundò : Existentiam ab essentia distingui realiter, saltem tanquam modum à re in sententia Thomistarum; è contrà in sententia Scoti, existentiam ab essentia distingui formaliter ex natura rei, vt etiam nos probabimus in Metaphysicis.

Cæterum existentia solet dici actus entitatus, & Metaphysicus, ad differentiam formæ substantialis, quæ dicitur actus Physicus, & formalis, & iuxta hunc duplicem actum, duplex quoque assignatur potentia, nimirum potentia Metaphysica, dicens negationem existentiae, & actus Metaphysici, seu entitatus; & potentia Physica, dicens negationem actus formalis, & Physici.

Conclusio sit : Materia prima propriam habet existentiam, & non existit per existentiam formæ.

Ità *Ex Antiquis Alex. 1. de Anima cap. 1. Thomist. & Simplicius 1. Phys. 61. Philo p. 1. Phys. 66. Scotus in 2. dist. 12. qu. 1. & 2. quem sequuntur non modò Scotistæ, sed etiam Nominales, Greg. Gab. Ockam. Ricc. Mayronus in 2. d. 12. Ex Recentioribus Toletus hic q. 13. Perer lib. 5. c. 13. Hurtadus disp. 2. Phys. sect. 6. Suarez disput. 13. Met sect 4. Arriaga disp. 2. Physic. subsect. 1. Ouiedus Contr. 1 p. 3. Franciscus le Reës Com. in Phys. art. 3. §. ult. & alij. quos citat, & sequitur Auersa hic qu. 20. sect. 8.*

Contra Capreolum in 2. dist. 13. qu. unica, Caiet. de ente, & essentia cap. 5. q. 8. & 1. p. q. 76. art. 2. Ferrarien. 2. contra gentes cap. 68. & 1. Physic. qu. 11. Bagnes lib. 1. de Generat. cap. 3. dub. ult. Durand. in 2. d. 12. qu. 2. Compluten. hic disp. 3. qu. 2. §. 2.

Probatur Conclusio primò : quia essentia non distinguitur ab existentia realiter, sed vna, & eadem entitas est essentia, & existentia, ergo cum materia prima habeat propriam essentiam; habet

habet quoque propriam existentiam ; Maior in Metaphysicis probabitur .

Hoc argumento conuicti nonnulli Thomistæ , quos subtiliores (proprio eorum nomine suppresso) appellat *Franciscus Le Reës Com. in Phys. art. 3.* negant materiæ primæ propriam essentiam , volunt enim , materiam essentiarî per formam .

Sed contra est : quia hi Thomistæ subtiliores videntur peius peccare , quàm alij crassiores ; si enim materia prima caret propria essentia , & essentietur per formam , ergo illud agens naturale , quod producit formam substantialem producit illam ex nihilo subiecti , quia verè materia sine essentia est nihil , & consequenter iam crearet formam : at creatio soli Deo conceditur ex communi omnium sententia , ergo peius errant subtiliores hi Thomistæ , quàm alij , quos Crassiores ibi vocat *Franciscus Le Reës* .

Probat secundò Conclusio : quia materia est causa materialis , & subiectiua formæ , ergo cum omnis causa debeat præexistere ad effectum suum , & non possit ab effectu accipere existentiam , aut esse , iam materia habet propriam sui existentiam , & non potest illam accipere à forma , quæ est eius effectus .

Respondent huic argumento Thomistæ : quòd sola causa effectiua , quia est causa perfecta , debet præexistere ad effectum suum , non verò causa materialis , quia hæc est causa imperfecta .

Sed contrà est : quia eadem militat ratio de causa effectiua , & perfecta , ac de materiali , seu imperfecta , vtraque enim dat aliquod esse effectui , aliàs non esset causa , ergo vtraque debet existere antè effectum ; nisi velint negare , causam materialem esse causam . Præterea materia est vera causa effectiua , vel suarum proprietatum , vel ad minus eorum accidentium ; quæ tanquam dispositiones prærequiruntur ad formam , ergo iam debet præexistere materia ad formam .

Respondent alij : Materiam priùs existere in genere causæ materialis , at formam existere prius materia in genere causæ formalis , datur enim mutua causalitas inter materiam , & formam .

Sed contrà est : quia suo loco probabo , non posse dari istam mutuam causalitatem inter materiam , & formam , sed ea data , adhuc in isto , quia hoc est , quod argumentum probat si forma

in existendo est prior in genere causæ formalis, ita ut ipsa det existentiam materiæ, ergo iam materia per hanc ipsam existentiam non potest prius existere tanquam subiectum in genere causæ materialis; nam sicuti est prorsus inintelligibile, nè dum impossibile, quòd paries, verbi gratia, debeat esse albus in aliquo priori, ut recipiat albedinem, & tamen sit albus per albedinem, ita inintelligibile, nè dum impossibile est, quòd materia debeat existere in aliquo priori, antequam recipiat existentiam à forma, & tamen existat per existentiam forme.

Respondet *Quid. hic Contr. 2. p. 5. num. 10.* ut ostendat, argumentum factum non esse efficax: Materiam primam secundum sui essentiam præsupponi ad formam, tanquam causam materiale illius, præscindendo pro illo priori, in quo supponitur, ab existentia; eo modo, quo supponeretur ad propriam existentiam, si illam haberet distinctam à forma, eademque ratione, qua supponitur materia ad suam præsentiam, præscindendo pro illo priori, in quo supponitur, à præsentia.

Sed contrà est: quia in primis, quantum spectat ad præsentiam, ideò pro aliquo priori materia præscindit à præsentia, quia non debet esse præsens, antequam recipiat præsentiam, at debet esse existens, antequam recipiat formam, quia est causa formæ; quantum ad existentiam, si ponatur modus distinctus in primis dico, ob id existentiam non esse ponendam, ut distinctam; sed facta hypothese, quòd existentia esset distincta, b essentia materiæ, eadem difficultas fieret de existentia forme, quomodo scilicet reciperetur in essentia formæ, tanquam in subiecto, quod in aliquo priori ad existentiam non potest supponi existens.

Dico igitur: quòd existentia reciperetur in essentia, non tanquam in vero, & proprio subiecto, quia talis essentia non supponeretur in aliquo priori ad existentiam, quod est de ratione veri subiecti, sicuti & terminus, utpote quia producit per actionem, atque adeò non supponitur ad actionem; deficit à ratione veri subiecti respectu actionis, ideòque actio dicitur illi adhærere, non inhærere.

Probatur tertio Conclusio: quia si materia prima acciperet existentiam à forma, & non existeret per propriam existentiam; sequeretur, materiam generari, & corrumpi ad generationem, & corruptionem formarum, à quibus accipit existentiam, gene-

rari enim est accipere existentiam, corrumpi verò est deperdere existentiam, at hoc est falsum, & contrà communem sensum, Philosophorum asserentiam materiam esse ingenerabilem, & incorruptibilem, ergo.

Obijcies primò: communes loquutiones Philosophorum, qui materiam appellant non ens, non esse aliquid, non esse substantiam, esse potentiam, esse ens in potentia, poni in actu per formam, & similibus alijs modis de materia discurrunt, ergo materia debet carere propria existentia.

Respondeo: Materiam non esse ens completum, non esse aliquid, aut substantiam Physicè completam, quia est pars compositi. Dici quoque esse in potentia, Ens in potentia Physica, quia caret forma Physica, sed non dici ens in potentia Metaphysica, quia careat forma Metaphysica, seu actu entitativo, qui est existentia.

Obijcies secundò: ex duobus entibus in actu non potest fieri vnum ens per se, vt enim habet commune dictum, quicquid aduenit enti in actu, accidentaliter aduenit, sed si materia haberet propriam existentiam, iam esset ens in actu, ergo ex ipsa, & forma non posset fieri compositum, quod est ens per se.

Respondeo: Maiorem esse veram de ente in actu completo, non de ente in actu incompleto; Porro materia habens propriam existentiam, haberet actum, & existentiam incompletam, sicuti enim materia habet essentiam incompletam, ita quoque haberet existentiam incompletam, ex qua simul, & ex altera existentia incompleta formæ, fieret compositum, quod est ens per se. Verum quidem est, quòd materia est ens incompletum potentiale, & ideò magis incompletum, quàm sit ens incompletum forma, quæ est ens incompletum actuale.

Dices: ergo iam materia habet essentiam, & existentiam, ergo est composita ex essentia, & existentia, ergo iam esset ens completum, & consequenter ex illa, & forma non posset fieri vnum ens per se.

Respondeo: Materiam fore Metaphysicè compositam ex sui essentia, tanquam subiecto, & potentia Metaphysica; & ex existentia, tanquam ex forma Metaphysica; cum quo tamen stat, vt Physicè sit incompleta, quia ipsa essentia, & existentia materiae sunt potentia Physica respectu formæ Physicæ.

Obijcies tertio: Datur purus actus omnem prorsus excludens potentiam, qualis est Deus, ergo datur pura potentia om-

nam prorsus excludens actum, talis non potest esse, nisi materia, dato enim vno contrariorum, debet dari & alterum, ex Arist.

2. *Cali* t. 18.

Respondeo in primis, Maiorem non esse vniuersaliter veram, sicuti enim non valet, datur summum bonum, omnem excludens rationem mali, quale est Deus, ergo debet dari summum malum, quod excludat omnem rationem boni: quia quodcumque malum est ens, & omne ens est aliquo modo bonum, ita non valet vniuersaliter; datur purus actus, ergo & pura potentia. Præterea Deus non est ita purus actus, ut omnem excludat potentiam, quia Deus habet potentiam actiuam: dictum autem Arist. debet intelligi de contrarijs positius, uti sunt calor, & frigus; non de contrarijs summè distantibus in perfectione essentiali, ut sunt Deus, & materia prima.

Obiicies quartò: omnis actus, aut est informans, aut per se subsistens, sed materia prima non est actus informans, ut patet, neque est actus per se subsistens, quia tales sunt Angeli, ergo materia nullo modo est actus.

Respondeo: Materiam esse actum per se subsistentem incompletum, quia est substantia incompleta, & omnis substantia per se subsistit, præcipuè verò materia, quæ est primum subiectum, & non potest alteri subiecto inhaerere; cum hoc tamen stat, ut sit adhuc quid imperfectum comparatiuè, tum ad Angelos, qui sunt actus per se subsistentes; & completi; tum ad formas substantiales, quæ licet sint actus, & ipsi incompleti, tamen sunt in genere actus, materia verò est in genere potentiae, & omnis actus ex suo genere perfectior est potentia.

Obiicies quintò: in vnoquoque genere debet dari aliquid, quod est per se tale, & aliquid, quod est tale per aliud, ergò in genere existentium debet dari materia, quæ existit per aliud, nempe per formam, & formam, quæ existit per se.

Respondeo: in genere existentium solum Deum habere existere per se, cætera entia, sicuti sunt creata, ita habent existentiam, vel à Deo, vel ab agente naturali.

Colligite ex his: quòd sicut materia prima habet propriam suam existentiam, ita quoque habet propriam subsistentiam, per quam subsistit per se, & independentè à subiecto, sicuti enim materia prima est substantia partialis, & incompleta, ita habet partialem, & incompletam subsistentiam. Præterea, ut mox dicebam, materia est primum subiectum, ergo non potest alteri subie-

subiecto, inherere, aliàs non esset primum subiectum, & consequenter debet per se subsistere, & habere propriam partialem, sui subsistentiam.

LECTIO VI.

Dependentia materiæ primæ à forma.

Præmitto primò: posse vnum ab alio dependere dupliciter, primò per dependentiam causalitatis, seu à priori, quomodo effectus dependet à suis causis, vel etiam à conditionibus ad eius productionem prærequiritis. Secundò potest vnum dependere ab alio aliàs sibi accidentali, & omninò posteriori ratione necessariæ alicuius connexionis, quam habeat cum illo; hæc ratione anima pendet à suis potentiis, & omnis essentia à proprietatibus, imò & omne ens creatum ab ubi, & duratione, impossibile enim est naturaliter existere aliquod ens creatum, quod ens creatum non sit in aliquo loco per ubi, & aliquo tempore, per durationem.

Hanc dependentiam à posteriori priùs impugnat, deindè approbat, & ingeniosè probat *Quied. hic Controu. 2. p. 7. §. 2.* licèt enim id, quod est posterius, nullum influxum, siue morale, siue Physicum habeat in id, quod respectu eius est prius, & quod iam supponitur completè, & perfectè existere, attamen vt saluetur communis sententia admittens hanc dependentiam rei à suo posteriori, potest satis probabiliter dici, id, quod est prius, habere intrinsecam, & essentialẽ exigentiam ad habendum, aliquod sibi posterius, & ità iam id, quod est prius habebit intrinsecam, & naturalem connexionem cum suo posteriori.

Præmitto secundò: Thomistas cohærenter ad eorum doctrinam de causalitate formæ respectu Materiæ, asserere, dependere materiam à forma à priori, & tanquam à causa dante illi existentiam, & consequenter nec de absoluta potentia posse materiam existere absque forma, quia implicat materiam existere sine existentia, quam accipit a forma. Scotistæ, & Recentiores talem dependentiam omninò negant, & consequenter docent, posse de absoluta potentia materiam existere sine forma, a qua supponunt materiam dependere, a posteriori modo explicato, imò

Quied. Controu. 2. p. 7. 9. 3. putat, etiam naturaliter posse conseruari materiam absque forma.

Quid sentiam duabus conclusionibus aperio.

Conclusio prima : Materia prima de facto, & naturaliter non potest existerē absque aliqua forma substantiali.

Ita communiter sentiunt Auctores hic *Auerr. 1. physic. com. 76. & lib. 2. cem. 3. Auicē. 2. met. cap. 2. & 3. Thomist. 1. physic. digres. ult. Alex. lib. 2. nat. Quast. cap. 11. Auersa quast. 20. sect. 10. Dico secundò, Arriaga disp. 2. sect. 6. subsect. 3. Ruuius tract. 1. q. 5. a fortiori Thomistae, qui nec de absoluta potentia volunt materiam posse existere sine forma, & alij communiter.*

Contra *Marsilium in 3. q. 13. art. 1. Gabriel in 3. d. 2. q. unica art. 3. Quied. Contr. 2. p. 7. §. 3. & aliot, quos citat Argentinas in 2. d. 12. qu. vn. art. 2.*

Probatur Conclusio : Materia prima de sua intrinseca ratione, & natura exigit habere aliquam formam, ergò naturaliter, & considerata eius naturali exigentia non potest esse materiā prima absque omni forma, aliàs esset in statu violento, & sibi naturaliter indebito. Consequentia tenet. Antecedens difficile probari, ostendit *Arriaga loc. cit.* ubi varias probationes adducit, & soluit, ostendendo esse parum efficaces.

Probatur tamen : quia materia de sua natura est pars incompleta, & imperfecta, ergò exigit de sua natura completi, & perfici, at non compleuit, neque perficitur, nisi per formam, ergò iam exigit habere aliquam formam, a qua perficiatur, & compleatur.

Replicabis : Anima rationalis, & ipsa est pars incompleta, quæ exigit completi, & perfici, & tamen naturaliter potest esse sine subiecto, & sine altera comparte.

Sed contra est quia, anima rationalis, licet sit pars, tamen est ordinis, & naturæ spiritualis, atque adeò conditionis in suo genere perfectæ; hinc est, ut nobilissimas eliciat operationes, etiam quando est extra subiectum; non sic materia prima, quæ est ex genere suo ens imperfectum potentiale, & prorsus inhabile ad exercendum suum proprium, & naturale munus recipiendi, si careat omni forma substantiali.

Dices : nulla causa habet intrinsecam exigentiam ad habendum effectum, ita ut sine illo non possit naturaliter existere, & conseruari, ergò nec materia prima habet intrinsecam, & naturalem exigentiam ad habendam formam.

Respon-

Respondeo : negando antecedens , quia animā rationalis non potest esse naturaliter sine suis potentiis , quas intrinsecè , & essentialiter exigit , sicut omnis essentia suas passiones , & proprietates ; denique nulla est res creata , quæ essentialiter non exigit vbi-
cationem , & durationem .

Replicabis : Potentias ab anima rationali ; passiones ab essen-
tia ; vbi-
cationem , & durationem emanare a re vbi-
cata , & du-
rante ; at formæ substantiales non emanant a materia , ideò esto
anima rationalis exigit suas potentias , & quælibet essentia exigit
naturaliter suas proprietates , sicuti & quælibet res creata exigit
vbi-
cationem , & durationem , non tamen materia habet talem
intrinsecam exigentiam ad formas substantiales .

Sed contrā est quia formæ substantiales , licet a materia non
emanent , educuntur tamen ex illa , educio autem æquiualeat ema-
nationi , perindè enim se habent , ac si emanarent , patet quia , quæ
educuntur in suo esse , fieri , & conseruari dependent a materia ,
non minùs , ac ea , quæ emanant , ergò si in anima rationali po-
nitur intrinseca exigentia ad habendas sui potentias , etiam in
materia prima aptè , & congruè potest , & debet poni intrinseca
exigentia ad habendas formas substantiales .

Conclusio secunda : De absoluta Dei-
potentia potest mate-
ria separari ab omni forma substantiali .

Ita Scotistæ , & Recentiores communiter .

Contrā Thomistas supracitatores .

Probatur Conclusio : quia Diuinæ Omnipotentiae id solū
est denegandum , quod aliquam inuoluit contradictionis impli-
cantiam , quod enim tale est , est purum nihil , & non ens , atque
adeò non potest esse terminus Diuinæ Omnipotentiae , cuius ter-
minus est realis existentia , sed materiam primam existere sine
forma substantiali , non inuoluit contradictionis impli-
cantiam ,
vt ex solutione argumentorum mox patebit , ergò .

Confirmatur quia : Materia minus pender a formis substan-
tialibus , quàm hæ pendeant ab ipsa , quia earum est causa , sed
formæ substantiales possunt esse extra materiam , & diuinitis
conseruari , quia vel ipse formæ accidentales possunt esse sine
materia , vt patet in Sanctissimo Eucharistiae Sacramento , vbi
peracta consecratione remanet quantitas sine substantia panis , er-
gò a fortiori poterit materia prima sine formis substantialibus
conseruari .

Obicies primò : si Materia esset sine forma substantiali , esset

actu, & non esset actu, sed hæc est manifesta contradictionis implicantiæ, ergo. Minor probatur quia, materia esset actu ex suppositione; non esset actu, quia non haberet existentiam, quia careret forma, a qua habetur omnis existentia, ergo.

Confirmatur quia: non potest dari esse accidentale sine forma accidentali, ergo non potest dari esse substantiale sine forma substantiali, ergo materia non potest esse aliquid substantiale, si careat forma substantiali.

Respondeo: ex dictis iam, & probatis materiam de se, & independentem a forma substantiali habere propriam existentiam: esto igitur careat omni forma substantiali, non tamen caret existentia.

Ad confirmationem dico; latam esse disparitatem, quia esse accidentale habetur a sola forma accidentali, non sic esse substantiale, nam Deus, & Angeli habent esse substantiale, & non per formas substantiales sibi superadditas, ita & materia prima habet suum esse substantiale, & non per formam substantialem.

Obiicies secundò: Materia est essentialiter ens incompletum, atque adeò dicit essentialem, & transcendentalem ordinem ad formam, tanquam ad terminum sui completum, & perfectum, ergo non potest existere sine omni forma, & si implicaret forma, etiam materia prima implicaret, quia deesset illi ordo essentialis ad formam, nihil autem potest existere sine suis essentialibus.

Respondeo: aliud esse, materiam implicare, si forma implicaret; & aliud esse, materiam implicare, aut non posse existere, non existente forma. Primum ultro admitto, & nego secundum, quia bene potest stare ordo essentialis ad terminum, non quidem actu existentem, sed possibilem; imò etiam si terminus esset impossibilis, posset ad illum esse ordo essentialis, & transcendentalis, nam de facto scientia transcendentaliter, & essentialiter refertur ad obiectum, quamvis obiectum si nihil, & non ens, aut ens implicans, & impossibile.

Obiicies tertio: omne ens constituitur in determinata aliqua specie per formam, ergo si materia careret omni forma substantiali, non esset in aliqua determinata specie, & consequenter non posset esse in rerum natura, nihil enim existit, quod non sit determinatum alicuius speciei.

Respondeo: per formam omne ens constitui in determinata specie completa, non in determinata specie incompleta, ideò materia

teria in casu separationis ab omni forma substantiali, esset in aliqua specie incompleta, & partialis.

Quæri solet hic: an facta semel separatione materiæ ab omni forma substantiali, opus esset nouo miraculo ad conseruandam materiam sic separatam, ita vt debeat Deus nouo, & maiori influxu concurrere ad conseruandam materiam ab omni forma substantiali, quam antea concurrebat ad conseruandam eandem materiam unitam formæ substantiali.

Sentio: Deum non debere concurrere maiori influxu ad conseruandam materiam sine forma: ratio est, quia res ad sui conseruationem non exigit maiorem, & vberiore influxum, quam antea, nisi quando ipsi subtrahitur aliqua causa, à qua in conseruari dependebat, tunc enim talis influxus debet à Deo suppleri, sed iam ex dictis, & probatis, materia non dependet à forma, tanquam à causa dante illi esse, aut existere, ergo ad hoc, vt conseruetur sine forma, non indiget maiori, & vberiori influxu.

Dices; materia esset in statu sibi violento, & præternaturali, ergo nouo modo, & nouo concursu conseruaretur à Deo, ac conseruaretur antea; sed nouus iste concursus non esset minor, ergo maior priori concursu, quo conseruabat eandem materiam unitam formæ, ergo,

Respondeo: non fore materiam in statu violento positivè, quasi aliquod positivè contrarium statui naturali materiæ superadditur, sed esse in statu violento negativè, quia deesset illi aliquod sibi connaturaliter debitum, non ergo requiritur nouus concursus positivè ad sic conseruandam materiam, sed sufficit concursus negativè consistens in denegatione, seu separatione formæ, alias naturaliter debitæ; seu sufficit, quod desit materiæ ille concursus, qui præerat, quod ad formam, & quod ad esse informatum ipsius materiæ, ita loquitur *Scotus in 2. d. 12. quæst. 2.* Vel denique vt explicat *Ioannes Cardinalis Lugo in Manuscriptis*, miraculosum Dei concursus ad conseruandam materiam sine forma, fore miraculosum in posteriori, non in priori; seu miraculum consistere, non in conseruatione materiæ, sed in expoliatione materiæ ab omni forma, & impeditione agentium naturalium à productione omnis formæ substantialis in materia.

LECTIO VII.

Alie Quæstiones de materia prima resoluuntur.

Quæstio prima solet esse: an materia prima habeat appetitum ad formas, tam substantiales, quam accidentales. Verum appetitus non nisi Metaphoricè appropriatur materiæ, sicuti & unicuique enti inanimato, & non viuenti; propriè enim appetitus dicitur de viuentibus, & animatis, saltem anima sensitua, in his enim adest potentia appetitiua obiecti sibi boni, & conuenientis, vbi proprius actus talis potentiæ appetitiuæ dicitur appetitus; hic diuiditur, vt alius sit appetitus desiderij, & alius sit appetitus complacentiæ; appetitus desiderij fertur in bonum absens, vt absens: appetitus complacentiæ fertur in bonum præsens, & iam possessum.

Ducta igitur Metaphora à viuentibus ponitur in materia duplex iste appetitus, idest, naturalis inclinatio, & propensio ad formas tum substantiales, tum accidentales, ita tamen, vt primariò talis appetitus feratur in formas substantiales, secundariò accidentales.

Ratio autem ponendi talem Appetitum in materia est, quia, vnumquodque ens inclinat naturaliter ad id, quod est sibi bonum & conueniens, sed formæ substantiales sunt quid maxime bonum, & maxima perfectio materiæ primæ, ergo materia appetit formas; & quia formæ substantiales sunt maius bonum, quam formæ accidentales, ideò materia primò appetit formas substantiales, secundariò appetit formas accidentales.

Porrò quando hic appetitus fertur in formas actu existentes in materia, dicitur complacentia, quando fertur in formas absentes, dicitur appetitus desiderij.

Quæstio secunda solet esse de proprietatibus materiæ primæ.

Et quidem materiæ prima proprietas est, quòd illa sit ingenerabilis, & incorruptibilis Ità *Arist. 1. Phys. t. 32. & communiter omnes alij Philosophi*. Ratio est, quicquid generatur, generatur ex subiecto, quicquid corrumpitur, corrumpitur, & desinit in subiectum, sed materia ipsa est primum, & vltimum subiectum, ergo non habet aliud subiectum, ex quo generatur, aut in quod

corrumpatur, & resoluitur materia, ergo immediate creatur à Deo ex nihilo, & in nihilum à Deo solo potest resolui, & annihilari, solius enim Dei est res naturales annihilare, sicuti & creare.

Dices; si materia esset ingenerabilis, & incorruptibilis, ergo posset dici compositum esse ingenerabile, & incorruptibile, quod est falsum, ergo.

Respondeo: prædicata negatiua vniuersaliter distribuere, ideo non posse dici compositum ingenerabile, & incorruptibile, quamuis habeat materiam ingenerabilem, & incorruptibilem, sensus enim esset, quod secundum omnes sui partes, esset ingenerabile, & incorruptibile, quod est falsum.

Est tamen materia causa generationis, & corruptionis rerum, quia cum omnes formas apparet, & non possit omnes simul habere, est in causa, ut aliæ generentur, & aliæ corrumpantur; ideo, que etiam dicitur malefica, & nouerca Formarum.

Altera proprietas Materie est: quod habeat quantitatem indeterminatam; id est indeterminate, & indefinite sumptam, ubi nomine quantitatis indefinite acceptæ venit extensio localis, seu externa, abstrahendo ab eo, quod sit maior, aut minor, nam idem pugillus materie nunc magis extenditur, dum rarefcit, nunc minus extenditur, dum densatur, & quia omnis proprietas, & est inseparabilis ab eo, cuius est proprietas, & est illi coeua, seu simul existens; ideo quantitas, & est inseparabilis à materia, & est illis coeterna.

Quæstio tertia solet esse; an materia prima sit vna specie.

Et quidem communis sententia vult; materiam primam omnium corporum sublunarium esse vnâ specie; quia materia prima constituitur in suo esse specifico per esse subiectum passivum formatum, sed omnes materie omnium corporum sublunarium sunt æque capaces, sunt æque passivum subiectum omnium formarum; ideo materia prima est vna specie in omni corpore sublunari. An verò materia sublunaris, & materia Cælestis sit vna specie, in libris de cælo examinabimus.

Dices, Forme differunt specie inter se, ergo & materie.

Respondeo: negando consequentiam, quia quælibet materia est capax omnium formarum, ideo ex diuersitate forme non licet inferre diuersitatem materie, sicuti neque ex diuersitate actuum intellectus, licet inferre diuersitatem specificam ipsius intellectus.

Dices secundò : planta , & homo differunt specie inter se ; ergo & eorum materia.

Respondeo : nego consequentiam, quia compositorum diuersitas specifica habetur à forma , quæ est præcipua eorum pars, non à materia.

Quæstio quarta solet esse: an materia prima respiciat, & dicat ordinem essentialem ad formas in communi , an ad formas in particulari ?

Sententia mea est: materiam primam non respicere formas in communi, sed in particulari; ratio est, quia reuerà cum non detur forma in communi, vt probatum suppono in logicis, ideo non potest ab illa actuari , & perfici materia, quæ propter eam respicit formas in particulari , non quidem indeterminatè, siuè hanc, siuè illam, quo modo etiam si esset impossibilis forma canis, verbi gratia, adhuc materia esset eadem, quæ prius, & nullum amitteret prædicatum essentialè, atque intrinsecum : sed eas respicit determinatè , per singulos enim respectus respicit singulas formas, quatum si vna sit impossibilis, materia non remanet eadem essentialiter , sed intrinsecè mutaretur , amittendo illum respectum.

Probatur quia: si data impossibili Forma. Canis, verbi gratia, adhuc est materia, ergo etiam data impossibili forma leonis esset eadem materia , & sic data impossibili omni forma , adhuc esset eadem materia, quod est falsum; sicuti omnipotentia diuina, quæ respicit creaturas indeterminatè, ità se habet, vt si essent impossibiles omnes creaturæ, adhuc tamen esset idem Deus; hoc autem dici non potest de materia, quæ de sua natura est completibilis, & pars essentialis de se ordinata ad compositum.

Dices; data hac doctrina , sequeretur materiam primam respicere infinitas formas possibiles ; vnde Angelus perfectè cognoscens entitatem materiæ, cognosceret formas actum infinitas.

Respondeo : negando sequelam , quia materia prima respicit formas possibiles duntaxat in hoc ordine , & dispositione rerum : hæ autem non sunt infinitæ , & indeterminatæ : Præterea intellectus Angelicus potest cognoscere infinita obiecta , non solum in hoc ordine, & dispositione rerum, sed etiam in alio ordine, & dispositione rerum , & tamen de facto licet perfectè cognoscat intellectum suum , non tamen cognoscit omnia obiecta in omni ordine rerum possibilia.

LECTIO VIII.

De priuatione, & quomodo sit Principium.

Priuatio ab *Arist. 6. Met. l. 27.* definitur, quæ sit carentia formæ in subiecto apto ad habendam illam formam; in quia definitione *Tò carentia formæ*, ponitur loco generis, quia etiam negatio est carentia formæ. *Tò in subiecto apto*, ponitur loco differentia; quia per hoc differt priuatio à negatione, quæ est carentia formæ in subiecto non apto: hinc cæcitas in oculo hominis est priuatio; cæcitas in lapide est negatio, quia oculus hominis est aptus natus ad habendum visum, non sic lapis; & licet sæpè negatio, & carentia formæ explicentur termino positiuo, vt Cæcitas, & tenebræ, reuerà tamen ipsa carentia formæ est non ens.

Quia ergo priuatio reuerà est non ens, & est omninò opposita formæ oppositione priuatiua, non ità facilè explicatur, quomodo sit Principium Generationis naturalis, non enim potest principiare in instanti generationis, quia tunc est forma: priuatio autem, & forma non possunt esse in eodem instanti, non potest principiare ante instans generationis, quia ante instans generationis priuatio non est; & quod non est, principiare non potest. Dixi mutationis naturalis, quia certum est, non esse principium compositi substantialis, cum non sit eius pars essentialis, & intrinseca; vt iam etiam suprà explicauimus.

Primò ergo, nonnulli volunt, priuationem principiare in ipsomet instanti Generationis simul cum forma, non enim reputant absurdum, simul esse priuationem, & formam.

Ità *Bacconus in 3 d. 3. quest. 2. art. 3. Vctorius Parisiensis in summula Petri Hispani tract. 1. tit. de lege contradictoria- rum ad 4. & plures alij, quos suppresso nomine refert Dur. in 3 d. 3. q. 1. n. 5.*

Sed alij multò probabiliùs defendunt, priuationem esse principium mutationis; & generationis non quidem in eodem illo instanti, in quo est forma, sed in instanti immediatè antecedenti; mutatio enim, & ipsa generatio, vt mutatio est, est ens successiuum, atque adeò plura instantia includit, quibus perficitur, & com-

& completur; includit ergo primò instans illud, in quo est priuatio, & non est forma; includit deindè instans illud, in quo est forma, & non est priuatio; sicuti enim Dies, verbi gratia, includit Auroram, & Vesperas, ita tamen vt Aurora præcedat Vesperas, quæ deindè subsequuntur; ita priuatio principiat mutationem in aliquo instanti priori ad formam, quæ deindè subsequitur in alio instanti posteriori, mutatio tamen vtrumque includit, ex vtroque componitur, quia ens successiuum est, atque adeò constat ex partibus, quarum aliquæ sunt priores, aliæ posteriores, ad differentiam entis permanentis, cuius partes omnes simul existunt.

Ità *Mayronius in 1. dist. 43. quest. 3. Græg. dist. 30. quest. 10. art. 3. Suarez disput. 19. Met. sect. 9. num. 8. Auerſa q. 10. sect. 6. Dico secundò.* Licet hi auctores non ità clarè rem istam explicant,

Conclusio mea est: Priuatio principiat in instanti antecedenti ad formam.

Probatur Conclusio quia: sic benè explicatur, priuationem principiare, & ex alia parte saluatur, priuationem non esse simul cum forma substantiali, cuius est priuatio, ergo. Antecedens quò ad primam partem probatur quia, sicuti Aurora principiat diem in instanti, in quo non sunt Vesperæ, & benè intelligitur dies, vt potè res successiua, componi ex Aurora, & Vesperis sibi inuicem succedentibus, ità benè potest intelligi, & explicari, mutationem fieri, & principiare per priuationem, & formam sibi inuicem succedentes, ita vt priuatio antecedit, & sit veluti primum initium & deindè succedat forma, ergo.

Obijcies primò: mutatio, antequam sit forma, non est, ergo tunc non est principiatà à priuatione.

Respondeo: mutationem tunc non esse secundum omnes sui partes, & complere, sed esse incompletè, sed initiatiuè, & secundum aliquam sui partem, est enim secundum terminum à quo, mutatio. n. est transitus à termino à quo ad terminum ad quem, atque adeò includit terminum, à quo, & terminum ad quem tanquam duas sui partes, vnā priorem, alterā posteriorem.

Obijcies secundò: Principium dicit realem relationem ad principiatum, sed priuatio, cum sit non ens, & nihil, non potest dicere relationem realem, ergo.

Respondeo: maiorem esse veram de principio realiter influen-

te, talis non est priuatio; hæc enim principiat, non realiter influendo, sed potius recedendo, principiat enim per modum termini à quo, scilicet, à quo recedit mutatio, dum transit ad terminum, ad quem.

Obijcies tertio: expellens, & expulsum debent esse simul, sed forma expellit priuationem, ergo debet esse simul, & in eodem instanti cum priuatione.

Respondeo: Maiorem esse veram, quando expellens positiuè, & per realem positiuam actionem destruit, & expellit: tunc enim, quia expellens debet agere in expulsum, debent existere expellens, & expulsum, illud, vt agat, istud, vt recipiat actionem sui expulsum; at quando aliquid expellitur ratione incompatibilitatis, & impossibilitatis simultaneæ cum alio sui expellente, non solum non debent esse simul expellens, & expulsum, sed necessariò vnum præcedit, aliud subsequitur, hoc enim est, duo esse incompatibilia, & impossibilia, simul non posse esse in eodem subiecto.

LECTIO IX.

Definitur forma substantialis.

PRæmittitur primò: formam substantialem variis appellari nominibus: quorum aliqua eius perfectionem explicant, & declarant, alia eius munus, officium, & effectum, quem causat, & exercet circa materiam, & circa compositum assignant. Primi generis nomina sunt, *Mens*, & *diuina proles* à Platone appellatur in *Timæo*, quia est adumbrata quædam similitudo diuinæ mentis: vnde etiam ab *Arist.* hic cap. 9. dicitur, *quidpiam diuinum*, & cap. 3. 1. 81. dicitur pulchrum: *Forma appetitur à materia sicut pulchrum à turpi*: communi, & vulgari appellatione, dicitur forma, eo quod formet, & poliat ruditeriam materię. Secundi generis nomina sunt, *character*, quia contrahit vnum compositum ab alio, imprimendo quodammodo vni composito notam, qua ab alijs dignoscitur, & discernitur, ab *Arist.* 2. *Phys.* appellatur ratio, & hic dicitur, quod quid erat, esse, id est, ratio formalis, & quidditas, seu essentia compositi, appellatur actus, quia actuat materiam.

Præmittitno secundò: Formam substantialem dari, certum esse
in

in Scholis, & omissis pluribus argumentis, quibus formæ existentia probatur ab auctoribus, præsertim ab *Arriag hic disput.*
 3. *sect. I.*

Probatur primò ratione petita ex ipsis rerum naturis: quia aqua quantumvis calefiat, relicta tamen sue naturæ, pristinam recuperat frigiditatem, ergo manet in ipsa aliquod principium illius frigiditatis, sed hoc non exigit potius frigus, quam calorem, ergo est forma substantialis Aquæ. Nec enim potest dici, quòd principium talis frigiditatis sit forma accidentalis, quia vel talis forma supponeret aliud principium prius se, & tale erit forma substantialis, quia hæc esset primum principium, & radix operationum naturalium, vel non supponit aliud principium, & tunc ipsa erit forma substantialis, quia iam esset de primo conceptu aquæ, & prima radix operationum eius.

Probatur: quia de Fide est, definitum in *Concilio Lateranensi III. sub Leone X. sess. 8. & in Clementina unica de summa Trinit.* Dari in homine, præter Corpus, seu materiam, animam rationalem, quæ est vera forma corporis, sed eadem militat ratio de composito humano, seu de homine, ac de reliquis compositis naturalibus. Ergo in iis, præter materiam, dari debet forma, tanquam ratio formalis determinatiua, & completiua materiæ primæ, de se cæterò qui indeterminatæ, & omnino incompletæ.

Definitur ergo, forma substantialis ab *Arist. 5. Met. t. 2.* forma est ratio ipsius, quod quid erat esse; quæ definitio sic clarius redditur ab auctoribus: forma est actus substantialis materiæ primæ, cum ea constituens compositum naturale. In qua definitione, *Id actus*, stat loco generis, quia in hoc conuenit cum forma accidentalis, *Id substantialis*, stat loco differentiæ, cætera de se satis clara sunt.

Verùm quia forma est actus materiæ, quatenus illam actuat, & perficit, ideò dicit ad materiam ordinem essentialem, & transcendentalem, sicuti & materia, ut iam diximus, dicit ordinem transcendentalem, & essentialem ad formam, quia ab ipsa actuatur, & perficitur.

Obiicies primò contrà definitionem formæ hic assignatam: forma substantialis dicit transcendentalem ordinem ad materiam, tanquam ad sui subiectum, quod actuat, & in quo recipitur, ergo iam dependet à subiecto, ergo non est substantia; hæc enim est independens a subiecto.

Respon-

Respondeo : iam nos in Logicis assignasse , differentiam inter formam substantialem , & accidentalem petendam esse ex eo , quòd licet utraque dependeat à subiecto , tamen forma substantialis de se est apta à subiecto non dependere , non sic autem forma accidentalis.

Obiicies secundò: materia prima in superiori Lect. 3. explicata est , & definita per ordinem ad formam , ergo non bene modo forma explicatur , & definitur per ordinem ad materiam , sic enim committitur vitiosus circulus.

Respondeo : Relatiua non posse aliter explicari , & definiri , nisi ad inuicem , vnum per aliud , & è contrà : & sanè in relatiuis circulus non est vitiosus.

Obiicies tertio. ex *Arist. Met. 1. 15. & 2. de anima 1. 7.* ita ex materia , & forma fit vnum , sicuti ex aere , & figura vna statua , sed statua est vnum per accidens : ergò ex materia , & forma non fit Compositum naturale , quod est vnum per se , & substantiale.

Respondeo: eam similitudinem ab Aristotele adductam tenere solum quòd ad hoc , quòd sicuti ex materia secunda , & forma accidentali; ex aere , & figura fit vnum , ita ex materia prima , & forma substantiali fit vnum , non tamen tenere quòd ad alia; similitudines enim , & exempla claudicante , non tenent quòd ad omnia , sed quòd ad aliqua , aliàs non essent exempla , & similitudines , sed potius identitates.

LECTIO X.

An Forma sit tota Essentia Compositi.

HAc in re tres sunt Philosophorum sententiæ omninò diuersæ inter se , & oppositæ.

Primò ergo nonnulli defendunt , solam formam esse solam , & totam quidditatē compositi , seu corporis naturalis , ac proinde materiam non spectare ad essentiam , & quidditatem naturalis compositi. Ità *Auer. 7. Com. 2 l. Iandunus 7. Met. quest. 14. Alex. Alphron. 2. Met. tract. 12. Temistius 3. de anima tract. 9. & 38.*

Secundò alij ex opposito contendunt materiam esse solam , & totam quidditatem compositi , Formam verò esse terminum

quendam intrinsecum materiæ, & non spectare ad Essentiam; & quidditatem compoti. Ità *Riccard. quodlib. 2. quest. 1. & quelib. 4. quest. 3. art. 1. Aureol. in 2. dist. 12. quest. 2. art. 1. Auicebron. in lib. Funis Vitæ; citantur Philoponus; & Galenus pro hac sententia d. Francisco Le Rees Com in. Phys. art. 1. nam in sententia Philoponi, & Galeni, non datur forma substantialis, sed loco eius substituitur Crasis quædam, & temperies qualitatum, vnde remanet, quòd materia sit sola, & tota essentia compositi.*

Tertiò communiter reliqui omnes Philosophi, tam antiqui, quam recentiores omnium Scholarum, & Classium vnanimi consensu defendunt, tam materiam primam, quam formam esse partes substantiales compositi naturalis.

Conclusio mea est: non sola Forma, sicuti nec sola materia, sed vtraque est tota essentia compositi, seu corporis naturalis.

Probatur conclusio primò quia compositum naturale, quod est Homo, resultat ex materia prima, & forma, ex corpore, & anima rationali tanquam ex partibus essentialibus, & substantialibus, sed eadem est ratio de hoc composito naturali, quod est homo, & de reliquis naturalibus compositis, ergo. Maior probatur quia: habemus in Symbolo Athanasij sicut anima rationalis, & caro vnus est Homo, ita Deus, & Homo vnus est Christus, ergo iam Homo coalescit ex carne, seu Corpore, seu materia prima, & anima rationali, tanquam forma, eodem modo, quo Christus coalescit ex Deo, & Homine, sed neque solus Deus constituit Christum, nec solus, Homo, ergo nec sola anima constituit Hominem, nec solum corpus; hinc benè habet *D. Augustinus 19. de Ciuit. Dei cap. 3.* Homo neque est Anima solum, neque solum corpus, sed ex vtroque compositus.

Confirmatur quia: in triduo mortis Christi Domini dissolutum fuit hoc compositum, quod in Christo erat Homo, sed anima remansit vnita verbo diuino, hoc enim, quod semel assumpsit, nunquam dimisit, (Theologicum axioma) ergo si hoc compositum, quod est Homo, consisteret in sola anima, hoc compositum, quod est Homo, non fuisset mortuum, quod est aperte falsum, vnde & contrà fidem, ergo.

Verum quia: tota difficultas defendendi hanc doctrinam oritur ex efficacia argumentorum; quæ in contrarium obijciuntur, ideò ad eorum dissolutionem nunc accedamus.

Obijciunt ergo primòs Homo continuo augetur, & diminuitur,

rit, augetur quidem; quia nouas, & nouas materiæ partes acquirit; diminuitur, quia alias, & alias veteris materiæ partes perdit vicioris naturalis humidum radicale continuo depascentis; unde fit, vt homine sene nulla iam sit pars materiæ, quam habebat infans, vel puer, sed omnia omninò diuersa materia successerit, & tamen est idem numero homo, qui erat puer, & qui modo est senex, ergo materia non spectat ad intrinsecam, & essentialem hominis compositionem.

Respondeo, rigorosè, & Physicè loquendo, non remanere eundem hominem, sed remanere duntaxat hominem moraliter eundem, partes enim materiæ, quæ adgenerantur, reponuntur in eodem loco, eodem modo, seruata eadem dispositione, & figura; Præterea istæ partes non omnes simul, sed successiue, & paulatim reponuntur, ideò insensibilis cum sit mutatio, moraliter, & communi, ac prudenti hominum existimatione, idem omninò homo reputatur senex, & puer, sicuti idem est fluuius, quamuis in eo nouæ, & nouæ semper aquæ superueniant, & fluant.

Respondent alii semper remanere quasdam partes primitiuis; & eandem Vnionem esse reproducendam in generali resurrectione, docet *Scorus in 4. dist. 43. quæst. 1.* & ideò remanere eundem hominem ratione illarum partium, & ratione vnionis eiusdem.

Obijcies secundò; Argumentum, quo (vt refert Iustinus Martyr in quæstionibus Græcorum) utebatur Gentiles contra Christianos, vt articulum resurrectionis mortuorum impugnarent.

In resurrectione mortuorum idem homo numero, qui perierat, debet resurgere, sed non remanet in eodem homine eadem portio materiæ, ergo vel materia non spectat ad essentialem constitutionem huius compositi, quod est homo, vel non resurgit idem numero homo, qui erat mortuus. Minor probatur; quia materia vnus hominis per varias transmutationes fit sæpè materia alterius hominis, vt patet in ijs, qui humanas carnes comedunt, at impossibile est, quòd materia eadem numero spectet ad duplex numero compositum, ergo.

Respondeo: ad diuinam prouidentiam spectare res ita ordinare, ac disponere, vt non tota materia vnus hominis euadat materia alterius, atque adeò in homine, qui resurgit, licet non sit tota eius materia est tamen aliqua eius pars; quòd sufficit, vt dicatur idem homo moraliter: vt enim bene habet *D. Augustinus*

huius 22. de Ciuit. Dei c.2. quem Deus mirabiliter creauit, potest modo mirabiliore recreare.

Obijcies tertio: idem est principium constitutiuum, & distinctiuum ex *Arist. 7. Met. t. 41* sed homo, verbi gratia, ab omni alio composito naturali per solam formam distinguitur, ergo: Minor probatur; quia per materiam primam, quæ est eadem, & communis omni indiuiduo non distinguitur homo ab alijs compositis.

Respondeo: quod etiam per materiam distinguitur homo ab alijs compositis, nam materia hominis per proprium, & peculiarem respectum essentialem respicit animam rationalem, vt supra explicauimus Lect. VII.

Præterea, Metaphysicè loquendo, genus est essentiale constitutiuum entis Metaphysici, & tamen est commune pluribus speciebus, atque adeo non est principium distinctiuum, quare illud axioma solum habet locum in forma substantiali, prout illa distinguitur à forma accidentali, habet locum in definitione, de qua ibi loquitur *Arist.* definitio enim est principium constitutiuum, & distinctiuum; quia duas habet partes, Genus, & differentiam: & sic ratione generis, est principium constitutiuum, ratione differentie est principium distinctiuum.

Obijcies quartò; pro Galeno, posito, vel sublato conuenienti temperamento, & Crasi; ponitur, & tollitur id, quod dicitur forma substantialis, ergo verè hæc forma non datur, neque est pars substantialis compositi.

Respondeo: in primis falsum esse antecedens, nam sæpè notabiliter mutatur, imò & deletur temperies, vt patet in aqua calidissima, & tamen res non perimitur. Præterea neganda est consequentia, dato enim antecedente solum sequitur, vel ipsam formam in suo conseruari deperdere à certa qualitatibus temperie, & Crasi.

LECTIO XI.

Formarum Productio, & Origo.

NOta cum sit Origo materie primæ, quam cum alijs Philosophis probauimus immediatè creari à Deo, vterius progredimur ad inuestigandam originem formæ substantialis; & sanè

sanè Origo substantialis formæ fuit adeò semper occulta, & inuoluta, vt antiquos Philosophos in Plures, & planè absurdas coegerit abire sententias.

Nonnulli opinati sunt: formam substantialem immediate creari à Deo, vt est cõmunis sententia de materia prima. Hanc opinionem tribuit *Albertus in 2. d. 18. art. 12. Platoni in Phædone, & Auicem. 1. sufficientia cap. 10. & 9. Met. cap. 4.*

Alij è contrà opinati sunt: Formam substantialem latitare, & absconditam esse in sinu, & gremio materiæ, è quo deindè virtute agentis naturalis educerentur, & foras quodammodo extraherentur. Hanc opinionem tribuit *Franciscus Le Reès in Phys. Com. sect. 3. art. 3. Anaxagora, & Democrito.*

Recentiores aliqui putarunt in materia formam præexistere, vel secundum quasdam inchoationes; vt voluerunt *Alb. 1. Physic. tract. 3. cap. 3. Sotus ibidem Soncinas 8. Met. quest. 28. vel secundum quasdam possibilitates, vt voluit Duran. in dist. 18. quest. 2.*

Sed iam contrà has omnes sententias tanquam omninò absurdas, & antiquatas conclamatum & in Scholis, idèd.

Conclusio mea sit: forma substantialis corruptibilis, & materialis, vi agentis naturalis educitur de potentia passiuâ materialis.

Dixi forma corruptibilis, & materialis, quia de anima rationali, utpotè forma incorruptibili, & spiritali suo loco dicemus, sicuti etiam de forma incorruptibili Cœlorum, & de formis Elementorum.

Probatur Conclusio; quia forma substantialis in suo esse, fieri, & conseruari dependet à materia, ergo ex eius potentia passiuâ educitur, consequentia tenet; quia omnium conceptu, & sensu educi formam, est formaliter in suo esse, fieri, & conseruari ab illa dependere, licèt enim, vt sic, & vniuersaliter loquendo, in suo esse, fieri, & conseruari dependere ab alio, non sit ex illo educi, quia potest vnum ab alio dependere in esse, fieri, & conseruari tanquam à causa efficiente, aut etiam tanquam à conditione; attamen iuxtà subiectam materiam, eam aliundè constet materiam primam, neque esse causam efficientem, neque conditionem, si ab illa dependeat forma in esse, fieri, & conseruari, dependet tanquam à causa materiali, & non aliter.

Antecedens probatur à priori; quia forma substantialis cum sit ordinis naturalis, petit de sua natura produci ab agente na-

turali per naturalem actionem, sed actio naturalis est omnino dependens à materia, tanquam à subiecto recipiente, & sustentante, nullum enim naturale potest operari ex non praeiacente subiecto, seu ex nihilo, ergo forma substantialis dependet à materia, tanquam à subiecto eam recipiente: & sustentante, effectus enim est eiusdem conditionis cum actione, per quam produci-
tur.

Probaturs secundò idem antecedens à posteriori: quia forma substantialis in suo operari omnino dependet à materia, forma enim si à materia, seu corpore separaretur; nullam eliceret operationem, ergo, & in esse, fieri, & conservari à materia, & corpore dependet; modus enim operandi sequitur modum essendi.

Obijcies primò: anima rationalis in suo esse, fieri, & conservari dependet à materia, ut patet, tum quia non creatur, nisi in materia, tum quia non exercet suas operationes, nisi in corpore, & dependenter à corpore, & tamen non educitur, sed immediata creatur à Deo, ergo quamvis forma substantialis corruptibilis in suo esse, fieri, & conservari dependeat à materia, non proinde ex illa educitur.

Respondeo: In primis animam rationalem non dependere à materia, tanquam à subiecto recipiente, & sustentante, potest enim anima rationalis naturaliter existere separata à corpore, ut patet in morte hominis naturalis, quae nihil est aliud, quam naturalis separatio animae rationalis à corpore. Præterea anima rationalis exercet suas nobilissimas operationes, intellectionem, & volitionem, etiam quando est separata à corpore, non sic forma substantialis corruptibilis.

Obijcies secundò: ex nihilo nihil fit, ergo formae substantiales fiunt ex aliquo sui, & non ex nudo subiecto, ergo sunt in subiecto aliqua inchoationes formarum.

Respondeo: sensum illius axiomatis ex nihilo nihil fit, esse huiusmodi, ex nullo praeiacente subiecto, nihil fit; non verò esse sensum, quasi omne quod fit, fiat ex aliquo sui esse antecedente, seu perfecto, seu imperfecto, & inchoative se habente.

Obijcies terriò: quod ex alio educitur antea in illo latebat, & abscondebatur, ergo si forma educitur de potentia passiva materiae, iam in illa latitabat.

Respondeo distinguendo antecedens, si educatur ex alio tanquam ex loco, seu per solam loci mutationem, concedo, si edu-
catur

tatur ex alio per actionem productiuam, tanquam ex causa materiali, nego. antecedens, hoc secundo modo educitur forma substantialis, quæ in ea iam virtualiter continebatur, sicuti & effectus virtualiter continetur in sua causa effectiua, ex qua etiam dicitur educi.

LECTIO XII.

An præter partes ponenda sit unio.

EX materia prima, & forma substantiali hucusque assignatis, & explicatis conflari, & tanquam ex duabus partibus coalescere compositum, certum est apud omnes. Sed an præter assignatas partes, superaddendus sit modus unionis, quo ipsæ partes uniantur, varix sunt, & diuersæ Philosophorum sententiæ.

Primò ergo nominales, uti sunt modorum omnium hostes iurari, hunc modum unionis, tanquam omninò superfluum ad faciendum compositum naturale, seu totum, omninò negant, & tollunt. Ità *Gregor. de Arimino in 2. d. 18. q. 2. Maior ibidem dist. 2. qu. 2. art. 1. Baconus in 3. dist. 1. quæst. 1. art. 1. & quæst. 2. a. 2. Occham in 1. dist. 32. quæst. 1. ad 2. Ex Thomistis hanc sententiam sequuntur Caic. 1. par. quæst. 2. Medino ibidem. Aureol. in 4. d. 44. art. 6. Aluarez 3. p. disp. 13.*

Altera sententia omninò contraria defendit præter materiam, & formam, dandum esse modum unionis substantialis in ordine ad faciendum compositum naturale, seu totum. Ità ferè omnes *Thomistæ, pauci illis exceptis, quos mox citauimus; horum longam seriem referunt, & sequuntur Complutenses hic disp. 6. qu. 2. 9. 2. ferè omnes recentiores, quos cit & sequitur Ouel. hic controu. 6. p. 1. §. 1. Franciscus Le Reès in Phys. com. art. 5. §. 1. Auerſa quæst. 19. sect. 5. & quamuis hi recentiores modum superadditum relationis negauerint, apertè tamen prænant pro modo unionis: an consequenter philosophentur, ipsi sint Iudices.*

Conclusio mea est: Præter partes, materiam, & formam, admihi debet unionis modus substantialis ad faciendum compositum naturale, seu totum.

Probatur conclusio primò: auctoritate *Aristot. 8. Met. cap. 6. t. 15. ubi ex professo videtur hanc difficultatem tractare, &*

positæ conclusioni omnino fauere; *circa definitiones*, & *circa numeros*, quæ causa est, ut unum sint? omnium namque, quæcunque plures partes habent; & non est totum, quasi coacturatio, sed ipsum totum est aliquid aliud præter partes, est aliqua causa, nam in corporibus quibusdam tactus est causa, ut unum sint; quibusdam verò viscositas, aut aliqua alia talis passio. *Definitio* verò una est, non coniunctione, ut ilias, sed eo quod unus est. Et versus finem, *es esse triangulum*, est compositio aris, & trianguli; *et album esse*, est compositio superficiæ, & albedinis. Et sanè per totum hoc caput, assignat plura genera compositorum, semper inculcans, compositum, quod est vnum per se, includere aliquid aliud præter partes, ita ut nihil clarius possit in Aristot. desiderari.

Probatur secundò conclusio. Quia vnus homo verè, & propriè generat, & producit alium, ergo debet assignari proprius, & formalis terminus talis actionis productiue, sed formalis terminus talis actionis non est materia, quæ immediatè creatur à Deo, non forma, nempe anima rationalis, quæ & ipsa immediatè à Deo creatur, ergo erit ipsa vnio substantialis.

Neque enim potest dici, quod terminus talis actionis, sint dispositiones, aut præsentia localis harum partium, quia tam dispositiones, quam ista præsentia localis est accidens, sed accidens non potest esse formalis terminus actionis, & productionis substantialis, cuiusmodi est generatio, & productio hominis; ergo terminus talis actionis erit modus substantialis vnionis.

Confirmatur, quia, ut habetur in Symbolo Athanasij, sicut corpus, & anima vnus est homo ita Deus, & homo vnus est Christus, sed Deus, & homo vnus est Christus medio modo substantiali vnionis, quæ propterea dicitur Hypostatica, quia terminata fuit ad diuinam Hypostasim, & naturam, & receptam subiectiuè in humanitate, ut communis est serè omnium Theologorum sententia, paucis exceptis, qui etiam obsecuti sunt nomen, ergo etiam ad hoc, ut sit homo præter corpus, & animam, adinueniendus est modus substantialis vnionis.

Probatur tertio: quia potest dari materia prima cum omnibus dispositionibus requisitis ad faciendum vnum quid cum forma, inò & cum locali præsentia, sed debita approximatione, absque eo, quod materia dicatur, & sit vnita, ergo vnio est aliud quid præter dispositiones, & localem præsentiam. Antecedens patet, quia si Petrus penetraretur cum Paulo, forma Pauli erit præ-

præfens corpori Petri, & tamen illi non est vnita, ficuti non fuit vnita anima Christi cū corpore B: Virginis, cui erat intimè præfens, quando erat in vtero.

Respondebis negando antecedens, quia materiam eſſe vnitam formæ, nihil aliud eſt, quam materiam eſſe localiter præſentem, & habere vltimas diſpoſitiones ad hanc formam, ita tamen, vt inter has diſpoſitiones numeretur negatio omnis formæ, quæ non fit hæc, cui ſupponitur eſſe localiter præſens; ideo enim in penetratione aſſignata, anima Pauli non eſt vnita corpori Petri, quia corpus Petri carebat iſta diſpoſitione negatiua, qua etiam carebat Corpus Beatæ Virginis, ideo illi non potuit vniri anima Christi Domini, quauis localiter, & intimè præſens.

Sed contrà hanc reſponſionem eſt: quia hi auctores, contrà quos agimus in præſenti, nobiſcum ſentunt contrà Thomiſtas, poſſe ſupernaturaliter materiam ſeparari ab omni forma ſubſtantiali, quo dato caſu ſeparationis, poteſt intelligi materia cum præſentia locali ad aliquam formam, cū vltimis diſpoſitionibus requiſitis ad illam; & conſequenter cū negatione omnis formæ, quia iam ab omnibus formis ſupponitur eſſe ſeparata, & tamen non intelligeretur vnita illi formæ, cui dicitur localiter præſens, & ad quam hæbet requiſitas diſpoſitiones vltimas: ergo eſſe vnitum formæ, eſt quid ſuperadditum materiæ primæ, & formæ omnino diuerſum à locali præſentia, præuijs diſpoſitionibus, & negatione omnis formæ.

Obijcies primò: Auctoritatem Philoſophi 8. *Met. cap. 6.* vbi Ariſtoteles reprehendit Lycophronem quendam quærentem, aliam rationem, cur materia, & forma faciant vnum præter hanc, quia materia eſt potentia, & forma eſt actus, ergo ex mente Ariſt. non eſt neceſſaria vnio ad hoc, vt ex materia, & forma fiat vnum.

Reſpondeo: ſi aduerſarij attentè totum illud *cap. 8. Met. legiſſent* in ipſo fonte, & textu, & non tranſcripſiſſent ex alijs auctoribus, non illud nobis obijcerent; certe ibi Ariſt. Lycophronem non reprehendit, ſed potius refert eius ſententiam, & approbat; dicebat Lycophron. Scire, eſſe copulam ſcientiæ, & animæ. Dicebant quidam alij ex antiquis Philoſophis viuere, eſſe coniunctionem corporis, & animæ, vtrumque dictum confirmat, & approbat Ariſt. ſubdens, etiam ſanum, eſſe copulam, & coniunctionem ſanitati, & anima; ac eſſe triangulum, eſſe coniun-

Unionem aris, & superficiei. Non ergo ille textus est contrarius, sed fauet potius conclusioni positæ.

Obijcies secundò, si materia, & forma vnirentur media vnione, deberet dari alia vnio, qua vniretur ipsamet vnio partibus, & extremis, hoc videtur absurdum, ergo.

Respondeo: vnionem vniri partibus, & extremis seipsa, & non per aliam vnionem superadditam, quia ipsa est ratio formalis vniendi, & sicuti actio non fit per aliam actionem, & relatio non refertur per aliam relationem, ita vnio non vnitur per aliam vnionem.

Obijcies terriò: materia, & forma sunt partes immediatæ totius, ergo immediatè componunt totum, ergo non componunt totum mediante vnione, & consequenter non datur ista vnio inter materiam, & formam.

Respondeo: materiam, & formam vniri immediatè, idest, non mediante alia parte, non tamen vniri immediatè idest, non mediante vnione, licet enim vnio mediet inter partes, non tamen tollit, quin immediatè vniantur, non enim se habet vnio ad modum bituminis, sed admodum vnei suprâ duas lapides immediatè se tangentes, infixi.

LECTIO XIII.

Alia quæstiones de vnione resolvuntur.

Prima quæstio solet esse, an vnica sufficiat vnio ad connectendas ambas partes.

Opinio fuit, *Hur. disp. 5. Phys. sect. 7. & Aris. 1. de gen. disp. 2. q. 16. & aliorum recentiorum*, quos suppresso nomine cit. *Auersa* hec q. 18. sect. 6.

Hi asserunt, non sufficere vnicam vnionem ad connectendas, & vniendas ambas partes: sed duas esse ponendas vniones iuxta partium dualitatem.

Opinio communis est in contrarium, & vnicam sufficere vnionem, defendit. Ita *Suarez disp. 14. Met. sect. 9. nu. 13. Vasq. 1. 1. in 3 p. disp. 9. num. 23. Quieto: hic contr. 4. par. 2. §. 1. Ariaga disp. 4. sect. 2. subsect. 1. Franciscus Le Rees Com. in Phys. art. 5. §. 5. auers. q. 19. sect. 6. Dico primò.*

Conclusio: Vnica sufficit vnio ad vniendas partes.

Pro-

Probat^{ur} conclusio : quia sufficit vnica vnio ad connectenda duo , ergo superflue ponitur alius modus vnionis . Antecedens probatur ; quia implicat intelligere vnionem , & non intelligere ; quod connectat duo , vnio enim quid est aliud , quam duorum nexus , & vinculum ?

Confirmatur : quia in Christo Domino fuit vnita Humanitas verbo , & verbum humanitati per vnicam vnionem , in composito accidentali per vnicum modum inhzrentiæ accedens vnitur cum subiecto , & facit vnum compositum cum illo , ergo etiam in composito naturali , & substantiali sufficit vnica vnio ad connectendam formam cum materia , & materiam cum forma .

Dices : Vna similitudo non sufficit ad denominandos , & constituendos duos Parietes albos , verbi gratia , in esse similes , sed requiruntur duæ similitudines , ergo etiam requiruntur duæ vniones ad vniendas duas partes compositi .

Respondéo : disparitatem esse primò : quia sæpè similitudo est inter duos patieres albos maxime inter se distantes , in quo casu similitudo existens hic Neapoli verbi gratia , non potest denominare parietem similem , qui existat Romæ . Altera disparitas est , quia ad hoc , vt paries dicatur similis , debet recipere in se similitudinem , quia ad hoc , vt paries dicatur relatus debet esse subiectum relationis ; hinc terminus relationis non denominatur relatus : ad hoc autem , vt extremum dicatur vnitum , non debet recipere vnionem , aut esse subiectum vnionis , quæ enim vnitur materia , quæ recipit vnionem , ac vniatur forma , quæ vnionem non recipit , si enim ponamus à Deo creari vnionem , (vt posse creati plures doctissimi Philosophi defendunt) in tali casu , vnio à nullo extremorum dependeret tanquam à subiecto , in quo recipiatur , & tamen æquè vnitet vtrunquæ extremum .

Replicabis : forma debet esse intrinsecè vnita , sed non est intrinsecè vnita , nisi recipiat vnionem diuersam ab eâ , quæ recipitur in materia , quia illa recipitur in materia , tanquam in adæquato sui subiecto , ergo .

Sed contrà est , quia forma est intrinsecè vnita , non quia recipit vnionem , sed quia est intrinsecus terminus vnionis , est autem intrinsecus terminus , quia simul cum vnione concurrit ad faciendum vnum per se substantiale : vel vt aliis placet , quia intrinsecè exigit vnionem , & intrinsecè exigitur ab illa .

Dices secundo : si ponatur duplex vnio , magis perfectè dicuntur

Et esse partes vnitas, quâ si esset vnica vnio; sicuti magis perfecte dicitur ligari ille, qui pluribus catenis constringitur, & tenetur.

Respondeo: adhuc eas partes esse magis unitas, si mille haberentur vniones, sicuti magis ligatus dicitur ille, qui mille catenis constringitur, & tenetur. Ad faciendum totum, seu compositum, sufficit, quod partes sint sufficienter & perfecte unitæ, & non requiritur, quod sint unitæ omni perfectione maiori, qua possint vniri; aliàs argumentum probaret etiam; eas partes fore vniendas vnione aliqua supernaturali, & diuina, quæ est multò perfectior.

Dices tertio: non est maior ratio, quod ista vnio potius recipiatur in vna, quam in altera parte, ergo vel debet recipi in vtraque parte, vel danda duplex vnio, quarum vna recipiatur in vna parte, & altera in altera.

Respondeo negando antecedens: quia materia cum sit commune subiectum, imò & ab ipsa natura instituta sit ad recipiendum, talis vnio magis debet recipi in materia, quàm in forma.

Replicabis. si ista vnio reciperetur in materia, iam esset materialis, ergo non posset perficere animam rationalem, quæ est spiritualis, & altioris ordinis.

Confirmatur: quia vnio intrinsecè perficit formam, ergo debet in illa intrinsecè recipi.

Sed contra est, quia talis vnio intrinsecè perficeret animam rationalem, non absolute, & simpliciter, sed relatiuè: in ordine, scilicet, ad compositum; ideò, quamuis vnio sit inferioris ordinis, adhuc modo explicato perficeret animam rationalem; nam, etiam species intentionalis, quamuis accidentalis, potest dici perficere animam rationalem relatiuè ad intelligendum.

Ad confirmationem respondeo, negando consequentiam, quia de facto Verbum diuinum intrinsecè perficit humanitatem, & tamen inhumanitate non recipitur: & forma materialis crearetur à Deo, intrinsecè perficeret materiam primam, & tamen in illa non reciperetur.

Quæstio secunda solet esse. An vnio sit distincta ab vnitione, id est productione formæ substantialis.

Conclusio mea est: Vnio est distincta ab actione, qua produciitur forma. Probatur manifestè Conclusio in homine, in quo anima rationalis creatur, vt est de Fide, at productio vnionis, esteductio, seu generatio, ergo.

Quod autem idem sit dicendum de vnione aliorum Compositio-

fiturum, pater; quia alioquin variato agente, & producente, variaretur etiam actio, & consequenter variaretur unio, quæ ab actione non supponitur distingui; vnde sequeretur, variata unione variari etiam essentialiter equum, verbi gratia, quia variatur unio illi intrinseca, & consequenter effectus hic numero productus à causa secunda, non posset à solo Deo conseruari, quia iam non esset idem numero, quin imò nec idem specie, & in essentia, variaretur enim actio, consequenter unio, & consequenter tota essentia specifica; & sic non esset idem Equus, qui à solo Deo conseruatur, & qui à Deo simul, & causa secunda, fuit productus.

LECTIO XIV.

*An totum distinguatur à Partibus unitis,
& simul sumptis.*

Hucusque probavi ad constituendum totum, seu compositum naturale præter partes, materiam, scilicet, & formam, requiri modum substantialem unionis: progredior vltcrius, & inquito; an totum præter has partes, & unionem, etiam simul sumpta, & accepta, includat aliquam totalitatem; seu tertiam quandam entitatem omninò diuersam a partibus: & unione.

Præmitto autem: in sententia Scoti, (quam ego sequor, & amplector) gradus Metaphysicos; idest gradus essentielles, seu prædicata essentialia, quæ in vna aliqua re Physica reperiuntur, distingui inter se quidditatiuè, seu formaliter ex natura rei, quatenus vnum prædicatum essentialiale non est de quidditatio, & formali conceptu alterius, sic distinguuntur animal, & rationale in homine; quia animal non est de formali, & quidditatio conceptu rationalis, animal enim definitur esse principium sentiendi, at rationale non est principium sentiendi formaliter, & è contra rationale non est de formali, & quidditatio conceptu rationalis, quia rationale est principium discurrendi, sed animal formaliter non est principium discurrendi.

Due sunt in proposita difficultate, opiniones omninò inter se diuersæ, & contradictoriæ.

Prima opinio docet, totum non esse tertiam entitatem realiter distinctam a partibus unitis simul, & collectiuè acceptis, quam-

quamuis non neget, totum esse entitatem distinctam a partibus vnitis distributiue sumptis; quare totum in hac opinione nihil aliud est, quam materia, forma, & vnio simul, & collectiue sumptæ, & in recto omnes simul posita. Ita omnes Græci, & Latini Expositores *Aristot.* ex Thomistis quamplurimi sequentes. *D. Thomam* 1. part. quæst. 75. art. 4. & alijs locis; ut videre est apud Complutenses hic Disput. 6. qu. 4. & *Auersam* quæst. 19. sect. 8. Ex Recentioribus. *Suarez* disp. 36. sect. 3. *Aresius* lib. 1. de Gen. disp. 2. q. 13. *Contar* in qu. de Distinct. partium à suo toto. *Asiaga* hic disp. 5. sect. 1. *Ouiedo* Contr. 5. pun. 1. Complutenses, & *Auersa* locis cit. *Franciscus Le Rees* Com. in Phys. artic. 5.

Contraria opinio docet: Totum dicere præter partes vnitas simul, & collectiue sumptas, & tertiam entitatem, seu formalitatem, & quidditatem distinctam.

Ita *Scotus* in 3. dist. 2. quæst. 5. quem sequuntur *Mayronius*, *Lich. Ant. And.* ibidem. Citatur etiam ab *Auersa*, ubi supra, pro hac sententia, *D. Thomas* in 3. d. 2. q. 1. ar. 3. quæstiuncula 3. ad 3. & in 3. d. 16. qu. 1. ar. 1. quæstiuncula 3. ad 2. & 3. part. qu. 6. ar. 15. sequuntur *Heru*: quodlib. 2. qu. 15. *Capreolus* in 3. d. 2. qu. 1. *Caietanus* 3. p. qu. 6. art. 5. *Ferrariensis* 4. contra gentes cap. 81. *Iaculus* 7. *Met.* qu. 50. & alij plures. Ex Recentioribus citari possunt *Conimb.* 1. *Physic.* cap. 2. qu. 1. & *Pererius* lib. 7. cap. 18. qui problematice vtramque opinionem defendunt, quibus adde *Soncini* 7. *Met.* qu. 42.

Conclusio mea est: totum dicere formalitatem, seu quidditatem distinctam a partibus vnitis simul acceptis.

Probatur conclusio primò: quia materia seu forma vnita simul causant realiter totum, sed idem non potest causare realiter seipsum, ergo totum est realiter, seu formaliter, & quidditatiue quid diuersum, & distinctum a partibus vnitis simul. Minor est adeò certa, & de se adeò clara, ut nec explicatione, nec probatione indigeat. Maior sic euincitur, quia non potest assignari aliud, quod causet realiter totum, nisi assignentur materia, & forma simul vnita.

Respondebis: materiam, & formam simul vnitas causare realiter totum distributiue acceptas non collectiue sumptas; idest, materia vnita formæ, & forma vnita materia; causant realiter totum, sed materia, forma, & vnio non causant realiter totum, sed sunt ipsum totum formaliter.

Sed contra est quia : realiter idem sunt hæc, materia vnita formæ, & forma vnita materiæ, ac materia, forma, & vnio, ergo si materia vnita formæ, & forma vnita materiæ causat totum, iam materia, forma, & vnio causant totum : seu si partes vnitæ distributiue causant totum, etiam partes vnitæ collectiue acceptæ causant totum . Antecedens probatur : quia materia vnita formæ, & forma vnita materiæ, dicit materiam, formam, vnionem, & nihil aliud, realiter loquendo, dico, realiter loquendo, vt omne præcludatur effugium aduersarijs, respondendi ; quod materia vnita formæ, & forma vnita materiæ, dicit materiam, & formam in obliquo, materia verò forma, & vnio dicunt partes in recto . Quia partes esse in recto, vel in obliquo positæ, spectat ad modum intelligendi, & explicandi, non ad realitatem ipsam, ergo iam realiter a parte rei, idem est dicere, materia vnita formæ, & forma vnita materiæ, ac dicere, materia, forma, & vnio .

Probatur conclusio secundò: quia ex nostro modo concipiendi, & explicandi, aliud est totum, aliud sunt materia, forma, & vnio; quia materia, forma, & vnio concipiuntur ad modum plurium, totum verò concipitur ad modum vnius, vt patet, & ipsi Aduersarij vltro admittunt, concedunt enim totum a partibus, & vnione distingui ratione, & secundum nostrum modum concipiendi, vt videre est apud *Complutens. loc. cit.* quo dato, vltèrius progredior: talis modus concipiendi diuersus, nempe totum ad modum vnius, partes verò, & vnionem ad modum plurium, habet fundamentum in ipso obiecto, in ipsismet rebus, ergo iam a parte rei aliquid diuersum est totum a partibus, & vnione etiam collectiue acceptis.

Probo antecedens: quia ego cognitione experimentalì, & sensata cognosco totam manum, verbi gratia, esse calidam; sed tali cognitione non attingitur materia, nec forma, nec vnio, quia hæc omnia sunt substantialia, quæ innotescere non possunt, nec immediatè attingi cognitione sensata, & experimentalì, ergo id, quod cognosco cognitione experimentalì, & immediata, quando cognosco totam manum esse calidam, est tertia entitas, seu quidditas, formalitas, seu denique ipsa totalitas.

Probatur tertio: quia contrà negantes modum relationis in Logicis, ita sunt argumentari plures ex auctoribus contrariæ sententiæ. Datur denominatio similis intrinseca, ergo debet esse ab aliqua forma relatina, seu modo intrinseco relationis, ergo a

simili, valeat ita argumentari, datur denominatio totius; ergo debet esse ab aliqua forma intrinseca, quæ sit totalitas, seu quidditas, & formalitas ipsius totius; sicuti enim album est ab albedine, ita & totum est ab ipsa totalitate, seu formalitate, & quidditate totius, ita loquitur *Scotus loco supracit.* §. *Respondeo.*

Obiicies primò *ex ariaga*: ista totalitas distincta a partibus, vel est aliquid ipsius compositi, vel non est aliquid ipsius compositi; si est aliquid ipsius compositi, ergo est pars eius, & consequenter non est aliquid superadditum partibus, si non est aliquid ipsius compositi, ergo non spectat ad compositum.

Respondeo: totalitatē esse ipsam formalitatem, & quidditatem compositi, seu totius, sicuti humanitas est ipsa quidditas, & formalitas hominis, non ergo ista totalitas est pars compositi, sed est ipsamet tota essentia, & formalitas compositi.

Obiicies secundò: *ex Quiedo*, vel totum a partibus vnitis distinguitur adæquatē vel inadæquatē, neutrum dici potest ergo. Minor probatur, quia nō potest dici, quod distinguatur inadæquatē, quia distinctio inadæquata est inter duo, quorum vnum includit aliud, & aliquid amplius, sed totum nihil aliud includit præter partes, & vnionem. ipsa enim totalitas hæc tria tantum dicit: non potest dici, quod distinguatur adæquatē, quia distinctio adæquata est inter duo, quorum vnum non includit aliud, at totum verē includit partes, & vnionem, ergo.

Respondeo: totum distingui a partibus, & vnione adæquatē, tanquam effectum a suis causis; ad probationem in contrarium respondeo, distinguendo maiorem; tunc duo distinguuntur adæquatē, quando vnum non includit aliud, tanquam sui partiale constitutiuum, concedo maiorem, quando vnum non includit aliud, non vt partiale, sed vt totale constitutiuum, nego maiorem; Porro totum includit materiam, formam, & vnionem, tanquam totale sui constitutiuum, ideo adæquatē ab illis distinguitur, tanquam effectus a causa.

Obiicies tertio: vel ista tertia entitas ponitur, tanquam tertia pars totius, vel tanquam tota essentia, & quidditas totius; primum est apertè falsum, neque est ad mentem Scoti; secundum etiam dici non potest, quia alias materia, & forma non essent partes totius, hoc enim consideret in illa tertia entitate, quæ cum sit distincta a partibus, partes illas non includit.

Respondeo: illam tertiam entitatem esse totam quidditatem, & formalitatem compositi, ita tamen vt partes includat, distin-

distinguitur enim à partibus non realiter, aut modaliter, sed formaliter ex natura rei, quo modo distinguitur animal à rationali, cum quò stat, quòd animal includat rationale, ità etiam ista totalitas includit partes, quamuis ab illis distinguatur; & hæc etiam est ratio, cur non possit ista totalitas à partibus separari, sicuti nec potest animal in homine separari à rationali.

Obijcies quartò: In vniuersum omne totum, siuè Metaphysicum ex genere, & differentia, siuè integrale, & quantitatiuum, nihil aliud est, quàm suæ partes, ergo etiam totum physicum nihil est aliud, quàm suæ partes, ergo omninò superflue ponitur ista totalitas, & tertia entitas.

Confirmatur quia: quicquid aduenit enti in actu, accidentaliter aduenit, sed ista totalitas iam adueniret materiæ actuatae per formam, ergò accidentaliter adueniret, & faceret vnum per accidens, quod est absurdum. ergò.

Respondeo: eò argumento in primis probari, non dari modum vnionis, quia in toto Metaphysico ex genere, & differentia, in toto quantitatiuo, puta in numero binario, præter partes non datur vnio distincta; Dico igitur paritatem non valere, quia sunt res diuersi generis, atque adeò sicuti in toto physico, præter partes, datur vnio, quæ non datur in toto alterius generis, ita in toto physico datur totalitas, & tertia entitas, quæ non datur in toto alterius generis.

Ad confirmationem respondet *Scotus loco cit. §. Respondeo, et dico*, quòd ista totalitas non aduenit toti, tanquam forma informans, sed tanquam forma, qua constituitur totum quidditatiuè ad eum modum, quo loquitur *Auicē. §. met.* equinitas est tantum equinitas; & ideò non sequitur, quòd adueniat accidentaliter, quia non aduenit enti in actu, vt actuet, & informet.

Obijcies quintò: auctoritatem Philosophi 4. *Phys. 23. non enim est præter partes totum*, vel vt habet alia lectio. *Totum non est diuersum à partibus.*

Respondeo: hoc argumento, etiam probari non dari vnionem distinctam à partibus; si ergò ea auctoritate non obstante, adhuc datur vnio, quæ est modus distinctus à partibus, ergò etiam ea verba non obstant, quò minus detur ista totalitas; sensus ergò eorum verborum est, non dari aliquid, quod sit in partibus præter ipsum totum, ibi enim Aristoteles, vt patet legenti textum, assignat varios modos, quibus aliquid est in alio, Nam

aliquid est in alio, ut digitus in manu, & pars in toto; alio modo, ut totum in partibus, neque enim prater partes totum, alio modo, ut homo in animali, & omnino, ut in genere species. Cæterum Arist. neque hic, neque alijs suæ doctrinæ locis positæ Conclusioni aduersatur, imò potius apertè fauet 7. Met. in fine, eo verba; quia manent A. & B. & non manet Ab. idèd Ab est realiter distinctum ab A. & B. neque enim idem potest manere, & non manere.

DISPUTATIO II.

DE NATURA, ET CAUSIS.

Complectemur hac secunda disputatione ea omnia, quæ Aristoteles tradit secundo Physicorum Libro, qui est de Natura, & Causis; sicuti prima Disputatione complexi sumus materias ab eodem Aristotele tractatas primo Physicorum Libro de Principijs Rerum Naturalium, & quidem non est hic sermo de Natura, & prout nomine Natura venit ipse Deus, qui propter soles dici Natura naturans; neque est sermo de Natura, prout accipitur pro rerum uniuersitate, in quo sensu dicitur aliquid esse, vel non esse in rerum natura; neque denique est sermo de natura, prout significat cuiusque rei essentiam, aut naturalem complexionem viuientis, sed pro primo, & radicali Principio operationum, siue passiuo, ut est materia prima, siue actiua, ut est forma substantialis; nam in prima Disputatione plura tractauimus de materia, & forma, ut erant Principia intrinseca, seu partes compositi substantialis; hic uero de iisdem nobis agendum est, ut sunt Principia, & cause naturalium effectuum.

LECTIO I.

Natura, & Ars definiuntur.

Naturam existere est adeò certum, ut meritò Aristoteles dixerit; ridiculum est tentare, demonstrare naturam; ità 2. *Phys.* 1. 6. Hæc tamen doctrina intelligenda est de demonstratione à priori, seu per causas, cum enim ipsa natura sit causa, & primum principium radicale operationum naturalium, non datur alia causa prior, per quam probeatur naturæ existentia; à posteriori, & per effectum proprium naturæ, qui est naturalis motus, seu naturalis transmutatio, optime probatur, naturam esse, naturam existere; ad sensum enim patet, dari motum, dari naturalem transmutationem, sed huius naturalis motus, & transmutationis Principium, natura est, ergo, Cæterum. *Arist.* 2. *Phys.* 1. 3. Naturam ità definiuit; *Natura motionis, & quietis eius rei, in qua est primum, & per se, & non ex accidenti principium quoddam est, & causa.* Hanc definitionem omnes Philosophi recipiunt, & sic clariùs explicant, ac declarant. Natura est principium, & causa motus, & quietis eius, in quo est primum per se, & non secundum accidens.

Dicitur ergo in hac definitione, quòd natura est *Principium, & causa* loco generis; aptè autem non solum est positus terminus, *Principium*, sed etiam terminus, *Causa*, quia ex dictis *Disp.* 1. *Lect.* 1. latius patet terminus, *Principium*, quàm terminus, *Causa*, vnde per, *Tò Causa*, excluditur ab hac definitione, priuatio, quæ est principium, & non est causa, quia nulum esse tribuit composito naturali. Reliquæ particulæ stant loco differentia.

Dicitur ergo; *Motus, & Quietis*, quod est ità intelligendum, ut natura causet motum, & quietem successiuè, non simul, non enim est possibile, idem corpus simul moueri, & quiescere. Particula, ET, à quibusdam sumitur disiunctiuè, ità ut sensus sit. Natura est causa motus, vel quietis; ut ità saluetur, in Terra esse naturam, quamvis semper quiescat, & nunquam moueatur; Similiter & in Cælo esse naturam, licet semper moueatur, & nunquam quiescat; ab alijs illa particula sumitur copulatiuè; quatenus natura sit causa motus in corpore existente extrà suum

Locum naturalem, & sit causa quietis in corpore existente in suo loco naturali.

Cæterum nomine quietis intelligitur non tam carentia motus, quàm consistentia, & permanentia in termino acquisito per motum, & nomine motus, venit motus Physicus, nempe generatio, alteratio, Augmentatio, & Latio, idest, motus localis omnium præcipuus, & notissimus Index naturæ. Hinc patet, etiam in Angelis esse aliquo modo naturam, quia in ijs adest motus localis, & consequenter principium talis motus potest dici aliquo modo natura. Dixi aliquo modo, quia sicuti talis motus non est corporeus, & verè Physicus, ita in Angelo non adest vera causa Physica talis motus, & vera natura.

Dicitur, *eius in quo est*, ut à ratione naturæ excludantur externæ causæ quorundam motuum Physicorum, quales sunt Angeli motores Syderum, & Cælorum.

Dicitur, *primum*, quia natura est primum, & radicale principium motus, ita ut ante ipsam non sit assignare aliud principium prius, quod sit causa motus.

Denique additur, *per se, & non secundum accidens*, ut denotetur, quod natura est principium motus in eo composito, in quo est ipsa natura, tanquam eius intrinseca pars, per quod natura contradistinguitur ab arte, quæ non est intrinseca pars, sed, potius merum accidens eius subiecti, in quo causat motum.

Quoad definitionem artis, quæ est opposita naturæ, ut melius eiusdem naturæ definitio innotescat, & explicetur, ab auctoribus definitur. Ars est habitus tradens regulas, & præcepta operis faciendi: ex quo patet, plures esse differentias inter artem, & naturam. In primis enim natura esse substantia, Ars verò accidens de prima specie prædicamenti qualitatis. Secundò natura est radicale, & primum principium, imò & causa dans esse rei; at ars ad opus non concurrir dando esse, sed dirigendo, regulando, seu illuminando potentiam, in qua est talis habitus. Denique opus, ad quod faciendum concurrir natura, est opus naturale; at opus ad quod ars concurrir directiue, & illuminatiue, est opus artificiale, & accidentale, sic verbi gratia, Marmor est opus naturale factum à natura; at Marmor excavaturn, & in statuam efformatum, est opus artificiale elaboratum ab arte.

LECTIO X.

An ars efficere possit opera naturæ.

ARtem, quam naturæ æmulam, & imitatricem, semper agnoscit Philosophia, dupliciter possumus imaginari, quod opera naturæ efficiat; primum, quidem propria, & innata vi, seu virtute; secundò virtute ipsius naturæ, applicando, scilicet, actiua passius, ita ars Medica naturali virtute herbarum sibi benè cognita, ægris corporibus sanitatem impertit; similiter & aliæ artes, adhibito igne, alijsque huiusmodi naturalibus causis, variè materiam immutant, & plures effectus producant.

Est autem peculiaris difficultas de arte Chymica, an virtute ipsius naturæ, possit efficere verum, & probatum aurum.

Quò ad Primum.

Conclusio sit: Ars non potest efficere opera naturæ propria sui vi, & virtute.

Probatur conclusio: quia causa debet esse, vel perfectior, vel æque perfectæ, cum effectu suo; sed ars neque est perfectior, neque æque perfectæ, ac sit opus, seu effectus naturalis, ergo.

Probatur minor: quia effectus naturalis, est forma, vel substantialis, vel accidentalis, sed Ars est merum accidens de prima specie qualitatis, ergo non est perfectior forma substantiali, sed neque accidentali, quia prima species qualitatis, nempe habitus, est omnino imperfectæ, & minimæ virtutis, ergo.

Confirmatur; quia habitus, ad opus; quod facit, non concurret effectivè, sed illuminativè, & directivè; ergo non potest efficere aliquod opus naturale.

Quò ad Secundum.

Conclusio secunda: ars Chymica potest efficere verum, & probatum aurum virtute naturæ.

Ita D. Thomas 2.2. qu. 77. art. 2. magnus Albertus lib. 3. de mineral. cap. 9. Henricus Gandaven. quod lib. 5. q. 3. Zimarn in tract. de differentijs Naturæ, & artis. Mirandulanus lib. 9. de eversione singularis certaminis sect. 7. Comimbri. hic c. 1. q. 6. Franc. Le Reès Com. in Phys. art. 3. §. 2.

Contrà Auerroem in Paraphrasi ad primum l. de Gen. Animalium. Auisen. in suis Com. Meteororum. Aegidium in 3.

quod lib. quæst. 8. Cornelium Agrippam cit, à Le Reës, vbi supra.

Probaturs conclusio primò: quia ars virtute naturæ potest præstare, & efficere opera nobiliora, & perfectiora, quàm sit productio auri, ergo à fortiori post efficere verum, & probatum aurum. Antecedens probatur quia Apes gignuntur ex visceribus bonum recentibus cum fimo obrutis, vel iuuentorum corpore examinato, bufones elixatura anatis sub dio positæ, tantæ ex humido puluere; pulli ex ouis in fornacibus virtute ignei caloris excluduntur Alexandriae Aegypti, nec non oua Nicedalorum, teste Scaligero: denique Agricultura fruges omnes, & fructus producit, ergo etiam potest ars, quæ semper naturam imitatur, efficere verum aurum, quod est opus multò ignobilius, quàm sint animalia, & viuientia modo enumerata.

Confirmatur: quia in Hungaria in Monte Carpatho fontes sunt, in quos, dum ferrum coniicitur, vertitur in cuprum, ligna quoque, & herbæ virentes, si in quosdam gelidissimos fontes incidant, lapidescunt, ergo etiam potest aurum fieri ex aliis metallis virtute ignis, qui est elementum magis efficax, & actiuum, quàm sit aqua.

Probaturs secundò: quia si aurum non posset effici ab arte, maximè quia adhuc nescitur, quæ sit materia, & sub quo Astrorum influxu, debeant applicari ignis, & alia requisita ad auri productionem, sed hoc probat solummodò valdè difficilem esse respectu hominis, non tamen impossibilem auri productionem, seu Chrysopæam, & lapidem Philosophicum, ergo. Dixi respectu hominis, quia id Angelo facile erit.

Obijcies primò; Aurum Chymicum non habet conditiones, & notas auri legitimi, ergo non est verum, legitimum, & probatum aurum, sed potius est quædam auri tinctura.

Respondeo: notas veri, & probati auri esse, quòd sit coloris citrini, vix sonorum, maximè ductile, & extensum sub malleo, ita vt vnius grani tertia pars trahi, & duci possit in filum centum triginta quatuor pedum, vt tradit *Cardanus lib. de rerum varietate*, vt sit incorruptibile tum in ære, tum in aqua; denique vt omnes probas sustineat, tale autem est aurum Chymicum, ideò habet notas veri auri, imò in Thesauro Ducis Hetruriæ ostenditur Clauus media sui parte versus in optimum aurum per artem Chymicam; & si fides adhibenda est Historijs, legimus Arnoldum de Villanoua cum Remundo Lullio hac

hac de re disputasse, & ut Raimundum conuinceret Arnoldus inter disputandam in Aula summi Pontificis virgulas aureas arte confectas exanimi subieciisse, & fuisse probatas.

Obijcies secundò; Aurum non potest confici, nisi virtute celestis caloris in gremio, seu visceribus terræ, sed Ars Chymica vititur igne ad producendum aurum, quod conficit in superficie terræ, & aperto aere, ergo, vel nullum conficitur aurum, vel conficitur aurum fucatum, & apparens.

Respondeo: calorem celestem, & igneum esse eiusdem speciei, & idè posse eundem effectum præstare, & scilicet aurum à natura in gremio terræ producat, nulla ratio prohibet, quominus in superficie terræ, vel etiam alibi produci possit, locus enim merè materialiter se habet ad productionem effectus naturalis.

Obijcies tertio; Ecclesia, ut patet ex Extrauag. Ioann. XXII. prohibet usum Artis Chymicæ, ergo non fit per eam verum aurum.

Respondeo; eam Artem fuisse damnatam, tanquam perniciosam animæ, plures enim, dum ardentius diuitias amant, & assequi per hanc artem procurant, incidunt in tentationes, in laqueos, & insidias diaboli; vel etiam damnari propter excessum impensarum, vel denique ob summam eius difficultatem, non quia impossibilis sit.

Obijcies quarto; Virtute artis dædali statuar hunc, illuc discurrebant, ex *Aristot.* 1. *Polit.* 3. Archyta Tatentinus ligneam Columbam volare docuit, Archimedes vitream Sphæram confecit, ubi Ortus, & occasus Syderum videbantur; denique annulis, & imaginibus astronomicis, multa mirabilia, & suprâ visitatum naturæ cursum consciuntur, ergo iam ars potest efficere morum & alia opera naturæ.

Respondeo; omnes huiusmodi motus fieri ab arte virtute naturæ, ut patet ex dispositis intus machinis, & rotis; exemplum habemus in Horologiis, quorum motus est ab Arte, sed virtute naturæ; quòd autem dicunt, de annulis astronomicis, vel id est fabulosum, vel ad Dæmonum præstigias spectat.

LECTIO III.

Definitur causa in Communi.

Non reperitur definitio causæ in Communi in Aristotelis libris, nam illa, quæ circumfertur, tanquam tradita ab Aristotele in Libello de Causis, nec in tali Libello reperitur, nec ille Libellus à probatis auctoribus censetur esse Aristotelis; est autem ea Definitio; causa est illa, ad quam aliud sequitur. Hæc Definitio reiicitur communiter quia, ad primam horam sequitur secunda, nec tamen prima hora est causa secunda; ad Priuationem sequitur Compositum, & tamen priuatio non est causa compositi. Alii alias adducunt definitiones, sed quælibet earum sicuti suas paritur difficultates, & pluribus patet oppositionibus, ita potest ad bonum sensum trahi, & consequenter probabiliter defendi.

Nam, primò definitio supradicta, causa est illa, ad quam sequitur aliud, defenditur à *D. Thoma hic Lect. 10. & opusc. 31. circa medium*, à *D. Bonau. in 2. distin. 20. art. 2. à Masse 2. Physic. cap. 3. quæst. 2. Tolet. quæst. 1. Scoti quæst. 3. & communiter à Thomistis*, præcipuè verò à *Compluten. hic disput. 8. quæst. 1. §. 1. 2. & 3. ab Auerſa tom. 1. philos. quæst. 11. sect. 1.* Qui explicat eam definitionem, esse intelligendam non de consecutione quomodocunque, sed de consecutione necessaria cum necessaria dependentia; sensus ergò eius definitionis est, causa est illa, ad quam aliud necessario sequitur, & necessario dependet; Hinc in diuinis Pater non est causa Filij, quia nec filius sequitur ad patrem, tanquam posterius ad prius, nec filius dependet à patre; in creatis verò non est assignare aliquid, quod sequatur ad aliud, tanquam posterius ad prius, & quod dependeat, absque eo, quod sit effectus recognoscens pro causa id, quod est sibi prius, & à quo in suo esse dependet.

Sed contrà hanc definitionem, eiusque explicationem est quia, in creatis effectus æquè dependet à conditionibus, & à causa, & quidem tanquam quid posterius à suo priori, æquè enim causa, & conditiones ad causandum requisitæ, sunt quid, prius effectui.

In diuinis verò *Arriag. hic disp. 6. sect. 1. nu. 4.* non dubitat asser-

assidere, filium dependere à patre, quia filius indiget patre, & existat, atque adeò non potest existere sine patre, dependere autem vnum ab alio, est vnum non posse existere sine alio, & tamen pater non est causa filii; præterea cõgruum est inter Latinos, patrem non esse causam filij, & tamen non omnes negant eam prioritatem naturæ in diuinis, vt testatur *Ariaga ubi supra n. 5.* Dixi inter Latinos, quia Greci Patres absque vllò scrupulo admittunt in diuinis, patrem esse causam filii, sed apud illos principium non distinguitur à causa, quia ergò pater est principium filii, ideò libenter concedunt, etiam patrem esse causam filii.

Secundò: *Franciscus Ouied. hic contr. 6. pun. 1. §. 3.* relatis, & reiectis aliorum definitionibus, considerans rationem fundamentalem; quæ mouit Latinos ad negandam causalitatem in diuinis, in patre respectu filii, esse, quia ratio causæ importare videtur aliquam limitationem in effectu productò, talem assignat definitionem causæ; causa est principium influens per influxum ex se formaliter defectibilem; vbi per *Tò influxum ex se formaliter defectibilem*, assignatur ratio adæquata, cur in diuinis pater non sit causa filij, quia generatio filij in diuinis est ex se indefectibilis, atque adeò omninò illimitata, & infinita, sicuti è contrà actio, seu influxus defectibilis; est quoque finitus, & limitatus, si non formaliter, saltem arguitur, in creatis verò nulla est causa, quæ agat, & influat per influxum indefectibilem; illimitatum, & infinitum, omnis enim actio creata defectibilis, finita, & limitata est.

Sed hæc definitio, præter difficultates, quas ipsemet *Ouied.* contra se adducit, & soluit, adhuc ex eo mihi non probatur, quia videtur, essentiam, & formalitatem causæ per aliquid æque, aut fortasse magis obscurum explicatur; tanò facilius intelligitur, quid sit causa, quàm intelligatur, quid sit iste influxus ex se formaliter defectibilis: Deinde, non video, cur ratio causæ, vt sic debeat esse finita, & limitata, cur eius influxus debeat esse finitus, & limitatus, cur eius influxus debeat esse defectibilis, cur effectus debeat esse finitus, & limitatus? Ratio enim causæ, vt sic, sicuti præscindit à causa, siue creata, siue increata; ità præscindit ab eo, quod sit finita, vel infinita; quod eius influxus sit defectibilis, vel indefectibilis. In diuinis, ideò pater non est causa filii, quia causa, vt causa dicit effectum à se dependentem, & omnis dependentia imperfectionem, & minoritatem importat in

eo, quod ab alio ponitur dependere; si ergo pater esset causa filij, esset dependens a patre: & esset minor, aut saltem imperfectior patre, quod est contrà Symbolum *Athanasij*, qui loquens de filio, ait, *Aqualis Patri secundum diuinitatem, minor secundum humanitatem.*

Tertio: *Arriaga disput. 6. sect. 1. num. 7.* Definit causam, esse illam, quæ producit essentiam, seu, quæ per se influit producendo essentiam, & ided pater in diuinis non est causa filij, quia non producit essentiam, sed essentiam eandem numero communicat filio.

Sed contrà hanc definitionem est, quia: pater in diuinis, licet non producat, & generet essentiam, producit tamen, & generat personalitatem filij, qui propterea in Symbolo *Athanasij* dicitur genitus à Patre.

Præterea, qui producit accidens, adhuc habet veram rationem causæ, quia etiam accidens habet suam essentiam, vt fateatur ultro *Arriaga*, ergo pater, qui producit personalitatem filij, adhuc habet veram rationem causæ, quia etiam personalitas habet sui propriam personalem essentiam, & quidditatem.

Quarto: alij definiunt causam esse illam, ex qua aliquid per se pender, ita *Fonsæ met. 1. cap. 7. quest. 1. Combricens. 2. phys. cap. 7. qu. 1.* ex parte hanc definitionem approbant *Auersa, & Complut. locis cit.*

Hæc definitio mihi videtur clariùs, & probabilius causæ formalitatem explicare. Nam in Diuinis ided Pater non est causa filij, quia filius non pender à Patre, omnis enim dependentia importat imperfectionem, & minoritatem, quæ non potest esse in Filio respectu Patris, & ex alia parte in creatis non est reperire dependentiam vnus ab alio absque causalitate, ergo per eam definitionem optimè explicatur formalitas, & essentia causæ, vt sic, & in comuni; Quare

Conclusio mea est: causa vt sic, & in comuni optimè definitur esse illa, à qua aliquid per se pender. Ita Auctores mox citati.

Probatur conclusio tum ex modo dictis, tum ex solutione argumentorum.

Obijcies primo; effectus æquè dependent à suis causis, atque conditionibus, ergo *Tò per se dependens*, non explicat formalitatem causæ; præterea datur dependentia rei à suo posteriori & non tanquam à causà, vt materia, quæ dependet à posteriori à forma, ergo.

Re-

Respondeo : aliquid dependere à conditionibus per accidens & non per se : quidd ex eo patet , quia conditiones possunt diuinitus suppleri ; nam, verbi gratia , ad causandum requiritur approximatō localis , tanquam conditio sine qua non , & tamen potest causa Diuinitus, & supernaturaliter agere in distans, similiter dependentia à posteriori, est dependentia per accidens, diuinitus enim, & supernaturaliter potest esse materia sine forma , & omne prius potest esse sine suo posteriori.

Obijcies : Filius in diuinis non potest esse , seu existere sine Patre , & tamen Pater non est causa filij , ergo per dependere vnum ab alio non bene explicatur formalitas causæ.

Respondeo : dependentiam poni à Philosophis inter ea , quæ habent essentiam numero diuersam, ergo licet Filius esse, seu existere non possit absq; Patre, quia tamen non habet essentiam numero diuersam à Patre, idè non dependet à Patre, sicut nec Pater, vt Pater dependet à Filio , sine quo nec potest esse , seu existere , relatiua enim sunt simul natura , & ea sunt simul natura, vt diximus in Logicis , quæ simul existunt, & neutrum est causa alterius.

Obijcies terriò : in probabili sententia, quam docent *Suar. 3. p. disp. 50. Coninch. de Sac. Euch. ar 4 dub. 5. Petr. d S. Ioseph in Idea Theol. Sac. l. 2. c. 6. Resol. 3.* idem supernaturaliter potest esse causa sui ipsius, nam in Sanctiss. Eucharist. Sacramenta Christus Dominus seipsum producit , sed idem non potest dici, quòd à seipso dependeat , ergo.

Respondeo : Auctores eius sententiæ , quæ ponit idem posse seipsum producere, assignare aliam definitionem causæ , non istam, quam assignauit Fonseca, vbi supra, & nos approbamus. Præterea dico, bene posse idem non quomodocunque , sed prout secundò productum dependere à seipso , vt primò productum, saltem enim hæ duæ productiones realiter distinguuntur, non quidem ratione termini , qui idem realiter esse supponitur in vtraque productione, sed ratione principij ; nam prima productio est ab vno principio, secunda est ab alio principio omninò diuerso, quando enim idem seiplum secundò producit, secunda productio est ab ipso effectu primò productum ; prima verò productio est ab agente intrinseco.

LECTIO VI.

An causæ definitio conueniat causæ remotæ.

Nomine causæ remotæ venit ea causa, quæ producit causam proximam, ex qua proximè & immediatè procedit effectus; verbi gratia, silex percussus producit ignem, ignis producit calorem; quaritur, an silex possit dici, & verè sit causa caloris, non minus, ac ignis, à quo immediatè, & proximè productus est calor.

Conclusio mea est: causæ remotæ non competit assignata definitio causæ. Ità *Hurtadus disp. 8. sect. 4.* vbi pro se citat *Suarez disput. 18. Met. sect. 1. nu. 22. Vasq. tom. 1. in 3. part. disput. 21. nu. 17.* His addo *Scotum in 2. d. 18. quest. unic. 9. præterea*, vbi docet, quòd Plato generatus à Sorte, potest generare Cicero-nem, Sorte non existente, nec causante.

Probatur conclusio: quia à causa remotæ, & mediata effectus non dependet per se, sed merè per accidens, ergò causæ remotæ non conuenit definitio causæ supra explicata, vbi tribuitur effectui dependentia per se à causa. Probatur antecedens: quia ea est causa per accidens, qua deficiente adhuc habetur effectus, si enim producto semel igne à silice, desinat esse, & destruatursilex, adhuc producitur calor ab igne producto à silice; ergo calor merè per accidens à silice producitur.

Confirmatur: quia accidentia Eucharistica operantur, & præcipuè calor calefacit, & non adest subiectum, seu causa remota talis caloris, quæ est substantia panis, ergo iam remanet effectus non existente causa remota, ergo effectus per se non pender à causa remota.

Confirmatur secundò; quia eodem modo aqua dicitur videri, ac dicatur calefacere; dicitur enim videri per calorem, calefacere per calorem, sed aqua propriè non videtur, nulla enim substantia potest esse obiectum visus, ergo neque verè, & propriè calefacit.

Probaturscundò: quia si causa remota esset vera, & propriæ causa, effectus naturales possent æquè attribui causæ primæ mediatè, ac remotè concurrenti, ac tribuatur causæ secundæ immediatè, & proximè concurrenti, sed hoc est falsum, & erroneum
apud

Apud omnes Theologos, qui propterea tanquam erroneam damnant sententiam Durandi, ponentis Deum concurrere ad effectus naturales mediata, & remota, quatenus ab initio tribuit causis secundis vim, & virtutem operandi, ergo causa prima non esset vera causa, si mediata, & remota concurreret.

Probatur tertio: quia in communi sententia proprietates dicuntur emanare, & produci ab ea essentia, cuius sunt proprietates, non verò ab agente producente essentiam, & tamen agens producens essentiam, est causa remota proprietatum ad essentiam consequentium, ergo in communi sensu causa remota non est causa, in communi phrasi Scholarum, causa remota non dicitur causa.

Confirmatur: quia avus non dicitur Pater nepotis, quamvis avus sit causa Patris, & Pater sit causa nepotis, non nisi quia avus non est causa proxima, & immediata.

Obijcies primo: quod est causa causæ, est etiam causa causari ergo: causa remota est verè, & proprie causa; confirmatur ex *Aristot. hiet. 3.* aliquæ scientiæ sunt circa causas proximas sui obiecti, aliæ verò sunt circa causam ultimam, & primam, sed causa ultima, & prima est causa alicuius, quia solum est causa causæ, ergo.

Respondeo; Causam remotam, & mediatam esse quidem causam, sed non esse causam per se, & proprie; imò potius esse causam per accidens, & valde improprie; ideòque simpliciter nomine causæ venit causa proxima, non remota.

Obijcies secundo: Ignis dicitur comburere lignum, licet talis combustionis causa sit calor: ergo etiam causa remota simpliciter est, & denominatur causa. Confirmatur quia: homo dicitur tangere alium hominem, licet vestes tangat, & non eius substantiam, ergo.

Respondeo: Ignem comburere lignum, quia forma ignis immediate simul cum calore concurret ad combustionem; similiter, quando intellectus intelligit, anima intelligit, quia anima concurret immediate simul cum intellectu. Ad confirmationem dico, eam esse locutionem minus propriam, esse phrasim vulgi, non scholæ.

Obijcies tertio: Aqua calida calefacit manum, & tamen non potest dici, quod aqua immediate concurrat simul cum calore ad talem calefactionem, quia aqua non est causa naturalis caloris, in tantum ergo dicitur causa illius calefactionis, in quantum est subiectum caloris immediate calefacientis.

Respondeo: Verè aquam non esse causam per se talis calefactionis, si enim diuinitus conseruetur calor extrà aquam, adhuc calefacit manum; dicitur ergo aqua calida calefacere manum, quia sicuti id, quod fit, & fieri dicitur, compositum est, quamuis sola forma, aut ad summum forma simul, & vnio producantur, ità aqua denominatur calefacere, quamuis solus calor verè, & proprie calefaciat.

Respondebis cum *Quieto, hic controu. 7. punt. 5.* tunc causam remotam esse causam effectus producti, quando causa proxima effectus in suo esse, & conseruari ità dependet à causa remota vt ea deficiente alia suppleatur, & ideo Auus non est causa nepotis, quia mortuo auo, adhuc conseruatur Pater, nulla alia causa supplente concursum Aui in Patrem: è contrà Ignis est vera causa calefactionis in manu, quamuis sit causa remota, quia deficiente igne debet calor, qui est causa proxima calefactionis in manu, conseruari à Deo supplente concursum ignis conseruantis calorem,

Sed contrà est: quia iam habeo vniuersaliter esse falsum, quòd causa remota sit vera, & propria causa, Deinde, quòd deficiente causa remota, debeat per aliam causam suppleri eius influxus in ordine ad conseruandam causam proximam, non arguit, causam remotam influere in effectum productum à causa proxima; aliud est enim causam proximam conseruari, & aliud est eam operari, potest enim conseruari absque eo, quòd operetur.

D. deficiente igne, vt conseruaretur calor ipsius ignis, deberet suppleri influxum ignis ad conseruandum suum calorem per aliam causam, aliàs deficeret calor ignis, quia in suo conseruari ab igne dependet; sed rursus calor productus in manu deficeret, nisi calor ignis conseruaretur, ergo calor in manu per se pendet ab igne, qui tamen est causa remota caloris existentis in manu.

Respondeo: negando minorem, patet enim manifesta experientia, manum conseruari calidam, accepto semel calore ab igne, quamuis ignis deinde, & calor ignis destruantur.

LECTIO X.

An causa dicat relationem ad effectum.

Premitto primò : causam posse in triplici statu considerari ; primò quidem secundum virtutem , & vim causatiuam , quo pacto consideratur causa in actu primo , quia in hoc statu consideratur , vt potens causare . Secundò consideratur causa secundum sui causalitatem , quo pacto consideratur causa in actu secundo , quia in hoc statu consideratur , vt actu causans . Tertiò denum potest considerari causa secundum hanc præcisam denominationem causæ , quo pacto consideratur causa , prout habet hanc denominationem , vel dum producit , vel postquam produxit effectum .

Premitto secundò : Causam , vt actu crufantem , esse transcendentaliter relatiuam ad effectum suum , ratio est , quia causa constituitur essentialiter actu causans per causalitatem , sed causalitas est ratio transcendentaliter relatiua , nam talis causalitas , vel est actio , vel est vnio ; est actio siue realis , siue metaphorica in causis extrinsecis , efficiente , scilicet , & finali ; est vnio in causis intrinsecis , materia , scilicet , & forma , sed tam actio , quam vnio est ratio transcendentaliter relatiua , vt patet , ergo iam causa , vt actu causans , est transcendentaliter relatiua .

Conclusio mea est : Causa in actu primo , seu secundum virtutem causatiuam , est ratio absoluta , non relatiua .

Probatur Conclusio : quia omnis causa , vel est perfectior , vel aequè perfecta effectui suo , ergo non potest dicere realem relationem ad effectum , imò debet esse absoluta ab ordine , & relatione ad effectum , tenet consequentia , quia si diceret relationem , & ordinem ad effectum , iam ab effectui suo specificaretur , ab eo acciperet finem esse , & existere , ab eoquè dependeret , sed omnis dependentia dicit imperfectionem , ergo iam causa esset imperfectior effectui suo .

Confirmatur , quia ratio relatiua ex ordinatione naturæ est ad terminum , sed natura nunquam ordinat id , quod est perfectius ad imperfectius , ergo non ordinant causam ad effectum .

Probatur secundò : quia causa , vt causa semper est prior effectui suo , sed relatiua sunt simul natura , & simul sunt , seu existunt ,

stunt, ergo causa comparata ad effectum non est relatiua ad effectum, sed potius est ratio absoluta, independens ab effectu, & prior illo.

Cum hoc tamen stat, vt causa referatur ad effectum relatione secundum dici, quia referri ad aliud relatione secundum dici, nihil aliud realiter importat, quàm terminare tendentiam, alterius in ipsum, quo modo obiectum scibile terminat tendentiam scientiæ in ipsum; & sicuti si sumatur obiectum scibile, vt scibile præcisè, obiectum, vt obiectum, scibile, vt scibile secundum hanc denominationem præcisè, obiectum refertur ad scientiam relatione secundum dici, aut relatione rationis, ita causa in actu primo accepta præcisè, vt causa, secundum hanc formalem, & præcisam denominationem, refertur ad effectum suum relatione rationis, & secundum dici, quæ relatio non importat vllam imperfectionem, nam etiam hæc relatio rationis, & secundum dici reperitur in Deo respectu creaturarum absque eo, quòd in Deo imperfectio arguatur.

Obiicies primò: Causa in actu primo, seu secundum virtutem causatiuam, est essentialiter potens producere effectum, seu habet essentialitèr virtutem, & potentiam producendi effectum, sed hoc est habere essentialem ordinem, & transcendentalem relationem ad effectum possibilem, ergo.

Confirmatur quia: non potest intelligi causa vt potens producere effectum sine ordine, & relatione ad effectum, ergo causa in actu primo est transcendentaliter relatiua.

Respondeo: negando minorem; eius enim falsitas colligitur ex eo, quia si esset impossibilis omnis effectus, adhuc remaneret causa in actu primo, seu adhuc remaneret virtus causæ, non quidem in ratione causæ productiue effectuum possibilem, & à se producibilem, sed in ratione entitatis; sicuti in probabili sententia, quam defendit *Vasquez 3. par. disputat. 21.* si essent impossibiles omnes creaturæ, adhuc in Deo remaneret Omnipotentia, non quidem in ratione potentis omnia creare, sed in ratione entitatis; eodem pacto, si ponamus potentias respicere obiecta in communi, non in particulari, posito impossibili omni obiecto, adhuc remaneret potentia ad illud, non in ratione potentiae ad illud, sed in ratione entitatis. Ità dato impossibili omni effectu, adhuc esset causa, eiusque virtus saltem in ratione entitatis, si non in ratione causæ habentis virtutem, seu vim, & potentiam ad tales effectus producendos.

Obijcies secundò; causa in actu primo constituitur per actionem possibilem, sed actio possibilis est transcendentaliter relatiua ad effectum possibilem, ergo etiam causa in actu primo est transcendentaliter relatiua. Maior probatur, quia causa in actu secundo constituitur per causalitatem, seu actionem actualem, ergo causa in actu primo constituitur per actionem possibilem.

Respondeo: duplicem esse actum primum; nempe actum primum logicum, & actum primum physicum; actus primus logicus est ipsamet possibilitas causæ, seu non repugnantia causæ ad existendum; actus primus physicus est virtus productiua, seu effectiua alicuius, verbi gratia virtus, quam habet Deus ad producendam creaturam, est actus primus physicus Dei: concedo igitur causam in actu primo logico constitui per actionem possibilem, sicuti causa in actu secundo constituitur per actionem existentem, vt bene probat argumentum, nego tamen per actionem possibilem constitui causam in actu primo Physico, quia in causa adest virtus productiua independentem ab omni actione, & effectu.

Obijcies terriò: ex Aristotele, inter alia genera relationum realium assignatur genus relationis fundatæ in actione, & passione, & consequenter in ratione causæ, & effectus, ergo causa dicit relationem realem ad effectum.

Respondeo: Causam, vt causantem concretiuè acceptam, vtrique dicere relationem realem ad effectum, vt iam suprà explicatum est; vel etiam causam sequuto effectu dicere realem relationem ad effectum, generato enim Filio, resultat relatio realis Paternitatis in homine generante ad Filium, & ad hominem genitum; id ego non nego; nego solum, causam in actu primo, seu causam, prout dicit virtutem productiuam effectus, dicere relationem realem ad effectum, pono enim causam ita consideratam, esse omninò independentem ab effectu, & consequenter non dicere realem relationem ad effectum.



LECTIO VI.

Conditiones ad causandum requisitae.

TRes solent enumerari conditiones requisitae in causa ad hoc, ut effectum producat. Prima est causae existentia; Secunda est, propinquitas, seu approximatior causae, ut alij loquuntur contactus causae cum subiecto, in quod debet agere, & operari. Tertia est eiusdem causae prioritas.

Quò ad primam conditionem.

Conclusio sit; causa debet existere in eo instanti, quo producit effectum; ita est communis sententia.

Contrà aliquos ex Thomist. Nunnium, Caberudo 3. p. q. 22. art. 1. diff. 5. §. quinta sententia, Capreolum, Sotum, quos citat Suarez 3. p. d. 13. sect. 7.

Probatur conclusio primò ex Aristot. 4. Met. cap. 4. t. 16. ea, quae non sunt, quoniam passio loquuntur, aut ambulabunt? ergo causa debet existere.

Probatur secundò; quia nemo dat, quod non habet, ergo eo instanti, quo causa non habet existentiam, non potest illam tribuere effectui,

Dices; Viuentia moriuntur, ergo in instanti mortis realiter mutantur, ergo etiam poterunt realiter operari; sed tunc non existunt, ergo.

Respondeo: in primis non esse dicendum, viuentia mori in sensu composito, sed in sensu diuiso; idest illa, quae fuerunt viuentia, moriuntur. Præterea talis mutatio est mera negatio, & ideò mirum non est, quòd causa talis mutationis non existat, existentia enim requiritur in causa, ut productiua effectus realis, & positiui.

Dices secundò; ad hoc, ut corpus moueat aliud corpus, non requiritur, quòd sit penetratum cum illo, sed sufficit, si sit illi contiguum, ergo, ad hoc, ut causa producat existentiam effectus, non requiritur, quòd existentia causae sit penetrata cum existentia effectus, sed sufficit, si antea extiterit causa, atque, adeò sufficit, quòd sit illi contigua.

Respondeo; causam tunc esse contiguam cum effectui, quando existit simul cum effectui, contigua enim debent esse simul; unde

dè pater tale argumentum potius esse contra aduersarios. Et sane nihil iuuat ad existentiam effectus, quòd causa paulò antea fuerit, perindè enim se habet, ac si nunquam extitisset, quia in eo instanti, in quo operatur, & producit effectum, non existit.

Quòd ad secundam conditionem, quæ est approximatio causæ ad subiectum, in quod debet operari, seu indistantia localis.

Conclusio sit; causa debet esse approximata subiecto, in quod agit. Probatur manifesta experientia: quia ignis, verbi gratia, existens Romæ, non potest calefacere manum meam existentem Neapoli, non nisi ob defectum debitæ approximationis. Similiter paries albus in maxima distantia non potest videri ab oculo, quia non est in debita distantia, seu quia non est debitè approximatus, & consequenter non potest transmittere sui species ad oculum, qui propterea non potest videre parietem à se maximè distantem. Ex quo factum est commune dictum, non datur actio in distans.

Vndè autem, aut ex quo capite requiratur approximatio ista causæ ad subiectum, in quod debet agere, an ex limitatione virtutis, an ex peculiari ratione causæ, infra examinabimus.

Quòd ad tertiam conditionem, quæ est prioritas causæ ad effectum, Communis sententia est, causam debere esse priorem effectu suo.

Noto autem tres assignari in Scholis Prioritates; nempe Prioritatem originis, prioritatem naturæ, & prioritatem temporis. Illud dicitur prius tempore respectu alterius, quod est in aliquo instanti, in quo aliud non est, ideòque talis prioritas, dicitur prioritas, in quo. Prioritas naturæ, cum duo sunt simul in eodem instanti reali, seu temporis, sed vnum est dependenter ab alio; ideòque vnum non potest concipi absque alio, & hæc prioritas, dicitur prioritas, à quo, seu prioritas independentiæ. Tertia prioritas originis est, cum vnum est, seu procedit ab alio tanquam à principio absque vlla dependentia, & absque eo, quòd vnum sit, aut concipiatur esse sine alio, ità se habet in Diuinis Pater respectu Filij, hæc prioritas à Theologis, potius dicitur ordo, quam prioritas.

Conclusio sit: causa est prior saltem prioritate naturæ effectu suo; dixi saltem prioritate naturæ, quia sæpè causa est prior tempore effectu suo, ità Pater est prior tempore Filio; sed non semper causa est prior tempore effectu suo, quia sol non est prior tempore luce, quam ex se producit, sed solum prior prioritate

tate naturæ, seu prioritate independentiæ; & sic etiam anima suis potentijs, & omnis essentia suis proprietatibus est prior, prioritate naturæ, seu prioritate independentiæ.

Ad causandum etiam requiritur applicatio causæ, & remotio impedimentorum, si enim ad operandum causa non se applicet, aut sit impedita, non potest agere, & operari, quamuis sit prior effectu suo, sit debite approximata, & verè existat, quod maxime verificatur de causa libera, hæc enim positis omnibus requisitis ad operandum, non operabitur, nisi se applicet, & velit operari.

LECTIO VII.

Causa Materialis, & Formalis Definuntur.

Suppono quatuor esse genera causarum, nempe causam materiale, formalem, finalem, & efficientem; hanc diuisionem causarum tradit *Arist. 2. post. 1. 48. 2. Phys. 1. 28. 1. Met. & lib. 5. c. 2.* Hanc ipsam causarum diuisionem agnouerunt antiquiores Philosophi, & recentiores communiter receperunt; & licet plures possint assignari rationes, quibus sufficientia huius diuisionis ostenditur, omnium potissima mihi videtur, sensus communis omnium Philosophorum; addito præsertim, quod si quæ alia causa, præter istas, assignetur ad vnā ex quatuor enumeratis facile reducitur.

Quod igitur spectat ad definitionem causæ materialis; ea sic definitur ab *Arist. cum hic 1. 28. Met. 2.* materialis causa est, ex qua fit aliquid, cum insit, clarius sic redditur, ex qua inexistente aliquid fit, cum insit, ubi per terminum, *inexistente*, contradiungitur causa materialis à priuatione, ex qua fit etiam aliquid, seu compositum, sed tanquam ex termino, à quo, non tanquam ex parte inexistente & componente.

Sed hæc explicatio mihi non videtur sufficiens, debet enim causa materialis non solum contradistingui à priuatione, sed etiam à causa formali, à qua tamen non distinguitur, per, *Td inexistente*; dicatur ergo, ex qua *recipiente*, seu *sustentante*, aliquid fit, sic enim contradistinguitur causa materialis non solum à priuatione, sed etiam à forma, sustentare enim, & recipere soli materiæ primæ conuenit.

Verum quia non solum materia prima, sed etiam ipsum compositum recipit, & sustentat quædam accidentia, imò & omnis essentia siue corporea, & materialis, siue incorporea, & spiritalis, recipit suas proprietates, & accidentia, ideò tam compositum, quam omnis essentia, imò & quælibet res recipiens aliam, reducitur ad hoc genus causæ materialis, præsertim verò ipsum compositum solet dici materia secunda, & in ipso composito, ut potè magis noto, & sensibus obuiò, exemplificat hic Aristoteles genus causæ materialis, ait enim, *ut ex are fit statua, ex argento phiala.*

Quò ad Definitionem causæ formalis: hæc ita definitur ab Aristot. hic: *Ratio quod quid erat, esse, seu Ratio quidditatis* Clariùs sic redditur ab *Auersa tom. I. Philos. quæst. 2. sect. I.* causa formalis illa est, à qua intrinsecè actuante, aliud dependet, vbi, per *Tò actuante*, excluduntur non solum causæ extrinsecæ, efficiens, & finalis, sed etiam excluditur causa materialis, quæ non actuando, sed recipiendo concurrit.

Ad hoc genus causæ reducitur omnis forma accidentalis, siue naturalis, siue supernaturalis; reducuntur omnes modi, qui etiam astuant, & informant subiectum, in quo recipiuntur. Denique etiam differentia respectu speciei, quam componit, & generis, quod determinat, reducitur ad hoc genus causæ, sicuti ipsum genus reducitur ad causam materiale.

Cæterum hæ causæ ad causandum, præter conditiones suprà Lect. VI. assignatas, requirunt proportionem quandam, quæ sit inter subiectum, & formam; non enim quælibet forma informare potest quodlibet subiectum, non enim potest subiectum spirituale recipere formam corpoream, nec è conuerso potest forma spiritalis informare subiectum corporeum, sed requiritur aptitudo quædam, & proportio; hæc autem proportio consistit in eo, quod subiectum, & forma sint eiusdem ordinis, & gradus.

Alterà conditio est, ut sit in materia apta præparatio, & dispositio ad recipiendam formam, quæ in subiectum præniè non dispositum, & minimè præparatum, non inducitur, hæc autem dispositio, & præparatio non est vna, & eadem respectu omnium formarum; sed est multiplex, & diuersa iuxtà multiplici-
tatem, & diuersitatem formarum, sic ad recipiendam formam ignis requiruntur in materia tanquam præuiæ dispositiones, calor, & siccitas; hinc videmus lignum viride, & humidum quam difficillimè ignem concipere.

Et licet vniuersaliter formæ accidentales sint prauia dispositiones ad formas substantiales, imò ad id sint institutæ, & ordinatæ à natura, attamen etiam vna forma accidentalis est prauia dispositio ad aliam, hinc perspicuitas, & diaphaneitas est dispositio ad recipiendam lucem, quæ non nisi in subiectum perspicuum, & diaphanum introducitur.

LECTIO VIII.

Causalitas, & effectus vtriusque cause assignantur.

P Ræmitto: causalitatem esse omninò realiter distinctam à causa materiali, & formali; ratio est, quia sapè est reperire causam, & non est reperire causalitatem, non enim semper causa est actu causans, constituitur autem causa actu causans per causalitatem; si ergo reperitur causa, sine causalitate; causalitas est realiter distincta à causa, quæ enim separantur, realiter distinguuntur.

Dices. Materia semper est vnita formæ, atque adeò semper est actu causans compositum; similiter & forma semper est actu informans materiam, neque enim est reperire materiam sine forma, & formam sine materia.

Respondeo; Materiam saltem supernaturaliter esse sine forma, & formam materialem sine materia; dixi supernaturaliter, quia anima rationalis etiam de facto datur separata à corpore, & materia, absque eo quòd vllam exerceat causalitatem.

Si ergo materia est, & non est actu causans, ergo actu causare, seu causalitas, est distincta à materia, & non est de eius essentia, quæ enim sunt de essentia materie, nec supernaturaliter possunt ab illa separari: eadem omninò ratio, & discursus militat de forma seu causa formali.

Conclusio mea sit: causalitas vtriusque causæ, materialis scilicet, & formali, est vnio substantialis, per quam materia vnitur formæ, & forma materiæ. Est communis sententia, quæ Argumentorum solutione melius firmabitur.

Probatum primò: quia causalitas est quid distinctum & realiter separatum à causa tam materiali, quàm formali, sed tale quid distinctum non est effectus, non est relatio, non est actio generatiua, seu productiua formæ, ergo est iste modus substantialis Vnionis. Minor probatur; quia in primis non est effectus, quia esse-

effectus supponit causalitatem, seu causam actu causantem, non enim esset productus effectus, nisi prius fuisset causa actu causans; non est relatio, quia relatio consequitur ad causam actu causantem; relatio enim fundatur in ipsamet causalitate, ex eo enim, quod causa fuerit actu causans, oritur in ipsa relatio causæ ad effectum. Denique non est ipsa actio, & generatio formæ, quia datur causalitas materiæ, & causalitas formæ absque eo, quod sit productio formæ, ut patet in generatione Hominis, ubi materia, & forma, idest, anima rationalis supponuntur creata immediate à Deo, ergo causalitas causæ, tam materialis, quam formalis non est effectus, neque relatio, neque actio, seu productio formæ, ergo debet esse iste modus substantialis vnionis, nihil enim aliud est assignabile.

Probatur secundò conclusio; quia causalitas est id, per quod causa constituitur actu causans, sed posita sola Vnione, præciso quocunque alio, causa materialis intelligitur actu causans, quia posita sola vnione sunt compositum, & forma ex materia, & vicissim forma intelligitur actuare, & informare materiam, ergo vnio est causalitas, tam materiæ, quam formæ.

Verum quidem est; quod vnio prout se tenet ex parte materiæ, & est illius causalitas, dicitur receptio, seu sustentatio, prout verò se tenet ex parte formæ, & est illius causalitas, dicitur actuatio, seu informatio, atque adeò vnio, licet sit una, realiter, est duplex formaliter, & secundum nostrum modum formalem concipiendi.

Obijcies primò: vnio fit per actionem, seu generationem agentis, ergo vnio non est causalitas, causalitas enim non fit per aliud, sed fit seipsa. Confirmatur quia: ipsa actio, seu generatio causatur à materia, sed non causatur per vnionem, quia materia non vnitur ipsi actioni, seu generationi, ergo vnio non est causalitas.

Respondeo: Vnionem non esse causalitatem respectu agentis, quia potius est terminus actionis, quæ est ipsamet causalitas agentis, ut infra videbimus, sed esse causalitatem respectu materiæ primæ, quia per vnionem materia causat recipiendo formam, & constituendo compositum.

Ad confirmationem dico: vnionem non esse causalitatem materiæ respectu generationis, sed esse causalitatem materiæ respectu formæ, & respectu compositi, ratio est, quia cum ipsa actio, seu generatio sit modus non fit per alium modum, sed seipsa, si-

cuti etiam ipsa vnio seipsa fit à materia, & non per aliam vnionem: denique ipsa inherētia accidentis fit seipsa, & non per vnionem à materia, quare pater vniuersaliter omnem modum à materia non fieri, & causari per alium modum superadditum.

Dices: vnio est modus, & tamen ab agente fit per alium modum, quia fit per actionem, seu generationem, quæ propterea etiam dicitur vnio, idest, actio productiua vnionis.

Respondeo negando consequentiam, quia vnio respectu agentis non est modus, sed potius est terminus actionis, & generationis, at verò ipsa generatio est modus etiam respectu materiæ, quia etiam materiæ afficit modificando; & actuando modaliter.

Obijcies secundo; materia causat actu, quatenus sustentat formas, ergo sustentatio est causalitas. Confirmatur quia; materia causat formam recipiendo, sed recipere idem est, ac pati, & passio idem est, ac actio, ergo causalitas materiæ est actio, non vnio.

Respondeo, tam ad principale argumentum; quam ad eius confirmationem: sustentationem, & receptionem idem esse, ac vnionem; materiæ enim recipere, & sustentare in actu secundo formam, idem est, quò ad illi vniri: dixi in actu secundo, quia recipere, & sustentare in actu primo non distinguitur ab ipsa essentia materiæ, quando dicitur, quòd passio idem est, ac actio, verum est de passione, quæ sit accidens, non de passione, quæ sit ipsamet essentia materiæ, neque de passione in actu secundo respectu materiæ, qua ratione est modus substantialis vnionis.

Obijcies tertio: materia prima vnitur animæ rationali, & tamen non est eius causa, ergo causalitas materiæ non est vnio.

Respondeo: Vnionem, qua materia vnitur animæ rationali, esse essentialiter diuersam ab vnione, qua eadem materia vnitur cæteris formis materialibus, ista enim vnio essentia iter respicit animam rationalem, & ideo mirum non est, quòd talis vnio non sit causalitas materiæ respectu animæ rationalis. Nonnulli concedunt; materiæ esse quoque aliquo modo causam animæ rationalis, hæc enim non producit, nec operatur, saltem in præsentis statu sine materia, quæ propterea potest dici aliquo modo causa; dixi aliquo modo, quia anima rationalis multò minorem habet à materia dependentiam, quàm habeant reliquæ formæ materiales, quæ propterea & sunt, & dicuntur materiales, quia

earum essentia, & natura tota est immersa in materia, & omninò dependens à materia.

Obijcies quartò: causalitas debet fieri saltem, vt quo à causa, vt patet in actione, quæ fit vt quo à causa efficiente, cuius est causalitas, sed vnio non fit à forma, quia non informatur à forma ergo non est causalitas respectu forme.

Confirmatur: quia ista vnio potest saltem supernaturaliter à Deo creati, sed in tali casu, nec in materia reciperetur, nec ab illa causaretur, quia creatio est omninò independens à materia, & subiecto, ergo.

Respondeo; Vnionem informati, vt quo à forma, materia enim informatur mediante vnione, & ità vnio se habet, vt id, quo forma materiam actuat, & informat.

Ad confirmationem respondeo, negando maiorem, quia enim vnio est essentialiter duorum vnio, non potest sola vnio creari.

Quòd spectat ad effectus materię primæ, vt causa materialis est, solent enumerari duo; nimirum forma, & compositum; & sanè materia causat formam, illam recipiendo, & sustentando. Causat verò compositum, illud intrinsecè constituendo, tanquam eius intrinseca, & essentialis pars constitutiuæ.

LECTIO IX.

Definitio, & diuisio causæ finalis.

Licet aliqui causam finalem è numero causarum excludant, Communis tamen, & concors Philosophorum sententia inter reliquas causas Physicas, finalem etiam causam agnoscit vnà cum Aristotele, Plarone, & alijs ex antiquis,

Definitur ergo ab Aristotele causa finalis, tum hic c. 3. t. 39. tum etiam 2. Met. t. 8. id, cuius gratia aliquid fit, vt deambulandi sanitas. Hæc definitio sic clariùs redditur; finis est, cuius gratia cætera sunt, ipse verò nullius gratia, verbi gratia; deambulatio, & scissio venæ fit propter sanitatem, seu sanitatis gratia, seu ad sanitatem est ordinata, ipsa verò sanitas non est ordinata ad scissionem venæ, aut ad deambulationem, nec ad aliud aliud.

Et sanè ea, quæ ad aliud, tanquam ad finem, ordinantur, dicuntur media; id verò, ad quod alia ordinantur, dicitur finis, seu

seu causa finalis, sic ambulatio, & scissio venæ sunt media respectu sanitatis, quia ad sanitatem consequendam ordinantur, & conducunt; ipsa verò sanitas dicitur finis, & causa finalis. Hinc media dicuntur amari, & esse volita non propter bonitatem, quam habeant in se, sed propter bonitatem finis, ipse verò finis dicitur amari, & esse volitus propter bonitatem, quam in se habet; ita scissio venæ non est volita, & amata à voluntate propter bonitatem, quam habeat in se, imò potius secundum se est iniusta voluntati, sed amatur propter bonitatem ipsius sanitatis, sanitas verò seipsa amatur, & propter bonitatem, quam in se habet.

Quoad diuisionem causæ finalis.

Diuiditur primò causa finalis in finem, cui, & in finem; cuius gratia, quæ diuisio sumitur ex *Aristotel. 2. de Anima t. 37. & 2. Physic. 24.* finis cuius, est id, cuius adipiscendi, vel acquirendi gratia aliquid fit, vt sanitas, cuius gratia est facta scissio venæ; vndè etiam solet dici finis, quod, vel qui debet acquiri; finis cui est is, cui alius finis est acquirendus, vt sanitas, quæ est acquisita, si est acquisita mihi, vel Petro, ego, vel Petrus sum, vel est finis, cui. Vndè benè habet *Arist. hic t. 24. utimur omnibus, quæ sunt, propter nos, sumus enim quodammodo, & nos finis.*

Secundò diuiditur finis in finem vltimum, & non vltimum, finis vltimus est is, ad quem omnia ordinantur; finis non vltimus, vel proximus est is, ad quem proximè tendit intentio, vel operatio agentis, verbi gratia, Deus est finis vltimus actus boni, & honesti, at finis proximus benè, & honestè operantis, est ipsamet operatio bona, & honesta.

Obijcies primò contrà assignatam definitionem; causa finalis nihil producit, nec dat esse alicui, ergo non est illa, cuius gratia aliquid fit. Antecedens probatur, quia causa finalis non existit, vt patet manifestè in sanitate, à qua tanquam à fine mouetur infirmus ad sumenda medicamenta, & tamen sanitas non existit, & sæpè etiam non acquiritur per medicamenta, atque adeò sæpè non solum non existit, sed neque est futura, sed quod non existit, non potest dare esse alteri, ergo.

Respondeo: finem, seu causam finalem esse possibilem, atque adeo habere existentiam possibilem, licèt non habeat existentiam actualem, sufficit autem talis existentia ad hoc, vt causa finalis sit actu causa, & actu det esse alteri, quia non dat esse alteri per influxum realem, sed prout est in apprehensione, & cognitione; sanitas enim, verbi gratia apprehensa, & cognita, vt bona, & ac-

quisi-

quisibilis ab intellectu infirmi, mouet illum ad sumenda medicamenta: vbi sumptio medicamentorum fit gratia sanitatis, non quidem actu existentis, sed actu apprehensæ, vt quid bonum, & vt quid acquisibile, dixi, vt quid bonum, quia ratio motiua in causa finalis, seu ratio formalis causandi est bonitas; dixi, vt quid acquisibile; quia finis, saltem debet esse possibilis, quamuis actu non existat, si nimirum apprehenderetur, vt impossibilis, & non acquisibilis, non moueret agens ad operandum.

Obijces secundo: omnis causa est principium, sed finis non potest esse principium, principium enim, & finis opponuntur, ergo.

Respondeo; finem, & principium opponi, prout nomine finis venit extrema, seu vltima pars rei alicuius, non prout nomine finis venit causa finalis, sic enim verè causa finalis est principium earum actionum, quæ fiunt ab agente in ordine ad acquirendum, & consequendum finem.

Obijces tercio contra diuisionem assignatam finis; Finis est id, cuius gratia cætera fiunt, ipse verò nullius gratia, ergo non benè diuiditur finis in finem vitimum, & finem non vltimum, quia finis, cuius gratia non debet ordinari ad finem cui, nec finis non vltimus debet ordinari ad finem vltimum, aliàs non esset finis, sed potius medium, id enim quod ad aliud ordinatur, habet rationem medij, non finis.

Respondeo cum *D. Thoma 1.2. qu. 13. art. 3.* finem respectu voluntatis ita se habere, sicuti se habet principium, seu præmissa respectu intellectus, sicuti enim vna præmissa probatur per aliam, & alia per aliam, quod ad vsque perueniamus ad præmissas per se notas, & indemonstrabiles; ita voluntas vnum obiectum vult, & amat propter aliud, & aliud, quod usque perueniat ad obiectum, quod per se amet, & velit, & non in ordine ad aliud, vnde sicuti vna præmissa respectu conclusionis est præmissa, & respectu alterius præmissæ notioris, & certioris, se habet vt conclusio, ita aliqua obiecta sunt media respectu finis, & sunt finis respectu aliorum mediorum; ita Sanitas verbi gratia est finis respectu scissionis venæ, sed est medium respectu hominis, cui sanitas comparatur; actio bona, & honesta est medium respectu Dei, qui est vltimus finis, sed est finis respectu agentis intendentis operationem honestam, & bonam patet ergo idem respectu diuersorum benè esse posse finem, & medium, medium, & finem.

LECTIO X.

Ratio formalis causandi in fine assignatur.

EX dictis superiori lectione patet : finem causare , quatenus in se habet aliquam bonitatem , in tantum enim agens intellectuale mouetur ad procuranda media conducentia ad assequendum finem, in quantum apprehendit in fine aliquam bonitatem sibi bonam , & conuenientem ; si enim in fine non esset aliqua bonitas, vel si esset aliqua bonitas , & illa non esset apprehensa, sine dubio agens non moueretur, nec procuraret media, quibus assequeretur, & sibi finem compararet; si egrotus non apprehenderet in sanitate esse bonitatem sibi maxime conuenientem, non procuraret potionem Medicinæ, & scissionem venæ; duo ergo sunt in fine causante, seu mouente agens ad operandum, nimirum bonitas, & apprehensio, seu cognitio. Hinc oritur difficultas, quæ nam sit ratio formalis causandi in fine, bonitas finis, an apprehensio, seu cognitio finis; vtrumque enim requiritur, vtrumque ita necessario concurrit, vt altero, & quolibet eorum deficiente, finis non causet, & agens non se moueat ad procuranda media conducentia ad finem.

Conclusio sit: Bonitas realis est ratio formalis, seu virtus causandi in fine, cognitio verò, & apprehensio talis bonitatis est conditio, sine qua non, seu est ratio applicans virtutem causatiuam ad causandum.

Ita D. Thomas 1. contra gentes cap. 75. & 1. par. quest. 80. art. 1. ad primum, Scotus in 2. d. 25. quest. 2. Gab. in 1. d. qu. 5. ar. 1. Caiet. 1. 2. qu. 1. art. 1. & 1. par. qu. 1. art. 4. Ferrarien. lib. contra gentes cap. 44. Iauellus 5. lib. Met. qu. 15. Sotus l. 2. Phys. qu. 3. Complutenses hic disp. 14 q. 4. §. 2.

Ex Recentioribus, Tol. qu. 14. Pererius lib. 3. qu. 4. Fonseca 5. Met. cap. 2. quest. 11. Conimb. 2. lib. Physic. cap. 7. q. 23. Suarez disp. 23 sect. 8. Rubius lib. 2. Physic. tract. 5. qu. 5. num. 41. Auerſa tom. 1. Phyl. qu. 13. sect. 6. Ouiedo, & Arriaga hic.

Contrà Auicennam 6. Met. cap. 5. Capreol. in 2. d. 25. qu. 1. art. 3. Medinam 1. 2. quest. 1. artic. 1. Soncin. 5. Met. q. 3.

Probatur Conclusio primò quia : finis causat secundum quod mouet voluntatem agentis ad operandum, idest, ad eligenda media

media conducibilia, & vtilia ad consequendū finem, vt sequenti lectione fufius explicabimus, fed id, quod mouet voluntatem, agentis eft realis bonitas, non eft apprehenfio, feu cognitio, quia potentia mouetur à fuo obiecto, quod propterea etiam dicitur motiuum, obiectum autem, & motiuum voluntatis eft bonitas, ficuti enim motiuum intellectus eft verum, feu veritas, ita motiuum voluntatis eft bonitas, ergo.

Probatnr fecundò quia: finis fecundum eam rationem formaliter caufat, fecundum quam fatiat appetitum, & qua obtenta dicitur agens habuiffe intentum, & qua non adèpta, dicitur fuo fine frustrari, vt patet ex communi locutione, & ex *Arist. 2. Phys. 6. Vt ambulare, fi purgationis gratia eft; fi verò non facta fuit ambulanti, frustrà dicimus ambulaffe, & quid ambulatio frustrà fuit.* Sed id, quod fatiat appetitum, & quo obtento agens non dicitur frustrari fine fuo, eft realis bonitas, fiue exiftens, fiue apprehenfa, non verò cognitio ipfa, aut apprehenfio: ergo ratio formalis caufandi in fine, & ratio caufatiua eft bonitas, non cognitio, vel apprehenfio.

Dixi bonitas realis, vel exiftens, vel apprehenfa; quia fæpè accidit, in obiecto mouente voluntatem realiter non eflè bonitatem, vt quando voluntas impoffibilia, aut etiam fibi noxia, & perniciofa defiderat, & procurat, fed tamen in his cafibus adefl in tali obiecto bonitas realis apprehenfa, & propofita voluntati ab intellectu; quæ non minus mouet voluntatem, quàm bonitas verè realiter exiftens à parte rei, vt benè notat hic *Arist. 31. Differt autem nihil dicere, idem bonum, vel apparens bonum, & 8. Eth. c. 2. amat vnusquisque, quod ipfi eft bonum, fed quod apparet, fed id nihil refert, quia amabile apparens erit, in qua Doctrina communiter recepta fundatum eft vulgare dictum, nemo refpiciens ad malum, operatur.*

Quòd autem cognitio, & apprehenfio requiratur, tanquam conditio finè qua non, & tanquam ratio applicans; probatur quia: Voluntas eft potentia cæca, atque adeò non poteft fe fola videre, & profequi obiectum, indiget ergò illuminari ab intellectu per obiecti propofitionem; debet ergo cognofci obiecti bonitas, eaque repræfentari voluntati, confequenter cognitio, & apprehenfio bonitatis realis eft conditio finè qua non, & applicatio voluntatis ad operandum, id eft, ad procuranda media conducibilia, & vtilia ad confequutionem finis.

Confirmatur quia: ficuti in cæteris caufis requiritur tanquam

conditio finè qua non, approximatio causæ ad subiectum, in quod debent operari; ità vt voluntas moueatur à bonitate reali finis, debet talis bonitas veluti approximari voluntati, approximatur autem per cognitionem, & apprehensionem, ergo cognitio, & apprehensio bonitatis se habet tanquam conditio, finè qua non.

Obijcies primò: Finis causat quando non existit, sed quando non existit non habet bonitatem realem, sed solum bonitatem intentionalem, & apprehensam, ergo non bonitas realis, sed apprehensio est ratio formalis causandi in fine.

Confirmatur quia: sapè ab intellectu proponitur voluntati aliquod obiectum impossibile, sed in obiecto impossibili nulla est realis bonitas, nisi, quæ fingitur, & apprehenditur ab intellectu, ergo etiam ipsa apprehensio est ratio formalis, & virtus causatiua in fine.

Respondeo: aliud esse vi apprehensionis, & cognitionis representari voluntati bonitatem realem, quæ aliàs non posset mouere voluntatem; & aliud esse, formalem rationem, & virtutem motiuam voluntatis esse apprehensionem, & cognitionem; quando ergo in fine non est bonitas actu existens, vel etiam quando eius bonitas est impossibilis, adhuc tamen per apprehensionem representatur voluntati aliqua bonitas, realis in se, ficta tamen per intellectum, & hæc est, quæ mouet voluntatem, non ipsa apprehensio, non ipsa fictio.

Obijcies secundò: si cognitio esset conditio finè qua non, & nõ ratio formalis finalizandi, vt ità dicam, posset saltem de absoluta potentia, bonitas realis finis mouere voluntatem nulla præuia cognitione, seu apprehensione talis bonitatis, sicuti quia approximatio in ceteris causis se habet, vt conditio finè qua non, potest de absoluta potentia suppleri, ità vt agens agat in distans, sed hoc est falsum, quia nec de absoluta potentia voluntas potest ferri in incognitum, nihil enim volitum, quin præcognitum, ergo cognitio non se habet, vt conditio, sed potius vt ratio formalis causandi.

Respondeo: in primis non omnes conditiones posse supernaturaliter suppleri, nam etiam existentia est conditio finè qua non, & non est virtus formalis causandi, & tamen non potest supernaturaliter suppleri, neque enim de absoluta potentia potest fieri, vt causa non existens agat, & operetur. Dico præterea; plures ex Philosophis probabiliter defendere, posse voluntatem

tatem in incognitum ferri . Ità *Quietus Controu.7. de Anima pun. 3. Palud. in 4. d. 49. qu. I. art. 2. nu. 29.* quem videtur sequi *Gregorius ibidem, Ochamus qu. 77. art. 7. & 15.* & nonnulli ex mysticis Theologis , asserentibus eos , qui altissimæ contemplationi dediti sunt , posse peruenire ad eum statum , in quo voluntas sinè præuia cognitione bonum diligit.

Obijcies tertio : actus voluntatis motæ à fine specie diuersificatur ex diuersitate cognitionis , & apprehensionis , ergo cognitio , & apprehensio se habet , vt ratio formalis , non vt conditio , actus enim specie diuersificantur ex diuersa ratione formali . Antecedens probatur quia : si apprehendatur bonum , vt absens , causatur desiderium , si apprehendatur , vt præsens , causatur gaudium , vel delectatio , ergo .

Respondeo : quòd licèt esse præsens , vel absens habeatur per apprehensionem , tamen id , quod est præsens , vel absens est ipsa realis bonitas ; & hæc est , quæ desideratur , & quæ delectat , quare ipsa bonitas est ratio formalis specificatiua eorum actuum , licèt requirant tanquam conditionem , sinè qua non , quòd sit præsens , vel absens .

LECTIO XI.

Causalitas finis declaratur.

Communis sententia Philosophorum pro causalitate finis motionem metaphoricam assignat ; quid autem sit motio metaphorica , sic explicò .

Præmitto : nomine motionis , seu motus venire motum physicum propriè , & in rigore , siuè sit generatio , siuè augmentatio , seu alteratio , siuè latro , quæ idem est , ac motus localis , qui omnium propriissimè , & per antonomasiam dicitur motus , & motio . Hinc per metaphoram nomen motus , & motionis attributum est etiam actibus intellectus , & voluntatis , nam operatio intellectus , seu ipsa cognitio , motio dicitur , actus voluntatis , amor ipse , motio dicitur ; & quando intellectus operatur , dicitur se mouere , sed talis locutio est metaphorica , & translaticia , ità voluntas , quando amat aliquod obiectum bonum , dicitur se se mouere , & quodammodo ad illud ire , in quo est fundatum commune dictum , Anima plus est , vbi amat , quàm
vbi

vbi animat, quia voluntas amando obiectum, quasi ad illud se transfert.

Præmitto secundo: ad actum intellectus, & voluntatis concurrere etiam obiectum, sed diuerso modo, & quidem ad actum intellectus obiectum, quod est verum, concurrir intrinsecè, quia concurrir transmittendo sui speciem ad intellectum; simul cum quo constituit vnum intrinsecum principium intellectionis, in quo fundatur vulgare dictum, ex obiecto, & potentia paritur notitia; obiectum verò voluntatis, quod est bonum, concurrir, & ipsum, ad actum voluntatis, sed extrinsecè, idest, alliciendo & trahendo: quia nimirum intellectus ostendendo, proponendo, & representando bonū voluntati, illam trahit, & allicit, vt illud obiectum amet, & prosequatur, simili ratione, qua ranum viridem ostendis ouī, & illam trahis, & allici, nuces puero, & illum trahis, & allicis ad tui persecutionem.

Quando ergo intellectus ostendit, & representat voluntati nostræ realem bonitatem, quæ est in fine, talis bonitas ostensa, & representata allicit voluntatem, & trahit ad amorem, & prosecutionem sui; qui amor, & quæ prosecutio, dicitur motio metaphorica, & hanc esse causalitatem causæ finalis, docet sententia communis, quare sit.

Cōclusio mea: causalitas finis est motio metaphorica, seu actus amoris à voluntate elicitus vi bonitatis realis apprehensæ ab intellectu, & representatæ voluntati.

Probatur conclusio mea quia: causalitas, est id, quo posito intelligitur causa actu causans, sed posita metaphorica motione intelligitur finis actu causare, ergo. Probatur minor, quia posita motione metaphorica, & amore voluntatis circā bonitatem finis, voluntas ulterius progreditur ad procuranda media conuenientia ad finem consequendum, ergo iam procurat media gratia finis; & consequenter posita motione metaphorica, & amore finis, intelligitur finis actu causare.

Obijcies primò: amor bonitatis finis est effectus finis, ergo non est eius causalitas; effectus enim, & causalitas distinguuntur.

Confirmatur quia: bonitas finis, allicit, inuitat, & trahit voluntatem, sed eo ipso, quod finis intelligitur allicere, & trahere voluntatem, intelligitur eius causalitas, ergo causalitas finis non est amor, aut aliquis alius actus elicitus à voluntate.

Respondeo: amorem bonitatis finis esse effectum finis, vt quo,
non

non effectum, ut quod; sicuti etiam actio est effectus efficientis, ut quo, non ut quod.

Ad confirmationem dico: non posse intelligi, quid sit bonitatem finis allicere, & trahere voluntatem absque aliquo actu voluntatis, elicito à voluntate tanquam ab intrinseco principio, & ab ipsa bonitate obiectivè, & extrinsecè concurrente, aliter enim non video, quomodo possit explicari ista allicientia, seu tractio, sed talis actus voluntatis non potest esse alius, quàm amor bonitatis iam cognitæ; & repræsentatæ, ergo iam talis amor est vera causalitas finis. Quòd si velis, talem amorem appellare elicentiam, seu tractionem, seu etiam finalizationem, ut alij loquuntur; parum refert, quomodo loquaris in hac materia, dummodo benè sentias.

Obijcies secundo: si causalitas finis esset motio metaphorica, iam finis non esset causa physica, & realis, sed potius causa moralis, sed hoc videtur absurdum, ergo.

Probaturs minor, quia causalitas finis non esset realis, sed metaphorica.

Respondeo: motionem metaphoricam non dici metaphoricam, quasi non sit realis, sed dici metaphoricam relativè ad motum localem, qui omnium propriissimè dicitur motus, seu motio: fateor tamen, causam finalem in genere causæ non esse ita perfectam, sicuti est causa efficiens, quæ propterea habet causalitatem magis perfectam, quàm sit causalitas causæ finalis, actio enim, quæ est causalitas efficientis est ab illa, tanquam ab intrinseco principio effectivus; causalitas verò finis sit à fine, tanquam à principio duntaxat extrinsecè concurrente modo explicato.

Obijcies tertio: cum finis alliciat, eo pacto movet, quo is, qui consulit, uterque n. intuitur, obiectum appetitui, & voluntari proponendo, sed motio consulentis spectat ad causam efficientem, ergo. Minor probatur ex *Arist. 2. Phys. cap. 3. s. 29. præterea id, unde mutationis, aut quietis primum est principium, qualis causa est is, qui consulti ergo.*

Respondeo: quòd motio metaphorica, seu actus amoris elicitus à voluntate vi bonitatis realis apprehensæ in fine, spectat ad genus causæ effectivæ, & ad genus causæ finalis secundum diversam rationem, nam actus amoris, prout elicitur à voluntate, est vera actio procedens à voluntate tanquam à causa effectiva; propterea verò talis amor est elicitus vi illius bonitatis extrinsecè concurrentis, spectat ad causam finalem.

Obijcies quartò: etiam ea, quæ carent cognitione, operantur gratia finis, & tamen à fine non alliciuntur modo explicato, ergo talis motio metaphorica, seu alliciètia nō est causalitas finis.

Respondetur: quòd agentia propter finem aliqua magis propriè aliqua minus agunt propter finem, & quidem rationalia propriissimè agant propter finem, ut patet; animalia sensibilia minus propriè, quia cognoscunt solum finem media cognitione sensitiva, adhuc minus propriè res insensibiles, quia non habent ipsæ cognitionem finis, & mediotum conducentium ad finem, sed vice illarum Deus, ut auctor naturæ, habet talem cognitionem, ità Deus cognoscit bonitatem fructuum, virtutem frondium ad fructus tegendos, ex qua cognitione facit in arbore tale temperamentum, ut possit suis temporibus facere frondes ad tegendos fructus, quod temperamentum bene potest appellari naturalis appetitus frondium: hinc est, ut opus naturæ, dicatur opus intelligentiæ: idest, Dei, qui sicuti naturas rerum creavit, ità easdem regit, & gubernat, dirigendo ad finem, & dictando media conducibilia ad finis consecutionem.

LECTIO XII.

Causa exemplaris, seu Idealis explicatur.

DVo sunt hic explicandi de Idæa; primum quid sit Idea, secundum, ad quod genus causæ Idæa reducatur.

Quò ad primum.

Idæam Græci; exemplar, seu etiam formam Latini appellant id, ad cuius similitudinem agens intellectuale operatur, dum facit opus; neque enim hic nomine Idææ venit Idea Platonis, seu natura aliqua vniuersalis à singularibus abstracta, & separata, de qua in Logicis.

Porro Idæa triplex assignatur: primò quidem Idæa externa, seu externus modulus operis faciendi ab artifice, verbi gratia, Architectus, si velit novum Templum adificare, vel archetypum ligneum construit, vel etiam in tabula, aut carta delineat novi templi constructionem; secundo nomine Idææ intelligitur conceptus noster obiectiuus, idest, ipsa res facienda, prout mente concipitur, antequam enim opus existat in se, mente præconcepitur, & hæc Idæa appellatur Idæa obiectiua. Terriò nomine Idææ

venit

venit conceptus ipse formalis rei faciendæ, agens. n. intellectu-
le antequam opus aliquod aggrediatur, format de tali opere ve-
rũ, formalem conceptum, & per hoc contradistinguitur agens
intellectuale ab alio quocunque agente non intellectuali, quia ni-
mirum agens intellectuale prius intelligit, & format de re à se
facienda conceptum, & deinde opus aggreditur, vnde patet Idæam
habere locum solum in agente intellectuali, sicuti & ratio causæ
finalis solum quoque in agente intellectuali reperitur.

Definitur Idæa ab *Arist. 7. Met. cap. 7. t. 32.* esse illud, in
quod artifex inspiciebat, operatur; quia nimirum, omne agens in-
tellectuale, antequam faciat externum aliquod opus, illud prius
concepit, & ad similitudinem obiecti à se concepti, externũ opus
efformat, & ideo agens intellectuale dicitur imitari Idæam in
suis operationibus, & Idæa definitur à *D. Augustino lib. 13. de
Ciuit. Dei cap. 2.* esse forma, quam aliquis imitatur ex intentione
agentis determinantis sibi finem.

Ex qua duplici definitione Idææ; Aristotelis, nimirum, &
D. Augustini, patet nomine Idææ propriè, & in rigore venire
conceptum obiectiuum rei faciendæ, probatur quia, Idæa est id.
in quod inspiciebat artifex, operatur, sed artifex inspicit conce-
ptum obiectiuum rei faciendæ, non conceptum formalem. ergo.

Probat minor quia: artifex volens nouum Templum ædifi-
care, non intendit assimilare tale opus suo conceptui formali, &
cognitioni, non inspicit suam cognitionem, aut suprà illam refle-
ctit, imò nè quidem de illa cogitat, imò potius inspicit tem-
plum à se mente præconceptum, vt patet experientia, ergo,

Dices primò: artifex non inspicit conceptum obiectiuum,
sed potius externum modulum in carta; vel etiam in tabula ef-
formatum, ergo neque conceptus obiectiuus est Idæa.

Respondeo: etiam externum modulum esse efformatum ad
similitudinem conceptus obiectiuum, prius enim artifex Templum
aliquod, verbi gratia, mente præconcepit, deinde illud in carta,
aut tabula exprimit, postremò opus externum, & ædificationem
noui Templi aggreditur.

Dices secundò: Idæa est illa, quam artifex imitatur; & ad
cuius similitudinem operatur, sed artifex non operatur ad simili-
tudinem conceptus obiectiuum, conceptus enim obiectiuus non di-
stinguitur ab opere externo, idem autem non potest esse efforma-
tum ad similitudinem sui metipsum, ergo non bene nomine Idææ
venit conceptus obiectiuus,

Respondeo : Idem bene posse esse efformatum ad similitudinem suimetipsum, si consideretur in diuerso statu, nam nouum Templum, verbi gratia, prout est à parte rei, bene potest esse efformatum ad similitudinem suimetipsum, prout mente concepti, & cogniti.

Quò ad secundum initio huius lectionis propositum, nimirum, ad quoddam genus causæ Idæa reducatur.

Prima sententia reducit Idæam ad genus causæ formalis. Ità *D. Albertus Magnus in 1. dist. 20. art. 1. Durandus dist. 45. quest. 2. argens art. 2. Aegid. prop. 35. de Euchar. Caiet. 1. par. q. 6. art. 3. quest. 44. art. 3. Fons. 5. Met. cap. 2. quest. 7 sect. 5. Conimb. hic cap. 7. q. 4. art. 2.*

Secunda sententia reducit Idæam ad genus causæ efficientis. Ità *D. Thomas in d. 2. q. unica, Scotus quest. 2. D. Bonau. in 3 d. 11. quest. 2. Alensis 1. part. q. 23. memb. 4. art. 1. Henricus in 1. d. 36. quest. 1. Pererius lib. 8. cap. 1. Suarez tom. 1. Met. disp. 25. sect. 2. nu. 8. Ruus hic tract. 6. q. 6. n. 80. auersa tom. 1. Philos. q. 15. sect. 1.*

Conclusio sit: Idæa reducitur ad genus causæ efficientis.

Probatnr conclusio primò auctoritate *Arist. 7. Met. t. 23.* quomodo ex sanitate, sanitatem accidit fieri, & domum ex domo, quæ finè materia, eam, quæ habet materiam; vbi per domum finè materia intelligit domum mente conceptam, ex qua fit domus externa, & materialis, sicuti & sanitas fit ex sanitate mente concepta.

Probatnr secundò quia: Idæa concurret ad faciendum opus externum regulando agens intellectuale in factione talis operis, sed concurrere regulatiuè, quomodo concurrunt omnes artes, est concursus in genere causæ effectiue, ergo.

Obijcies primò: causa efficiens debet esse realiter existens, sed Idæa non existit realiter, sed duntaxat intentionaliter, & in mente, quomodo existit causa finalis, ergo potius Idæa reduci debet ad genus causæ finalis, quàm ad genus causæ efficientis.

Respondè: quòd licet Idæa in modo existendi assimiletur causæ finali, vt ostendit argumentum, in modo tamen operandi assimilatur causæ efficienti, quia Idæa non mouet agens ad operandum, alliciendo, & trahendo per sui bonitatem, quem modum operandi seruat causa finalis; sed potius Idæa operatur regulando, dirigendo, & illuminando agens ad operandum, vti faciunt etiam omnes artes, qui modus operandi regulatiuè, directi-

uè, & illuminatiuè, est modus operandi causæ effectiue; quæ licet debeat realiter existere, quando dat esse effectui, non debet tamen realiter existere, quando concurrat solum dirigendo, & regulando.

Obijcies secundò: Idæa, & exemplar inferuit agenti, vt conferat effectui determinatam speciem, & formam, idè enim, agens exterius producit potius nouum Templum, quàm aliud quodcunque opus, quia in mente præhabet Idæam Templi, non alterius, sed causa formalis est illa, quæ dat speciem operi, ergo Idæa potius reducitur ad genus causæ formalis, quàm ad genus causæ efficientis.

Rèspondeo: causam formalem dare speciem effectui dando seipsam effectui, tanquam alteram eius partem intrinsecam, quomodo Idæa non dat speciem effectui, & operi, quod agens producit; Idæa enim dat speciem operi, & effectui regulatiuè, & directiuè modo suprà explicato.

Obijcies tertio: Idæa definitur esse forma, quàm imitatur artifex, sed forma non potest reduci ad aliud genus causæ, quòd non sit causa formalis, ergo.

Rèspondeo: etiam artes esse formas, seu habitus intellectuales, & tamen non ad genus causæ formalis, sed ad genus causæ effectiue reducuntur, etiam anima rationalis est forma, & tamen est principium effectuum suarum operationum; esto igitur, Idæa sit forma non tamen sequitur, eam esse reducendam ad causam formalem, sed bene posse reduci ad genus causæ efficientis.

LECTIO XIII.

Definitur causa efficiens, & varia eius diuisio.

Definitur causa efficiens ab *Arist.* tùm hic cap. 2. & 3. tùm 5. *Met.* esse, vnde primum principium est mutationis, & quietis; quæ definitio, quia obscura, sic clarius redditur à *Suarez disp. 17. Met. sect. 1. d. Rubio hic tract. de Causa efficiente num. 1. ab Auerſa tom. 1. Philos. d. 14. sect. 1.* Causa efficiens est principium per se, à quo primò est, aut fit mutatio, & quies.

In qua definitione, *Principium*, stat loco generis, reliquæ vero particule sunt appositæ loco differentie, & per eas contradi-

stinguitur causa efficiens à causa finali, quia causa finalis non est illa, à qua est mutatio, & quies, sed est illa, propter quam est motus, aut quies; contradistinguitur etiam per easdem particulas à causa materiali, & formali, quia res naturales non dicuntur fieri à materia, & forma, sed ex materia, & forma, tanquam ex partibus iuxta se componentibus, & constituentibus; Causa verò efficiens est omnino extrinseca effectui, vnde notanter est appositae illa particula, *Vnde*, in definitione Aristotelica, quia per illam particulam denotatur extrinseca causalitas causae efficientis respectu sui effectus.

Dices ex *Ouiedo hic Controu. 9. Punc. I. num 6.* etiam materia est causa extrinseca respectu formae, ergo non bene per assignatam definitionem, & signanter per particulam, *Vnde*, contradistinguitur causa efficiens à causa materiali; aliunde ergo petenda est differentia utriusque causae, nimirum ex eo, quod causa efficiens est principium primum motus, id est, principium determinatum, tale non est materia prima, quae cum sit principium passivum, non est determinatum motus, sed est potius indeterminatum quid, & indifferens ad omnem motum.

Respondeo: quod licet differentia, quam assignat *Ouiedo*, optima sit, & ingeniosa; etiam illa prior à nobis, & alijs Auctoribus assignata, potest defendi, & sustineri, licet enim materia sit extrinseca formae, quia verè non est eius pars componens, tamen est eius intrinsecum subiectum, quia formam intrinsecè recipit, & intrinsecè recipiendo, illam causat.

Replicabis, etiam causa efficiens intrinsecè recipit effectus suos, intellectus enim est causa efficiens respectu suarum operationum, quas tamen intrinsecè recipit, ergo.

Respondeo: intellectum, non quia causa efficiens est, sed quia immanens est, recipere suas operationes; & ideo firmum stat, quod causa efficiens, quia efficiens, non habeat intrinsecè recipere effectus suos; è contrà causa materialis, quia causa materialis est, habet intrinsecè recipere formas. Dixi, quod causa efficiens, quia efficiens, non habeat intrinsecè recipere effectus suos, non quod illi repugnet, intrinsecè recipere effectus suos, quia si hoc illi repugnaret, nulla esset assignabilis causa efficiens, quae reciperet intrinsecè effectus suos, quod enim repugnat generi, repugnat & speciei, est enim primum principium à nobis in Logica explicatum, & ab Auctoribus communiter admissum, quicquid negatur de universalis, negatur, & de quolibet supposito, seu inferiori eius.

Quò

Quò ad diuisionem causæ efficientis.

Diuiditur illa primò : in causam increatam, seu primam, & causam creatam, seu secundam; Causa increata, seu prima, est illa, quæ ita est principium aliorum, vt ipsa non sit ab vilo alio principio, sed à se, talis est Deus. Causa secunda, seu creata, est, quæ cum sit effectus causæ primæ, est tamen principium aliorum effectuum, semper tamen principium cum dependentia à Deo, & à causa prima.

Secundò diuiditur causa efficiens in causam Physicam, & Moralem, causa Physica verè, realiter, & directè insunt in effectum; vt Pater est vera causa Physica respectu filij. Causa Moralis, quæ etiam imputatiua dicitur, non verè per se insunt, sed inducit alium ad operandum certum effectum, ita se habet is, qui consulit, suadet, docet, vel præcipit, impetrat, aut meretur, vel demum alio simili modo se gerit. Ad hoc genus causæ moralis reducitur is, qui est alteri occasio, vt operetur, Causa applicans est, vt cum quis applicat ignem ligno, vt combustio fiat, Causa remouens & prohibens, vt cum quis remouens tabulam, in qua erat superpositus lapis, est causa descensus lapidis, qui aliàs prohibebatur, & impediabatur descendere à tabula; denique causa regulans, & dirigens, seu illuminans, vti se habet omnis sciētia practica, seu ars, ad hoc genus causæ moralis reducitur.

Tertiò diuiditur causa efficiens in vniuocam, & Aequiuocam. Causa vniuoca est, quæ est eiusdem rationis cum effectū, vt ignis cum igne, quem producit, homo cum homine, quem generat; Aequiuoca dicitur, quæ est diuersæ rationis, vt cum Sol generat ignem, metalla, & alia.

Ex quibus colligitur, causam vniuocam esse æqualis perfectionis essentialis cum effectū. Causam verò Aequiuocam non posse esse perfectionis minoris respectu sui effectus, si enim effectus esset perfectior causa, & superans causam in entitate, ergo etiam illam superat in vi, & virtute agendi, sicut enim operari sequitur ad esse, ita virtus operandi sequitur ad perfectionem essendi, atque adeò verè non esset effectus.

Quartò, & vltimò diuiditur causa efficiens in causam Principalem, & instrumentalem. Causa principalis est illa, quæ primario agit, & in virtute propria, vt vnum vinens gignens aliud sibi simile, & ignis produçens alium ignem. Causa instrumentalis est, quæ subordinatur causæ principali, & agit in virtute

eius, vt calor, qui agit in virtute ignis, & semen in virtute generantis.

Ceterum in causa instrumentali, vt sit vere causa instrumentalis, tres conditiones requiruntur. Prima est, vt instrumentum sit aliquo modo proportionatum ad producendum effectum, ad quem assumitur à causa principali, nam ad secandum lignum non assumitur malleus, sed securis, ad scribendum assumitur calamus, non gladius; imò & ad scindendum non satis est, assumere securim quomodocunque, sed debet assumi securis acuta, & dura; non quicumque calamus assumitur ad scribendum, sed calamus conuenienter aptatus, & dispositus.

Secunda conditio est, vt instrumentum sit immediatum principium directè influens in effectum, ità vt ex illo immediate egrediatur actio productiua effectus, per hoc enim contradistinctur causa instrumentalis à conditionibus, quæ tantum indirecte concurrunt.

Tertia conditio est, vt instrumentum accipiat virtutem motiuam à causa principali; sic Artifex imprimit ferræ virtutem motiuam, vel ipsum motum localem; generans tribuit semini vim formatiuam, seu generatiuam; aliquando instrumentum non accipit à causa principali virtutem, sed ipsum instrumentum est virtus causæ principalis, sic calor est virtus ignis; Hinc est, vt instrumentum dicatur agere in virtute causæ principalis, quia nimirum, vel instrumentum accipit à causa principali vim, & virtutem agendi, vel instrumentum ipsum est virtus agendi causæ principalis.

Ceterum causa instrumentalis est duplex coniuncta, scilicet, & separata: Causa instrumentalis coniuncta non potest operari, nisi actu sit coniuncta, & connexa cum causa principali; ità se habent securis ad scindendum, calamus ad scribendum. Instrumentum separatum est, quod operatur, etiam si separatum sit, & longè distans à causa principali; ità se habet semen, quod licet sit separatum à generante, adhuc effectum producit.



LECTIO XIV.

Causalitas causæ efficientis.

OMnibus causis hucusque explicatis assignauimus peculiare, proprias, & distinctas causalitates: debemus ergo etiam, causæ efficienti, quam in præsentī explicamus, propriam, & distinctam causalitatem assignare.

Nominales, qui omnes modos de medio tollunt, negant causalitatem causæ efficientis esse, quid distinctum à causa, & effectu, si enim admitterent hanc causalitatem distinctam, cogerentur etiam admittere, esse aliquem modum distinctum à causa efficiente, & effectu: eūdem Nominalibus sentiant, necesse est, non solum hi, qui modum vnionis negant esse causalitatem materię, & formę, sed etiam illi, qui negant relationem esse modum distinctum à fundamento, & termino, par enim videtur esse ratio de relatione, de vnione, & de actione, quam mox ostendam esse causalitatem causæ efficientis; sequuntur hanc sententiam nonnulli ex Thomistis, *Heruæus quodlib. 2. q. 1. & quodlib. 4. q. 8. Socin. 5. Met. q. 4. Iauellus ibidem q. 4. Fonseca quæst. 13. sect. 3.*

Recentiores communiter ponunt causalitatem causæ efficientis esse modum actionis contradistinctum à causa, & effectu.

Ita *D. Thom. in commentarijs lib. 5. Met. Arist. cap. 15. Magnus Alb. 2. Phys. tract. 2. cap. 6. Suarez disp. 18. Met. sect. 10. nu. 5. Conimb. hic c. 7. q. 7. Ruuius tract. 4. de causa efficiente q. 3. Auerse q. 14. sect. 4. Arriaga disp. 9. sect. 3. Oued. Controv. 12. pun. 1.*

Conclusio sit, causalitas causæ efficientis est modus accidentalis actionis,

Probatur conclusio primò: Auctoritate Philosophi *5. Met. c. 15.* vbi assignat aliquas relationes fundatas in actione, & passione; sed clare patet, has relationes esse fundatas in causalitate agentis ad passum, seu subiectum, ergo causalitas agentis, seu causæ efficientis est actio, seu efficientia.

Probatur secundò conclusio ratione: quia causalitas est illa, qua posita intelligitur causa efficiens actu causans, sed posita actione, & præciso quocunque alio, intelligitur causa efficiens cau-

causans, ergo actio est causalitas; Maior probatur: quia causa efficiens, & agens idem sunt, sed agens, sicuti à sola actione denominatur, ita à sola actione constituitur, & fit agens, seu actu causans, ergo.

Probatur tertio: quia causalitas non potest esse ipsamet entitas causæ, quia sæpè datur entitas causæ, quæ non sit actu causans, sæpè datur homo non actu generans; nec potest esse ipsemet effectus, seu eius dependentia, aut relatio ad causam, quia tam effectus, quam dependentia eiusdem, & relatio sunt quid posterius ad causam actu causantem, & consequenter sunt quid posterius ad causalitatem, ergo causalitas non potest consistere in effectu, aut in eius dependentia, aut denique in ipsa relatione; imò relatio, ut in Logica diximus, in actione ipsa, & causalitate fundatur.

Respondebis: Causalitatem consistere in causa, & effectu simul, seu in coexistentia, & simultate causæ, & effectus, statim enim ac intelligitur causa, & effectus simul, intelligitur actu causans.

Sed contra est: quia producto effectu, & existente causa, hæc non intelligitur actu causans, nam producto, & generato filio, & simul existente Patre, non intelligitur Pater actu generans Filium, ergo actu generare, actu causare, non consistit in coexistentia causæ, & effectus.

Obijcies primo: ipsa actio est effectus, ergo non est causalitas: antecedens patet, quia actio & ipsa fit ab agente, unde habet D. Gregorius in serm. de Spiritu Sancto, actionem magis agi, quam agere, quod etiam approbat D. Damascenus lib. 3. fidei Orthodoxæ.

Respondeo: actionem esse effectum, ut quo, non ut quod, seu actionem esse rationem formalem agendi, non propriè effectum; ratio est, quia non per causalitatem, aut aliam actionem producit, sed seipsa fit ab agente, sicuti unio seipsa vivitur, & non per aliam unionem; ex quibus patet responsio ad auctoritates DD. Gregorij, & Damasceni.

Obijcies secundò: sunt aliqui effectus, qui à suis causis dicuntur resultare, & emanare, sed hi non fiunt per actionem distinctam, sed potius per illam resultantiam, & emanationem, ergo, universalius loquendo, actio non est causa illas.

Respondeo: ipsam resultantiam, seu emanationem esse actionem, sed tamen diversæ speciei à reliquis actionibus; emanatio enim,

enim, seu resultantia est earum formarum, quæ in subiecto extrinseco non recipiuntur, & sunt permanentes, ideo proprietates dicuntur emanare, quæ non recipiuntur in extrinseco subiecto, sed in ea essentia, à qua producuntur; & ex alia parte sunt permanentes; è contrà actus à potentijs non dicuntur emanare, seu resultare, sed elici, quia licet in iisdem potentijs, & non ex intrinseco subiecto recipiantur, tamen non sunt permanentes, sed statim, ac sunt elicti, transeunt, & evanescent.

Obijcies tertio; Deus verè causat, quando creat, sed non causat per actionem, tanquam per causalitatem distinctam, ergo. Minor probatur, quia non potest assignari, in quo subiecto talis actio recipiatur, neque enim talis actio potest recipi in Deo, quia Deus est incapax cuiuscunque accidentis de nouo; neque potest recipi in effectu, quia effectus est posterior actione, deberet autem esse prior, si actionem, tanquam causa materialis, reciperet, quia omnis causa materialis est prior effectu suo.

Respondent aliqui: creationem recipi in effectu creato; qui secundum diuersam rationem est prior, & posterior actione; prior, ut est causa materialis actionis, posterior, ut effectus agentis. ita *Conimb. lib. c. 7. q. 8. ar. 3.*

Respondent alij: creationem recipi in effectu, non tanquam in subiecto inhesionis, sed tanquam in subiecto adhesionis; porro subiectum inhesionis vere causat formam sibi inhaerentem, & ideo debet esse prius illa, sicuti omnis causa est prior effectu suo; subiectum adhesionis non causat formam, quam recipit, sed præcisè ab ea denominatur, sicuti materia denominatur ab anima rationali, quam tamen non causat; inde fit, ut forma à tali subiecto non pendeat, tanquam à priori, sed tanquam à posteriori; quatenus videlicet non potest esse sine illo. Ita *Arriaga disp. 9. subsect. 4. num. 58.*

Essent examinanda plura alia de actione, nimirum, qua ratione distinguatur à passione; an in agente recipiatur; & his similia; sed sufficiat in præsentì explicasse tantum ea, quæ spectant ad actionem, ut est præcisè causalitas agentis.



LECTIO XV.

*A quo determinetur causa ad effectum in individuo
producendum.*

Pono primò: causas secundas, & creatas verè esse naturalium effectuum productivas, & non omnes naturales effectus à solo Deo produci ad præsentiam causarum secundarum; patet enim ad sensum, ignem ab igne produci, solem illuminare, & huiusmodi, vnde benè monet *Arist. lib. 1. Top. cap. 9.* talem causam negantes indigete, aut sensu, aut pœna; ità sentiunt omnes Scholæ, omnes omnium classium Doctores, & Theologi fundati in auctoritate SS. Patrum, & in varijs Sacræ scripturæ locis, in quibus vis agendi, & producendi naturales effectus causis secundis manifestè attribuitur, *Genes. 1. Germinet terra herbam virentem. Lucæ 31. Videte ficulneam, & omnes arbores cum producant iam ex se fructum.*

Pono secundo: Causam primam, & Deum immediatè simul cum causis secundis concurrere ad productionem naturalium effectuum; dixi, immediatè, quia non sufficit concedere, Deum à principio indidisse virtutem actiuam causis secundis, quæ deinde per illam virtutem à Deo acceptam, agant, Deo amplius non concurrente: sed præterea debemus admittere, Deum æquè immediatè concurrere ad productionem naturalium effectuum, ac concurrant causæ naturales, & creatæ. Ità omnes Philosophi, ac Theologi sentiunt; qui propterea, tanquam erroneam damnant: oppositam sententiam *Duran. in 2. d. 1. q. 5. & dist. 47. q. 1.* & ratio reddi potest, quia: res naturales, sicuti se habent ad esse, ità & ad operari, sed res naturales in suo esse, & conseruari, immediatè dependent à Deo, ergo etiam in operari, & consequenter non operantur, nisi immediatè ad illarum operationes simul cum illis concurrat Deus.

Pono terciò: Causas secundas esse ex sua natura determinatas ad producendos hos potius, quàm illos specie effectus, ignis enim de sua natura est determinatus potius ad producendū calorem, quàm frigus; quòd si causa secunda sit libera de se determinatur ad producendū siuè hunc siuè illum specie effectū voluntas, verbi gratia, cum sit potentia omnino libera, seipsa determinatur

natur ad producendum potius actum amoris, quàm actum odij, à quo autem determinatur causa secunda ad producendum hunc potius numero effectum, quàm alium, non vna est omnium Philosophorum Opinio.

Et quidem communis sententia defendit, à causa secunda produci hunc potius numero effectum, quam alium, quia sic est determinata à Deo, quia sic Deus, vult.

Ità Gregor. de Arimino in 1. d. 17. & dist. 25. quæst. 1 art. 1. Aversa tom. 1. Philos. 4. 15. sect. 3. Conimb. 1. Phys. c. 7. quæst. 15. art. 2. Fons. 5. Met. cap. 2. qu. 9. sect. 10. Ruuius tract. 4. q. 9. num. 3. Hurt. disp. 10 sect. 4. Ariaga disp. 1. Met. sect. 3. subsect. 9. Suarez in Met. disp. 5. sect. 3. nu. 34. Ouid. contr. 10. pun. 2.

Altera sententia negat, causam secundam à Deo determinari ad producendum hunc potius numero effectum, quam alium, sed potius causam secundam ex sui natura esse determinatam ad producendum hic, & nunc in his circumstantijs loci, temporis, & subiecti hunc potius numero effectum, quàm alium. Ità Vassq. tom. in 3. p. d. 74. cap. 5. n. 49. Sotus in 4. d. 43. q. 1 art. 3.

Opinioni communi nunquam potui acquiescere, quia recursus ille Anaxagoricus ad causam primam, & ad Deum semper mihi visus est reprehensibilis in Philosophia, cuius proprium munus est, naturalium effectuum naturales causas inuenire, & assignare.

Conclusio sit: Causa secunda ex ipsa sui natura est determinata ad producendum hunc potius numero effectum, quàm alium.

Probatum primò: Ex Arist. 2. Phys. t. 38. vbi manifestè docet, particulares effectus in particulares causas esse refundendos; sunt verba. *Prætered generum genera, & singulorum singula, ut Statuarius statua, & hic huius.*

Probatum secundò: quia quælibet causa habet naturalem vim, & virtutem producendi plures, & plures numero effectus, sed non habet virtutem producendi hos effectus in confuso, & sine debito aliquo ordine, ergo est determinata ex sui natura ad producendos hos effectus seriatim, & ordinatim, ità vt hunc prius, illum posterius producat; Minor probatur, quia natura, vt est ordinis studiosa, & amantissima, nihil facit inordinatè, sed omnia ordinatè disponit, vt habet Arist. 3. de Gen. Animalium cap. 10. *semper, quod secundum naturam est, ordinem habet.* Ergo quælibet causa ex sui natura est determinata

ad producendos plures effectus, quos potest producere, cum debito ordine, & dispositione, ita ut vnum prius, & in his circumstantiis, alium posterius, & in alijs circumstantiis producat.

Confirmatur: quia ordinatè volens, & amans, quamvis vellet, & amare possit plura obiecta, amat, & vult illa ordinatè, ita ut prius amet, & velit seipsum, deinde cetera; sic Deus quia est ordinatè volens, & amans, prius vult, & amat bonitatem suam, deinde vult, & amat creaturas; ut bene probat *Scotus in 2. d. 20. qu. 2. §. Dico*, ergo similiter causa potens producere diuersos effectus, debet posse illos producere ordinatè, & cum aliqua serie, & dispositione, ita ut vnum prius, & in his circumstantiis, alios posterius, & in alijs circumstantiis producat.

Probatut tertio quia: Causa est determinata ex sui natura ad producendum hunc potius effectum in specie, quam alium, ignis de sua natura est determinatus potius ad producendum calorem, quam frigus, ergo etiam ex sui natura est determinatus ad producendum hunc potius calorem, quam alium ex pluribus calotibus, quos virtute continet, & potest producere, inaxime si ad hunc potius numero calorem, quam alium concurrant hæ potius circumstantiæ, quam aliæ.

Confirmatur quia: circumstantiæ loci, & temporis, diuersificant specie, & numero peccata, & constituunt diuersas specie, & numero malitias morales; qui enim sumpta Eucharistia, accedit statim ad concubinam, committit peccatum specie diuersum ab eo, quod committit, qui ad concubinam accedit non sumpta Eucharistia, vel post duos dies à sumpta Eucharistia, similiter & verba inhonesta in loco Sacro prolata, tactus impudici, & aspectus in Ecclesia facti habent specialem malitiam in Confessione aperiendam; ita *Card. de Lugo de Pœnitentia Disputatio. 16. sect. 10.* & communis est sententia de furto in loco Sacro commisso, ac de effusione seminis. Similiter vnitatis, & distinctio numerica peccati externi, licet aliquando sumantur ex sola retractatione interna, aliquando tamen, stante continuatione eiusdem Voluntatis, sumuntur ex vnitatis, & distinctione temporis, & loci, qui enim integro die continuaret in voluntate furandi; prima tamen, & vltima hora illius diei furtum committeret, duo numero peccata externa committeret, ut docet *Merol. 1. disput. 2. Dub. 3. num. 30.* ergo à pari etiam temporis circumstantia suo modo concurrit, ad hoc, ut hic potius numero

mero effectus physicus producat, quàm alius: imò vnitas numerica motus ab vnitate quoque temporis dependet, vt infra videbimus.

Probatur quartò quia: non repugnat causæ naturali, vt sic, se determinare ad hunc potius numero effectum, quàm alium, vt patet in causa libera, ergo neque repugnat causæ naturali necessariò operanti, cui magis videtur congruere, & conuenire esse determinatam ad operandum certum effectum, per hoc enim inter alia contradistinguitur à libera, quia hæc est indeterminata, & indifferens siue ad hunc, siue ad illum effectum ex sui natura, non sic causa necessaria, & mere naturaliter operans, ergo.

Obijcies primò: quando alienius effectus naturalis non inuenitur causa naturalis, peculiaris, & propria, recurrendum est ad causam primam, & vniuersalem, nempe ad Deum, cuius est supplere vicem, & defectum causæ naturalis, sed quòd producat hic numero effectus potius, quàm alius, non potest assignari causa naturalis, peculiaris, & propria, ergo siue vlla reprehensione possumus ad causam primam, & ad Deum recurrere.

Respondeo negando minorem: nam causa naturalis est determinata ad producendum in his circumstantijs hunc numero effectum, & non alium ex his, quos ordinatum, & seriatim continet, nisi velimus admittere naturam aliquid inordinatè facere, & noli.

Replicabis: Causa de se est indifferens ad producendum siue hunc, siue illum numero effectum, equaliter enim omnes continet; ex alia parte quilibet effectus indifferenter est producibilis siue hoc tempore, siue illo, siue in hoc, siue in illo loco, ergo quòd producat hic numero effectus, non in ipsam causam, & loci, temporisque circumstantias, sed in Deum refundi debet.

Respondeo negando antecedens, licet enim causa indifferens sit ad producendum quemlibet effectum ex illis pluribus, quos potest producere, non tamen indifferenter quemlibet illorum siue vltio ordine, & serie producit, sed vnum prius, & in his circumstantijs, alium posterius, & in alijs circumstantijs debet producere: & licet circumstantiæ sint extrinsecæ effectui, tamen intrinsecè respiciuntur à causâ determinatâ ad producendum hunc numero effectum in his circumstantijs, & non alium.

Obijcies secundo: non repugnat Deo concedere hanc virtutem determinandi causam ad producendum hunc potius numero effectum, quàm alium, sed neque repugnat causæ, ut finiat, & permittat determinari, ergo.

Respondeo: hoc Argumento probari de absoluta potentia, posse causam secundam à Deo determinari ad producendum hunc potius numero effectum, quàm alium, sed non probari de facto, ita rem se habere, quia id esset contra naturalem exigentiam naturæ, quæ indidit causis secundis vim naturalem producendi effectus plures, & plures eum aliquo ordine, & dispositione, ita ut aliquos prius, aliquos posterius producat.

Obijcies tertio: Effectus, qui est productus hoc loco, & hoc tempore, æquè potuisset produci in alio loco, & alio tempore, ergo quod producat hic numero effectus potius, quàm alius, non habetur ex circumstantiis loci, & temporis.

Respondeo: effectum productum hoc tempore, & in hoc loco potuisse quidem produci alio tempore, & in alio loco, sed non ab eadem numero causa, quæ de se est determinata ad producendum hunc effectum, & non alium, hoc tempore, & loco, non alio; sed tamen id admitto de absoluta potentia, non naturaliter, & de facto, ut mox explicabo.

LECTIO XVI.

An effectus productus ab una causa potuisset prodci ab alia eiusdem virtutis.

Sensus est, an hic numero calor productus ab igne A. potuisset produci ab igne B., si Ignis B. fuisset eodem loco, & tempore eidem subiecto applicatus. Dixi, hic numero calor, quia idem calor, quia idem calor in specie absque vlla Controversia est producibilis à diversis specie causis, puta, ab Igne, à Sole, & à motu; & sicuti varæ, & diversæ specie formæ possunt eandem specie materiam informare, ita varæ, & diversæ specie causæ efficientes possunt eundem specie effectum producere: ita supra Lect. II. ostendi, calorem Cœlestem à Sole productum, & calorem igneum esse eiusdem speciei, Aurum produci virtute naturali, & virtute Artis Chymicæ; Loquendo igitur de eodem effectu individualiter, & numericè.

Con.

Conclusio sit: Effectus hic numero productus ab hac numero causa, non potuisset produci à causa eiusdem virtutis, etiam si esset applicata in eodem loco, eodē tempore, & eidem subiecto.

Ità *D. Thomas quodlib. 5. art. 8. Cap. in 2. d. 20. qu. 1. Scotus in 4. d. 43. quest. 1. art. 3. Iauel. 2. Physic. d. 4. qu. 8. Pererius 8. Physic. c. 15. Conimb. 2. Physic. c. 9. d. 7. q. 15.*

Contrà *Suarez disp. 26. sect. 5. Ruuium 2. Physic. tract. 7. quest. 2. Auerfam quest. 16. sect. 4. Scotum in 2. dist. 20. quest. 2.*

Probaturs conclusio primò; ex *Arist. 8. Met. 1. 11. si materia diuersa, & mouens, & ipsum, quod factum est; ac si dixisset; si materialis causa, & effectiua est diuersa numero, etiam effectus est numero diuersus, ergo si diuersa sit causa efficiens, quamuis sit applicata eidem materie, seu subiecto, & in iisdem circumstantijs loci, temporis, effectus prodibit numero diuersus.*

Probaturs secundò; quia causa hæc numero, & indiuidualiter accepta continet determinatam seriem, & classem horum numero effectuum à se producibilium, ergo nullus horum effectuum potest produci ab alia causa. Probaturs antecedens, in quo est difficultas, quia causa hæc numero, & indiuidualiter accepta, ideò est hæc numero, & non alia, quia respicit determinatè hos numero effectus, & non alios, licet enim causa in actu primo considerata, & in ratione entitatis, nullam dicat relationem, aut connexionem cum effectu vt dixi *Lect. V.* si tamen accipiatur causa, vt causa, & vt hæc numero, & non alia, respicit determinatè, & signanter hos numero effectus, & non alios, ergo quælibet causa numero continet determinatam seriem, & classem effectuum numero diuersorum à se producibilium.

Probaturs tertio: quia si effectus productus ab hac causa numero potuisset ab alia produci, iam effectus ab illa prima causa non penderet per se, sed per accidens, & consequenter quælibet causa esset causa per accidens, & non per se suorum effectuum, quod est absurdum, ergo.

Confirmatur quia; hic numero effectus est productus per hanc numero actionem, sed hæc numero actio non est, nisi ab hac numero causa, & non alia, vt *Auerfa hic quest. 16. sect. 4. in resp. ad 3. obiect.* vltro concedit, ergo hic numero effectus non potest ab alia causa numero diuersa produci.

Obijcies primò: effectus productus ab vna causa saltem de absoluta potentia potuisset ab alia produci; ergo iam effectus, qui continetur in virtute naturali vnius causæ, potest contineri

in virtute naturali alterius causæ, si Deus ita determinasset, & consequenter hæc numero causa non est ex sui natura determinata ad hos numero effectus, quod enim ex sui natura est tale, neque de absoluta potentia potest aliter fieri.

Respondeo negando consequentiam, licet enim de absoluta potentia ignis B. assumatur ad producendum calorem, qui continetur in virtute naturali ignis A. indè non sequitur, eum calorem contineri in virtute naturali ignis B.; rerum enim naturæ non immutantur, aut destruuntur etiam de absoluta potentia; sed solum sequitur, illum calorem contineri in virtute supernaturali, seu obedientiali ignis B., sicuti enim Deus assumit aquam ad producendam Gratiâ in Baptismo, & tamen non sequitur, eam gratiam contineri in virtute naturali, sed supernaturali, & obedientiali, ita & de calore dicendum est, non contineri in virtute naturali, sed supernaturali, & obedientiali ignis B. cum hac tamen disparitate, quod est quædam proportio inter ignem B. & calorem, quæ non est inter aquam, & gratiam.

Obijcies secundo: effectus, qui à causa vniuersali, & particulari produciuntur, potest à sola causa vniuersali produci, in quo casu produceretur ab illa, tanquàm à causa particulari, ergo ita effectus, qui produciuntur ab vna causa, potuisset ab altera produci: Antecedens probatur quia calor, qui à sole, & igne produciuntur in aqua, potuisset à sole tantum produci, & omnis effectus producibilis à causa prima, & secunda, potest produci à sola causa prima, ergo.

Respondeo; quod idem numero calor, qui produciuntur à sole, & igne, non produciuntur à sole tantum, diuersus est enim calor numero, qui continetur in virtute Solis, & ignis, ab eo, qui continetur in virtute solis tantum, aut ignis tantum. Esto, quod effectus, qui produciuntur à causa prima, & secunda, possit idem numero produci à causa prima, quia virtus causæ secundæ eminenter continetur in prima, quod non verificatur de alijs causis vniuersalibus, quia hæc non continent eminenter virtutes causarum particularium. Addo quod non omnis effectus, qui produciuntur à causa particulari, & vniuersali, potest produci à sola causa vniuersali, nam sol, & homo generant hominem, qui tamen à sole tantum non potest generari.

Obijcies tertio: causa æquiuoca, verbi gratia, ignis continet in virtute calorem, & calor, tanquam causa vniuoca continet in virtute alios, & alios calores numero diuersos à se producibiles, ergo causa æquiuoca, putà ignis potest producere omnes alios

alios calores, quos in virtute sua continet causa vniuoca, potuisset produci à causa æquiuoca.

Respondeo: Argumentum hoc bene concludere in casu proposito, & quando causa æquiuoca in virtute continet causam vniuocam, vt etiam supra dicebamus de causa prima respectu causæ secundæ; at quando causa æquiuoca in virtute non continet causam vniuocam, argumentum non concludit, sic sol est causa æquiuoca respectu hominis, qui tamen à sole tantum non potest generari, & produci, quia sol eminenter non continet virtutem generatiuam hominis.

Alia argumenta minoris efficaciz, & roboris opponunt nobis Aduersarij, quæ tanquam inefficacia ad probandum intentum reiiciunt *Auersa loco cit. Suarez disput. 26. sect. 5. Ruuius ubi supra.* quamuis hi auctores contrariæ sint sententiæ.

LECTIO XVII.

An idem numero effectus possit esse simul à duabus causis totalibus eiusdem generis.

Premitto: Certum esse, eundem numero effectum non solum posse, sed etiam debere procedere à pluribus causis diuersi generis, puta à materiali, formali, finali, & efficienti; ideo solum est questio de duabus, vel pluribus causis eiusdem generis, puta à duabus causis finalibus, vel materialibus, aut etiam efficientibus; sanè præsens difficultas præcipuè est de causis efficientibus.

Et quidem si efficientes causæ sint pattiales, & non totales, possunt duæ, imò & plures ad eundem numero effectum concurrere, vt patet in duobus, vel pluribus hominibus trahentibus nauim. Similiter, si causæ efficientes sint subordinatæ, vel vna vniuersalis, altera particularis, vna remota, altera proxima, certum est, quòd possint eundem numero effectum producere, vt patet de causa prima, & secunda; de sole, & homine, à quibus generatur homo.

Præmitto secundò: nomine causæ totalis, & adequatæ venire causam; quæ se sola habeat sufficientem virtutem ad producendum totum effectum; ideoque altera causa non indigeat ad eundem effectum producendum; è contrà nomine causæ partialis,

& inadæquate intelligitur illa, quæ se sola non habet totam virtutem ad producendum effectum; primo modo se habent duo ignes eiusdem speciei in ordine ad eundem numero calorem; secundo modo se habent duo homines nauim trahentes.

Præsens quæstio procedit tum de facto, & naturaliter, tum de possibili, & per absolutam Dei potentiam.

Conclusio prima sit: de facto, & naturaliter non potest idem numero effectus esse à duabus causis efficientibus simul adæquatè concurrentibus.

Ita *Auers. tom. I. Philos. qu. 14. sect. 5. Arriaga disp. 8. sect. 10.* qui & asserunt esse sententiam communem inter Recentiores.

Contrà *Nominales Ocham in 3. qu. 1. & quodlib. 4. quæst. 14. Adamum in 3. d. 1. quæst. 1. Gabriel. in 3. d. 1. q. art. 2. dub. 3. & alios plures.*

Probatur Conclusio posita communi argumento, quia vnus numero effectus sufficienter per vnâ numero causam produci-
tur, ergo altera est superflua, otiosa; natura autem, sicuti non deficit in necessarijs, ita abhorret à superfluis, teste Philosopho
1. de Gen. Animalium cap. 4. t. 20. natura, rem quamcunque facit, quia necessaria est.

Dices: potest quis ob duos fines totales, verbi gratia, propter sanitatem, & propter recreationem, eligere deambulationem; sicut ait *Arist. lib. 2. de Partibus animalium cap. 16. nu. 50. Linguam natura homini dedit idoneam ad duplicem actionem, nimirum ad percipiendos sapes, & ad formandum sermonem, sic etiam labia, tam sermonis, quam tutela dentium gratia adhibuit.*

Respondet *Arriaga loco sup. cit.* reiectis aliorum responsionibus, in materia de superfluitate non valere argumentum à rebus Physicis ad intentionales, licet enim repugnent duæ quantitates, duæ vbicationes, & duæ actiones, quia otiosæ, non tamen repugnant duo actus amoris de eodem obiecto, aut etiam duæ intellectiones; ratio est, quia quantitas requiritur, vt subiectum sit extensum; vbicatio, vt corpus sit in loco, actio, vt effectus existat, sed ad hos effectus existat, sed ad hos effectus sufficit vna quantitas, vna vbicatio, vnica actio, ideo altera esset superflua: at verò actus vitales non eliciuntur præcisè propter obiectum, sed propter perfectionem potentia, ideo licet obiectum sufficienter attingatur per vnum actum adhuc tamen, non superflue alter actus eligitur, inseruit enim ad perficien-
dam

dam eam potentiam, à qua elicitur; sicut ergo idem obiectum potest amari diuersis actibus, ita potest imperari ob diuersos fines absque nota otiositatis.

Sed contrà hanc responsionem est quia; idè idem obiectum potest amari diuersis actibus, quia hi ordinantur ad perficiendam potentiam, sed duo aut plures fines non perficiunt potentiam, nec alium effectum præstant, ergo omninò otiosè, & superflue idem obiectum ob duos, aut plures fines imperatur.

Respondeo igitur: eam electionem non respicere duos illos fines, tanquam fines adæquatos, sed tanquam fines inadæquatos in actu secundo; esto quilibet eorum sit adæquatus in actu primo, & de se sufficiens ad terminandam eam electionem, vnde quolibet eorum deficiente, adhuc esset electio deambulationis.

Quòd si dicas cum *Arriaga*, ibi interuenire duas electiones tendentes ad eandem ambulationem ob duos illos fines.

Adhuc respondeo, eam ambulationem habere pro fine inadæquato, quemlibet eorum in actu secundo, quamvis in actu primo quilibet eorum sit finis adæquatus illius ambulationis, eadem enim militat ratio de actu interno electionis, & de actu externo deambulationis respectu ad illos duos fines.

Conclusio secunda: de absoluta potentia idem numero effectus potest esse à duabus causis totalibus.

Ita *Caiet. 1. part. quest. 52. art. 3. Fons. 5. Met. cap. 2. quest. 15. Suarez disp. 26. sect. 4. Ruuius 3. Phys. tract. 7. quest. 1. Murcia disput. 4. quest. 7. Auerſa q. 14. sect. 5. Arriaga loco supra cit.*

Contrà *Vasq. 3. d. 29. Capreol. in 2. d. 2. q. 1. & alios plures apud Auerſam ubi supra.* Nonnulli contendunt, eam conclusionem esse contrà *Scotum in 3. d. 4. q. 2.* Sed sanè decipiuntur, quia *Scotus* ibi loquitur de effectu essentialiter dependente à causa, non de effectu quomodocunque, tenet enim ibi *Scotus*, vnam naturam posse subsistere pluribus subsistentijs, & personalitatibus, à quibus natura essentialiter non dependet tanquam à causis; vna subsistentia, & personalitas non potest afficere plures naturas, quia pendet personalitas essentialiter à natura tanquam à causa; ex qua doctrina nò bene inferitur, *Scotum* vniuersaliter sentire, eundem effectum non posse dependere à pluribus causis; solum enim ex ea doctrina deducitur, effectum essentialiter pendentem ab vna causa non posse simul dependere ab

Altera, aliis non penderet essentialiter ab illa prima.

Probat^{ur} Conclusio primò quia: non repugnat eundem numero effectum dependere simul à duplici causa totali, quæ utraque habeat naturalem virtutem producendi eundem numero effectum, vel saltem vna earum habeat vim naturalem, altera vim, & virtutem obedientialem, ergo. Consequentia tenet, quia id solum est denegandum absolutæ potentiae Dei, quod repugnat, aut aliquam contradictionis implicantiæ inuoluit. Antecedens nulla efficaciori ratione probari potest, quàm solutione argumentorum in oppositum. Præterea quia non repugnat, eandem numero materiam informari duabus, aut pluribus formis, sicuti & eandem formam informare duas, vel plures materias, ergo neque repugnat eundem numero effectum produci à duabus, vel etiam pluribus causis totalibus.

Idem antecedens probatur à simili, argumento deducto ex materia Theologica, quia duo, vel etiam plures Sacerdotes possunt, & de facto consecrant eandem Hostiam; duo, vel etiam plures Sacerdotes conferunt idem Baptisma, si simul verba formæ Sacramentalis pronuncient, ergo etiam, saltem de absoluta potentia, duæ causæ totales possunt eundem numero effectum, producere.

Confirmatur quia: de facto vna, & eadem numero anima rationalis, vtpotè indiuisibilis, informat omnes, & singulas partes materiae, ergo iam eadem numero forma recipitur in pluribus numero subiectis, ergo à pari, saltem de absoluta potentia, potest idem numero effectus produci à pluribus causis totalibus.

Replicabis: plures partes materiae non esse causas materiales respectu animæ rationalis, hæc enim non dependet à materia, tanquam à causa; at idem numero effectus habere debet dependentiam à pluribus, tanquam à causis.

Sed contra est quia: anima aliorum perfectorum animalium in probabili sententia ponitur indiuisibilis, & consequenter tota in tota materia, & tota in singulis eius partibus tæquam in adequatis subiectis, ergo iam eadem numero forma dependet à pluribus causis materialibus, & adequatis, simili modo, quo defendo, eundem numero effectum pendere à duabus, vel pluribus causis totalibus efficientibus.

Obijcies primò: si idem effectus produceretur à duobus agentibus, sequeretur simul dependere, & non dependere ab utroque; dependeret ab utroque, quia ab utroque produceretur, vt supponi-

ponitur; non dependeret, quia id dependet ab alio, quod non potest esse sine illo, sed talis effectus posset esse sine hoc agente, quia potest fieri ab alio, & posset esse sine alio, quia fieret ab hoc, ergo posset esse sine utroque, & sic à neutro dependeret.

Confirmatur quia: ad minus sequeretur, quòd quilibet ex his causis esset per accidens, quia à qualibet illarum ita dependeret, ut posset non dependere, & fieri ab illa, sed ab alia, ergo respectu cuiuslibet illarum esset effectus per accidens.

Respondeo: quòd licet ille effectus posset esse sine qualibet illarum causarum, non tamen inde sequitur, quòd non dependeat ab illa, nam & forma materialis potest esse saltem supernaturaliter sine materia, uti etiam quantitas, & quodlibet aliud accidens, & tamen non licet inferre, quòd à materia non dependeat; anima rationalis etiam naturaliter potest esse sine materia, & tamen non valet inferre, quòd non dependeat aliquo modo ab illa; sicut enim non omne, quod non potest esse sine alio, dependet ab illo, ut patet quia, in diuinis Pater non potest esse sine Filio, & tamen non dependet à Filio, omnis enim dependentia importat imperfectionem, quæ non est in Patre respectu Filij in diuinis; ita non omne, quod potest esse sine alio, per necessariam consequentiam debet inferri, quòd ab illo non dependeat.

Ad confirmationem dico: quamlibet illarum causarum posse dici causam per accidens, tum quia non est pars intrinseca illius, effectus, sicuti sunt materia, & forma respectu compositi, cuius sunt pars intrinseca, & simul causa, tum quia quilibet illarum non concurrit sola, sed simul cum altera, sed tamen non posse, dici causam per accidens, quasi non influat esse, & det esse effectui, sed potius se habeat, ut remouens prohibens: in hoc ultimo sensu non potest quilibet illarum causarum dici causa per accidens; sicuti nec causa secunda potest dici causa per accidens respectu effectus, ad quem concurrit simul cum causa prima, ita ut etiam possit se sola concurrere causa prima ad illum effectum.

Obijcies secundò: Ideò naturaliter idem numero effectus non potest produci à duabus causis, quia effectus ex sua natura non indiget altera illarum, sed Deus naturas rerum non potest immutare, ergo de absoluta potentia fieri non potest, quòd effectus ab utraque producat.

Respondeo: quòd quando effectus ab utraque causa produci-

tur, non indiget utraque, nec per absolutam Dei potentiam, ut effectus indigeat ea causa, à qua producitur, qua antea non indigebat; plura enim sunt de absoluta Deipotentia præter exigentiam, & indigentiam naturalem rerum; nam respectu diuinæ omnipotentie, non attenditur indigentia, vel exigentia naturalis rerum, sed implicantia, aut repugnantia ad hoc, ut dicatur posse fieri de absoluta potentia.

Obijcies tertio: si duæ causæ totales producerent eundem numero effectum, concurrerent duplici actione solo numero distincta, quæ reciperetur in illo effectui producto, tanquam in subiecto, sed duo accidentia solo numero diuersa, maxime si præstent eundem numero effectum; non possunt esse in eodem numero subiecto, accidens enim indiuiduatur à subiecto, ergo.

Confirmatur quia; causa adequata ea est, quæ neque excedit effectum, nec ab illo exceditur, sed statim, ac effectui produceretur à duabus causis totalibus, & adequatis, iam effectus excederetur ab illis causis, ergo.

Respondeo: non esse absurdum de absoluta potentia, duo accidentia solo numero diuersa reperiri in eodem numero subiecto, etiam si præstent eundem numero effectum, quia in hoc nulla est repugnantia, sed solum superfluitas, & otiositas alterius eorum accidentium, quæ respectu absolute Dei potentie non attenditur, accidens autem indiuiduari per subiectum conceditur à Thomistis, non ab alijs Auctoribus.

Ad confirmationem dico: Idem argumentum posse urgeri de corpore existente in duobus locis adequatis, quia à quolibet illorum excederetur; Respondeo: igitur, causam adequatam hic non sumi in eo sensu, quo dicitur obiectum adequatum scientiæ, quod scilicet, non excedit scientiam, nec ab illa exceditur, sed dicitur causa adequata, quia sola est sufficiens ad producendum totum effectum.



LECTIO XVII.

An sit possibilis Reproductio effectus.

IN duplici sensu procedit præsens difficultas; primò quidem naturali vi, & virtute naturæ. Secundò per absolutam Dei potentiam. Iterum ista difficultas æquè procedit de effectu permanente, ut calor, ac de effectu successiuo, ut hora, dies.

De reproductione in primo sensu.

Conclusio est: Virtute naturali non potest ullus effectus corruptus reproduci.

Ità *Communis sententia* contra *Aureo.* apud *Caprol. in 4. Scotum in 4. d. 34. qu. 2.* & sanè *Scotus* non defendit, omnem, proflus effectum corruptum posse reproduci, sed aliquem, imò *Scotus qu. 3.* impugnât sententiam *Platoniorum* asserentium per circuitus temporum; idest, post triginta sex millia annorum redire eadem, quæ erant antea; impugnât, inquam, ex *Sacris Scripturis*, vsurpans illud *Psal. II. In circuitu impij ambulat*, idest, dicunt reditione, circulares, & denique concludit, eam sententiam esse contra *Fidem*.

Sic explicata Conclusio probatur, non quidem demonstratione aliqua Mathematica, sed ratione probabili, quæ non protectuum, sed docile ingenium philosophantis ingenium, facile moueat, & persuadat: etenim omnino impossibile est, omnium habere demonstrationem, & ignorantia est, nescire, quorum oporteat querere demonstrationem, & quorum non; *Arist. 4. Met. cap. 4. t. 10.*

Ratio igitur, quæ communiter adduci solet, est, quia natura intendit meliorem, & potiorem, imò & optimum modum operandi, sed optimus modus operandi est, noua, semper producere; non vetera reficere, ergo. Minor de se patet; Maior probatur ex *Aristotele* varijs suæ doctrinæ locis, præcipuè verò de *Gen. Animalium cap. 4. t. 20. Natura rem quancumque facit, aut quia necessaria est, aut quia melius illa est*, & lib. de *Gen. Animal. gressu t. 20. natura nihil frustra machinatur, sed in ijs, quæ fieri possunt, ad id respicit, quid potius sit, & melius.*

Probatur secundò quia Causa naturalis de sui natura est determinata ad producendum hunc potius numero effectum, quam

quàm alium; in his potiùs circumstantijs, loci, & temporis; quàm alijs, sed est impossibile naturaliter, quòd redeant eadem circumstantiæ, præcipuè verò, quòd redeat idem tempus, tempus enim non distinguitur à motu Cœli circulari, qui idem redire non potest, vt vltro admittit Scotus loco vbi suprà, arguens contrà sententiam Platoniorum, ergo. Maior patet ex dictis suprà, & præterea ex *Arist. 5. Physic. cap. 3. per totum*, vbi fuisse probat ad vnitatem motus requiri vnitatem temporis.

Probatur tertio Auctoritate *Arist. 2. de Gen. quorum substantia perit, non reuertitur eadem numero, & 5. Physic.* loquens de sanitate, docet; *non redire eandem numero.* In Prædicam. à priuatione ad habitum non datur regressus.

Obijcies primò: non potest assignari ratio, cur natura nequeat aliquid idem numero reproducere, ergo. Probatur antecedens in agente, cuius sit continuata actio respectu effectus producti, si enim Sol in primo instanti A. ponatur producere radium, & aliquo tempore illum vsque ad vltimum instans, C. verbi gratia, continuare; erit idem numero radius, tam in primo, quàm in vltimo instanti, quia illa identitas numerica radij non dependet à seipso, vt in primo instanti A. nec dependet ab intermedio tempore, ergo si hoc tempore intermedio supponatur esse corruptus ille radius, adhuc esset idem numero in vltimo instanti C.

Respondeo: quòd sicuti illa interruptio facit, quòd non sit idem numero motus, seu actio; ità etià facit, quòd non sit idem numero radius; vt enim infra dicemus, & ex *Arist.* notauimus suprà, vnitatis temporis requiritur ad vnitatem motus, & ad vnitatem effectus moralis.

Obijcies secundò. Auctoritatem Philosophi 8. *Met. cap. 3. vbi Materia est eadem, agens idem, effectus quoque idem erit*, sed potest dari casus, in quo sit idem agens, vt de se patet, & eadem materia, licet enim ad corruptionem effectus, illius materia, vt plurimum dispergatur, & diuidatur, tamen aliquando potest conseruari eadem materia, vt si intrà vas vitreum, conseruetur ignis, qui corrumpatur in aerem, potest ex illo aere ex reflexione radiorum Solis, vel aliter, generari ignis, in quo casu materia erit eadem, ergo.

Respondeo, locum illum *Arist.* ità communiter citari ab Auctoribus, sed nec verè, nec fideliter, nam 8. illo libro *Met. c. 4. num 3.* habet ità, *etenim si materia diuersa, & mouens, & ipsum*

sum quod factum est : esto igitur , quòd ad diuersitatem effectus sufficiat diuersitas materię , & agentis ; non tamen valet , quòd è contrà ad vnitatem sufficiat vnitas materię , & agentis ; plura enim requiruntur ad vnitatem , quàm ad diuersitatem , quia vnitas comparatur bono , diuersitas malo ; bonum autem est ex integrâ causâ , malum ex vnicò defectu .

Obijcies tertio : Materia retinet appetitum ad formam corruptam , ergo nè frustrâ sit talis appetitus , debet admitti ; quòd sit impossibilis reproductio formę naturaliter .

Confirmatur quia ; *Arist. in suis problem. refert* , Muscas quasdam mortuas calore Solis reuiuiscere , & Lib. de admirandis audicionibus refert , quosdam fontes esse , quorum in alterum , si immergatur Animal , motitum , in alterum , reuiuiscit , ergo ians naturaliter datur reproductio eiusdem numero effectus .

Resp. in materia non esse appetitum ad formas corruptas ; vel etiam si admittantur in materia primâ esse talem appetitum , & impossibilem esse naturaliter reproductioem , adhuc tamen talis appetitus non esset frustrâ , quia esset explebilis per operationem agentis supernaturalis .

Ad primam partem Confirmationis de Muscis dico : eas Muscas non fote mortuas ; sed mortificatas ; ad alteram partem similiter dico , me fuisse testem oculatum , & Puteolis propè Neapoli vidiſſe , canem immersum in alterum eorum Fontium non fuisse omninò mortuum , sed mortificatum , sed morti proximum ; sed inde extractum , salutem pristinam recuperasse ; alterum verò canem in eundem fontem immersum , penitus interijſſe , absque vlla prorsus spe vitę , & salutis recuperandę .

De Reproductione in altero sensu , & per absolutam Dei potentiam .

Conclusio meâ est ; Potest de absoluta potentia effectus corruptus idem numero reproduci .

Itâ est *Communis sententia Catholicorum* .

Contrâ *Hæreticos negantes articulum Fidei de Resurrectione Mortuorum* .

Probatur Conclusio primò quia : Idem homo mortuus in die Iudicij resurget , & reprodacerur , vt est de Fide , sed eadem , est ratio de honore , & reliquis effectibus , ergo .

- Probatur secundò quia : non implicat reproductio eiusdem numero effectus , vt parebit ex solutione Argumentorum , ergo de absoluta Dei potentia possibilis est reproductio eiusdem numero effectus ,

Dices primò : Ad præteritum non est potentia; ergo effectus corruptus iam, & præteritus non potest reproduci. Antecedens suadetur ex *Arist.* 6. *Ethicorum*, ubi approbat dictum Agatonis, rectè ait, hoc solo priuatur Deus, ingenerata facere, quæ facta sunt, ergo non potest præterita reproducere, aliàs præterita non solum non essent præterita, sed etiam essent præsentia.

R. spondeo : Deum non posse facere, quòd præterita non sint præterita, & quòd facta non fuerint, sed simul cum hoc stat, quòd possit facere præsentia.

Dices secundò : si pars præterita temporis reproduceretur; simul esset cum parte præsenti temporis, ergo iam essent simul duæ partes temporis, sed hoc repugnat enti essentialiter successui, cuius partes vna debet esse essentialiter post aliam, ergo.

Respondeo : quòd reproducta parte præterita, impediretur, ne fluere pars præsens, & sic non datur casus, quòd sint simul duæ partes temporis.

Alia argumenta, quæ articulum Resurrectionis mortuorum videntur impugnare, soluta sunt à nobis supra Disp. 1. Lect. 10.

LECTIO XIX.

An causæ possint esse sibi inuicem causæ.

Causas esse sibi inuicem causas docet *Arist.* hic cap. 3. r. 30. quædam verò vicissim sibi sunt causæ, ut exercitatio boni habitus, & hic exercitationis, sed non eodem modo, at ille ut finis, hæc ut principium motionis, ubi nomine boni habitus intelligitur sanitas, seu valetudo. Eandem doctrinam repetit 5. *Met.* cap. 2. r. 2. accidit inuicem causas esse, ut laborare bonæ habitudinis, hæc uerò laborandi, non tamen eodem modo, sed hæc quidem ut finis, illud uerò ut principium motus.

Hæc Aristotelis Doctrina diuisit Philosophos in duas Classes.

Prima est eorum, qui traditam ab *Arist.* Doctrinam extendunt, & ampliant ad causas materialem, & formalem, volunt enim materiam esse causam formæ, & formam esse causam materię; ità *Thomistæ* omnes, qui cum velint, materiam accipere existentiam à formâ, quæ etiam in existendo dependet à mate-

ria, consequenter defendunt, materiam, & formam esse sibi inuicem causas quò ad earum existentias, non minus, ac sunt sibi inuicem causæ, finalis, & efficiens, ità *Ioannes d. S. Thomas. 1. Philosoph. qu. 10. art. 4. Ruuius hic tract. 8. qu. 2. qui alios citant, & referunt.*

Altera Philosophorum Classis; verba Aristotelis intelligit ad literam, & vult solum causas, efficientem, & finalem esse sibi inuicem causas, non quidem secundum eandem rationem, sed secundum diuersas, ità vt causa efficiens causet finalem quò ad existentiam, finalis verò causet efficientem non quò ad existentiam, sed quò ad causalitatem, & operationem, ità *Auersa t. 1. Philosoph. q. 16. sect. 7. Conimb. 2. Phys. cap. 7. qu. 1. I. art. 2. Arriag. disp. 8. Physio. sect. 2. Ouid. Contr. 8. pun. 9.*

Traditur autem ab his Auctoribus optima, & generalis regula ad iudicandum, quæ causæ, & quomodo possint esse sibi inuicem causæ; est autem; quando sunt duæ causæ diuersi generis, quarum vtraque ad causandum non prærequirit realem existentiam, tunc possunt esse sibi inuicem causæ; at verò quando vtraque causa ad causandum prærequirit realem existentiam, non possunt esse sibi inuicem causæ; hinc materia, & forma non possunt esse sibi inuicem causæ, quamuis sint diuersi generis; dico, diuersi generis, quia certum est, causas eiusdem generis non esse inuicem causas, neque enim materia ab alia materia, nec forma ab alia forma, aut denique efficiens ab alia efficiente vicissim causatur: Si verò ad causandum vtraque causa existentiam non prærequirit, optimè possunt causæ esse sibi inuicem causæ; vt patet in causis efficiente, & finali; licet enim causa efficiens ad causandum realem existentiam prærequirit, non tamen causa finalis.

Conclusio sit: Causæ non possunt esse sibi inuicem causæ, si vtraque ad causandum prærequirit realem existentiam.

Probatur à nonnullis, quia idem esset causa suimetipsum, quod enim est causa causæ, est etiam causa causati, ergo si A. produceret, B, & B. produceret, A. iam A. produceret A.

Sed ista ratio non est efficax: quia ex ea solum sequitur, quòd idem esset causa remota suimetipsum, at causa remota verè non est causa, vt præter *Hurt sup. cit. notat Ruuius hic tr. 7. qu. 1.* nam etiam, Deus est causa hominis, homo est causa peccati, & tamen non sequitur, quòd Deus sit causa peccati.

Probatur efficaciter quia: *Arist. locis supra cit.* ità asseruit, cau-

causas esse sibi inuicem causas, vt deinde eam doctrinam exam-
plificauerit in genere causarum, quarum vtraque ad causandum
non prærequirit realem existentiam, ait enim, laborare est cau-
sa bonæ habitudinis, & hæc laborandi; comparantur autem hæc
causa efficiens, & finalis; finalis causa non prærequirit realem
existentiam, sed intentionalem, & obiectiuam, vt est planum, &
certum.

Probatur secundò quia: Inintelligibile est, causam realiter
existere in aliquo priori antè effectum, & tamen accepisse exi-
stentiam ab effectu nondum existentes; nihil enim potest accipe-
re existentiam ab alio non existente, nàm vt bene ait *Arist.* 4.
Met. cap. 4. t. 16. ea, quæ non sunt, quoniam pacto, aut loquen-
tur, aut ambulabunt?

Similiter causa, vt causet effectum, iam debet præsupponi in
aliquo priori realiter existens, ergo non potest deinde accipere
illam existentiam ab effectu, ergo inintelligibile est, causam
præquirere in aliquo priori realem existentiam ad effectum, &
tamen illam accipere ab effectu, tùm quia effectus non supponi-
tur existens, tùm quia iam in causa supponitur ea existentia, quæ
aliàs ab effectu esset accipienda.

Respondebis primò: Causam ab effectu non accipere exi-
stentiam, sed accipere aliquid aliud, putà, vel causalitatem, vel
aliquam aliam qualitatem disparatam, atque diuersam, ità Pa-
ter producit, & generat Filium, à quo potest accipere sanita-
tem, honores, aut diuitias: ità causa efficiens accipit à causa
finali, non realem existentiam, sed causalitatem, sicuti enim
causa efficiens, causat finalem quò ad existentiam, ità finalis
causa causat efficientem, non quò ad existentiam, sed quò ad
causalitatem.

Sed contrà est, quia quando filius causat sanitatem, honores,
aut diuitias in Patre, non dicitur causare Patrem, & dare illi
eam existentiam, quæ in aliquo priori requiritur, & præsuppo-
nitur in Patre; sicuti, nec causa finalis dicitur causare efficien-
tem, si propriè loqui velimus, sed potius causare eius causalita-
tem, quæ in causa efficiente iam præsupponitur realiter existens;
è contrà, quia eius causalitas, & operatio non præsupponitur
existens, ideò talis existentia habetur beneficio cause finalis,
non quidem elictiue, sed effectiue, sed motiue, & obiectiue
concurrentis; effectiue enim talis operatio, & causalitas est ab
ipso efficiente. Do igitur vniuersaliter, posse effectum suæ
causæ

causæ dare omnia ea, quæ non præsupponuntur in causa antè existentiam effectus.

Replicabis: ipsa causalitas efficientis præsupponitur ad causam finalem, hæc enim non producit, nisi media causalitate, ergo causa finalis non potest dare existentiam causalitati causæ efficientis, nec causam efficientem causare quò ad causalitatem.

Sed contrà est quia: talis causalitas causæ efficientis præsupponitur ad causam finalem, ut realiter existentem, sed non præsupponitur ad illam, ut obiectiuè, & intentionaliter existentem, causa enim finalis, quia causat mouendo intentionaliter, & obiectiuè, non debet realiter præexistere, ut causet efficientem, quò ad eius causalitatem, & operationem, sicuti neque debet realiter præexistere, ut causet media, quibus ipsa causa finalis producit, & accipit realem existentiam, ac proinde media, & finis etiam secundum eandem rationem, & secundum existentiam se inuicem causant, dummodò illud altè retineamus, non prærequirere finem ad causandum realem existentiam.

Respondebis secundo: Tàm materia, quàm forma ad capiendum requirunt realem existentiam, & tamen sunt sibi inuicem causæ, quia materia causat formam recipiendo, & sustentando; rursus forma causat materiam informando, & perficiendo. Imò materia est causa formæ quò ad existentiam, non enim potest existere materia, nisi existat forma, & rursus forma est causa materiæ quò ad existentiam, non quia forma det existentiam materiæ, ut volunt *Thomistæ*, sed quia saltem naturaliter non potest existere materia sine forma, ut admittit *communis sententia*.

Sed contrà est, quia materia, ut vera causa subiectiua formæ, in aliquo priori naturæ existit, & intelligitur existere antè formam, quam recipit, & sustentat; at forma, non debet in aliquo priori naturæ existere, aut intelligi existere ante materiam, quam actuat, & informat, sed sufficit, si intelligatur in aliquo posteriori aduenire materiæ, ut reuerà aduenit; neque enim forma est causa materiæ, ut contendunt *Thomistæ*, sed potius est causa compositi. Ad id, quod dicitur de existentia; Fateor, materiam non posse existere sine forma, nec formam sine materia, sed tamen materia in existendo non dependet à forma; tanquam à causa dante existentiam, sed tanquam ab effectū, & in posteriori; ut probauimus *Disput. I. Lect. 6.* è contrà forma dependet à ma-

à materia tanquam à causa, & à priori.

Respondebis tertio : cùm *Ioanne de S. Thoma loco cit. nulla causa debet in aliquo priori temporis esse existens antè effectum suum*, sufficit enim si causa sit simul, & concomitanter cùm effectu suo ; nam simul cùm ista simultanea, & concomitanti existentia reali, & temporis, est prioritas naturæ in causa respectu effectus, est enim prioritas naturæ, prioritas independentiæ, quæ benè potest esse inter ea, quæ simul existunt, & concomitanter se habent ; materia ergo, & forma simul existunt, concomitanter se habent, sed quia sunt inuicem dependentes secundum diuersam rationem, materia, scilicet, recipiendo, & forma actuando, ideò sunt sibi inuicem causæ.

Sed contra quia, vt benè aduertit *Arriag. hic disp. 3. sect. 6. subsect. 4.* prioritas naturæ non dicit solam independentiam, appropinatio enim est independens à calefactione, & tamen non est prior naturæ ; requiritur ergo ad prioritatem naturæ, præter independentiam, vt vnum sit causa alterius, & possit intelligi in aliquo priori existens antè effectum, nam sicuti ea sunt simul natura, quæ habent subsistendi consequentiam, ita ea sunt priora natura alijs, quæ non habent subsistendi consequentiam, quia nimirum possunt, aut existere, aut intelligi existere sine alijs. Sed materia prima in sententia *Thomistarum*, nec existit, nec potest intelligi existere sine forma, ergo non est prior natura forma, neque habet eam prioritatem, quæ requiritur in causa ad causandum.

Respondebis quarto : duæ manus calidæ mutuò se calefaciunt, & calorem conseruant : duæ manus frigidæ mutuò se calefaciunt ; duo baculi mutuò se sustentant, ergo iam datur mutua causalitas inter duas illas manus, & duos baculos.

Sed contra est : quia in primo casu, quando duæ manus calidæ mutuò se calefaciunt, id non accidit, quia producant calorem, sed quia resistunt contrario ; & dato, quòd calorem producant, ita quælibet ex illis supponitur existens, vt non accipiat existentiam ab altera ; in secundo casu, calor ille producitur à motu, non à manibus ; nec in vtraque manu est vnus numero calor, sed duplex numero, sicuti sunt duæ manus, denique in tertio casu, duo baculi mutuò se sustentant resistendo grauitati, quæ deorsum illos vrgeret, & inclinaret.

LECTIO XX.

De casu, fortuna, fato. & Monstris.

Casus, Fortuna, & fatum ad causam efficientem reducuntur, quia casus, & fortuna sunt causa per accidens quamplurimum effectuum naturalium, qui propterea dicuntur effectus casuales, & fortuiti, seu effectus per accidens; Monstra quoque sunt effectus per accidens, quia per accidens voliti, & intenti à natura. Denique fatum ob sui immobilitatem, videtur omnino opponi fortunæ, quæ rota fluxa est, & variabilis.

De fortuna antiqui, ut de quodam divino numine sentiebant, & loquebantur, vnde illud *Iuven. Saty. 10.*

Sed te

Nos facimus, fortuna, deam; cæloque locamus. Illòs redarguunt *D. Augustinus lib. 4. de ciuit. Dei cap. 18. Laſtantius lib. 3. cap. 28. & 29.* & demum hæc sententiâ è Scholis Philosophorum, & Theologorum omnium explosa est.

Recipitur tamen communiter definitio fortunæ, quam tradidit *Arist. hic c. 5.* quòd sit causa per accidens in ijs, quæ ob aliquem finem ex electione operantur. Sic fodiens terram, inuenit thesaurum, viperam, aut carbonem, idèòque dicitur causa per accidens, & fortuita respectu inuentionis Thesauri, Vipere, aut Carbonum, fossor enim non eo fine aggressus est fodere terram, ut Thesaurum inueniret, sed alia erat eius intentio, alius finis, idèò inuentio Thesauri est effectus per accidens, & fortuitus respectu fossoris, aut fodientis terram.

Casus differt à fortuna per hoc, quòd casus reperitur in Agèntibus, etiâ inanimatis, & nò intellectualibus, hinc casus lapidis suo pondere deuoluti est causa per accidens, & casualis, infligti vulneris Socrati prætereunti; vnde patet latius patere casum, quàm fortunam: hæc enim in solis agentibus intellectualibus, seu ex electione reperitur; ut m. bene hic habet *c. 6. t. 69. Arist. neque inanimatum ullum, neque bellua, neque infans, quæ delectum non habent, quippiam agunt eorum, quæ fortuna eueniunt*

Dices, Proræchus fortunatos dixit lapides, à quibus arx extructa esset, quòd honore afficerentur, cum alij eiusdem generis pedibus consulerentur, ergo.

Respondeo : illos lapides fortunatos dici non propriè ; sed similitudine quadam ; & analogia ; propriè tamen non dicitur, fortunatum, sed casu venisse equum : qui seruatus est, quia venit ; fortunatum propriè dicimus hominem, qui terram fodiens, inuenit Thesaurum, sicuti infortunatum appellamus eum, qui fodiens terram, inuenit viperam, à qua vulnus accepit.

Verum quidem est, quòd respectu Dei, locum non habent fortuna, & casus ; quia, vt benè habet *D. Augustinus lib. 3. de Trinit. cap. 4. nihil in ista totius creatura amplissima quadam, immensaque republica est, quod non de interiori, atque intelligibili aula summi Imperatoris, aut iubeatur, aut permittatur, ergo si nihil euenit præter intentionem Dei, aut iubentis, aut permittentis, nihil respectu Dei fortuitum est, aut casuale.*

Nomine Fati, antiqui intelligebant necessariam, & ineuitabilem naturalium effectuum consequentiam ex naturalibus, necessarijs, & inflexibilibus causis prouenientem, vnde illud.

Volentem ducunt, nolentem trahunt Fata. Seneca in Trag.

Ideò sicuti apud antiquos fortuna putabatur fluxa, & variabilis, irà è contrà fatum inuariabile, & prorsus immutabile credebatur.

Qui benè, & Catholicè sentiunt, nomine Fati intelligunt, ordinem inuariabilem causarum secundarum diuinam prouidentiam exsequentium : seu nomine fati causas secundas intelligunt, prout subordinatas diuinæ prouidentie.

Dices : fatum est causa per accidens, ergo non est ordo, ordo enim est relatio, relatio autem non est effectiua.

Confirmatur quia, *D. August. in Ioannem tract. 27 lib. 5. de Ciuit. Dei cap. 9. & alibi, fatuos appellat eos, qui fatum aliquid esse putant.*

Respondeo ; Fatum non esse ordinem, aut relationem, vt sic in abstracto sumptam, sed esse causas secundas ordinatas, aut etiam subordinatas diuinæ prouidentie,

Ad confirmationem dico : *D. Augustinum intelligendum esse de fato, prout in antiquorum sententia fati nomine intelligebatur causa necessaria tollens libertatem humani arbitrij, in quo etiam sensu D. Gregor. in Homil. 10. Epiphania monet, nè quid Fatum esse, existimemus.*

Denique monstra, & ipsa ad causas per accidens spectant, quia accidunt præter intentionem naturæ.

Definitur ergo monstrum, quòd sit naturalis effectus à recta, & solita

Solita secundum speciem dispositionem degenerans. Dicitur, *naturalis effectus*, quia Artis opera monstra non efficiuntur; dicitur *directa dispositione degenerant*, quia Monstrum fit per errorem, & præter intentionem naturæ, quæ semper perfecta intendit, & ordinat, dicitur etiâ, *solita*, quia quæ frequenter accidunt, non solent monstra appellari, quamvis vitiosa, & perfecta non sint, ita Pygmaei, & Gigantes non solent inter monstra enumerari.

Postremò additur, *secundum speciem*, quia qualibet rerum, & animalium species exigit certa membrorum structuram, & partium lineamenta, vnde quando ab hac dispositione deficit effectus naturalis, aut in totum, aut ex parte, monstrum efficitur, & generatur, exempla effectus naturalis, qui ex parte deficit à naturali sibi debita membrorum structura, adducit *Arist. 4. de Gen. Animalium cap. 3.* sunt autem; Puer, qui capite arietino; ouis, quæ Bubalo; Vitulus, qui capite humano, nati sunt; inter quos referri possunt Arimaspi, seu Monoculi, qui vnum oculum in fronte gerunt: & qui sine ceruicibus oculos habent in humeris, & qui caninis capitibus pro voce latratum edunt, vt refert *Plinius lib. 7. natural Hist. cap. 4.*

Ex toto errant animalia à sibi debita naturali membrorum dispositione, & structura, cum vnum animal in alterius effigiem prorsus declinat; vt si bos agnum pariat, vt Hierosolymis euenisse, refert *Iosephus de Bello Iudaico cap. 12.*

Dices, natura nihil temerè, aut inordinatè agit, ergo non potest aliquid imperfectum, & inordinatum, præter eius intentionem accidere.

Respondeo; Naturam nihil agere temerè, idest, præter sui intentionem, & nihil inordinatum, quando non est impedita, & à primario suo fine non distrahitur; secus quando est impedita, tunc enim à primario suo fine distracta, producit monstrum à se secundariò, & per accidens intentum; ideoque *Arist. 4. de Gen. Animalium cap. 4.* monstra appellat, excursum, & digressionem naturæ; verbi gratia, genitores hominis, tantam futuro fœtui materiam subministrare intendunt, quantum exigit congrua eius generatio; ex accidenti fit, quod vberior, & abundantior materia subministretur, & ideo homo gignitur, vel Giganteæ magnitudinis, vel duo habens capita; e contra si minor, quam fœtus exigit, materia exhibeatur, vel homo generatur exigue magnitudinis, vel cum defectu alicuius membri, vt monoculi, & vnipedes; sæpè ob seminum commixtionem semihoannes, &

semibestiae nascuntur, quod praesertim accidit in Aphrica, ubi opinopiam aquarum, ad vnum Annem plura animalia coueniunt; ibi fit eorum confusio, & comixtio seminum, & plura monstra generantur.

DISPUTATIO III.

DE QVANTITATE,

ET INFINITO.

Tertio Physicorum libro Aristoteles aggreditur corporis naturalis Passiones, & proprietates explanare, & primò quidem agit de Motu, de quo interruptam habet tractationem, nam partim hic, partim quinto libro quae ad motum spectant, explicat. Nos omnia, quae de motu tractat Philosophus, tum hic, tum quinto libro, in ultimam, & quintam Disputationem, reducemus, haec verò praesens Disputatio erit de quantitate, & Infinito.

Et quidē quantitas diuiditur primò in finitam, & in infinitam; illa est, quae habet terminos, à quibus finitur, limitatur, & circūscribitur; infinita est, quae nullos habet terminos à quibus finiatur; iterum quantitas finita diuiditur in continuam, & discretam. Continua est, cuius partes sunt adinuicem continuatae, & unitae, ut lignum quadrupalmare: discreta, cuius partes sunt discrete, & diuise, ut numeri: quantitas continua dicitur magnitudo, sicuti discreta, dicitur multitudo: subdividitur quantitas continua in permanentem, & successiuam; illa in re corporea solùm reperitur, haec verò etiam in re spiritali; quantitas successiua est ut motus, & tempus: Denique quantitas permanentis, vel est superficies, vel linea, vel corpus. Caterum superficies, linea, & corpus solet dici trina dimensio: superficies enim est longitudo, & latitudo; linea est sola longitudo: corpus est longitudo, latitudo, & profunditas. Longitudo desumitur ab extremis maximè distantibus, profunditas ab extremis minimè distantibus; denique latitudo

titudo desumitur penes extrema medio modo distantia, quare longitudo est dimensio omnium maxima. profunditas omnium minima: latitudo est dimensio maior profunditate, minor longitudine: Huic quantitati, seu trine dimensiononi opponitur punctum, idest, indiuisibile, quod caret omni illa trina dimensionione. Disputatio hæc erit de quantitate continua permanente, & de infinito.

LECTIO I.

Ratio formalis quantitatis assignatur,

S Vpono primò: quantitatem esse accidens omninò realiter distinctum tum à substantia, tum à reliquis accidentibus; hæc est communis doctrina contrà Nominales, & alios paucos, quos citat *Auerſa. tr. 1 Philo. q. 22. sect. 1.*

Suadetur doctrina communis primò; auctoritate Philosophi, qui tum in Organo de prædicamentis, cap. de quantitate agit de illa tanquàm de prædicamento ab alijs realiter distincto, tum etiam alijs suæ doctrinæ locis. *5 met. c. 1. 3. Phys. 39. et 49. 2. de gen. 52. 3. Met. 17. 7. Met. 1. 8.*

Suadetur secundò: argumento deducto ex materia Theologica quia peracta consecratione, fides docet, destrui substantiam panis, & vini; & tamen ad sensum patet, remansisse eandem quantitatem, quæ erat antea in hostia, hæc .n. apparet eodem modo magna, lata, & rotunda, sicuti erat antea; remanet ergo quantitas panis, destructa, & non remanente substantia panis, ergo substantia, & eius quantitas distinguuntur, realis enim separatio signum est infallibile realis distinctionis. Neque dicas: ibi remanere quantitatem aliorum accidentium; quia data hac responsione, deberet Deus nouo miraculo conseruare ea accidentia sinè quantitate, quæ prout distincta realiter à substantia, & ab alijs accidentibus, ponitur esse subiectum immediatum, & proximum eorum accidentium; imò tot essent multiplicanda miracula de nouo, quot accidentia de nouo producerentur in Hostia consecrata, hæc enim non possunt ab agente naturali produci, sed immediatè à Deo crearentur, essent enina sinè subiecto, sed Communis Theologorum sententia, non plura, quàm necessitas exigit, admittit miracula, ergo talis Responsio non est sustinenda.

Hec dixi contrà *Nominales, et Hurtadum*, qui vt benè notat *Petrus Durille lib.1. Cathegoricothae cap.5.* videtur, sententias Nominalium iam sepultas ab inferis resuscitare. *Hurtado* ex parte adhæret *Arriaga disput.5. Met.sect. 1. subsect. 1.* putat enim quantitatem, saltè à substantia, realiter non distinguitur; mouetur, quia talis distinctio nullo efficaci argumento potest conuinci; sed quot sunt in Philosophia assertiones communiter admittè, quæ efficacibus argumentis, aut demonstrationibus non probantur? etenim omnium omnino impossibilis est demonstratio ex *Aristotel.* sæpius à me citato; sufficiat ergo ad ponendam ream em distinctionem quantitatis à substantia, & reliquis accidentibus ratio à nobis suprà adducta, & explicata, vna cùm communi Philosophorum sensu.

Suppono secundo: Rationem formalem quantitatis desumendam esse ex aliquo eius effectu formali, forma enim accidentalis à suo effectu formali non distinguitur verùm quia essentia rei consistit in priori, & quantitas plures habet effectus formales; certè ille erit ratio formalis, & essentia quantitatis, qui probabitur esse reliquis effectibus formalibus priori; Porro in quantitate hi formales effectus numerantur; diuisibilitas, mensurabilitas, extremitas partium in ordine ad se, extremitas partium in ordine ad locum, denique impenetrabilitas.

Primò ergo nonnulli, ponunt rationem formalem quantitatis consistere in ratione mensuræ, non quidem actua'is, hæc enim potest à quantitate separari, imò & de facto separatur, non enim semper vna mensurat pannum; sed in ratione mensuræ aptitudinalis, per quantitatem enim formaliter habetur, quòd ab vno ente aliud possit mensurari, & mensurare; vbi nomine mensuræ intelligitur id, quo cognoscitur aliud, quantum sit, sic vna mensurat pannum, quia per vnam cognoscimus, quantum sit pannum. Ità sentit *Albert. hic tract 8. cap.1.* & videtur etiam sentire *D. Thom Opusc.52. circa finem.*

Secundò alij ponunt, rationem formalem quantitatis in diuisibilitate, nam à quantitate formaliter habetur, quòd res sit apta nata diuidi in partes. Ita *Capreolus in 2. d.4. qu.1. art.3. & disput.19. q. vnic. Sencinas 5. Met. qu.21. Iauellus qu.20. Zannardus ibidem, Flandria q.14. art.3. Aquarius q.11.*

Tertiò, alij ponunt rationem formalem quantitatis in extensione externa, & locali, seu in extremitate partium in ordine ad locum, per quam fit, vt res aliqua materialis, & corporea

tota sit in toto loco, & partes eius in partibus loci, ad differentiam rei spiritualis, & incorporeæ, quæ tota est in toto loco, & tota in singulis partibus loci, ita se habent anima rationalis, & Angelus. Ita *Auerſa tom. 1. Philoſ. qu. 22 ſect. 2. Franciſcus le Rees Com in Prædic. art. 4. §. 2.* ſed nomine extensionis localis non intelligit *Auerſa* actuale extensionem, hæc enim ſeparatur in Euchariftia à Corpore Chriſti, quod autem adhuc remanet quantum; ſed intelligit extensionem localem aptitudinalem, quæ eſt à quantitate inſeparabilis.

Quartò alij: ponunt rationem formalem quantitatis in Impenetrabilitate, nam à quantitate habet res corporea, & materialis, quòd nequeat eſſe in eodem loco cum altera re materiali, & corporea, in quo conſiſtit ratio formalis, & conceptus impenetrabilitatis. Ita *Arriaga Diſp. 5. Met. ſect. 1. ſubſect. 2. Oued. Contr. 7. Met. pun. 2. ſect. 1. et plures Moderni.*

Quintò alij: ponunt rationem formalem quantitatis conſiſtere in extremitate partium in ordine ad ſe, vel, ut alij loquuntur, in extremitate partium in ordine ad totum; quæ quidem extremitas dicit, quòd vna pars ſit extrà aliam; indè ſit, ut partes non ſint inuicem in conſuſo complicatæ, & in vnum conglobatæ, ſeu omnes vni immediatè vnitæ, ſed potius, quòd ſint vnitæ cum aliquo ordine, ita ut vna ſit immediatè vnita alteri, mediatè verò cæteris; ita in homine, verbi gratia, à quantitate habetur, quòd Caput immediatè ſit vnitum collo, mediatè verò peſtori, brachijs, pedibus, & alijs.

Ita *D. Thomas 1. p. q. 14. art. 12. Ferrarienſ. ibidem cap 87. ad euidentiā. Nunno 3. p. q. 76. art. 4. dnb. vn. Arauxo lib. 5. Met. q. 3. art. 1. Ruuius in Log. cap. 6. de Quant. qu. 1. Didacus Ortiz in Log. tra. 7. 5. Conferentia 3. §. 2. Vaſq Fonſ. Conimbr. et alij, quos citant, et ſequuntur Complut. in Log. diſp. 13 q. 2. Cum hiſ ſit.*

Concluſio mea: Ratio formalis, ſeu eſſentia Quantitatis conſiſtit in extremitate partium in ordine ad ſe.

Probatuſ primò: ex *Ariſt. in Prædic. cap. de Quant. vbi diuidens quantitatem in continuam, & diſcretam continuam, deindè ſubdiuidit, ita ut partim ſit ex habentibus poſitionem partibus, partim ex non habentibus. Sed quantitatem conſtare ex partibus habentibus poſitionem, nihil eſt aliud, quàm conſtare ex partibus habentibus talem ordinem, & diſpoſitionem, per quam fiat, ut vna ſit immediatè vnita vni, mediatè verò extre-
ris modo explicato, ergo,*

Probatur secundò, quia essentia, & ratio formalis quantitatis in eo debet consistere, quod est eius effectus formalis, & est reliquis effectibus formalibus prior, sed extreitas partium in ordine ad se est effectus formalis quantitatis, ut de se patet, & est reliquis effectibus prior, ergo. Maior patet ex dictis suprâ. Minor probatur quia, ideò aliquid est diuisibile, mensurabile, impenetrabile cum alio, & denique extensum in ordine ad locum, quia est extensum in ordine ad se, nam spiritualia, quia non sunt extensa in ordine ad se, nec habent partes extrâ partes, ideò nec sunt diuisibilia, nec mensurabilia, nec impenetrabilia, nec extensa in ordine ad locum, ergo extreitas partium est quantitatis effectus formalis, prior reliquis effectibus formalibus, nimirum, diuisibilitate, mensurabilitate, impenetrabilitate, & extensione in ordine ad locum, & consequenter est eius formalis ratio, & essentia.

Respondebis: Res quælibet de se habet partes independentes à quantitate, nam in materia prima, verbi gratia, sunt partes entitatiuæ, & substantiales, & non per quantitatem, hæc enim est accidens, & ideò non potest dare partes entitatiuas materiæ primæ; quæ sunt substantiales, ergo extreitas partium non est effectus formalis quantitatis. Maior patet quia, res quælibet materialis, & corporea independentes à quantitate differt à re spirituali, & incorporea, per hoc tantum, quòd illa habet partes, non sic res spiritualis, ergo in materia, & qualibet re materiali, & corporea ad sunt partes independentes à quantitate.

Sed contrà est quia: In primis posset negari maior, licet enim plures concedant, materiam primam, & quamlibet rem materialem habere partes de se independentes à quantitate, in horum enim sententia distinguitur res materialis, & corporea à re spirituali, quia illa exigit habere quantitatem, non sic res spiritualis; sed tamen data illa maiori, adhuc dico; aliud esse, quòd in re materiali sint partes, & aliud est, quòd in re materiali sint partes ordinatæ, & ita dispositæ, ut vna sit immediate vnita alteri, mediatè verò cæteris. Saltem talis ordo, & dispositio est effectus formalis quantitatis; Vnde *Ruuius licet in Physicis lib. 1. qu. 2.* concedat materiæ primæ partes entitatiuas independentes à quantitate, adhuc tamen in *Logicis in Prædic. cap. 6.* de quantitate nobiscum sentit, essentiam quantitatis consistere in extreitate partium in ordine ad se.

LECTIO II.

Soluntur argumenta in oppositum.

A Vctores sententiarum, quas supra in contrarium adduximus, varia aduersus dicta opponunt argumenta.

Obijciunt primò: *ex Arist. 5. Met. cap. 13.* definitur quantum, esse diuisibile in ea, quæ insunt, quorum vtrumque vnum quid & hoc aliquid aptum est, esse, ergo iam in definitione quantitatis, tanquam eius essentiali prædicatum, est posita diuisibilitas, quæ proindè est ratio formalis quantitatis.

Confirmatur quia; plures species quantitatis distinguuntur per diuisibilitatem; sed specifica distinctio non habetur, nisi à ratione formali, ergo. Maior probatur quia: si sit diuisio secundum dimensionem longitudinis, est linea, si sit diuisio secundum latitudinem, & longitudinem, est superficies; denique si sit diuisio secundum dimensionem longitudinis, latitudinis, & profunditatis, est corpus, ergo.

Respondeo; eam *Aristotelis* definitionem esse descriptionem, quia est tradita per diuisibilitatem, quæ est quantitatis proprietas; vel ibi *Arist.* sumpsisse diuisibilitatem radicaliter, quo pacto idem est, ac extensio partium in ordine ad se.

Ad confirmationem similiter dico: species quantitatis distinguui per diuisibilitatem, tanquam per proprietatem, & passionem notioem, vel etiam sumi diuisibilitatem radicaliter pro ipsa partium extensione in ordine ad se, non verò sumi diuisibilitatem formaliter, quo pacto est passio, & proprietas quantitatis.

Obijciunt secundo *ex Aristot. 4. Phys.* definitur tempus, quòd est species quantitatis, quòd sit numerus, & mensura motus secundum prius, & posterius, ergo ratio mensuræ est ratio formalis, & essentialis quantitatis.

Confirmatur quia: species quantitatis distinguuntur per rationes essentielles, & específicas, sed distinguuntur per rationem mensuræ, vt patet in loco, & superficie, locus enim est mensura corporis contenti, superficies verò est mensura corporis continentis, ergo.

Respondeo ad principale argumentum; vel eam non esse definitionem, sed descriptionem, vel ibi intelligi mensuram
radi-

gi mensuram radicalem, vel nomine numeri non intelligi mensuram, sed potius distinctionem, & discretionem partium; ut ibi explicat *Ruvius*.

Ad confirmationem dico: per rationem mensurae distingui superficiem à loco accidentaliter, non essentialiter, & specificè.

Obijciunt tertio nomine quanti intelligimus id, quod est localiter extensum, ergo localis, & externa extensio est quantitatis ratio formalis.

Confirmatur quia; tres sunt species quantitatis, nimirum, longitudo, latitudo, & profunditas, sed hæc nihil aliud sunt, quam extensio localis, ergo,

Respondeo: bene nomine quanti nos intelligere localem extensionem, quæ est notior, & magis sensata extensione interna, & in ordine ad se, in qua tanquam in prima, & formali ratione fundatur alia extensio localis, & externa.

Ad confirmationem dico, longitudinem, latitudinem, & profunditatem, ita esse extensiones locales, ut tamen supponant extensionem in ordine ad se.

Obijciunt quarto: per impenetrabilitatem contradistinguitur quantitas à re spirituali, non per extensionem partium, ergo & per eam constituitur; cum idem sit principium constitutum, & distinctum. Antecedens probatur, quia substantia spiritualis, saltem de absoluta potentia, potest contate partibus, ergo.

Respondeo: per impenetrabilitatem distingui quidem quantitatem ab omni eo, quod non est ipsa, sed non distingui primò: est autem idem principium constitutum, & distinctum, non, quomocunque, sed primò distinctum; primò ergo quantitas ab omni alio, quod non est ipsa, & præcipue à substantia spirituali, distinguitur per habere partes, nego enim de absoluta potentia posse dari substantiam spiritualem, quæ habeat partes; hinc est, ut substantia spiritualis sit penetrabilis cum alia substantia, non sic substantia quanta, corporea, & materialis, quæ quia habet partium extremitatem, & una pars est extra aliam, & extra locum alterius, idèò est cum alia impenetrabilis, id est, non potest esse in eodem loco, in quo est alia.

Quòd si ad ponendam rationem formalem quantitatis in impenetrabilitate, fas est, concedere de absoluta potentia partium extremitatem substantiæ spirituali, pariter possemus eidem substantiæ spirituali concedere de absoluta potentia impenetrabilitatem, & negare extremitatem partium: non enim videtur esse

maior ratio, ut substantiæ spirituali non repugnet extremitas partium, & repugnet impenetrabilitas, ergo ut saluetur communis conceptus, quem omnes hucusque habuerunt de substantia spirituali, debet illi utrumque denegari etiam de absoluta potentia, nempe extremitas partium, & impenetrabilitas.

Quod si nomine impenetrabilitatis, veniat impenetrabilitas radicalis; concedo impenetrabilitatem esse rationem formalem quantitatis, sed ita impenetrabilitas idem erit, ac extremitas partium in ordine ad se.

Colligite ex his. diuisibilitatem, mensurabilitatem, extensionem localem veluti in actu primo, & impenetrabilitatem, esse proprietates, & affectiones consequentes ad quantitatem, Ipsam vero actualem mensuram, extensionem localem quodammodo in actu secundo, seu actualem impenetrationem esse accidentia quantitatis; simili modo, quo risibilitas est proprietas hominis, actualis verò risus est accidens.

LECTIO III.

An partes in quantitate sint actu distinctæ.

Premitto primò pro intelligentia, & solutione difficultatis. Vniuersalissimè loquendo duo esse distincta, nihil aliud esse, quàm vnum non esse aliud, consequenter partes quantitatis continuæ esse distinctas realiter, nihil aliud erit, quàm vnā realiter non esse aliam. Cæterum vnum non esse aliud diuersa ratione contingit in toto Etherogeneo, ac in toto homogeneo; Et quidem in toto Etherogeneo vna pars non est alia ex propria sui entitate, quæ cum sit diuersa ab entitate alterius partis, ideò quoque est actu realiter distincta ab altera; ita in composito Phyllico, verbi gratia, materia est actu distincta à forma, quia ex sui propria entitate est diuersa ab illa, ideòque dicitur Etherogenea respectu formæ, idest, diuersæ rationis, & entitatis, ac sit forma.

At in toto homogeneo, ubi omnes partes sunt eiusdem rationis, vna realiter distinguatur ab alia non per propriam sui entitatem, sed per actualem separationem, quæ actualis separatio fit, & habetur per actualem diuisionem: v. g. primus palmus ligni quadripalmatis, non distinguitur realiter à quarto palmo, nisi
actu

actu separaretur ab illo : nec potest separari , nisi per actualem diuisionem. Ratio est , quia nisi accedat actualis separatio , non potest verificari , quòd primus palmus non sit quartus , seu quòd entitas primi palmi , non sit entitas quarti palmi , quia sunt eiusdem rationis , & entitatis , ideoque dicuntur homogenei , vbi vero aduenit actualis separatio , statim primus palmus terminatur in suo esse , & habet negationem alterius palmi , & ideo statim verificatur , quòd vnus palmus non est alius.

Premitto secundò : consequenter totum , aliud esse potentiale , seu potestarium , & aliud esse actuale ; totum actuale est illud , quod habet partes actualiter distinctas , & tale est totum Etherogeneum , vii est quodlibet compositum Physicum ex materia , & forma. Totum potentiale , seu potestarium est illud , quod non habet partes actu realiter distinctas , sed potentia solum , quatenus , scilicet , capax est diuisionis , per quam vna pars actu separatur ab alia , per consequens terminatur in suo esse , & de ea potest verificari , quòd non sit alia ; tale est totum homogeneum , vt vnum quadripalmare , festuca , palea , aqua maris , & huiusmodi.

Queritur modo : an quantitas continua habeat partes actu realiter distinctas , an verò solum potentia distinctas , atque diuersas.

Conclusio est : In continuo non sunt partes actu realiter distinctae , sed solum potentia.

Ita Antiqui expositores Aristot. Simpl. Auerr. D. Thomas in 1. Phys. circa text. 68. Durand. in 2. d. 1. quest. 3. Capreol. in 1. dist. 24. quest. 1. art. 1. Greg. cont. 1. conclus. & ad 2. Sciti , & dist. 43. quest. 1. art. 2. ad primum. Le Rees Com. in Phys. art. 3. §. 1. & 2. His addo Scotum in 2. d. 2. q. 9. §. sed contra , verba sunt , sicut essentialia est quanto posse diuidi in partes , ita est ei essentialia , quòd singulum eorum , in quo diuiditur , possit esse hoc aliquid ,

Contra , Riccard. in 4. d. 10. art. 7. qu. 2. Gab. in 2. d. 1. quest. 3. not. 7. Matron. in 4. d. 12. q. 8. Tolet. in 6. Physic. quest. 1. Conimb. cap. 2. quest. 1. art. 2. Masium sect. 2. q. 5. Hurt disp. 15. Physic. sect. 1. Arriagam , & Ouiedum , ubi agunt de compositione continui ; denique Auerfam tom. 1. Philos. quest. 22. sect. 6. Ioannem de Sancto Thoma in 6. Physic. quest. 20. art. 1. Difficultat. 3.

Probatur conclusio primò : ex Arist. 5. Met. 31. 7. Met. 49. in lib.

lib. de sensu, & sensibili cap. 6. præcipue verò 8. physie. tra. 7.
 69. in continuo sunt infinita dimidia non actu, sed potentia.

Probaturs secundò ratione à priori quia: partes esse actu distinctas, formaliter nihil est aliud, quàm vnā non esse aliam, sed partes continui non ita se habent, vt de ijs verum sit dicere, vna non est alia, ergo. Minor probatur, quia si partium continui vna non est alia: vel id habet ex entitate, sua, & intrinsecè, & hoc non, quia est homogenea, & eiusdem rationis cū alia parte, vel habet ex eo, quòd sit terminata in suo esse, & intrinsecè, & hoc neque dici potest, quia est continuata cum alia parte, ergo non potest verificari de partibus continui, quòd vna non sit alia.

Confirmatur quia: vt explicabimus in Metaphysicis, vnæquæque res indiuiduatur, seu sit vna, & non alia per propriam sui entitatem diuersam, sed in toto homogeneo, quæ est continuum, non sunt entitates diuersæ, quia omnes partes sunt eiusdem rationis, ergo partes continui non indiuiduantur, seu vna non est alia per propriam entitatem, ergo aliunde petenda est earum indiuiduatio, à qua habetur, quòd vna non sit alia, sed talis indiuiduatio non potest aliundè peti, nisi ex eo, quòd sit terminata in suo esse, ergo quandiu partes continui non terminantur in suo esse per diuisionem vnius ab alia, atque adeo per actualem separationem, non sunt realiter actu distinctæ, sed potius sicuti possunt diuidi, & separari, atque adeò vnæquæque terminari in suo esse, ita potest distingui vnæquæque ab alia, de facto tamen nulla est actu distincta, & singulæ sunt potentia distinguibiles, sicuti singulæ sunt potentia diuisibiles, & separabiles.

Probaturs tertio à posteriori quia: si istæ partes essent actu distinctæ realiter, actu daretur infinitum in multitudine, quod repugnare, infra ostendam, ergo; Antecedens probatur quia in continuo sunt partes infinitæ, Sed istæ sunt omnes actu distinctæ, ergo omnes erunt infinitæ actu.

Obijcies primò: partes continui actu non sunt idem realiter inter se, ergo realiter actu distinguuntur; consequentia est clara; Antecedens probatur quia: vna pars continui causat aliam, vt patet in stipula, cuius vna pars inflammat sibi continuam, ergo.

Confirmatur quia: de partibus continui verificatur prædicata contradictoria, ergo non sunt idem, neque enim de eodem pos-

sunt prædicata contradictoria verificari; probatur antecedens, quia vna pars est calida, altera non calida, vna videtur, altera non videtur, & his similia, ergo:

Respondeo in primis, negando consequentiam, quia inter esse actu realiter idem, & actu realiter distinguui, datur medium, nimirum distinguui realiter potentialiter. Præterea distinguo antecedens, partes continui non sunt actu idem simpliciter, & indiuisibiliter, uti sunt Angelus, & vel anima rationalis concedo, non sunt realiter actu idem continuariuè, & diuisibiliter, nego.

Ad probationem dico, quod vna pars continui non causat alteram simpliciter, & quod ad esse, sed secundum quid, ut in exemplo adducto stipulae, cuius vna pars inflammata non producit alteram partem quod ad esse, sed quod ad inflammationem, quatenus non illam producit, sed ignem in illa producit.

Ad confirmationem dico: prædicata contradictoria posse verificari de eadem re nedum potentia realiter diuisibili, sed de eadem de re indiuisibili simpliciter, dummodo in ea sit distinctio rationis, ut patet in gradibus Metaphysicis, & attributis diuinis in sententia Thomistarum admittentium in his solam distinctionem rationis. Præterea dico ad exempla adducta, eas partes per calorem, & visionem iam esse factas diuersas, & ethereogeneas, saltem accidentaliter, seu ut alij loquuntur, per designationem, aut assignationem extrinsecam, idcirco mirum non est, si in ijs sit aliqualis distinctio realis extrinseca; dixi, aliqualis distinctio realis extrinseca, quia propria distinctio realis intrinseca, non fit, nisi accedat actualis diuisio, & separatio, qua fit, ut quælibet pars sit terminata in suo esse intrinseco, & sit intrinsecè non alia.

Obijcies secundò: partes continui possunt realiter separari, & separatæ existere, ergo realiter distinguuntur, quæ enim realiter separantur, aut realiter separari possunt, realiter distinguuntur, vel ut loquitur *Aristot. 7. Top. tract. 1. si alterum interimitur ipsorum altero remanente, profecto non idem sunt.*

Confirmatur quia: quælibet pars continui seipsa est ens, ergo seipsa est vna, vnitas enim est passio entis, & consequenter seipsa est indiuisa in se, & diuisa à qualibet alia parte, vnum enim definitur per esse indiuisum in se, & diuisum à quolibet alio.

Respondeo: axioma illud, quæ realiter possunt separari, realiter distinguuntur, valere in ethereogeneis, non in homogeneis; vel

vel si in homogeneis illud quoque valere, asseramus, ex eo sequi, partes continui distingui quidem realiter, sed non actu, distinctio enim realis est duplex, actualis, & potentialis.

Ad confirmationem respondeo: quamlibet partem continui seipsa esse ens, non quaecunque, sed homogeneum; ens autem homogeneum non est actu vnum, & diuisum à quocunque alio, nisi per extrinsecam diuisionem.

Obijcies tertio: aqua marina tota est vnum continuatiue, sed impossibile, imò intelligibile videtur, quòd pars aquæ marinæ Orientalis non sit distincta à parte aquæ marinæ occidentalis, vna enim ab altera maximè, & longissimè distat, ergo.

Confirmatur quia: duæ guttæ aquæ antè earum vnionem, realiter distinguuntur, ergo etiam postquam sunt vnitæ, & factæ quid vnum continuatiue: tenet consequentia, quia illæ guttæ eadem entitatiue manent post vnionem, quæ erant antè vnionem, neque enim per vnionem substantialiter mutantur, ergo.

Respondeo: non esse intelligibile, eam aquam marinam Orientalem, & Occidentalem non distingui, si verè intelligas, eam aquam esse quid vnum continuatiue, non verò esse quid vnum omninò simpliciter, & indiuisibiliter. Præterea si aqua marina est Orientalis, & Occidentalis, iam per designationem, seu assignationem extrinsecam est aliquo modo diuersa, quò pacto fit etiam diuersa, si vno actu intellectus intelligas vnā aquā, vel per actum voluntatis vnā ames, & aliam non intelligas, aut ames, tunc enim fit aliqua designatio extrinseca, & accidentalis in illis partibus, ex qua deinde oritur extrinseca, & accidentalis differentia, & distinctio in aqua illa marina.

Ad confirmationem dico: in illis guttis totam variationem fieri ex eo, quòd antè erant diuisæ, & postèa non sunt amplius diuisæ; porro ex illa diuisione, aut negatione diuisionis oritur, vel earum distinctio realis actualis, vel negatio distinctionis realis actualis; non ergo illæ guttæ immutantur quòd ad earum entitates, sed quòd ad earum numerum, & diuisionem.

Obijcies quartò: si illæ partes essent actu penetratæ, & in eodem loco, distinguerentur ~~non~~ realiter potentialiter, ergo quia modo vna extrà aliam, & vna est extrà locum alterius, distinguuntur maiori aliqua distinctione reali; sed non nisi distinctione reali actuali, ergo.

Respondeo: distinctionem realem potentialem, aliam esse potentialem proximam, & hac distinguuntur partes de facto, quan-

quandò iam vnà est extrà aliam, & extra locum alterius; aliam verò esse distinctionem realem potentialem remotam, & hæc distinguerentur partes, quandò essent penetratæ, & in eodem loco positæ.

Dices: ex *Aristot. 1. Physic. 1. 57.* in continuo sunt multa; & alibi docet, partes continui copulari termino communi, ergo verè in continuo adsunt partes actu distinctæ.

Respondeo: Aristotelem in continuo agnoscere partes, & multitudinem potentialem, non realem actualem; & hoc patet ex alia eius doctrina à nobis suprâ adducta in prima probatione nostræ Conclusionis.

LECTIO IV.

Sententia Zenonis de compositione continui, reijcitur.

Propositam difficultatem de compositione continui esse omnium maximam, quæ in Philosophia solent agitari, & ferè ab humano ingenio imperceptibilem, ingenuè fatentur Philosophi ferè omnes, tam antiqui, quàm recentiores, qui & reiecta Zenonis sententia, vnanimi consensu Aristotelicam probant, & sequuntur.

Præmitto autem (antequam sententiam Zenonis de compositione continui adducam, & explicem:) continuum esse aliquod totum homogeneum, atque adeò omnes eius partes esse eiusdem rationis, & conditionis; & ideò eius partes debent esse, aut omnes diuisibiles, vt voluit Aristoteles, aut omnes indiuisibiles, vt voluit Zeno.

Præmitto secundo: indiuisibile esse id, quod non potest diuidi, seu quod non habet partes, in quas possit diuidi; est autem indiuisibile multiplex, nempe indiuisibile Metaphysicum, quod, scilicet, in sua substantia, & entitate nullas partes, aut diuisionem admittit, talis est Deus; Angelus; anima rationalis; tale indiuisibile licet actu formaliter, tale sit, æquiuallenter tamen, & virtualiter diuisibile est, quia occupat plures partes loci, ac si esset actu, & formaliter diuisibile; ita Deus omnem locum implet, Angelus, & anima rationalis occupant spatium, seu locum diuisibilem; ideò æquiuallenter, & virtualiter hæc, & similia. (si quæ sunt) dicuntur diuisibilia: aliud est indiuisibile Physicum,

ficum, nimirum illud, quod in se quidem, & in entitate sua diuisibile est, sed est adeò exile, tenue, & exiguum, vt vix sensu, aut intellectu percipi possit, nè dum aliquo materiali instrumento diuidi, & separari, ità se habent minutissimæ, & ferè insensibiles aristæ, vel paleæ partes. Denique aliud est indiuisibile Mathematicum, quod est in quantitate, quæ nullas habeat partes, & hoc iterum est duplex; aliud est indiuisibile simpliciter, quod nullas prorsus habet partes, vt punctum; & aliud est indiuisibile secundum quid; quod, scilicet, secundum vnā dimensionem non admittit diuisionem, secundum aliam sic, ità linea est indiuisibilis secundum latitudinem, & profunditatem, sed diuisibilis secundum longitudinem; superficies est diuisibilis secundum longitudinem, & latitudinem, sed indiuisibilis secundum profunditatem.

Fuit ergo sententia Zenonis, Anaxagoræ, & Democriti, totum continuum, tanquam ex partibus constare ex indiuisibilibus, seu punctis Mathematicis.

Conclusio est: Continuum non constat ex solis punctis, seu indiuisibilibus.

Ità Arist. 6. Physic. cap. 1. & lib. de lineis infecabilibus; quem sequuntur ferè omnes omnium Classum Doctores, Philosophi, ac Theologi.

Contrà Zenonem, Anaxagoram, Leucippum, Democritum, aliosque Antiquos, & Recentiores, Sebastianum Bassonum lib. de motu intentione 6. Ioachimum Doctorem Valentinianum lib. 6. Physic. disput. 1. sect. 2. pun. 1. Valentinum de Herice in 1. p. tract. 4. disput. 43. cap. 2. nu. 6. & alios plures suppresso nomine cit. à Toletio lib. 6. Physic. q. 1. & Valentiniano, ubi suprà, refert Ouied. Cont. 17. pun. 1. ubi etiam refert aliquos ex Antiquis Theologis, Mayronum in 2. d. 2. qu. 5. Gerardum apud Tarialetum lib. 6. Phys. Aegid. 1. de Gen. qu. 8. Gregor. in 1. d. 3. qu. 1. & in 2. d. 2. q. 2.

Et sanè Zenonis sententiam quam plures hac tempestate defenderent, nisi eos Auctoritas Aristote'is à communi sententia discedere prohiberet.

Conclusio probatur Argumentis, Physicis, Mathematicis, & Theologicis.

Argumenta Physica sunt.

Primum: quia si continuum constaret ex indiuisibilibus, seu punctis, vel hæc essent continua, vel contigua, vel deinceps; non

sunt continua, neque contigua, quia continua sunt, quorum extrema sunt vnum, & contigua, quorum extrema sunt simul, sicuti illa sunt deinceps, seu post, inter quorum extrema interiaceret aliquod tertium diuersæ rationis, sed puncta carent extremis, quia carent partibus, ergo non possunt esse continua, neque contigua, neque deinceps, seu post.

Secundum quia: si puncta constituerent quantitatem diuisibilem, vnum punctum immediatè tangeret aliud, vel ergo tangeret aliud secundum partem, vel secundum se totum; non primum, quia non habet partes; si secundum, ergo se iam penetraret cum alio puncto, & sic omnia puncta superuenientia inuicem se penetrarent, & consequenter non facerent quantitatem extensam, & habentem partes extra partes, vnde est commune dictum, indiuisibile additum indiuisibili, non facit maius, seu extensum.

Confirmatur quia: punctum non est extensum, ergo additum alteri puncto non facit extensum, quia nemo dat, quod non habet; at quantitas continua essentialiter constat ex partibus, quarum vna sit extra aliam, vel ad minus habet pro sui proprietate inseparabili extremitatem partium, seu extensionem in ordine ad se, ergo non potest coalescere, & componi ex punctis, seu indiuisibilibus.

Tertium, quod militat præcipuè de Quantitate continua successiua, nempe motu, & tempore, est, quia: si motus, & tempus componerentur ex indiuisibilibus, (quæ in motu dicuntur proprio nomine, mutata esse, & in tempore dicuntur, instantia) sequeretur, non moueri velocius mobile velox, ac mobile tardum, verbi gratia, si inuicem cõpararentur Aquila, & Testudo, Probatur quia; moueatur Aquila per spatium viginti punctorum, vel Aquila in primo instanti temporis pertransit vnum punctum, & Testudo etiam vnum punctum, & sic non velocius moueretur Aquila, ac moueatur Testudo, quia eodem tempore idem omninò spatium pertransirent; tunc autem vnum mobile velocius alio mouetur, quando idem spatium mobile velox breuiori tempore percurrit, sed in casu posito Aquila, & Testudo idem indiuisibile punctum spatij eodem indiuisibili puncto temporis pertransirent, ergo æquè velociter, & non vnum velocius alio, non velocius Testudine Aquila moueretur; quod sanè ridiculum est.

Nec potest dici, quòd Testudo, vtpotè mobile magis tardum, moueatur in eodem illo puncto temporis, ita vt percurrat medietatem puncti spatij, quia illud punctum spatij quia punctum, est indiuisibile in duas medietates, tanquam in partes.

Neque potest dici, quòd mobile velocius in vno instanti pertransit duo puncta spatij, mobile autem tardum in vno instanti pertransit vnum punctum spatij; nam vel mobile tardum mouetur, quando mobile velocius pertransit vnum punctum spatij, vel non mouetur: si non mouetur, id est contrà supposita. Si mouetur, non potest dici, quòd in eo puncto temporis percurrat vnum punctum spatij, quia iam æquè velociter moueretur; neque quòd percurrat medietatem illius puncti spatij, quia illud punctum non habet medietatem, quia caret partibus, cum sit indiuisibile.

Neque dicas; mobile velox in vno puncto temporis ita percurrere duo puncta spatij, vt in medietate puncti temporis percurrat vnum punctum spatij, & in altera medietate puncti temporis percurrat alterum punctum spatij, at verò mobile tardum vno puncto temporis percurrit vnum punctum spatij; quia punctum temporis, & ipsum est indiuisibile, & consequenter caret medietatibus, quia caret partibus, ergo non potest dici, quòd mobile velox in medietate puncti temporis percurrat vnum punctum spatij, & in altera medietate puncti temporis percurrat alterum punctum spatij.

Quartum quia: si quantitas componeretur ex indiuisibilibus, & punctis, non posset explicari, quomodo fieret rarefactio, & condensatio; nam ex doctrina communi, tunc contingit rarefactio, quando eadem quantitas olei, verbi gratia, per calorem rarefacta occupat maius spatium, quàm occuparet per frigus condensata, vt ad sensum patet; sed si talis quantitas constaret ex punctis, non posset explicari, quomodo illa eadem quantitas rarefacta occuparet maius spatium, quàm occupet condensata; ergo: Minor probatur quia, si illa quantitas olei constaret viginti punctis, non posset occupare, nisi viginti puncta spatij, non plura, aut pauciora, quia cum indiuisibilia sint, carent omni extensione, ergo non possunt se in maius spatium dilatare, aut in minus se se contrahere, cum enim viginti puncta sint, viginti sunt illi debita puncta spatij, non plura, aut pauciora, ergo illa quantitas olei constans ex punctis, non posset explicari, quomodo rarefieret, & condensaretur.

LECTIO V.

Sententia Zenonis Argumentis Mathematicis, & Theologicis rejicitur.

Argumenta Mathematica sunt,

Primum : *ab Euclide lib. 10.* demonstratum est, quòd omnis linea recta potest diuidi in duas partes æquales, sed si quantitas componeretur ex indiuisibilibus, non posset linea diuidi in duas partes æquales, si enim linea constaret ex quinque punctis, vel diuideretur in duas partes, quarum vtraque esset duorum punctorum cum dimidio, & ità punctum esset diuisibile, aut vtraque diuideretur in duas partes, quarum vna sit trium punctorum, altera verò duorum, & sic non diuideretur, nec posset diuidi in duas partes æquales.

Secundum est : si continuum constaret ex indiuisibilibus, tot essent puncta circuli minoris, quot sunt puncta circuli maioris, verbi gratia, tot essent puncta vnus anuli, quot sunt puncta Cœli Stellati, quod est palmare, & manifestum absurdum. Sequela probatur quia : si anulus, & Cœlum stellatum concentricè ponantur, ità vt anulus intrà Cœlum stellatum collocetur, & à centro anuli ducantur lineæ ad omnia puncta Cœli stellati, istæ lineæ deberent transire per puncta circuli minoris, sed anuli, ergo iam tot essent puncta circuli minoris, quot maioris, tot essent puncta anuli, quot sunt Cœli stellati; neque enim dici potest, quòd duæ lineæ transirent per vnicum punctum anuli, quia aliàs in puncto incidentiæ non essent rectæ, sed obliquæ, nam in puncto incidentiæ facerent angulum, sed illæ lineæ, quæ in puncto incidentiæ faciunt angulum non sunt rectæ, ergo iam non essent rectæ illæ lineæ, quod non est minus absurdum in Mathematicis, quàm quòd tot sint puncta circuli minoris, quot maioris, tot sint puncta anuli, quot Cœli stellati.

Tertium argumentum est quia: si continuum constaret ex indiuisibilibus, sequeretur Diametrum esse æquale lateri Quadrati contrà *Euclidem lib. 10. Propositione vltima*; sit enim Quadratum Diametro diuisum, & lineæ parallelæ ducantur ab vno latere Quadrati ad aliud latus: vel istæ omnes lineæ tangunt omnia puncta Diametri, quod faciunt, vel non, si primum, ergo

iam

iam puncta diametri, & vtriusque lateris sunt æqualia, quod est absurdum; si secundum, ergo iam duæ lineæ parallelæ se tangerent in eodem puncto, & ita non essent rectæ, quia in puncto incidentiæ obliquarentur: est autem æquè absurdum lineas parallelas non esse rectas, ac puncta diametri, & vtriusque lateris esse æqualia, seu latera Quadrati esse æqualia cum costis eiusdem quadrati.

Quartum Argumentum est quia: si statueretur triangulum, habens duo latera æqualia, & vnum inæquale, cuius Basis sit quinque punctorum; deinde super Basim ducantur lineæ parallelæ de latere ad latus, prima linea parallela erit quatuor punctorum, (semper enim partes, seu lineæ talis trianguli versus summum coarctantur, donec in punctum desinant) secunda linea erit trium punctorum, quarta duorum, quinta vnus, sexta, vel erit nullius puncti, vel dimidij, sed vtrumque est absurdum, ergo.

Argumenta Theologica sunt.

Primum: In Concilio Constantiensi sess. 15. damnata est inter alias hæc Propositio Vuiclesii, *linea Mathematica componitur ex duobus, aut quatuor punctis immediatis, aut solum ex punctis simpliciter finitis*; ait enim Concilium; *prima pars est error in Philosophia*, sed hæc propositio est expressa sententia Zenonis, ergo à Concilio damnata est Zenonis sententia, & licet cum *Valentia tom. 3. disp. 3. d. 1. pun. 7. §. 1.* concedamus à Concilio, & Pontifice, non posse in re purè philosophica aliquid definiri, tanquam de Fide, aut cum *Bellarmino lib. 2. de Concilij authoritate cap. 19.* non fuisse tale Concilium legitimè congregatum, vel etiam non approbatum à Pontifice *Martino V.* quò ad istam partem; licet, inquam, hæc concedamus, tamen non sequitur, votum illius Concilij, ad quod conuenere tot viri omnium doctissimi, & sapientissimi, non sufficere ad Zenonis sententiam reprobendam.

Secundum Argumentum fundatur in Auctoritate *D. Augustini tom. 1. de Quantitate Animæ cap. 11. & 12. ubi hæc habet, loquens de puncto, ab ipso incipit linea, ipso terminatur, deinde undecunque linea secari potest, per ipsum secatur, ubi D. Augustinus non videtur distinguere inter punctum, & partem, diuisibilem, ergo D. Augustinus indiuisibilia non agnouit, nec putauit ex illis quantum componi. Quæ omnia Argumenta Physica, Mathematica, & Theologica æquè probant, siue puncta ponantur esse finita, siue infinita.*

LECTIO VI.

Dua alia sententiæ reiſciuntur.

Sunt alix duæ ſententiæ Zenonis opinioni cognatæ, & affines. Prima ſententia, quàm Doctores Hyſpani, vel explicarunt, vel illuſtrarunt primò, ponit continuum conſtare ex punctis indiuiſibilibus in ſe, quæ ideò fortasſe turgida vocant, & inflata, vt diſtinguant à Zenoniſticis punctis, quæ facilè quis preſſa poſſet appellare, & ſicca, vtpotè quia carent omni extenſione etiam virtuali; non enim repugnat aliquod indiuiſibile in ſe, & formaliter, eſſe virtualiter extenſum, & diuiſibile in ordine ad ſpatium, ſeù locum, vt pater in Angelo, qui licèt formaliter ſit indiuiſibilis in ſe, eſt extenſus in ordine ad ſpatium, & occupat ſpatium diuiſibile: qua data doctrina iam poterit admitti, punctum occupare ſpatium diuiſibile, & ità ſaluatur ex non quanto, ex non extenſo, fieri quantum, & extenſum, quia punctum licèt formaliter ſit non quantum, & non extenſum, virtualiter tamen extenſum eſt, & quantum; ità etiam ſaluatur, quomodo vnum indiuiſibile additum alteri faciat maius, quia indiuiſibile occupat ſpatium diuiſibile, & ſic facit maius.

Sententia hæc eſt ſatis celebris, & famoſa, ſed ſicuti ſinè vllò certo Auctore vagatur in Scholis, ità & ab omnibus ſerè Scholaſticis reiſcitur, & impugnatur.

Primò quidem; quia ſi vera eſſet hæc Doctrina, punctum Mathematicum eſſet æqualis perfectionis, ac eſt Angelus, tale enim punctum eſſet formaliter indiuiſibile, virtualiter diuiſibile, & extenſum, occuparet ſpatium diuiſibile, vt Angelus, cui hoc attribuitur ob magnam ſubſtantiæ Angelicæ perfectionem; ſed hoc eſt abſurdum, & inconueniens, quomodo enim punctum, minima pars quantitatis, quæ omni ſubſtantiâ, & ſerè omni accidente imperfectius eſt, poteſt eſſe æqualis perfectionis cùm Angelo? ergo.

Secundò quia: data hac ſententia, dicendum eſſet conſequenter, rarefactionem, & condensationem conſiſtere in indiuiſibilium maiori, vel minori extenſione locali virtualiter, ergo æquè poſſet Angelus rareſceri, ac ſubſtantiâ quolibet materialis, quòd eſſe

esse absurdum, & inauditum æquè planum est, ac certum; sc̃ quela verò probatur quia: Angelus modo habet maiorem, modo minorem extensionem localem virtualiter diuisibilem, ergo æquè posset Angelus rarefieri, & condensari, ac rarefiat, & condensetur substantia materialis.

Altera sententia satis communis defendit, continuum constare partim ex diuisibilibus, partim ex indiuisibilibus continuatiuis, & terminatiuis; licet enim partes continui diuisibiles sint, vniuntur tamen, & continuantur per aliquod punctum indiuisibile, sicuti materia, & forma, vniuntur medio modo vnionis substantiali ad faciendum compositum substantiale; rursus quia partes continui, tandem finiuntur, & terminantur, neque enim continuum est infinitum, debet admitti aliud punctum, quo finiatur, & terminetur continuum.

Ità discurrunt ex Thomistis *Capreolus in 2.d.2.qu.1. De 2a qu.2.art.4. Caietan 4.par. ar.2. & cap. de quantitate. Soto ibidem qu. est. 2. Soucinas lib. 10. qu. est. 20. Ruuius tract. de comp. continui, Alensis lib. 3. sua Met. cap. 5. Complutenses in physic. quest. 24. §. 2. ubi referunt antiquos Arist. expositores Thomistium, Simplicium, Philoponum, nec non modernos Plaxam, & Masum. Ioannem à Sancto Thoma qu. 20. Physic. art. 1. diff. tertia.*

Ex Recentioribus hanc sententiam sequuntur *Suarez 2. tom. Met. disp. 40. sect. 5. num. 28. Conimb. lib. 6. cap. 2. qu. est. 1. ar. 2. Scaliger exercit. 65. contra Cardanum, Fonseca 5. Met. cap. 13. qu. 6. sect. 4. & lib. 7. cap. 1. qu. 1. sect. 4.*

Citati solet pro hac sententia *Scotus in 2. dist. 1. q. 3. & dist. 2. q. 9. Vidi, & legi attentè textum Scoti dist. 1. qu. 3. ubi agit, An aliqua creatura potuerit esse coeterna Deo, sed de indiuisibilibus nè verbum quidem facit. dist. 2. q. 9. tractat de indiuisibilibus, sed negat continuum ex illis componi adducens rationes, & argumenta ex mathematica, quæ etiam nos supra adduximus; inò §. Hoc etiam, apertè negat, aliquod quantum esse indiuisibile, en verba; non est intelligibile, quod aliquod quantum sit indiuisibile.*

Reijcitur hæc sententia, & impugnatur; Primo ratione, quam modò retuli ex *Scoto in 2. d. 2. q. 9.* si datur tale indiuisibile siuè continuatiuum, siuè terminatiuum, vtrique est aliquid quantitatis continuæ, & spectat ad illius compositionem, atque adeò est homogeneum cum illa, quantitas enim continua totum est

homogeneum in omnium sententia, ergo iam hoc continuatiuū, seu terminatiuum punctum, & indiuisibile, est aliquid quantitatis, & esse indiuisibile, quia diuisibilitas, vel est essentia, vel ad summum in omnium sententia, est proprietas quantitatis, ergo non potest dari indiuisibile continuatiuum, & terminatiuum, quod sit aliquid ipsius quantitatis continuæ.

Secundò impugnatur hæc sententia, quia talia puncta continuatiua, & terminatiua omnino superflue, & absque vlla necessitate excogitata sunt, cum enim, partes continui homogenee sint, seipsis, & non per superadditā entitatē vniuntur, dummodo nullū adsit impedimentum, & remota censeatur earum diuisio, & separatio. Similiter sufficientissimè intelligitur continuum finire, & terminari per simplicem negationem vltioris extensionis, ergo huiusmodi indiuisibilia, & puncta, merum sunt figmentum.

Tertiò tandem reijcitur, & impugnatur hæc sententia argumento petito ex materia Theologica, quia si darentur hæc indiuisibilia realia positiua in continuo, non posset saluari præsentia Corporis Christi Domini in illis, ergo.

Sequela probatur quia: vel Corpus Christi esset in illis indiuisibilibus, vel non; non potest dici secundum, quia aliàs in Hostia consecrata esset assignabile aliquid reale, in quo non esset tale corpus, quod esse absurdum, certum est; si primum; frangatur Hostia consecrata, & diuidatur in duas partes, in qualibet harum partium erit nouum punctum terminatiuum; tùm sic, vel in istis nouis punctis erit Corpus Christi, vel non. Non secundum ob rationem modò dictam, ergo primum, ergo iam Corpus Christi de nouo est præsens in aliquo reali absque noua consecratione; quod esse absurdum, omnes Theologi admittunt; similiter si vino consecrato admisceatur vinum aliud non consecratum, iam resultabit nouum punctum continuatiuum; de hoc facio idem quæsitum; vel sanguis Christi est in illo puncto nouo continuatiuo, vel non; non secundum, quia aliàs posset assignari in vino consecrato aliquid reale positiuum, in quo non esset Sanguis Christi Domini; si primum; ergo iam Sanguis Christi est in aliquo reali de nouo absque noua consecratione.

Probabilius esse puto, continuum ex solis indiuisibilibus constare siue finitis, siue infinitis, quàm illud componere ex partibus, & punctis indiuisibilibus continuatiuis; ratio est, quia continuum est totum homogeneum, ergo omnes eius partes debent esse

esse eiusdem rationis, ergo vel debent esse omnes diuisibiles, vel omnes indiuisibiles.

LECTIO VII.

Argumenta in contrarium soluuntur.

A Vttores sententiarum, quas hucusque retulimus, & impugnavimus, strenuè causam suam agunt, & plura nobis, ea-que magnæ efficaciz opponunt argumenta.

Et quidem Zenonistæ hæc nobis

Obijciunt primò: numerus fit ex pluribus Vnitatibus, quæ sunt indiuisæ, seu indiuisibiles in se, ergo etiam continuum potest constare, & componi ex indiuisibilibus.

Confirmatur quia: vnus homo non est binarius, alter homo non est binarius, sed ex vno, & altero homine fit binarius, ergo sicuti ex non binario fit binarius, ita ex duobus indiuisibilibus, seu duobus non quantis, ex duobus non extensis, potest fieri quantum, & extensum. Similiter forma non est composita, & tamen ex materia, & forma fit compositum, ergo etiam ex non quantis potest fieri quantum.

Respondeo: negando consequentiam: quia numerus est quantitas discreta, ideò bene potest, imò necessàrio debet constare ex partibus, quæ non sint extensæ, & continuatæ, sed potius inextensæ, & discontinuatæ, atque adeò indiuisæ, seu indiuisibiles, & discretæ, at quantitas continua est essentialiter extensa, ideò debet constare ex extensis, & diuisibilibus, nec potest constare ex inextensis, & indiuisibilibus.

Ad confirmationem similiter respondeo, ex non binario fieri binarium; quia vt fiat binarius non requiritur aliqua vnio duorum, seu aliqua extensio vnus cum altero, sed sufficit accipere vnum, & alterum, at verò, vt continuum fiat, debent assumi partes inuicem vnitæ, & extensæ, sicuti ipsi continuum est quid vnum, & extensum, si ergo ponantur puncta, & partes inextensæ, non fiet totum extensum. Ad exemplum de materia, & forma, dico fieri compositum, quia licet quælibet ex his seorsim sumpta ab altera non sit composita, tamen non concurrunt ad faciendum compositum, nisi vniantur adinuicem, & componantur, ideoque ex illis non compositis, vt non compositis, non fit

compositum, quod tamen fit ex illis, ut compositis, & unitis. Itē continuum ex punctis inextensis, ut inextensis, non coalescit, nisi illa puncta, & illa inextensa fiant extensa, quod quia impossibile est, impossibile est quoque, quod ex illis fiat continuum.

Obijciunt secundo: Mathematici definiunt, lineam esse fluxum puncti, superficiem fluxum lineæ, sed si imaginemur punctum fluere, tale punctum non designabit, nisi puncta, ergo iam tota linea constat ex solis punctis, seu indiuisibilibus.

Confirmatur quia: quantitas continua successiua constat ex solis punctis, ergo etiam quantitas continua permanens. Antecedens probatur in tempore, de quo dicitur, temporis non existit, nisi nunc, & instans, ergo iam totum tempus ex solis instantibus, seu indiuisibilibus componitur.

Respondeo: Mathematicos, ut melius cognoscant quantitatem quam habent pro obiecto, recurrere ad eius oppositum, quod est punctum, & ita multa demonstrant, de punctis sæpè loquuntur, utuntur punctis ad explicandas dimensiones quantitatis, ideò ut explicarent, lineam esse longitudinem carentem latitudine, dixerunt, lineam esse fluxum puncti, quia nimirum si intelligamus, aut figuremus punctum aliquod, & illud fluere in longum, & non in latus, iam intelligimus solam longitudinem, atque adeò lineam.

Ad confirmationem dico: veram esse communem locutionem; temporis non existit, nisi instans, atque adeò verè tempus constare ex instantibus, sed nomine instantis, non intelligitur pars omninò Mathematicè indiuisibilis, sed intelligitur pars adeò minima Physicè, ut à nobis nequeat diuidi, aut designari.

Obijciunt tertio: si ponantur duo puncta immediata, ista non se penetrant, nec sunt in eodem loco, ergo iam faciunt extensionem localem, ergo benè ex solis punctis potest intelligi componi quantitas, quæ, in probabili sententia, consistit in extensione locali. Antecedens probatur, quia non statim, ac duo se tangunt, statim se penetrant, nam duæ manus, verbi gratia, se tangunt, & non se penetrant, neque enim se penetrare, est vnum esse intrà aliud, sed potius vnum esse iuxta aliud, ergo.

Respondeo: duo puncta immediata se penetrare, quia cum non habeant partes, non potest dici, quod secundum vnā partem se tangant, secundum aliam non, ergo iam tota se tangunt, & vnum est intrà aliud: fateor in re diuisibili, se tangere, non esse penetrare, & vnum esse intrà aliud, sed dico indiuisibilia

se tangere, nihil aliud est, quàm vnum esse intrà aliud, & se penetrare: non ergo possunt esse duo indiuisibilia immediata, quin se penetrarent, atque adeò extensionem non faciant.

Ponentes puncta, & indiuisibilia inflata

Obijciunt primò; indiuisibili, quâ indiuisibili non repugnat localis extensio, vt patet in Angelo, qui licet sit substantia, occupat tamen spatium diuisibile, ideòque habet localem extensionem diuisibilem, sed neque indiuisibili materiali, & quanto repugnat talis extensio localis diuisibilis, adhuc enim indiuisibile quantum, & materiale differret ab Angelo, quia esset impenetrabile cum alio indiuisibili materiali, & quanto, ergo optimè potest statui indiuisibile materiale, & quantum, quod habeat extensionem localem diuisibilem.

Respondeo: localem extensionem diuisibilem esse debitam re i, quæ supponatur extensa in ordine ad se, & quæ habeat extremitatem partium; talem extremitatem non haberet punctum, ideò illi non potest attribui extensio localis. Præterea impenetrabilitas non competeret tali puncto, quia se haberet, vt Angelus, cui non competit impenetrabilitas, hæc enim competit entitati extensæ, & diuisibili, qualem non est punctum, sicuti neque Angelus.

Obijciunt secundò: Datis istis indiuisibilibus inflatis soluantur omnia Argumenta facta contrà Zenonem, & ex alia parte euitantur omnia Argumenta, quæ fiunt contra sententiam Aristotelis, ponentis partes semper diuisibiles in infinitum, ergo hæc indiuisibilia inflata debent admitti ad conciliandas has duas Sententias oppositas.

Respondeo: positione horum indiuisibilium nec solui Argumenta facta contrà Zenonem, nec euitati Argumenta, quæ fiunt contrà sententiam Aristotelis; & præcipuè non solui Argumenta facta contrà Zenonem, fusè ostendit *Arriag. hic disp. 16. sect. 9. per totum.*

Quòd etiam non euitentur Argumenta contrà Aristotelem, patet ex eo, quia indiuisibilia inflata occupant spatium indiuisibile, quod sine dubio est diuisibile in partes in infinitum diuisibiles, ergo omnia Argumenta, quæ inipugnant continuè diuisibilitatem in partes infinitas, militant etiam contrà spatium diuisibile, quòd sine dubio est diuisibile in partes infinitas; ideò contrà hæc indiuisibilia inflata militant omnia Argumenta, tam ea, quæ sunt contrà Zenonem, quàm cætera omnia, quæ fieri solent contrà Aristotelem.

Ponentes puncta continuatiua, & terminatiua.

Obijciunt primò: *Ex Arist. in Prædicamentis. cap. de quantitate*, continuum est illud, cuius partes copulantur termino communi, sed nomine termini communis, non aliud potest venire, quàm punctum continuatiuum, quod est commune vni, & alteri parti continui, ergo.

Respondeo. nomine termini communis venire partem diuisibilem, quæ interiacer, & media est inter vnâ, & alteram partem continui, hæc enim est communis vtrique, quia vtramque necit. & vnit; quod non potest præstare pars vltima, quæ quia vltcrius non extenditur, & alterum non vnit, non est alteri cõmunis.

Obijciunt secundò: Argumentum, quod ab ipsis censetur Achilles, & reuerà valdè famosum est, & efficax.

Creet Deus Sphæram perfectam, & ponat super perfectè planum, tùm sic, hæc Sphæra necessariò debet tangere planum in puncto, vt probat *Euclides lib. 3. prop. 16.* & notauit *Arist. 1. de anima cap. 1. s. 13.* ergo iam datur punctum aliquod, saltè continuatiuum.

Probatur antecedens: quia talis Sphæra non potest tangere planum in parte diuisibili, nulla enim pars illius Sphære est, quæ non sit spærica, & curua; pars autem sphærica, & curua non potest commensurari plano, ergo Sphæra illa cadens super planum, tangit in puncto. Similiter, si fiat columna perfectè rotunda, quæ vno verbo, dicitur Cylindrus, tangit planum in sola linea, & in sola longitudine: ergo datur linea, & sola longitudo.

Respondeo: varias ab Aristotelicis afferri solutiones ad hoc argumentum.

Aliqui enim, vt *Aresius 1. de Gen. d. 2. quasi. 23. sect. 7.* negant, posse fieri, & dari Corpus adè perfectè rotundum, & sphæricum vt nulla eius pars sit plana. Alij negant, posse dari planum adè perfectum, vt in eo non sit aliqua curuitas.

Alij recipiunt Corpus perfectè spæricum, & planum perfectum, sed volunt planum perfectum tangi ab illo Globo, seu Corpore perfectè sphærico, & rotundo in parte diuisibili, indeterminata tamen, & semper minori, & minori in infinitum, quam partem indeterminatam, & ità minorem Aristoteles appellauit punctum; vel esse locutum more, & consuetudine Geometrarum, quando concessit planum tangi in puncto ab illo Globo. Ità

Hurtad. disp. 15. Phys. sect. 2. quamvis enim indiuisibilia *Hurtad.* concedat, negat tamen hoc Argumento ea efficaciter probari.

Alij volunt, planum tangi in puncto, quod designatur per contactum illius Sphære, licet enim in illo plano non sit punctum formaliter, est tamen eminenter, & virtualiter, vnde posita designatione statim punctum illud formaliter, & actu emergit. Ità *Conimb. 6. Phys. cap. 2. qu. 1. in fine*, licet hi admittant realem superficiem, lineam tamen, & puncta non admittunt realiter, sed per designationem.

Alij negant, planum posse tangi ab illo Globo, obstat enim incommensuratio Globi ad planū, obstante incommensuratione, non potest fieri contactus. Ità *Auersa q. 22. sect. 5.* Verum quidem est, quod si talis Globus esset æneus, & planum esset vitreum, sine dubio tale planum frangeretur ab illo Globo, si magno impetu super planum descendere supponatur, sed talis fractio accideret non ex contactu Globi, sed ex contactu, & impetu Corporis intermedij, quod maximè addensatum, magno impetu in planum illud impingeret, ac proinde frangeret, & dissolueret.

Simile quid respondet *Franciscus le Reès Com in Phys. disp. 3. art. ult. S. 4.* vult enim, tangi planum illud à Globo contactu immediationis, non adæquationis, & commensurationis, quia verè talis commensuratio, & adæquatio non potest dari inter illud planum, & Globum, qui tamen tangit planum contactu immediationis; quia Globus, & planum, ità immota manerent, ut inter illa nullum aliud Corpus interiaceret, & hoc in eius sententia est tangi contactu immediationis.

Responder iterum *Auersa ubi supra*; talem Globum penetrari in aliqua saltem sui parte cum plano, id enim non præiudicat, nec figuræ planæ, nec figuræ Globosæ; ideoque talis Globus immediatè quidem tangeret planum, sed non saluaretur in eo omni extremitas partium, quia esset aliqualis penetratio Globi cum plano.

Ex his Responsionibus, sicuti nulla est, quæ sua careat probabilitate, ità quælibet suas habet impugnationes, cæteris probabilior mihi videtur ea, quæ ultimo loco adducta est.

Obijciunt tertio: Hæc est differentia inter Corpus diaphanum, & opacum, quod lux peruatit totum Corpus diaphanum, at non peruatit totum corpus opacum, sed solum in eius vltima, seu extrema superficie recipitur, ergo saltem datur superficies habens negationem profunditatis.

Confirmatur quia: negatis indiuisibilibus, tollitur actio vni-
formis difformis, nisi enim lux non recipiatur in parte indiuisibi-
li subiecti illuminati, sed potius in eius parte diuisibili; iam,
posset reperiri æquale lumē in duabus partibus, in quas illa pars
diuisibilis iam illuminata diuideretur, ergo tolleretur actio uni-
formis difformis, per quam in partibus subiecti semper diffunditur
eadem qualitas inæqualiter, seu semper minor.

Respondeo: lucem peruadere non solum superficiem, sed etiam
profunditatem corporis opaci, sed non totam eius profundita-
tem, at corporis diaphani totam peruadit, & penetrat profun-
ditatem.

Ad confirmationem dico: quod illa pars illuminata, sicut
diuideretur in duas partes, quarum vna esset minor, altera maior,
itā minus lumen esset in minori parte, maius lumen in parte
maiori, non ergo æqualiter diffunderetur illud lumen, vt fal-
sò supponit Argumentum,

LECTIO VIII.

Sententia Aristotelis declaratur.

Riectis omnino punctis à quātitate continua, refutato Ze-
none, eiusque vel in totum, vel in partem fautoribus, de-
claranda nobis supereſt Aristotelis sententia.

Hæc docet, continuum quodcunque etiam atomum, & mini-
mum, constare infinitis partibus in infinitum sine fine diuisibili-
libus etiam per eternitatem. Itā *Arist. 6. Physic. cap. 2. t. 16. dico*
continuum id, quod in semper diuidua est diuiduum 8. Physic.
cap. 8. tit. 68. infinitas Tempus habet diuisiones: & paucis in-
teriectis. In continuo sunt infinita dimidia, non actu, sed po-
testate, 5. Met. cap. 13. t. 18. definit. Quantum esse diuisibile
in ea, que insunt, quorum utrumque, aut singulum unum quid
aut hoc aliquid, aptum est, esse.

Aristotelem sequitur vulgus omne Philosophorum exceptis
ijs paucis à me supra pro Zenone. relatis, quos etiam puto nec
ingenuè philosophari, nec studio veritatis, sed ad ingenij ostenta-
tionem pro Zenone stitisse.

Pro huius sententię explicatione.

Pono primò: in continuo ab Aristotelicis partes assignari du-
plicis

pluribus generis, nempe æquales, & inæquales, verbi gratia, in ligno quadripalmari, sunt partes æquales, nempe quatuor palmi, vel etiam octo semipalmi, & sunt partes inæquales: id est, duo semipalmi, in quos quilibet palmus est diuisibilis; palmus enim comparatus cum quolibet semipalmo, in quem est diuisibilis, est inæqualis, est enim semipalmus minor palmo, ut patet; esto palmus respectu alterius palmi sit æqualis, vnde patet, quod eadem pars respectu diuerforum est æqualis, & inæqualis modo explicato.

Iterum partes aliæ sunt communicantes, aliæ non communicantes; communicantes sunt, quarum vna communicat cum alia, quia continet aliam, ut palmus, qui sub se continet duos semipalmos, non communicantes sunt, quarum vna sub se aliam non continet ut palmus comparatus cum palmo; & ex his etiam patet, quod eadem pars respectu diuerforum potest esse communicans, & non communicans, ut ex dictis planum est.

Nonnulli, partes inæquales, appellant communicantes, sicuti æquales appellant non communicantes, quia reuera æquales non ita se habent, ut vna æqualis, ut æqualis, contineat aliam sub se minorem, & ideo æquales non sunt communicantes; e contra inæquales sunt communicantes, quia pars dicitur inæqualis, quatenus sub se continet alias minores, & minores se; ita palmus, ut sub se continet duos semipalmos, & est pars inæqualis, & est communicans.

Similiter alij partes æquales, & non communicantes appellant aliquotas, sicuti e contra partes inæquales, & communicantes appellant aliquantas; pars æqualis, & non communicans dicitur aliquota, quia aliquoties repetita totum præcisè adæquat, ita ternarius est pars aliquota numeri duodenarii, quia denarius quater acceptus, duodenarium perfectè adæquat, & mensurat; pars aliquanta, & proportionalis est, quæ aliquoties repetita, non adæquat omnem numerum, in quo continetur, ita numerus ternarius continetur quidem in octonario, sed est eius pars aliquanta, non aliquota, quia si replicetur bis, exceditur ab octonario, si ter replicetur, excedit octonarium; vnde patet, quod respectu diuersi numeri eadem pars est aliquota, & aliquanta; in exemplo adducto, ternarius est pars aliquota respectu duodenarii, & respectu octonarii est pars aliquanta.

Denique partes æquales, & communicantes dicuntur determinatæ, sicuti e contra inæquales dicuntur indeterminatæ; & pro-

proportionales; partes æquales, dicuntur determinatæ, quia nota est, determinata, & patens earum magnitudo, partes inæquales dicuntur indeterminatæ, quia non est nota, & patens earum magnitudo, nulla enim earum est assignabilis, quarum non possit assignari alia minor, & minor vsque in infinitum; hæc etiam dicuntur proportionales, quia sicuti lignum bipalmare, verbi gratia, diuiditur in duas partes æquales, puta in duos palmos, ita proportionem seruata quilibet ex his palmis diuiditur in duos semipalmos, & proportionaliter quilibet semipalmus diuiditur in duas medietates, & quælibet medietas in alias duas medietates, & sic proportionem seruata vsque in infinitum abimus in diuisione cuiuslibet minimi continui, paleæ, verbi gratia, vel aristæ.

Pono secundò: in continuo partes æquales esse finitas, & numero determinatas; in ligno enim bipalmari, clarum est, duos tantum esse palmos, sed partes inæquales, & proportionales esse infinitas, non enim potest lignum bipalmare in tot partes diuidi, quin in plures, & plures in infinitum diuidi possit; idèque partes proportionales, inæquales, seu communicantes non categorematicè, & actu, sed sincategorematicè, & in potentia dicuntur esse infinitæ: ratio est, quia hæc partes proportionales non sunt actu omnes diuisæ, sed potentia diuisibiles; & ita sunt potentia diuisibiles, vt semper sint vltèrius diuisibiles vsque in infinitum, ita vt nunquam possit assignari vltima, & possit diuidi vltima. Idèò autem partes actu infinite dicuntur infinitæ categorematicè, quia sunt infinite simpliciter, ducta similitudine, & analogia à termino categorematico, qui simpliciter significat, seu perfectam habet significationem, è contra partes infinitæ in potentia, dicuntur infinitæ Sincategorematicè, ducta analogia à termino Sincategorematico, qui non significat simpliciter, sed secundum quid, habet enim imperfectam quandam significationem, vt ex dictis in logicis patet.

Conclusio mea est: Continuum constat ex partibus diuisibilibus finitè in infinitum, ita vt non possint in quolibet continuo, quamuis minimo, vt modica palea, vel arista, assignari tot partes, quin plures, minores semper, & minores sint assignabiles per totam æternitatem.

Probatur primò ex Aristotele locis supracitatis.

Probatur secundò: quia continuum est aliquod homogeneum, ergo omnes eius partes debent esse homogeneæ, & eiusdem

dem rationis, ergo vel omnes debent esse diuisibiles, vel omnes indiuisibiles, vt contrà Zenonem probauimus; nec possunt esse omnes diuisibiles solum virtualiter, quia etiam puncta inflata, & turgida refutauimus; neque possunt esse partim diuisibiles, partim indiuisibiles, quia etiam puncta continuatiua, & terminatiua reieciimus; ergo debent esse omnes diuisibiles.

Probatur terriò solutione argumentorum: quorum licet aliqui auctores fugam se potius videre fateantur, quàm solutionem, obregere se potius Aristotelicos partium continui infinita multitudine, non difficultates planè dissoluere, tamen inde licet maiorem in Aristotelica, quàm in Zenonistica sententia probabilitatem agnoscere, quòd Zenonistæ nec punctis quidem, vtpotè inextensis queunt se obregere, fuga etiam illis, nedum solutio interdicatur Argumentorum, quorum proinde iaculis patent, quousque confodiantur omninò, aut è scholis ejciantur.

LECTIO IX.

Argumenta contrà Aristotelem soluuntur.

O Bijciunt primò: si continuum esset diuisibile in infinitum, iam daretur actu infinitum, consequens est absurdum, ergo. Sequela Maioris probatur quia; Continuum esset indiuisibile in partes infinitas, nè dum proportionales, sed etiam æquales, sed partes æquales sunt actu, ergo daretur infinitum actu, & simpliciter. Maior probatur quia: Continuum bipalmare, verbi gratia, esset diuisibile in duos palmos, quorum quilibet esset diuisibilis in duos semipalmos æquales inter se, & quilibet semipalmus esset diuisibilis in duas medietates, quæ etiam essent æquales inter se, & sic in infinitum, ergo iam continuum diuideretur in partes æquales infinitas, ergo iam daretur infinitum actu, & sanè Argumentum propositum vim habet, & efficaciam in partibus æqualibus, nam si procedat de partibus inæqualibus, & proportionabilibus, facilè soluitur, admittendo partes proportionales esse infinitas in potentia, & Sincategorematicè, quod non est absurdum.

Respondeo: Continuum bipalmare benè posse diuidi in plures, & plures partes æquales in infinitum, sed tamen hæ partes

æquales nunquam erunt infinitæ, quia licet æquales sint inter se, non sunt tamen æquales, si comparentur cum his, à quibus diuiduntur, & cum his, in quas possunt vlteriùs diuidi; verbi gratia, duo semipalmi sunt æquales inter se, sed quilibet eorum non est æqualis cum palmo, à quo est diuisus, nec est æqualis cum quolibet medietate, in quam potest diuidi quilibet; licet ergo partes æquales possint in infinitum augeri, & multiplicari, illæ tamen nunquam erunt infinitæ, quia prout æquales, non sunt infinite. Præterea dico, quòd etiam si illæ partes essent omni modo æquales, & cum his, à quibus diuiduntur, & cum his, in quas possunt vlteriùs diuidi, nunquam tamen erunt infinitæ, quia nunquam fient infinitæ diuisiones, nunquam est assignabilis vltima diuisio, & sic semper possunt diuidi partes æquales, & inæquales in infinitum, sed nunquam erunt infinitæ.

Obijciunt secundo; Deus videt omnes diuisiones possibiles circa hanc Cartam, ità vt nulla sit, quam Deus non cognoscat, aliàs Deus non cognosceret omnia possibilia, sed potius aliquod possibile illi cognoscendum restaret, ergo iam Deus cognosceret hanc Cartam redactam esse ad indiuisibilia; tenet consequentia, quia si non videret Cartam redactam ad indiuisibilia, videret adhuc restare alias diuisiones, & sic non vidisset omnes.

Confirmatur quia: possibili posito in actu, nullum sequitur absurdum, ergo saltem Deus, posset omnes diuisiones possibiles, quas cognoscit in Continuo, actu exercere, quod saltem non debent negare, qui probabiliter defendunt, posse dari infinitum in multitudine, ergo iam posset in Continuo deueniri ad indiuisibilia.

Respondco: Deum videre omnes diuisiones possibiles, & simul videre has diuisiones, non posse simul coexistere, quia est essentialiale his diuisionibus, vt aliquæ existant, & aliquæ sint in potentia; Negatur tamen consequentia, nempe Deum cognoscere Cartam illam esse redactam ad indiuisibilia, quia cognitio Dei, non est diuisio, estò Deus cognosceret illas diuisiones possibiles, non tamen actu exerceret illas diuisiones, quia non diuideret, & ità non cognosceret Cartam illam redactam ad indiuisibilia.

Quando dicitur, si non videret cartam redactam ad indiuisibilia, videret alias diuisiones restare, negatur vltima hæc consequentia, quia supponitur iam, omnes diuisiones possibiles vidisse, & consequenter esse exhaustum continuum, & illius nihil aliud remanere, neque diuisibile, neque indiuisibile.

Respon-

Respondent alij, vt *Franciscus Le Rès disput 3. art. 2. §. ultimo.* Deum cognoscere omnes diuisiones possibles distributiue, quia ita sunt possibles; non collectiue, quia collectiue non sunt possibles, collectiue nullibi sunt, distributiue cognoscit, quia nulla est possibilis diuisio, quam Deus non cognoscat.

Ad confirmationem respondeo: continuum non posse totum diuidi, neque omnes diuisiones possibles subire, non quia repugnat infinitum in multitudine, nam illud non repugnare, probabilis est sententia; sed quia illæ diuisiones non possunt simul coexistere, quia essentialiter habent, quod partim sint actu, partim potentia, & consequenter, quod aliquæ existant, & aliquæ non existant.

Ad Axioma, possibili posito in actu, nullum sequitur absurdum, dico, verificari, quando aliunde non oritur repugnantia, in casu nostro ex ipsa natura Continui oritur repugnantia, cur omnes diuisiones possibles non possint ad actum reduci, sicuti ex ipsa natura potentiae intellectiuae, aut etiam visuiæ oritur repugnantia, cur nequeant omnes intellectiones possibles, omnes visiones possibles ad actum reduci, quia nimirum essentialiter est potentiae intellectiuae, non tot intellectiones elicere, quin plures, & plures possit elicere, & essentialiter est potentiae visuiæ, non tot visiones elicere, quin plures, & plures possit elicere.

Obijciunt tertio: *Quantitas continua successiua*, puta *Tempus*, non potest constare ex partibus semper diuisibilibus, ergo neque continuum permanens. Antecedens, in quo est difficultas, probatur, quia *Temporis* non existit, nisi nunc, & instans; tum sic, si hoc instans, est indiuisibile, iam habetur interitum; si pars diuisibilis, iam ista est diuisibilis in alias duas partes, sed illa pars diuisibilis tota simul exiit, ergo iam duæ partes *Temporis* simul existunt. Idem argumentum applicari potest etiam motui, nisi dicamus, motum constare ex mutatis esse, seu ex indiuisibilibus; iam duæ partes motus simul existerent, & consequenter *Tempus*, & motus non essent entia essentialiter successiua, cuius partes non possunt simul existere.

Respondet cum *Suarez disp. 50. num. 9.* nomine instantis venire partem diuisibilem *Temporis*, sed tamen eam partem inadæquatè existere more successiuorum, & quia ea pars tota inadæquatè existit, nihil illius partis est, quod adæquatè existat, sed quidquid est illius partis, inadæquatè existit; & sic patet, non existere simul duas partes *temporis*, aut duas partes motus.

Obiciunt quartò . Prima componentia sunt incomposita , & simplicia, seu indiuisibilia, quia ex alijs non debent componi , vt patet in materia, & forma, quæ ex alijs non componuntur , ergo etiam in continuo diuisibili, partes eius debent esse indiuisibiles, Confirmatur quia : si in quolibet continuo essent partes infinitæ in potentia, ergo iam omnes magnitudines essent æquales, quia omnes infinitæ, sed hoc est absurdum, & contrà sensum, ergo .

Respondeo : eam propositionem vniuersalem; prima componentia sunt incomposita, non esse vniuersaliter veram , nam etiam materia , & forma sunt composita Metaphysicè ex essentia, & existentia; sunt composita Logicè ex genere, & differentia; atque ità propositio illa vniuersalis non verificatur in continuo , cuius partes debent esse diuisibiles , quia ipsum est totum aliquod homogeneous, vnde ad summum verificatur illa propositio vniuersalis in etherogeneis .

Ad Confirmationem respondeo negando sequelam , quia æqualitas , & inæqualitas non desumuntur ex numero partium proportionalium, quæ sunt infinitæ in omni magnitudine, sed ex numero partium equalium; maior ergo est tabula quadrilateralis, quàm sit tabula tripalmaris , quia plus sunt quatuor palmi, quàm duo .

LECTIO X.

Essentia Infinitis Definitione , & Diuisione inuestigatur .

PRæcipua Quantitatis species est , quòd sit finita, vel infinita; hucusque de quantitate finita . De infinita erit deinceps sermo .

Communis conceptus , quem omnes habent de infinito, est ; Infinitum non habere finem , seu terminum; Quantitatem ergo esse infinitam, & quantitatem carere fine, seu termino , quo liniatur, terminetur, & circumscribatur :

Definiebatur infinitum ab Antiquis, esse id, cuius nihil est extrà; Hanc definitionem, tanquam definito non adæquatam , impugnant cum Aristotele communiter Philosophi omnes ; quia talis definitio excedit definitum, nam etiam Totum, & Compositum æquè composit, quia etiam extrà totum nihil est accipere, vt plenum est .

Defini-

Definitur ergò ab Aristotele hic c. 6. l. 63. *Infinitum est, cuius semper aliquid extrà ratione quantitatis accipi potest.* Et c. 4. l. 33. Infinitum definierat esse id, quod *impossibile est pertransire*.

Dices. Infinitum, & ipsum est aliquod totum, si genericè consideretur, ergo nihil eius est extrà accipere, sed quò infinitum, & specificè consideratum, semper est eius aliquid accipere, ergo in vna, eademque infiniti entitate conueniunt duæ rationes contradictoriæ, idest, nihil infiniti esse extrà accipere, secundum quod totum est, seu secundum rationem genericam; & esse semper aliquid eius accipere, secundum quod infinitum est, seu secundum rationem sui specificam.

Respondeo, Definiri infinitum esse id, cuius extrà semper est aliquid accipere, non quia extra se, & foràs infinitum remaneat aliquid accipiendum, sic enim benè procederet argumentum, sed infinitum definiri esse id, cuius extrà semper est aliquid accipere, quatenus ex ipso infinito remanent semper partes extrahibiles, & acceptibiles; quare infinitum cum seipso, vt totum est, conuenit in hoc, quod sicuti extrà, & foràs totum nihil est ipsius totius assignare, ita extrà, & foràs infinitum nihil infiniti est assignare.

Ex his definitionibus clarè colligitur; naturam infiniti eam esse, vt ex infinito semper restet aliquid, & aliquid accipere, ità vt nunquam possimus ad finem, & terminum peruenire, & ulterius non progredi.

Diuiditur primò Infinitum, ità vt aliud sit infinitum secundum essentiam, & aliud secundum quantitatem, tam continuam; & secundum magnitudinem; quàm discretam, & secundum multitudinem rerum, siuè corporearum, siuè spiritualium.

Diuiditur secundò Infinitum, ità vt aliud sit Categorematicum, seu infinitum actu, & aliud Sincategorematicum, & infinitum in potentia. Infinitum Categorematicum secundum communem conceptum constat ex entitatibus omnibus actu existentibus, quæ infinitum actu existens secundum se totum constituent. Infinitum verò Sincategorematicum dicit entitates existentes permixtas entitatibus possibilibus, quare dicit aliquas entitates existentes, alias verò posibles; & idè infinitum Categorematicum dicitur esse totum actu; Infinitum verò Sincategorematicum dicitur esse partim actu, partim potentia.

Dices; Infinitum Categorematicum non est totum actu, neque

constat ex partibus, quæ omnes sint actu, ergo assignata divisio non est tradita per membra inuicem non coincidentia contrà regulas bonæ diuisionis

Antecedens probatur; ex infinito Categorematico semper restat aliquid, & aliquid accipere, semper ergo in illo sunt partes acceptibiles plures, & plures in infinitum, ergo non omnes sunt actu, sed aliquæ sunt actu, aliquæ sunt in potentia, illæ nimirum, quæ sunt acceptibiles.

Respondeo: partes esse acceptibiles plures, & plures in infinito Categorematico respectu nostri, non enim omnes partes simul actu accipimus, aut possumus accipere, quia infinitum exhaustire, aut consumere, non possumus, aliàs non esset infinitum; quare aliquæ partes infiniti Categorematici sunt in potentia respectu nostri, non quia non sint, aut non existant actu in seipsis, contrà quod accidit in infinito Sincategorematico, cuius partes in seipsis non omnes sunt actu, sed aliquæ sunt actu, aliquæ sunt in potentia.

Respondent alij: vt *Quiedus hic Contr. 14. pun 5. num. 5.* Infinitum Categorematicum differre ab infinito Sincategorematico etiam ex multitudine partium, quia Categorematicum etsi dicat infinita, non tamen dicit existentia omnia existibilia, semper enim extrà tale infinitum remanent alia, & alia accipienda; at infinitum Sincategorematicum dicit totam collectionem possibilem, extrà quam neque singularis vnitas restat accipienda.

Sed contrà est, quia si extrà infinitum Sincategorematicum, neque singularis vnitas restat accipienda, ergo illi non competit Definitio infiniti tradita ab Aristotele, quia per illam dicitur, quòd infiniti semper restat aliquid accipere, & extra infinitum semper aliquid sit.

Maneat ergo, infinitum Categorematicum, & Sincategorematicum distingui non ex multitudine partium, sed ex diuerso statu, quem habent partes utriusque infiniti, quia nimirum partes infiniti Categorematici omnes sunt actu, partes verò infiniti Sincategorematici, non omnes sunt actu, sed aliquæ sunt actu, aliquæ sunt potentia: imò partes infiniti Categorematici, ita omnes sunt actu, vt possint omnes esse simul actu, atque adeò non solum omnes habent existentiam, sed omnes habent simultaneam existentiam; at verò partes infiniti Sincategorematici neque omnes actu existunt, neque possunt omnes habere simultaneam existentiam, & concomitantem actualitatem.

LECTIO XI.

An Infinitum Repugnet.

Repugnare Infinitum secundum essentiam certum est in ente creato, de facto enim solus Deus est infinitus in essentia, an de possibili repugnet Creatura infinita in essentia, infra videbimus.

Certum est etiam, de facto neque dari magnitudinem, neque dari multitudinē suē rerum spiritualium, suē graduum qualitatis actu infinitam, illi tamen, qui in Continuo admittunt partes actu distinctas, easque infinitas, velint nolint, infinitum actu admittere, coguntur.

An de absoluta potentia admitti debeat infinitum actu tam, in magnitudine, quā in multitudine suē graduum qualitatis, suē rerum, tam corporearum, quā spiritualium.

Controuersia valdē iuxta est, nēdum apud Antiquos, sed etiam apud Recentiores, irā vt illam *Ouiedus* hic æquē difficilem pronunciet, ac sit Controuersia de Compositione Continui.

Tam hi, qui negant, quā qui admittunt infinitum, grauibus premuntur difficultatibus; idēque benē monuit Philosophus hic. c. 4. t. 33. impossibilia multa sequi, siuē ponatur, siuē non ponatur infinitum, en verba. *Habet autem dubitationem ipsa contemplatio infiniti; nam si ponatur esse, impossibilia multa sequuntur, & etiam si non esse, ponatur.*

Malo infinitum negare, quā illud ponere; Moueor, quia sententia negans infinitum, maiorem habet probabilitatem extrinsecam, desumptam ex auctoritate eorum, qui eam defendunt; pro illa stant *D. Thomas*, & *Scotus* duo summa Philosophorum, & Theologorum Capita; Hos sequuntur plerique Nobiles Recentiores.

Ponunt infinitum *Nominales*, & pauci alij Recentiores; Horum præcipuum, imō vnicum argumentum est, & commune, & negatiuum; deducitur ex negatione implicantiarum, quarum tamen aliquæ tanti sunt momenti, vt cogant Aduersarios, etiam inuitos multa concedere, quæ vel lumini naturali, vel comuni conceptui, & sensui ingenuē philosophantium, omnino repugnant.

Conclusio sit : Repugnat infinitum in multitudine tam gradus qualitatis, quàm aliarum rerum, siuè corporearum, & materialium, siuè incorporearum, & spiritualium.

Ità *D. Thomas quodlib. 9. art. 1. § 1 p. quest. 7. art. 2. & 4. Scotus in 2. d. 1. quest. 3. D. Bonau. in 1. d. 43. quest. 3. Riccard. ibidem quest. 5. & 6. Durandus q. 2. Caiet. 1 p. q. 7. art. 3. & 4. Ioan. de S. Thoma hic qu. 18. per totam. Complutenses. hic disp. 18. per totam.*

Ex Recentioribus sequuntur *Auerſa tom. 1. Philos. q. 24. sect. 5. Albertus in Prædic. Quantitatis d. 4. & 5. Fonseca 2. Met. c. 2. q. 1. sect. 3. Suarez disp. 20. sect. 17. num 16. Ruuius hic tract. 2. q. 3. Franciscus Le Reès hic disp. 4. per totam, alijsquè innumeri, quos cit. Auerſa suprâ.*

Contrâ. *Nominales Ochamûs quodlib. 2. q. 5. & in 1. dist. 44. q. 1. Maior eadem dist. 43. q. 3. Greg. dist. 43 q. 4. Bass. & Mayr. ead. dist. Recentiores Vasq 1. p. dist. 26. Hurta. d. 13. Phys. Fassol. 1. p. q. 7. art. 4. Arriagam. & Ouiedum hic, qui tamen infinitum in magnitudine negat. Arriaga verò sect. 3. Argumentum difficillimum contra infinitum insolutum relinquit.*

Argumenta omnia, quibus infinitum impugnatur, adducere, esset in argumentis fateri eam multitudinem infinitam, quam rebus in alijs constanter negamus. Eligam efficaciora, quamuis, quia communia, plerique paruipendant.

Primò sic argumentor. Creet Deus infinita malogranata, in quolibet malogranato sunt infinita grana, vel ergo tot essent malogranata, quot sunt grana, vel maior esset numerus granorum, quam malogranatorum. Si tot sunt graha, quot malogranata, ergo iam pars esset aequalis toti, & non esset pars quæcunque maior suo toto, quod est contrâ illud principium lumine naturæ, & vel cæcis ipsis notissimum, omne totum est maius sua parte. Si maior esset pars granorum, quàm malogranatorum, ergo vnum infinitum excederetur ab alio, ergo ex his duobus infinitis vnum esset minus, aliud maius, & consequenter vnum excederetur ab alio, & consequenter terminaretur, in quo enim, vnum exceditur ab alio, iam finitur, & terminatur, quia iam, in eo est assignare vltimum, quo posito vltèrius non extenditur, quod formalissimè nihil est aliud, quàm terminari, idest, vltèrius non extendi: assignent mihi Aduersarij, quid quæso sit, terminari, si non est vltèrius non extendi?

Idem Argumentum potest vrgeri, si Deus crearet infinitos
ho.

homines, quia esset maior pars oculorum, quàm hominum, maior pars capillorum, quàm oculorum. Similiter, si Deus crearet infinitos montes, & in quolibet monte esset vna formica, deinde destructis montibus, conseruaret formicas; certè formicæ minus spatium occuparent, quàm occupabant montes, ergo iam spatium occupatum à formicis, esset minus spatio occupato à montibus, & minus esset infinitum formicarum, ac esset montium. Eandem vim habet aliud argumentum; quia si Deus ex infinitis hominibus annihilaret decem, adhuc numerus hominum esset infinitus per Aduersarios; & ratio est, quia per ablationem finiti non destruitur infinitum, sicuti neque per additionem finiti; numerus enim ille infinitus constaret ex partibus finitis, & infinitis, & si adderentur decem, similiter esset infinitus; reuerà autem talis numerus hominum non esset infinitus, quia cresceret, & decrederet, atque adeò agnosceret terminum aliquem, suæ multitudinis, vltra quem non extenderetur, ergo.

Respondent aliqui, in infinito non habere locum huiusmodi terminos, æquale, & inæquale, maius, & minus, augeri, & minui.

Sed contrà est quia: si hi termini locum non habent in infinito, verè in infinito, totum non est maius sua parte, neque est minus, neque æquale; si crescere, & minui non potest habere locum in infinito, verè infinitum non constat ex partibus infinitis, & ità ex infinito, non possent desumi plures, & plures partes finitè in infinitum, quod nihil est aliud, quàm negare infinitum. Bene monet *Le Rees hic*: Vocibus interdiciunt defensores infiniti, nè vocibus refellantur, & arguantur manifestæ contradictionis.

Secundò sic argumentor. Detur columna, vel linea incipiens ex hoc puncto versus Orientem, & alia linea incipiat ex eodem puncto versus Meridiem, istæ lineæ, quò magis protraherentur, eò magis elongarentur, & distarent inter se, ergo iam esset inter eas lineas distantia infinita, sed talis distantia esset clausa inter duas illas lineas, tanquam inter duos terminos, atque adeò illa distantia esset finita, sed ex alia parte esset infinita, quia illæ duæ lineæ infinitè distarent; ergo esset distantia infinita, & non esset infinita, quòd apertè implicat.

Respondent Recentiores aliqui; duas illas lineas esse quidem terminos illius distantiae infinitæ, sed esse terminos infinitos, & inpertransibiles, & ideo non offensere infinitæ illi distantiae, non enim

enim repugnat infinitum claudi duobus terminis infinitis, & inpertransibilibus, esto illi repugnet claudi terminis finitis, & pertransibilibus.

Sed contrà est primò, quia videntur hi duo termini, seu voces, *terminus inpertransibilis*, importare manifestam implicantiã, nam terminus, quã terminus formaliter, dicit negationem vltioris extensionis, vndè tunc quis dicitur peruenisse ad terminum viã, cum vltius non progreditur, cum vltius non procedit; sed si iste terminus est inpertransibilis, & infinitus, iam possenius in eo vltius, & vltius progredi, vltius, & vltius procedere, nunquam tamen perueniendo ad finem, infinitum enim est illud, ex quo semper restat aliquid, & aliquid accipere, seu in quo semper possumus vltius, & vltius progredi, nunquam perueniendo ad finem, ergo Tò *terminus* videtur esse impossibilis cum Tò *inpertransibilis*, seu infinitus.

Contra secundò quia; quando quæritur ab Aduersarijs, cùt illa distantia sit infinita, cum claudatur terminis. Respondent, quia clauditur terminis infinitis, & inpertransibilibus; Iterum, quæro, quare hi termini sunt infiniti, & vndè habent infinitatem, quã termini sunt, vt termini formaliter? Non possunt aliud respondere, nisi eos terminos esse infinitos, quã terminos formaliter, quia claudunt infinitum, seu infinitam distantiam; si enim clauderent distantiam finitam, ad quid ponere terminos infinitos? vnumquodque enim finitum sufficienter clauditur terminis finitis, ergo ideò illi termini sunt infiniti, quia claudunt infinitum; est ergo manifesta petitio principij, illa distantia est infinita, quia clauditur terminis infinitis, & hi termini sunt infiniti, quia claudunt distantiam infinitam.

Respondebis: illos terminos non esse infinitos, quia claudunt distantiam infinitam, sed esse infinitos de se, quia iam supponuntur illæ lineæ infinitæ.

Sed contrà est quia; estò illæ lineæ sint infinitæ, quia ita supponuntur, sed cum in quolibet infinito aliæ sint partes infinitæ, aliæ finite, vt concedunt Aduersarij, vndè est, quòd illæ lineæ sint termini, & claudant illam distantiam potiùs secundum sui partes infinitas, quàm secundum finitas; quod idem est, ac quære, quare illæ lineæ in ratione termini formaliter sint infinitæ? Non possunt aliud respondere, nisi quia debent claudere infinitam distantiam, ergo iam firmum stat, distantiam esse infinitam,

tam, quia clauditur terminis infinitis, & terminos esse infinitos in ratione termini formaliter, quia claudunt distantiam infinitam, aliàs possent illæ lineæ infinite terminare illam distantiam infinitam secundum sui partes finitas, & sic infinitum clauderetur terminis finitis.

Contrà tertio principaliter, quia hi termini impertransibiles videntur de industria excogitari ad fugam harum difficultatum, ceteroquin enim in alia materia, siue Philosophica, siue Theologica nunquam redit memoria, aut vllus vnquam sermo de huiusmodi terminis impertransibilibus; de terminis sæpe est sermo in Philosophia, & Theologia, iisque vtimur ad varias difficultates soluendas, & explicandas, sed termini impertransibiles tunc solum, & in eo casu nobis obijciuntur, cum difficultates contrà infinitum adducimus.

Contrà quarto quia, idèd per *Arist. 8. Phys. & 12. Met.* negatur Processus in infinitum in causis essentialiter subordinatis, quia aliàs non concluderetur existentia primæ causæ. nunquam enim possemus deuenire ad primam causam dato eo processu, sed si infinitum claudi posset terminis, tale argumentum non esset efficax, quia adhuc negato eo processu in infinitum, non possemus deuenire in cognitionem primæ causæ; ratio est, quia negato eo processu, inter primam, & vltimam causam adhuc possent intercipi aliæ, & aliæ infinitæ, ità vt si quis vellet, ab vltima ad primam retrocedere, nunquam posset primam assequi numerando, ergo non benè negatur ille processus in infinitum, vt indè veniamus in cognitionem primæ causæ, atque ità per locum intrinsecum non est efficax argumentum Aristotelis, probantis ex negatione processus in infinitum existentiam primæ causæ, quando verum sit, infinitum posse claudi terminis, & consequenter posse inter primam, & vltimam causam intercipi alias infinitas.

Contrà quinto quia, si posset infinitum claudi terminis, sequeretur, quòd quilibet magnitudo, etiam si esset palmaris, aut pedalis, esset actu infinita. Consequens est absurdum, ergo. Probatur sequela maioris hac hypothesi; suppono dati triangulum, cuius duæ lineæ sint actu infinitæ, tertia verò finita, putà, linea pedalis, quæ sit basis trianguli.

Probo, quòd ista linea pedalis sit actu infinita; nam illa linea est actu infinita, quæ constat infinitis partibus æqualibus, & non communicantibus, sed ista linea pedalis est huiusmodi, ex


gō. Minor probatur; quia designet Deus in vna linea infinitā singulos pedes; qui sunt numero infiniti, ducaturque à singulis pedibus lineas paralle'as alteri lineæ infinitæ, quæ lineæ pertingant ad lineam pedalem, iam erunt infinitæ lineæ parallelæ, ut patet, & à se pari distabunt interuallo, ergo designabunt in linea pedali infinitas partes æquales, & non communicantes, ergo iam linea pedalis erit actu infinita, ergo quælibet magnitudo simili modo esset actu infinita, si posset infinitum claudi terminis.

Denique addo infinitum posse claudi terminis, esse manifestè contrà *Arist. qui 1. Caeli c. 7. l. 60.* docet, & probat infinitum, non posse aliquid pati ab infinito, neque .n. fieri potest, ut infinitum ab infinito aliquid patiat, ergo infinitum non potest claudi terminis infinitis, aliàs infinitum ab infinito aliquid pateretur.

Hæc eadem argumenta vrgeri possunt, si esset possibilis multitudo infinita rerum spiritualium, putà Animarum rationalium, aut Angelorum; nam in tali casu, plures essent actus intellectiōis, aut volitionis, quàm essent Angeli, ergo iam vnum infinitum esset maius alio, vnum excederetur, atque adeò terminaretur ab alio,

Similiter & contrà magnitudinem actu infinitam eadem vrgeri possunt Argumenta, nam si daretur corpus aliquod infinitè magnum, quod propterea infinitum spatium, & locum replet; si Deus à tali corpore aliquas partes præscinderet, & annihilaret, certè tale corpus adhuc remaneret infinitum, quia per ablationem finiti, infinitum non destruitur, quero, an occuparetur idem spatium, vel non: non potest dici primum, quia non occuparentur illæ partes spatij, quæ prius occupabantur à partibus illius corporis, quas supponimus annihilatas, si secundum, ergo iam maius infinitum est spatium, quàm illud corpus, quod propterea exceditur, & terminatur à spatio.

Quòd si dicas, esse possibile corpora se penetrata, & intrà loca interposita, iam de his redibunt argumenta, quæ supra adduximus contra infinitum multitudinis rerum spiritualium.



LECTIO XII.

Soluntur Argumenta in Oppositum.

Defensores infiniti varia exogitarunt Argumenta, quibus infinitum actu esse possibile, suaderent. Quare

Obiiciunt primò, Pietatis motuum, nulla est omittenda occasio exaggerandę, atque magnificandę diuinę Omnipotentię, vbi satis aperta in oppositum non relucet implicantia, ergo licet argumenta facta contrà infinitum agere, & cum difficultate soluantur, adhuc sustinenda est alicuius infiniti possibilitas, præsertim quia, quod argumenta contrà infinitum facta, difficile soluantur, oritur, non quia in se insolubilia sint, sed ex debilitate nostri intellectus, qui sine dubio super exceditur à Diuina Omnipotentia, à qua plura possunt fieri, quàm possint à nostro intellectu capi, aut intelligi; aliòquin Diuina Omnipotentia non esset infinita, si à nostro finito intellectu exhaustiretur, & quodammodo comprehenderetur, intelligendo planè, & plenè ea omnia, quę sunt per Diuinam Omnipotentiam possible.

Respondeo; exceptis Mysterijs Fidei, quę à nobis, quàm difficillimè intelliguntur, quia verè in ijs super exceditur intellectus noster à Diuina Omnipotentia, reliqua omnia entia, siue naturalia, siue supernaturalia, non sunt admittenda posse à Deo fieri, nisi plenè, & planè intelligantur, non implicare, & esse possible; neque enim exaggeratur, aut magnificatur Diuina Omnipotentia, dum admittitur, ab illa posse aliquid fieri, quod in se non sit possibile, sicuti non bene exaggeraretur eius Diuina intelligentia, si admitteretur Deus, intelligere inintelligibilia, aut magnificaretur bonitas eius Diuinę voluntatis, si admitteretur Deus, velle ea, quę volubilia, & appetibilia non sunt, vti sunt peccata.

Obiiciunt secundò, Dei Omnipotentia non est minus infinita, quàm sit eius cognitio, sed cognitio Diuina attingit omnes creaturas possibile, ergo potest Deus omnes creaturas possibile producere, sed hæc sunt infinitę, ergo possibile est infinitum in multitudine.

Respondeo. Deum cognoscere omnes creaturas possibile eo modo, quo sunt possibile, neque enim Diuina cognitio potest
attin-

attingere objecta aliter, ac sunt in se, quia ergo creaturæ omnes possibiles, sunt possibiles non quidem actu simul omnes, sed successivè, idè Deûs illas hoc modo cognoscit; & consequenter hoc eodem modo potest illas producere, non quidem actu simul omnes, sed successivè; quando dicitur; hæ creaturæ possibiles sunt infinite; distinguo, sunt infinite actu, & categorèmaricè, nego, sunt infinite potentia, & sincategorèmaricè, idest, finitæ in infinitum, concedo. Simili enim modo philosophandum est de huiusmodi creaturis possibilibus, ac de partibus continui, quæ sunt finitæ in infinitum; vndè sicuti Deus non cognoscit, nec potest cognoscere tot partes in continuo, quin plures, & plures possit cognoscere finitè in infinitum, ita non cognoscit, nec potest producere finitè in infinitum tot creaturas possibiles, quin plures, & plures cognoscat, & possit producere.

Dices; hæ creaturæ possibiles, prout cognitæ ab intellectu Divino, sunt actu in Divino intellectu; ex alia parte non sunt successivè, ergo sunt actu omnes simul in intellectu Divino, ergo eodem modo possunt produci.

Respondeo: creaturas possibiles esse actu in Divino intellectu actualitate se tenente ex parte ipsius intellectus, seu Divinæ cognitionis, quæ tota est actualis, & non potentialis; non tamen esse actu actualitate se tenente ex parte rerum; hæ enim partim sunt actu, partim potentia. Similiter dico, has creaturas possibiles non esse successivè in intellectu Divino, quasi successio se teneat ex parte Divinæ cognitionis, hec enim est tota simul, & simultanea, non successiva, sed esse successivè, successione se tenente ex parte creaturarum possibilium, quæ non sunt possibiles simul omnes, & collectivè, sed successivè, & distributivè.

Replicabis: istæ creaturæ non habent adinvicem impossibilitatem aliquam, ergo omnes simul sunt possibiles.

Respondeo: creaturas possibiles habere invicem impossibilitatem, non quòd ad esse simul distributivè, quælibet enim potest esse simul cum altera, sed habere impossibilitatem quòd ad esse simul collectivè ob rationes supra adductas.

Obijcies tertio. Omnipotentia Divina ad extrà est infinita, ergo debet habere pro sui termino adæquato infinitum: sed est infinita actu, ergo habet pro sui termino aliquod infinitum actu.

Respondeo. Divinam Omnipotentiam esse infinitam, colligi tum ex eo, quòd potest producere plures, & plures effectus finitè in infinitum semper perfectiores, & perfectiores, tum ex

modo operandi, quia producit ex nihilo, & independenter ab omni causa; non tamen colligi ex hoc, quòd possit effectum actu infinitum producere, is enim possibilis non est; imò si à Divina Omnipotentia effectus actu infinitus produceretur, exhauriretur omninò, & finiretur, saltem quòad posse de nouo producere, vt præcludam aditum responsioni eorum, qui exhauriendam Diuinam Omnipotentiam ab effectu infinito, ideò negant, quia posset Deus infinitum illud anihilare, & iterum producere; Insto ego; saltem Diuina Omnipotentia producto infinito effectu, non posset de nouo infinitum aliquod producere, & consequenter exhauriretur quòad nouas productiones.

Obijcies quartò. Deus potest facere, quidquid potest facere, faciat ergo, quidquid potest, hoc non erit finitum, ergo infinitum, ergo Deus potest producere infinitum.

Respondeo; distinguendo maiorem. Deus potest facere quidquid potest, idest, omne distributiue, quod potest facere. concedo maiorem; omne collectiue acceptum, quod potest facere, nego maiorem; Quando additur; quidquid potest facere, non erit finitum; distinguo, non erit finitum simpliciter, esto, nam nec etiam est infinitum simpliciter; non erit finitum secundum quid, idest, finitum in infinitum, nego.

Obijcies quintò; possibilitas non prius conuenit vni, quàm alteri ex possibilibus, ergo possibiles creaturæ sunt omnes simul possibiles; Antecedens probatur, quia non est assignabilis, cui creaturæ prius conueniat possibilitas, ergo.

Respondeo distinguendo consequens, ergo sunt omnes simul possibiles, simultate potentia concedo; sunt omnes simul possibiles, simultate actus, seu existentia nego; & sensus est, quòd in Deo est simultanea potentia ad omnes producendas, sed ipsæ non possunt simul existere, & actu simul esse ob impossibilitatem, quam habent omnes simul.

LECTIO XIII.

Infinitum in essentia creata.

ENs creatum posse esse infinitum in duratione, seu ens creatum posse esse ab æterno, & posse habere æternam, & infinitam durationem, probabilis est vtrunque sententia; qua de re infra

infra determinabimus, in quam sententiam velimus propendere. At ens creatum esse infinitum in essentia, communiter omnes supponunt repugnare, & manifestam inuoluere implicantiam. Videamus, an ita sit.

In primis. Nonnulli volunt, implicare ens creatum esse infinitum in essentia, quia aliàs esset infinitum in omni genere, & idem esset simul substantia, accidens, Deus, & Creatura. Ita *Le Reès disp. 4. art. ult. §. 1. Compluten. disp. 18. q. 2. §. 2.*

Sed contrà est quia, tales ens creatum poneretur infinitum, in vno tantum genere, non in omni genere; verbi gratia, si daretur Angelus infinitus, esset infinitus in specie, & natura Angelica tantum, non in omni specie, aut natura. Imò ex hoc deduceretur differentia notabilis inter Angelum infinitum, & Deum, quia Deus est infinitus in omni genere, at Angelus esset infinitus in sui tantum natura, & specie Angelica.

Præterea in sententia *Scotistarum* quidditatiuè, & formaliter distinguentium Relationes Diuinas à Diuina essentia conceditur, Relationes infinitas secundum quid, & in genere Relationum, & negatur, illas esse infinitas simpliciter, & in omni genere: ita ex eorum principijs deducit *Suarez disp. 38. Met. sect. 2. num. 12.* ergo bene aliquid potest esse infinitum in aliquo genere, absque eo, quòd sit infinitum in omni genere.

Secundo, Alij dicunt, implicare creaturam esse infinitam in essentia: quia aliàs haberet esse irreceptum, esset à se, & independens à Deo, idè enim Deus est infinitus, quia est à se, & ab omni alio independens, seù quia habet esse irreceptum. Ita *Compluten. hic disp. 14. q. 2. §. 2.* vbi plures alios pro se citant.

Sed Contrà est quia. Probabilis est multorum sententia, creaturam posse esse infinitam in duratione; atque adeò posse esse còternam Deo, & cum hoc adhuc saluatur dependentia creaturæ à Deo, ergo si Angelus esset infinitus in essentia, adhuc dependeret à Deo.

Præterea; *Arriaga disp. 6. Phys. sect. 1. num. 4.* concedit, Filium in Diuinis dependere à Patre; constat autem Filium esse infinitum æquali infinitate, ac est Pater, ergo infinitas non tollit dependentiam; unò à fortiori, infinitas æqualis infinitati Dei, quæ est infinitas in omni genere, non tollit dependentiam infiniti in omni genere à Deo, ergo infinitas minor, & in aliquo genere, non tollit dependentiam Angeli infiniti à Deo.

Tertiò alij: ea, quæ in Deo sunt absoluta, non possunt comuni-

inunicari creaturis, quia absoluta spectant ad Diuinam essentiam, vnde si absolutum aliquod prædicatum Dei communicaretur Creaturis, creaturæ communicaretur essentia Diuina, quare ratio solum relatiua, seu Personalitas Verbi potest, & de facto fuit communicata Creaturis; at infinitas est prædicatum absolutum, ergo non potest communicari Creaturis. Ità *Beccanus tract. I. de Deo qu. 3. num. I.*

Sed contrà, quia Personalitas Verbi fuit communicata Creaturis de facto, ergo de absoluta potentia potest communicari infinitas, non enim video esse assignabilem rationem de prædicato Diuino relatiuo, quæ non militet de prædicato Diuino absoluto; nam etiam prædicata relatiua sunt realiter identificata cum Diuina essentia, & tamen ex communicatione prædicati relatiui creaturæ, non sequitur, eam creaturam esse Deum.

Præterea; ipsa actualis Diuina intellectio est ens absolutum in Deo, imò est eius ratio vltima differentialis, metaphysicè loquendo, & tamen probabilis est sententia, actualem intellectiōem posse esse essentiam Angeli; ità nonnulli, quos citant *Capreol. in 2. d. 3. q. 2. & in I. d. 35. qu. I. Gregorius in 2. d. 7. quest. 2.*

Imò Vbiquitas, & Immensitas de absoluta potentia potest Angelis communicari; si enim de facto Angelus quò perfectior est, eò maius spatium occupat, vnde potest creari Angelus adeò perfectus, qui totum mundum occupet, seu qui coexistat spatio occupato nunc à toto mundo; quare non potest creari Angelus, qui occupet infinitum spatium, illique coexistat? Ità *Beccanus tract. I. de Deo qu. 3. num. 2. Ioannes Durelle in sua Categoricothea lib. I. c. 10. Petrus à Sancto Ioseph in Idæa Theol. specul. lib. I. c. 5.* ergo potest etiam Angelo communicari infinitas in aliquo genere.

Quartò alij, asserunt, implicare creaturam in essentia infinitam, quia omnis creatura importat potentialitatem, defectibilitatem, & contingentiam; porro potentialitas, defectibilitas, & contingentia imperfectio quædam est, quæ non potest competere Creaturæ infinitæ in essentia, & perfectione, infinitas enim perfectionis, omnem imperfectionem excludit.

Sed contrà, quia creatura, quæ ponitur possibilis ab æterno, potentialitatem, defectibilitatem, & contingentiam excludit, & tamen est verè creatura, ergo ista creatura, quæ ponitur infinite perfecta, adhuc posset excludere has enumeratas imperfectiones

absque eo, quòd deperderet conceptum, & formalitatem creaturæ, vel etiam dato, has imperfectiones non posse excludi à creatura, adhuc non tolleretur infinitas talis Creature, per hoc enim contradistingueretur infinitas creata ab infinitate increata, & Diuina, quia infinitas Diuina omnem prorsus imperfectionem excludit, at infinitas creata, quia non excludit dependentiam à Deo, neque excludit defectibilitatem, potentialitatem, & contingentiam, quæ necessariò consequuntur ad talem dependentiam.

Præterea; potentialitas, contingentia, & defectibilitas videntur termini synonymi, & reuera non sunt; distinguamus ergo potentialitatem à contingentia, & defectibilitate, (nam hos duos ultimos puto coincidere, nimirum contingentiam, & defectibilitatem.) Potentialitas igitur, vel sumitur Logicè, idest, pro ratione generica, & contrahibili, vel sumitur physicè, idest, pro negatione, & carentia actus; si primo modo sumatur potentialitas, non videtur obstatè infinitati, quia Deus est infinitus, & tamen multi probabiliter putant, Deo competere rationem genericam, & contrahibilem, vnde illum ponunt in prædicamento, & supremo genere substantiæ. Ità *Vasq. l. p. d. 22. & 25. Gregorius, & Gab. in l. d. 8. qu. 4. Molcot. §. 6. Racconius d. 9. q. 1. Rès in prædicam. Arist. §. 11.* si secundo modo sumatur, iam suprà ostendi, non implicare Angelum, cuius essentia sit actualis intellectio; quo casu talis Angelus careret potentialitate physica, imò probabilis est sententia, possibilem esse qualitatem actu infinitam, si ergò intellectio ipsa esset actu infinita, careret potentialitate, & tamen adhuc esset ens creatum, ergo benè possunt inuicem combinari ista duo, esse creatum, & excludere potentialitatem.

Quòd contingentiam, & defectibilitatem; neque hæ videntur esse de ratione creaturæ, nam in probabili sententia, quam docet *Arriaga in tract. de Angelis dis. 2. sect. 1.* potest dari duratio creata indiuisibilis, quæ se extendat ad tempus diuisibile, verbi gratia, ad duos, vel tres dies, vel etiam in æternum, intra quod tempus creatura durans tali duratione non esset defectibilis, & contingens.

Imò de facto Nonnulli ponunt in Christo Domino visionem beatam, quæ habeat pro obiecto omnia futura, & suam propriam durationem in æternum, hæc autem non potest deficere, & corrumpi, neque de absoluta potentia, quia illi essentialiter
repu-

repugnât falsitas, atque adeò cum dicat essentialiter, se in æternum duraturam, & sit essentialiter vera, repugnat illam semel existere, & non durare in æternum, ergo non implicat, aliquam creaturam non esse defectibilem, seu esse indefectibilem, & indestruibilem; ratio est quia, talis indefectibilitas, & indestruibilitas competeret illi creaturæ ex suppositione, quod ita illam Deus voluerit creare, atque adeò esset indefectibilitas, & indestruibilitas, quæ non obstarét absoluto dominio, quod habet Deus suprâ talem creaturam, quia in eius libera potestate, & libertate erat producere, & non producere talem creaturam, dare, & non dare illi talem durationem; in quo sensu adhuc talis creatura potest dici contingens.

Si ergo creatura esset infinita in perfectione, & in essentia; adhuc esset creatura, licet non haberet indefectibilitatem, & careret contingentia; vel etiam posset dici, quod haberet contingentiam modo explicato, quatenus a Deo poterat, & non poterat liberè produci: Hinc *Petrus à Sancto Ioseph in Idea sue Theologiæ speculatiuæ lib. 1. cap. 5.* admittit creaturam posse esse secundum quid infinitam.

Quintò alij, fatentur, se in creatura infinita in essentia clarè non agnoscere implicantiam vllam, & tamen non audent discedere à communi sententia, negante huiusmodi creaturam in essentia infinitam, esse possibilem de absoluta Dei potentia.

Sed contrà quia, hi auctores, vel inuiti incidunt in illud ipsum, quod cauere intendunt, nam est communis sententia, ea non esse deneganda Diuinæ Omnipotentiae, quæ manifestam implicantiam non inuoluunt, ergo ab ista communi sententia discedunt, dum nolunt discedere ab alia, negante possibilitatem creaturæ infinitæ, & ex alia parte fatentur in creatura infinita in essentia non esse claram aliquam, & manifestam repugnantiam, imò magis communis est sententia, quæ admittit Diuinæ Omnipotentiae, concedenda esse ea omnia, quæ manifestè non implicant, quàm alia, quæ negat creaturam in essentia, & perfectione infinitam.

Sextò alij, concedunt, posse à Deo fieri creaturam omnium perfectissimam, nec non omnium imperfectissimam, & negant possibilem esse creaturam in essentia infinitam. Ità *Arriaga disput. 13. sect. 3.*

Sed contrà est quia: ista creatura omnium perfectissima excedit in perfectione infinitas creaturas, ergo ipsa esset infinita.

in perfectione, nam si creatura, quæ in perfectione infinitas excedit, non est infinita; quæ creatura poterit excogitari infinita? vel quis poterit efformari conceptus entis infiniti? sanè ens finitum non potest excedere infinita; si ergo creatura omnium perfectissima, excedit infinitas alias in perfectione, erit utique perfectionis infinitæ, non enim potest esse perfectionis finitæ.

Præterea; data ista creatura omnium perfectissima, non posset Deus aliam perfectiorem, & perfectiorem in infinitum creare, ergo iam ista creatura omnium perfectissima esset infinitæ perfectionis, solum enim infinitum in perfectione, non potest ab alio excedi in perfectione, finitum enim bene potest ab alio excedi; ideòque illi Auctores, qui negant posse à Deo perfectiorem, & perfectiorem creaturam in infinitum produci, moventur eo fundamento, quia aliàs Deus posset infinitam in perfectione creaturam producere. Ità *Henricus quodlib. 8. Durand. in I. d. 44. qu. 2.* ergo non posse aliam creaturam perfectiorem produci, est, iam Deum produxisse infinitam.

Dices. Datur Materia prima creaturarum omnium imperfectissima, quæ tamen non est infinita in imperfectione, ergo etiam si daretur creatura omnium perfectissima, non proinde esset infinita in perfectione.

Respondeo. Materiam primam esse imperfectissimam comparatiuè ad creaturas, quæ de facto sunt, non absolute, & simpliciter; Materia enim prima ideò imperfectissima est, quia est propè nihil, esse autem propè nihil, non consistit in indiuisibili, sed suscipit magis, & minus, potest enim aliquid magis, & minus ad nihil accedere; licet ergo de facto nulla alia creatura magis accedat ad nihil; De possibili non dubito, esse alias creaturas, quæ possunt magis, & magis ad nihil accedere.

Imò materia de facto à *Scoto* ponitur, habere propriam existentiam, à *Thomistis* ponitur, carere propria existentia, ab alijs adhuc carere propria essentia, ut suprà *disp. 1. lect. 5.* retulimus; ergo iam de facto habetur materia magis, vel minus imperfecta, magis & minus accedens ad nihil.



DISPVATIO IV.

DE LOCO, VACVO,
ET TEMPORE.

Ad alias Corporis Physici Passiones, & Proprietates explicandas gradum facimus cum Aristotele hic Quarto Physicorum Libro. Sunt autem Locus, & Tempus, nullum enim assignabile est Corpus naturale, quod aliqua Temporis differentia, & aliquo Loco non circumscribatur: Quia verò, Loco Vacuum opponitur, ut magis perspecta habeantur ea, quæ de Loco disputantur, etiam de Vacuo pauca quedam dicemus; siquidem Contrariorum eadem est ratio discipline ex Arist. in Problematis sect. 30. qu. 7. & alibi passim.

LECTIO I.

Faciliora quedam de loco expediuntur.

Existentia Loci conuincitur ex latione, seu motu, qui propterea dicitur localis, quia habet pro sui termino locum; hinc habet Philosophus hic t. 18. *Vnumquodque impellente natura moueri ad suum locum, & ea duce in suo loco quiescere.*

Primaria sui diuisione Locus ita partitur, ut alius sit imaginarius, (qui communiter dicitur spatium imaginarium,) & alius sit realis. Locus imaginarius, seu spatium imaginarium, est illa cauitas, quam modo vnum corpus occupat, & replet, quæque vacua esset, si ab hoc corpore, vel ab alio non repleretur, & occuparetur; hinc extrâ vltimum Cœlum dicuntur esse spatia imaginaria in aliquorum sententia, quia ibi magna cauitas, & capacitas est, quam plura corpora possent replere, & occupare, licet de facto nullum sit corpus, quod ea occupet. Sed an reuerà detur tale spatium imaginarium, infra examinabimus: Locus realis est vltima, seu extrema pars corporis continentis, &

ambientis aliud corpus; hinc aer, qui nos ambit, vndique continet, & circumscribit, dicitur, & est locus nobis extrinsecus, & realis. E contra vltimum Caelum, quia à nullo alio corpore circumambitur, & circumscribitur, non dicitur esse in loco, vel dicitur ad summum esse in loco secundum partem inferiorem, & concavam.

Item locus realis subdiuiditur in locum naturalem, & Artificialem: Locus naturalis est is, ad quem corpora vi naturali feruntur, sic ignis dicitur tendere sursum, & ad locum superiorem, lapis dicitur tendere deorsum, & ad locum inferiorem. Pisces dicuntur esse in mari, tanquam in loco naturali, & aues in aere. Locus artificialis dicitur corpus illud, quod ea industria, & arte factum est, vt contineat alia corpora, sic vas est locus artificialis aquae, & dolium est locus artificialis vini.

Denique locus alius est extrinsecus, alius intrinsecus. Locus extrinsecus, qui sine dubio realis est, definitur *ab Arist. hic r. 41. finis continentis immobilis primus*; id est, extrema pars corporis aliud continentis, & circumambientis; extrema ista pars dicitur extrema respectu corporis contenti; Dicitur etiam immobilis, quia locus est terminus motus localis, atque adeo debet sistere motum localem, & facere, quod ulterius non progrediatur, id autem non posset fieri, si ipse terminus, & locus moueretur, quia hac ratione potius protraheret, & continuaret motum localem.

Quomodo autem locus non dicatur localiter moueri, sed immobilis, cum ex alia parte ad sensum pateat, corpus omne localiter moueri, & consequenter moueri etiam extremas illius partes, quae habent rationem loci respectu alterius corporis; variè explicatur ab Auctoribus; Id, quod mihi videtur probabilius posse dici, & conformius ad mentem Aristotelis, est, Locum esse immobilem, quia non mouetur localiter ad motum locati, verbi gratia, ideo Coriscus est in Platea, tanquam in loco, quia licet Coriscus moueatur, Platea tamen non mouetur; ideoque bene concludit hic Philosophus *Coriscum tam ambiri Foro, quam Vestibus, & tamen Coriscum non dici esse in Vestibus, sed in Foro; Forum enim non mouetur localiter ad motum Corisci, sicut mouentur vestes*: & per hoc contradistinguitur locus à Vase, quia vas mouetur ad motum corporis intra se contenti, mouetur Dolium, si moueatur vinum, non sic locus.

Dices. Turris flante vento innumerabilibus vicibus mutat extrema Corporis circumambientis illam, nempe extrema aeris à vento commori, & agitati, & tamen Turris non dicitur mutare locum, ergo locus non est extremum Corporis.

Respondeo. Turrim illam mutare locum physicè; esto non mutet locum moraliter, quia ad mutationem vnius partis aeris succedit alia pars, quæ cum sit homogenea cum parte priori, moraliter, & iuxta prudentum hominum existimationem, videtur Turris illa, locum non mutare.

Locus intrinsecus est vbi, seu vbiatio, & præsentia, quæ, an detur, & quodplex sit, mox dicemus.

Solent assignari sex differentię Loci, nempe, sursum, deorsum, antè, retrò, dextrorsum, sinistrorsum; quę loci differentię sunt extrinsecę denominationes desumptę ex diuersis partibus Animalis ex *Arist. 2. Cali. l. 9.* Nam illa pars Animalis dicitur sursum, seu superior, per quam animal sumit alimentum, deorsum verò, seu inferior est illa pars, ad quam vltimò pertingit alimentum, vt pedes: illa pars dextera est, à qua incipit motus, huicque opponitur sinistra. Anterior pars est ea, in qua maximè vigent sensus, postica, seu posterior est pars opposita.

LECTIO II.

An vbi sit quid distinctum à Loco, & Locato.

Communitè vbi, seu localis præsentia, dicitur locus intrinsecus; hæc locutio mihi videtur minus apra, & minus propria, quia in rigore, & in proprietate sermonis, vbi non est locus, sed est ratio formalis constitutiua Corporis in loco; non reprehendo communem illum loquendi modum *Pauca sunt enim, quę propriè loquimur, plura non propriè, sed agnoscitur, quid velimus. D. August. lib. II. Confes. c. 20.*

Vt vbi esse aliquid distinctum defendam, pugna iterum, iterum certamen mihi ineundum est cum *Nominalibus*, seu *Complexistis*, nec non cum *Connotantibus*, seu *Connotatoribus*.

Nominales in primis, & Complexistę, vt funditus euertant modos, quos adedò auersantur, suo more ad phrasès, & nomina confugiunt, quando illis explicandum est vbi, vel Conplexum ex corpore locato, & loco, seu coexistentiam loci, & lo-

cati obtrudunt; Connotantes verò, seu Connotatores, loco vbi; connotatum substituunt; volunt enim, vbi esse corpus locatum, connotando locum, seu corpus, prout locum extrinsecum dicit, & connotat.

Nolo in horum Auctorum nominatione, & citatione immorari, quia illos tum in *Logicis Disp. 3. de Prædicam. Lect. 7. & Lect. 8. tum in Physicis Disp. 1. Lect. 12.* dum Relationem, & Vnionem esse modos distinctos propugnarem, enumeravi.

Communis sententia defendit, vbi esse quid distinctum à Corpore locato, & loco extrinseco. Ità in primis Thomistæ, *Ruius hic tract. de natura loci qu. 5. nu. 56. Complutenses hic. Disp. 19. qu. 1. §. 1. & 2. Ioannes de Sancto Thoma hic. qu. 14. art. 1. Ioannes de Castelnovi in Log. disput. 8. dub. 6. & fauet S. Thomas 5. Met. lect. 15. par. 1. opus 48. tract. de vbi. Fauet etiam huic sententiæ Scotus, qui in 3. distinct. 1. qu. 1. Vbi appellat relationem extrinsecus aduenientem; Scotum sequuntur plures alij ex eius Schola.*

Ex Recentioribus, *Suarez disp. 51. Met. sect. 1. Vbi. 1. par. disp. 29. Perer. lib. 13. c. 9. qu. 10. ad 4. Conimb. 3. phys. c. 3. qu. 4. art. 2. Durelle lib. 1. Categoricalæ c. 10. Hurt. disput. 14. phys. sect. 4. Auerſa t. 1. Philos. qu. 28. sect. 1. Le Reès disp. 5. de loco ar. 4. Ouied. hic contr. 15. punct. 4. Arriaga disp. 14. sect. 2.*

Non video, quomodo hi Recentiores coherentem philosophentur; nam in Logicis aperte negarunt, Relationem esse modum distinctum ab absolutis, & aliqui eorum Relationem saluabant per connotata, vt *Suarez, & Le Reès*, alij per coexistentiam duorum absolutorum, vt *Hurtadus, Auerſa, Ouiedus, & Arriaga*; hic verò modum vbiicationis acriter defendant.

Ego sanè semper eius fui voti, aut omnes modos esse ponendos, aut omnes negandos, quia de ijs omnibus eadem militat ratio: cur enim *Reès, & Suarez* per connotata saluant relationem, & per connotata non saluant vnionem, & vbi? Cùm alij Auctores per coexistentiam, & complexionem extremorum, saluant Relationem, & non saluant per similem coexistentiam, & complexionem vnionem inter materiam, & formam, & vbi intrinsecum? Eadem Argumenta, si non omnia, saltem aliqua, quæ probant vnionem, & vbi esse modos distinctos, probant etià, relationem esse modum distinctum, ergo si coherentem velint loqui, vel omnes modos debent negare, vel omnes concedere.

Conclusio sit, Vbi est quid distinctum realiter à loco, & corpore locato.

Dixi,

Dixi, est quid distinctum realiter, quia esse modum, & non rem, infrà ostendam.

Probatur Conclusio primò Argumento communi etiam alijs modis; quia non potest dari transitus subiecti de contradictorio in contradictorium sine aliqua intrinseca mutatione eiusdem subiecti, aliàs de vno, eodemque subiecto prorsus inuariato verificarentur duo contradictoria, quo nihil absurdius, sed corpus locatum de non præsenti huic loco extrinseco, sit præsens, ergo per aliquam sui mutationem, seu acquisitionem alicuius entitatis de nouo, quæ nulla alia potest assignari, nisi ista localis præsencia, seu vbi, cuius ratio formalis est, constituere corpus præsens potius huic loco, quàm alteri, potius præsens Romæ, quàm Genuæ.

Respondebis, Petrum, verbi gratia, esse potius præsentem Romæ, quàm Genuæ, nihil esse aliud, quàm complexum ex Petro, & Roma.

Sed contrà est; quia possunt esse Petrus, & Roma absquè eo, quòd Petrus dicatur esse, & verè sit præsens Romæ, ergo Petrum esse præsentem Romæ, est quid diuersum à Petro, & Roma, seu à coexistentia simultanea Petri, & Romæ:

Respondebis secundò. Petrum esse Romæ, esse Petrum, prout connotantem Romam, & non alium locum.

Sed contrà est quia; vnde habet Petrus, modo connotare Romam, quam antea non connotabat? Sanè si nil habet de nouo, non connotat modo Romam, quia nec antea connotabat; si habet aliquid de nouo, hoc ipsum est præsencia localis, & vbi, quod probare intendimus.

Respondebis tertio. Petrum esse præsentem Romæ esse, Petrum habere negationem corporis interiecti inter Petrum, & Romam, sicuti esse lucem, est formalissimè, non esse tenebras.

Sed contrà est quia; si Petrum esse Romæ, diceret formalissimè negationem corporis interiecti, iam daretur negatio negationis, ergo; probatur sequela, quia expellat Paulus à Roma Petrum, talis expulsio est negatio, Paulum enim expellere Petrum à loco, est negare existentiam Petri in illo loco, sed talis existentia est negatio, quia Petrum esse Romæ, & esse in loco, est negatio corporis interiecti per Aduers. ergo iam datur negatio negationis.

Respondebis quartò. Petrum esse Romæ, nihil aliud esse, quàm immensitatem Dei, prout virtualiter distinctam, & vt re-
spon-

spondentem Petro, & Romæ, licet enim Diuina Immenſitas vnâ ſit, & indiuiſibilis, multiplex tamen eſt, & virtualiter diuiſibilis, & ſic conſiderata correfpondet diuerſis locis, & corporibus locatis, & ſicuti diuerſa ſunt locata, & diuerſa ſunt loca, ita diuerſæ ſunt iſtæ virtualitates Immenſitatis Diuinæ correfpondentis ſingulis locis, & ſingulis locatis; & ſic Petrum eſſe Romæ, eſt virtualitatem Diuinæ immenſitatis eſſe in Petro, & correfpondere, Romæ.

Sed contrâ eſt quia, ſi Petrum eſſe Romæ, eſt virtualitas Diuinæ Immenſitatis correfpondens, & terminans ad Petrum, & ad Romam; ſimuliter parietem eſſe album, vel nigrum, erit virtualitas Diuinæ entitatis correfpondens parieti, & albedini, vel nigredini; atque ita non modò tolleretur præſentia iſta localis, ſed etiam omne aliud accidens, & vniuerſa philoſophia deſtrueretur.

Prætereâ; per quid ſit, vt vniuerſalitas Diuinæ Immenſitatis correfpondeat Petro, & Romæ, quibus antea non correfpondebat hoc ipſum, per quod iſta virtualitas Diuinæ Immenſitatis correfpondet Petro, & huic loco, eſt formaliffimè præſentia localis, & vbi intrinſecum, quod quærimus, & probare intendimus.

Probatur ſecundò Concluſio argumento ſpeciali; quia motus localis eſt vera actio productiua, ergo debet assignari formalis terminus productus vi talis actionis, nulla enim poteſt dari actio ſine ſuo termino formali, qui formaliter vi talis actionis producat; Sed talis terminus non eſt locus extrinſecus, qui iam eſſe præſupponitur, non eſt corpus locatum, quod etiam præſupponitur eſſe, & exiſtere, ergo erit ipſa præſentia localis, ſeu vbi intrinſecum.

Reſpondebis. Lationem, ſeu motum localem eſſe actionem adductiuam, non productiuam, atque adeò adducere, & deferre corpus ad locum; non verò producere præſentiam iſtam localem, & intrinſecum vbi,

Sed contrâ eſt quia, hæc ratione poſſet etiam dici, quòd generatio non ſit productio formæ ſubſtantialis, ſed adductio eius ad materiam, atque ita formæ ſubſtantiales materiales non producerentur ab agente naturali, ſed crearentur immediate à Deo. Similiter & augmentatio non eſſet productio quantitatis, nec alteratio eſſet productio qualitatís, ſed adductio, at hoc eſt contrâ omnes philoſophos, ergo ſi motus localis eſt verus motus phyſicus, ſicuti reliqui, imò quia eſt motus
per

per antonomasiam, & maximè propriè physicus. non debet esse adductio, sed productio noui termini, qui formaliter vi eius producat, qui terminus nullus est alius, quàm vbi.

Probat,ur tertio argumento adhuc speciali, & proprio ipsius vbi, quia, Vbi intrinsecum, vel ipsis omnibus sensibus patet, videtur, auditur, tangitur, olit, gustatur, ergo verè datur, omnes enim sensus falli nequeunt, esto aliquis falli possit ob defectum debitæ alicuius circumstantiæ, antecedens probatur, quia, audio cursum prætereuntem parte dextera, non sinistra, tango rem in hoc loco; & non in alio: canes venatici odorant prædam esse hic, & non alibi; eodem modo per gustum cognoscimus saporem esse in hac parte pomii, & non in alia; sed id magis declaratur in sensu visus; Pono lapidem pendentem in medio aere, me non vidente, traseratur lapis in alium situm eiusdem aeris; tum sic; video lapidem non esse ibi, vbi erat prius, ergo aliquid video in lapide, quod non videbam prius, sed hoc non est quantitas, nun qualitas, neque aliud ex prædicamentis, (suppono enim omnia accidentia remanere eadem) neque est motus, quia suppono, me non vidisse motum, ergo est vbi permanens, qui est terminus intrinsecus motus, ergo iam vbi per visum clarè innotescit, & patet.

Respondebis in tali casu videri diuersam positionem in ordine ad videntem, qui cum antea videret lapidem directâ facie, nunc videt deflexum in dexteram, vt sinistram partem.

Sed contrâ est, quia: diuersa isto positio nihil aliud est, quàm vbi, est enim diuersa ista positio localis, & cum relatione ad locum; dexterum enim, & sinistrum sunt differentię locales, vt Lect. I. diximus.

Quòd si hoc vbi appellare velis, positionem, & non vbi: non curro, quomodo loquaris, dummodo rectè sentias; *liberis vocibus loquuntur philosophi, nec offensionem religiosarum aurium in rebus ad intelligendum difficillimis, pertimescunt ex D. Augustino lib. 10. de Ciuit. Dei cap. 23.*

Respondebis secundo, videri diuersam quantitatem.

Sed contrâ est, quia suppono, omnia accidentia remanere immutata prorsus, & innariata. Præterea, ponamus tria corpora eiusdem planè rationis alio, atque alio modo, ita ut mutant inter se ordinem, sed remaneant quòdā omnia in eodem loco; in dato casu, diuersitas ista, quæ videretur, non posset refundi in diuersam quantitatem interceptam, quia inter illa tria corpora nulla

quantitas interciperetur, ergo firmum stat, videri diuersum, vbi.

Dices: Vbi non est color, vel lumen, ergo non videtur; non est odor, ergo non olit.

Respondeo. Vbi esse sensibile commune, quod à pluribus sensibus percipitur; reducitur autem ad motum, & quietem, esto non sentiatur, nisi sit iunctum sensibili proprio, seu nisi sit in aliquo corpore luminoso.

Denique quartò, & vltimo probatur, dari hoc vbi auctoritate *Arist. 1. Coelit. 100. Patet ergo neque locum extrà Cœlum esse, neque Vacuum, neque Tempus: quo circà neque apta sunt ea, quæ illic sunt, esse in loco, neque Tempus senescere ipsa facit:* si ergo extrà Cœlum non est Locus, & tamen aliqua sunt illic, certò, Tò illic, Vbi intrinsicum denotat, nam vt benè aduertit *Suarez in Metaph. disp. 51. sect. 2. num. 7.* aduerbia localia, *hic, illic*, & similia, licet vt plurimum ex loco extrinseco desumantur, aliquando tamen desumuntur præcisè ex Vbi intrinseco, quando scilicet; non connotant respectum ad aliud corpus circumstans, quo casu non tam aduerbia localia, quàm aduerbia præsentia, vel absentia, dici debent.

LECTIO III.

Aduersus Vbi argumenta dissoluntur.

EX pluribus, quæ aduersus Vbi excogitarunt Argumenta *Nominales, Complexiua, & Connotantes*, efficaciore adducam, & solutam.

Obijciunt primò: effectus determinatus debet esse à causa determinata, sed non potest assignari causa determinata huius vbi, ergo. Minor probatur, quia in hoc instanti A. producit hoc Vbi, quo corpus locatum fit formaliter præsens huic loco extrinseco, sed tale Vbi non potest produci à Corpore locato, quia est indifferens ad coexistendum potiùs huic spatio, & loco extrinseco, quàm alteri, sed neque potest produci à potentia loco motiua, quia hæc similiter est indifferens ad producendum, siuè hoc, siuè illud Vbi; neque potest produci à loco extrinseco, qui æquè est indifferens ad locandum, siuè hoc, siuè illud corpus, ergo

ergo huius Vbi non potest assignari causa determinata.

Respondeo: hoc argumentum vni habere in eorum sententia, qui putant, causas non esse ex sui natura determinatas ad producendum hunc potius numero effectum, quàm alium, sed potius esse indifferentes, & indeterminatas ad quemlibet producendum ex pluribus, quos possunt producere, donec accipiat determinationem à causa prima; quare auctores huius sententiæ tenentur respondere facto argumento, corpus locatum, seu potentiam loco motiuam determinari à Deo ad producendum potius hoc vbi, quàm aliud.

Cohærenter ad mea principia dico; potentiam loco motiuam de sui natura esse determinatam in hoc instanti A. & relatiuè ad hunc locum extrinsecum, ad producendum hanc potius vbi-cationem, quàm aliam, sicuti enim ignis, verbi gratia, est de sua natura determinatus ad producendum, hic, & nunc, hunc potius numero calorem, quàm alium; ita & potentia loco motiua est de sui natura determinata ad producendum potius hoc vbi, quàm aliud in hoc instanti, & relatiuè ad hunc locum extrinsecum.

Obijciunt secundò: Prius corpus est in loco, quàm habeat vbi, ergo corpus non constituitur formaliter in loco per vbi; consequentia est plana. Antecedens verò probatur quia, vbi producit à corpore, ergo iam corpus debet esse approximatum; nam ex dictis *Disp. 2. Lect. 6.* Approximatio est conditio necessario requisita ad operandum, sed corpus esse approximatum nihil est aliud, quàm approximatum loco, ergò iam corpus præsupponitur in loco.

Respondeo. Corpus non debere esse approximatum loco, vt producat vbi, neque enim vbi recipitur in loco, tanquam in subiecto, imò potius, quia vbi recipitur in corpore ipso, à quo producit, solum sequitur, ipsum corpus debere esse sibi met ipsi approximatum, & propinquum, vt reuerà est, nihil est sibi met ipsi non appropinquatum, & propinquum.

Quando autem ponitur approximatio, tanquam conditio necessario requisita ad operandum, talis approximatio debet esse inter Agens, & subiectum, seu passum, non inter agens, & effectum, aut aliquid aliud.

Dices; non potest vlla actio procedere à corpore non locato; quidquid enim operatur, debet esse in loco, ergo iam in aliquo priori præsupponitur corpus locatum, antequam producat per sui actionem Vbi, ergo non est necesse, vt producat Vbi, ad hoc, vt
loce-

locetur, & constitutur formaliter in loco.

Respondeo. Corpus productuum Vbi præsupponi constitutum in loco per Vbi productum ab eo, qui primò produxit tale corpus, Deindè quando tale corpus se mouet, & acquirit aliud locum extrinsecum, producit aliud Vbi, quo se constituit præsens loco, quem acquirit. Requiritur ergo Vbi in corpore iam locato, non vt se locet in loco, in quo iam præsupponitur existere, sed vt se locet in alio loco, cui fit de nouo præsens, quando se mouet localiter.

Replicabis. Agens, quod primò producit corpus locatum, simul Corpus produxit, & locauit, ergo per ipsam productionem constituit corpus in loco, & non per Vbi, Deindè illa causa, quæ corpus iam locatum conseruat, conseruatio constituit formaliter in loco, itaut ipsa actio conseruatiua sit ratio formalis constituendi corpus in loco, ergo non requiritur Vbi. Confirmatur, quia non repugnat ponere actionem productiuam, vel etiam conseruatiuam, quæ sit essentialiter affixa alicui loco, ergo per talem actionem potest optimè intelligi constitutum formaliter Corpus in loco.

Sed contra est quia: Corpus quodad primò produci, & conseruari, est independens à loco, vnde non desunt Philosophi, qui probabiliter defendunt, posse esse Corpus nullibi: sit ergo Corpus aliquod nullibi, iam conseruabitur tale corpus independens à loco, ergo per conseruationem non constituitur corpus formaliter in loco, & si potest conseruari nullibi, potest etiam nullibi, primò produci, ergo prima productio non est constitutiua corporis in loco.

Præterea prima productio, & conseruatio non habent pro sui termino locum, adæquatè enim terminantur à re producta, ergo merè gratis finguntur, quod sint affixæ alicui loco, aut quod rem productam essentialiter, seu formaliter constituent in loco.

Obijcies tertio: non datur modus peculiaris essendi sub quantitate, & qualitate, ergo non debet dari peculiaris modus essendi in loco, & consequenter non debet dari hoc vbi.

Confirmatur, quia corpus constituitur in loco formaliter per quantitatem, cuius proprietas, vel ratio formalis est, extreitas partium, ergo non constituitur corpus in loco per vbi.

Respondeo negando antecedens, quia datur peculiaris vnio, & receptio quantitatis, & qualitatis in subiecto, quod per quantitatem,

ratem, & qualitatem afficitur. Ad confirmationem dico, per quantitatem formaliter corpus constitui in aliquo loco indeterminate siue hoc, siue illo, sed per ubi formaliter constitui determinate in hoc potius loco, quam in alio.

Obijcies quarto: ex *Arist. 8. Phys. t. 59. minime motuum id, quod mouetur, dum fertur à substantia discedit, secundum enim solam nihil mutatur abesse, ut cum quid, alteratur, quale; cum augetur, & diminuitur quantum.* ergo per motum localem intrinsecè non mutatur subiectum recipiendo hoc ubi.

Respondeo. Per motum localem non ità intrinsecè mutari subiectum, sicuti mutatur per alterationem, & per augmentationem, quia per alterationem acquiritur, qualitatis, per augmentationem acquiritur quantitas, quæ utraque est res, non modus; per lationem verò, & motum localem acquiritur ubi, quod non est res, sed rei modus. Præterea per alterationem, & per augmentationem corpus totaliter mutatur, quia proximè disponitur ad mutationem substantialem, ad quam, vel non disponitur, vel valdè remotè disponitur per motum localem.

LECTIO IV.

Aliæ quæstiones de ubi resoluuntur.

Prima quæstio esse solet. An ubi sit res, vel modus; hanc quæstionem nullum mouisse, asserit *Arriaga*, ut eius se prodat auctorem, & inuentorem; sed meo quidem iudicio non est ità, *Suarez enim in Met. disp. 52. sect. 1.* refert sententiam non distinguentem ubi à loco intrinsecò, & locus intrinsecus est res, non modus: Præterea *Scotus* putauit ubi, esse relationem extrinsecus aduenientem, at relatio extrinsecus adueniens distinguitur à modo relationis prædicamentalis per *Scotum*, est ergo ubi, res, & non modus in Sententia *Scoti*. Aliqui, nomine ubi, intelligebant spatium, seu interuallum, ita refert *Suarez loco cit. num. 9.* & per spatium intelligebant aliqui corpus indiuisibile, alij quantitatem, alij quandam vacuitatem capacem corporis, sed neque corpus, neque quantitas est modus, at est potius res. Vacuitas verò, si res non est, neque modus est, fuerunt ergo plures antè *Arriagam* qui ubi non modum, sed rem esse existima-

stimatorum : & consequenter quæstio illa antè illum ab alijs est mota , & resoluta . Sententia communis supponit potiùs , quàm probat , ubi esse modum non rem ; esse accidens modale , non reale .

Arriaga hic disp. 14. sect. 2. subsect. 7. defendit . Vbi non esse modum , sed rem ; non esse accidens modale , sed reale .

Conclusio mea est . Vbi non est res , sed modus .

Probatur quia . Vbi esse modum , est communis sententia ; ut vel ipse *Arriaga* ultro concedit , sed à communi sententia non est recedendum , nisi solidum aliquod argumentum ad id nos cogat , quod in presenti non est assignare , ut ex solutione facili eorum , quæ obijciuntur , mox patebit , ergo .

Probatur secundò , quia modus ex *Arriaga disp. 1. Met. sect. 1.* est entitas illa , quæ ita per suam essentiam actuatur subiectum , ut ab illo nec diuinitus separari queat , sed ita se habet ubi , neque enim est assignare ubi sine sui subiecto , sicuti nec possunt esse vnio , nec actio , nec relatio prædicamentalis sine suis subiectis , quæ propterea esse entitates modales , communiter asseruntur ; ergo verè ubi est modus , & non res .

Dices primò , non est maior ratio , cur albedo , nigredo , actus videndi , & amandi sint accidentia realia , & non ubi ; ergo etiam ubi est accidens reale .

Respondeo primò : retorquendo Argumentum , non est ratio , cur albedo , nigredo , actus videndi , & amandi , sint entia realia , & non sint entia realia vnio , & actio , sed vnio , & actio in communi sententia , quam etiam defendit *Arriaga* , non sunt accidentia realia , ergo neque modus ubi est accidens reale .

Respondeo secundò directè ad Argumentum ; albedinem , nigredinem , actus videndi , & amandi esse entitates separabiles saltem diuinitus à suis subiectis , non sic ubi ; Verum quidem est , quòd quia actus videndi , & amandi sunt actus vitales , si ponerentur in extrinseco subiecto , putà in lapide , verbi gratia , lapis non diceretur videre , nec amare , quia videre , & amare supponunt vitale principium , quale non est lapis .

Dices secundò : potest esse ubi sine subiecto , cuius est ubi , imò & sine vilo subiecto diuinitus , & per absolutam Dei potentiam , ergo est res , & non modus . Antecedens probatur , quia actus amoris , & visio possunt diuinitus , & per absolutam Dei potentiam esse sine proprio subiecto , sine Petro , verbi gratia , à quo sunt elicit , ergo etiam ubi potest diuinitus separari à corpore locato , seu subiecto .

Respondeo: negando antecedens, nam si valeret paritas ab actu visionis ad Vbi, valeret etiam ab actu visionis ad vnionem, & actionem, imò & ad omnem alium modum, & sic omnes modi deberent negari; Dicendum est ergo, quòd quia Vbi est essentialiter affixum suo subiecto, non potest ab illo nec diuinitus separari, seu vt alij loquuntur, modum quemcumque nec diuinitus posse à subiecto separari, quia eius essentia est actualis inhærentia in subiecto. Hinc pro solutione aliorum argumentorum, si quæ forrè obijcientur, insistendum semper est, ijs etiam euinci, vnionem, actionem non esse modos; nec vllum alium posse modum assignari, & defendi.

Quæstio secunda solet esse; an in vna re plura, & tot sint admittenda Vbi, quot sunt entitates; nam verbi gratia, in composito physico adsunt substantia, & accidentia. Substantia alia est materia, alia est forma; rursus accidentia sunt plura, & plura in quolibet composito; queritur, an tot sint Vbi, quot sunt huiusmodi entitates in composito.

Prima sententia defendit, tot esse Vbi in qualibet re, quot sũt entitates eiusdem rei; Ità *Suarez disp. 51 Met. sect. 5. Hurtadus disput. 14. phys. sect. 4. le Reès disp. 5. phys. art. 4. 9. ult. Quied. Contr. 15. punct. 15. vbi nu. 6* pro hac sententia citat *Arriagam. Cabr. hic disp. 2. dub. 3. Val. 3. p. d. 6. q. 4. p. 1.*

Alterà sententia defendit, in vna re sufficere vnicam præsentiam, qua substantia, Quantitas, & reliqua omnia accidentia, seu modi eiusdem rei vbicentur. Ità *Vasq. tom. 1. in. 3. p. disp. 199. nu. 29. Albertinus de Predicam Quantit. disput. vn. q. 6. Rubius de loco tract. 6. q. 5. Ioannes de Sancto Thoma hic qu. 16. q. a. 2.*

Auersa tom Phil. q. 28. sect. 7. admittit tot præsentias, quot sunt entitates; vel vnam admittit præsentiam, variabilem tamen ad variationem cuiuslibet illarum.

Conclusio sit. Quælibet entitas est de se capax distinctæ præsentia, sed de facto, & attenda natura rei, vna datur præsentia in qualibet re; variabilis tamen ad variationem cuiuslibet entitatis.

Prima pars Conclusionis patet, quia quælibet actio est de se entitas diuersa, & ponibilis à Deo in diuerso loco extrinseco, ergo quælibet est capax diuersæ præsentia, per quam in diuerso loco constituatur.

Secunda pars probatur quia: verè non sunt multiplicanda entia sine necessitate, sed vnica sufficit præsentia pro omnibus entitatibus vnius, eiusdemque rei; ergo. Minor probatur, quia suffi-

est vna quantitas ad quantificandas omnes entitates vnus, eiusdemque rei, vna sufficit vnio ad vniendas ambas partes, ergo sufficit vnum Vbi ad vbicandas omnes entitates vnus, eiusdemque rei.

Denique tertia pars etiam faciliè probatur: quia praesentia, & vbicatio est essentialiter suus effectus formalis, ergo si hic effectus varietur, variabitur vbicatio, sed ablata, vel de nouo posita, qualibet entitate, variatur effectus formalis vbicationis, quia talis vbicatio, vel desinit vbicare eam entitatem, quam antea vbicabat, vel incipit de nouo vbicare eam entitatem, quam antea non vbicabat, ergo iam variatur eius effectus formalis.

Dices quantitatem non variari, quamuis vel desinat, vel de nouo incipiat entitatem aliquam quantificare, quia quantitas est accidens reale, & ideò non habent suum esse ita restrictum, & limitatum, vt statim varietur, quando desinit, vel incipit de nouo aliquam entitatem quantificare, sicuti nec variatur Anima rationalis, quando aliquas partes desinit, vel incipit de nouo informare, at vbicatio est modus, & entitas minima, ideò non potest admittere variationem in suo effectui formali, absque eo quòd ipsa varietur, & mutetur; cum quo tamen stat, quòd res vbicata non dicatur mutare locum, quia non mutat locum extrinsecum, quamuis mutet praesentiam.

Dices primò. Per quantitatem Anima rationalis non extenditur, ergo per vbi corporis locati non vbicatur.

Respondeo. Animam rationalem per quantitatem non extendi, quia est incapax extensionis, & non est incapax vbicationis; quamuis vbicatio corporea sit, & materialis, sicuti neque est incapax vnionis ceteroqui materialis, & corporeae.

Dices secundò: quando video albedinem in hoc loco, verbi gratia, non video nudam entitatem albedinis, sed etiam eius praesentiam, sed non video praesentiam quantitatis, quia cum quantitas visibilis non sit, nec eius praesentia est visibilis, ergo video praesentiam propriam albedinis, ergo iam sunt distinctae praesentiae.

Respondeo: videri praesentiam albedinis, quae communis est non solum albedini & quantitati sed etiam alijs accidentibus, praesentia enim ista non est propria quantitatis, sicuti nec est propria albedinis, sed est communis omnibus entitatibus, quae in vna eademque re reperiuntur.

Dices tertio: si Deus separaret quantitatem à substantia, remaneret

neret substantia cum sua præsentia, ergo distincta præsentia est in quantitate, & in substantia.

Respondeo facta tali separatione de nouo produci distinctam præsentiam, vel in quantitate, vel in substantia, in tantum enim de facto, vnius, eiusdæque rei vna est præsentia, quia omnes eius entitates supponuntur esse vnitæ in eodem supposito; dissoluta igitur hac vnione, quælibet entitas, sicuti est capax propriæ, & distinctæ præsentia, ita & de facto habebit propriam, & distinctam præsentiam.

Quæstio tertia solet esse. An Vbi pendeat à loco externo, seu corpore circumscribente.

Respondeo ex dictis iam in quarto Argumento, quo probauimus, dari Vbi distinctum à corpore locato, & loco, non dependere hoc vbi à loco externo; nam *Aristoteles hic 1. docet*, quidquid est, esse alicubi, ergo iam supremum Cælum est alicubi, sed non est in loco, ergo vbi non pendet à loco. Confirmatur, quia detineat Angelus lapidem in medio aeris, & tunc Deus annihilat aerem vndequaque, lapis non amittet suum Vbi, ergo Minor probatur, quia, non est maior ratio, cur dicatur lapis amittere Vbi, & non amittere reliquas formas accidentales, tum quia sequeretur, illum lapidem existere nullibi, quod esse impossibile, mox ostendam.

Denique quia, in Vacuo potest fieri motus, sed terminus talis motus est Vbi, ergo iam datur Vbi sinè loco externo.

Verum quidem est, quòd Vbi habet pro sui effectu secundario, constituere corpus præsens alicui loco externo, & superficiario, qui effectus secundarius, sicuti est relatiuus, ita est separabilis ab effectu primario absoluto eiusdem Vbi, qui est, constituere formaliter rem vbicatam præsentem hic formaliter.

Dices; Vbi ex genere suo est nexus, & vnio, sed vnio est duorum vnio, nexus est duorum nexus, ergo vbi est nexus duorum, ergo vnit rem locatam, & vbicatam, non nisi loco externo, ergo.

Respondeo, Vbi vnire, & facere rem vbicatam præsentem alteri, non quidem loco externo, aut superficiæ ultimæ, sed vel loco externo, vel rei spirituali, vel Deo, si enim aliqua creatura separaretur ab omni loco extrinseco, adhuc talis creatura esset alicubi, & præsens esset Deo.

Quæstio quarta solet esse. An possit aliqua creatura existere, & esse nullibi saltem de absoluta Dei potentia.

Respondetur negatiue. Ratio est, quia implicat intelligere, rem

esse, & esse nunquam, ergo etiam implicat intelligere, rem esse, & esse nullibi. Confirmatur, quia sicuti eo ipso, quod res existit, coexistit alicui parti virtuali Diuinæ Aeternitatis, sic eo ipso, quod res existit, coexistit alicui parti virtuali Diuinæ Immensitatis, sicuti enim Aeternitas continet virtualiter omnia tempora, ita Immensitas continet virtualiter omnia loca, & omnes vbicationes.

Dices. Vbi distinguitur modaliter à suo subiecto, ergo potest subiectum Vbi existere sine Vbi.

Respondeo: distinguendo consequens; potest existere sine vbi, hoc vel illo determinatè, concedo consequentiam: potest existere sine omni vbi. nego consequentiam; nam & materia prima potest esse sine forma hac, vel illa, non tamen sine omni forma, saltem naturaliter in sententia communi, & etiam supernaturaliter in sententia Thomistarum: actio non potest esse sine omni termino, licet possit esse sine hoc, vel illo termino.

Quæstio quinta solet esse; Quotuplex sit Vbi?

Respondeo primò diuidi Vbi; ita ut aliud sit vbi permanens, & aliud sit vbi fluens. Vbi fluens, seu vbi successuum est vbi, & præsentia rei successiuæ, ut motus. Vbi permanens, est vbi & præsentia rei permanentis, & stantis; Per vbi fluens res coexistit loco maiori se; per vbi permanens res coexistit loco sibi æquali, ut fusius infra explicabimus *disp. 5. sect. 4.*

Secundo diuidi vbi, ita ut aliud sit vbi definitiuum, & aliud sit vbi circumscriptiuum. Vbi definitiuum, est id, in cuius res carens extensione locali est in loco inextensè; quatenus tota est in toto loco, & tota in qualibet parte loci, ita Angelus totus est in tota hac Aula, & totus in qualibet parte aulæ; Anima rationalis tota est in toto corpore, & tota in qualibet parte corporis; Corpus Christi Domini Sacramentatum, totum est in tota Hostia, & totum in qualibet parte Hostiæ. Vbi verò circumscriptiuum est id, ratione cuius corpus est in loco extensè, & per partes, quatenus totum est in toto loco, & pars eius in parte loci. Denique datur vbi Immensum, quod est proprium Dei omnia loca actualia, & possibilis adimplentis, iuxta illud Scripturæ; *Cœlum, & terram ego impleo, Hierem. c. 23.*

LECTIO V.

Penetratio Corporum.

DVplex quæstio hic est examinanda. Primâ est, an naturaliter dari possit penetratio corporum. Secunda est, an supernaturaliter, & de absoluta potentia dari possit Corporum penetratio.

Quodâ primam Quæstionem.

Conclusio est. De facto non datur, nec potest naturaliter dari penetratio Corporum: Itâ *Communis sententia* manifestis experiencijs comprobata.

Contrâ paucos quosdam. *Alex. in opusc. de Mixtione. Fernelium lib. 2. sue Physiologia c. vlt. Petrum Ioan. Prouenzalem Quodlib. 3. q. 7.*

Probatur Conclusio primò. Auctoritate *Arist. hic 1. 8. non est possibilis penetratio dimensionum.*

Probatur secundò experientia, qua patet, vnum corpus non posse occupatum locum ab altero, quamuis molli, & fluido, occupare, nisi alterum recedat, sic quamuis malleus in incudem validissimè impingat, non illam penetrat, sed statim resilit; ignis ex puluere pyrio excitatus, & intrâ tormenta bellica inclusus, nisi aliundè habeat exitum, tormenta bellica disrumpit, non penetrat, quamuis magnus sit eius impetus, magna vis, & actiuitas, quia nimirum natura penetrationem non patitur.

Probatur tertio ratione à priori quia. Quantitatis essentia, vel saltem proprietas est impenetrabilitas, ergo nequit vnum corpus cum alio naturaliter penetrari.

Hæc ratio mihi non videtur efficax, nam esto impenetrabilitas sit ratio formalis quantitatis, at impenetratio actualis est eius accedens, atque adeò benè potest à corpore quanto tolli, & abesse impenetratio; quando ergo duo corpora se penetrarent, adhuc essent impenetrabilia, seu exigerent, se non penetrare, sicuti quando homo non ridet, adhuc tamen risibilis est. Imò sicuti risus etiam naturaliter potest, non esse in homine, itâ impenetratio potest etiam naturaliter non esse in corpore.

Respondebis, quòd impenetratio in quantitate non ita se habet,

bet, ut risus in homine, non enim omne accidens est naturaliter separabile à subiecto, albedo enim à niue, nigredo à Coruo separabilis non est, & tamen albedo respectu huius, nigredo respectu Corui, est accidens, impenetratio ergo tale accidens est, ut naturaliter à quanto nequeat separari: idque probatur pluribus experiencijs mox adductis.

Benè; sed iam tota ratio, cur naturaliter detur impenetratio, est experientia, ergo nulla alia ratio est afferenda, præsertim cum valde solemne, & singulare, sit *Aristotelis Axioma 8. Physic. c. 3. 1. 26. eorum querere rationem, quæ melius habemus, quàm si rationis indigeremus, hominis est profectò, malè, id, quod est melius, & id, quod est deterius, id quod est credibile, & id, quod non est credibile, principium denique, & non principium, discernentis*, & sanè experientia certior, & firmior est quacunque ratione.

Sed neque experientiæ ipsæ videntur Conclusionem probare efficaciter, quia adducuntur plures aliæ experientiæ in contrarium; Sunt autem: Vas plenum cinere, tantundem aquæ recipit, ac si fuisset vacuum, similiter vas ad summum usque aqua plenum, adhuc plures nummos aureos recipit absque eo, quod effundatur aqua, quæ sanè contingere non possunt sine penetratione. Denique alimentum recipitur, & diffunditur per omnes partes viventis, quæ cum supponantur repletæ alijs corporibus, non potest non dari penetratio: In ferro ignito existit ignis penetratus simul cum ferro; & pannus aqua imbitur non sine penetratione, ergo.

Respondebis ad has, & similes experientias; vel ad aduentum alterius corporis, corpus præexistens condensari, & minorem locum occupare, relinquendo alias partes loci occupandas à corpore de nouo adueniente, vel corpus de nouo adueniens se se per poros, & meatus præexistentis corporis insinuare.

Sed contrà est quia; hac responsione posset uti, *Durandus*, qui, ut infra videbimus, negat, possibilem esse penetrationem etiam supernaturaliter, ad dissoluenda argumenta, quibus probatur, contingisse aliquando penetrationem supernaturaliter, ea autem sunt, Christum Dominum exiisse ex utero Virginis illibata eius virginitate, exiisse è clauso sepulchro: intrasse ad discipulos ianuis clausis, & Cælos penetrasse posset dici à *Durando*, quòd cum corpora porosa sint, & pluribus meatibus repleta, Corpus Christi exiisse ex utero Virginis, & è sepulchro per

per poros, & meatus; similiter eodem modo cœlos penetrasse; & clausis ianuis ad Discipulos intrasse; sanè hæc responsio, si afferretur à *Durando*, difficile posset impugnari, aut ad minus posset difficilior impugnari, quàm aliæ ab ipso, adductæ, vt mox patebit ex earum minori probabilitate. Quare ex his colligo, non multum esse fidendum, nec rationi allatæ, nec experientijs, quibus solum probatur, non posse dari penetrationem inter quædam corpora magis dura, & imperuia, vt sunt Incus, & ænea tormenta, & de his similibus dimensionibus, seu etiam corporibus intelligenda sunt supracitata *Aristotelis* verba.

Standum est ergo pro Conclusionē posita, quia est communis scholasticorum Doctorum, & nobilium Philosophorum sententia.

Quoad secundam Quæstionem.

Conclusio: supernaturaliter possibilis est corporum penetratio.

Ita est communis sententia Philosophorum, Theologorum omnium, vno excepto *Durando* in 4.d.44.qu.6. qui vtrumque problematicè defendit; *Durando* adhæret *Palud. eadem dist. qu.3. art.3.*

Probatür conclusio primò, quia in hoc nulla apparet repugnantia, aut implicantia contradictionis, ergo absolutæ, & supernaturali Dei potentie non est denegandum; imò non solum duo, sed & plura, & omnia corpora per Diuinam Omnipotentiam ad vnum locum cogi possunt, licet enim id magnum quid nobis esse videatur, non tamen est impossibile Omnipotenti, qui valet facere supra, quam petimus, & intelligimus, *D. Augustinus 10. Confess. c. 30. in fine.*

Probatür secundò: quia de facto habemus fuisse factam supernaturaliter penetrationem, nam Christus Dominus clauso exiit utero Virginis; clauso resurrexit sepulchro. Ad Discipulos intrauit ianuis clausis, denique Cælum ascendens, cœlos penetravit, non disruptit.


Respondet *Durand.* Christum intrasse ad discipulos per fenestras apertas, vel per ianuas ipsas velocissimè apertas, & iterum clausas discipulis non aduertentibus, vel per rimulam in ianuis repertam: aut denique per caminum. Item in egressione ex utero Virginis partes fuisse dilatatas, sed non reseratas, & in clauso sepulchro fuisse foramen, per quod gloriosum Christi Corpus facile potuit transire, quia quæ gloriosum, agile erat, &

valdè subtile. Has responsiones non impugno, quia patet de se earum absurditas.

Melius, & probabilius respondere potuisset *Durandus*, ut se ab omnibus hisce argumentis breuiter expediret, Christum Dominum per poros, & meatus vteri vaginalis, & sepulchri exiisse, ingressum ad discipulos, & penetrasse Cœlos se se per poros, & meatus insinuando: aut etiam secundò *Durandus* potuisset respondere; Corpus Christi in hisce casibus, caruisse præsentia circumscriptiua, & miraculosè habuisse præsentiam definitiuam, cui non repugnat, se penetrare cum alia præsentia definitiua, ut patet in duobus Angelis occupantibus eundem locum, & in partibus Corporis Christi Domini Sacramentati; imò nec præsentia definitiua repugnat se penetrare cum alia præsentia circumscriptiua, ut patet in Angelo occupante idem spatium, quòd occupat corpus, & in Corpore Christi Domini Sacramentato, quod occupat locum occupatum à quantitate panis.

Sed licet prima responsio probabilior, & magis philosophica videatur, quàm illa *Durandi*; omninò tamen reiicienda est, quia ex vna parte non repugnat penetratio corporum & ex alia parte, quia melius, & cum maiori proprietate saluantur Scripturæ testimonia, & verba, quibus asseritur, Christum Dominum, clauso vtero Virginis, & clauso sepulchro exiisse, Cœlos penetrasse, & ad discipulos ianuis clausis intrasse, ità dicendum est; addito præsertim, quòd talis est sensus communis Theologorum, Sanctorum Patrum, & Sacrorum expositorum; & nè plurimas recensendo Sanctorum Patrum sententias, longius protrahat; sufficiat vna pro cunctis sententia, *D. Augustini cit. d. Le Rees hic disp. 5. §. ultim. ar. 5. si potuit Christus carnem suam de sepulchro producere, cur non potuit ianuis clausis ad discipulos intrare? dum audis miraculum, serua fidem, non inquirat animus rationem.*

Secunda verò responsio, quæ adduci potuisset pro *Durando*, quanti valeat, & quantæ sit probabilitatis, mox videbimus,



LECTIO VI.

*Explicatur modus, quo fit penetratio
supernaturaliter.*

POsito, duo corpora posse se penetrare, & esse in eodem loco de absoluta Dei potentia, insurgit alia, & tertia difficultas, seu quæstio in explicando modo, quo Deus ponit duo corpora in eodem loco, seu quid Deus auferat à corporibus, vel illis det, quando constituit in eodem loco.

Primus modus explicandi est eorum, quos suppressio nomine referunt *Scotus in 4. dist. 49. qu. 16. & D. Thomas 3. p. q. 83. a. 2.* qui volunt; duo corpora esse in vno loco supernaturaliter, quatenus auferret Deus ab illis corpulentiam, & crassitatem, dando illis dotem subtilitatis, quam in futuro sæculo habebunt corpora gloriosa.

Sed contrà hunc modum explicandi, est, quia data dote subtilitatis corporibus gloriosis, adhuc non possunt se penetrare, nisi diuina virtute, vt omnes Theologi cum *Scoto, & D. Thoma* locis citatis sentiunt, ergo sola dote subtilitatis collata, non possunt duo corpora se penetrare in eodem loco, nisi nouum miraculum accedat, de quo quærimus, in quo consistat, & quid deus Deus, aut auferat à corporibus, quæ ponit in eodem loco.

Præterea, impenetrabilitas, impenetratio oritur ex ipsa quantitate, ergo siue Deus auferat corpulentiam, & concedat dotem subtilitatis, siue non auferat, adhuc remanet explicandum, quid faciat Deus circa quantitates duorum corporum, quas ponit in eodem loco.

Secundus modus explicandi est *Palud. loco cit. & Gotsfred. apud Scotum in 4. d. 49. q. 16. §. alius est intellectus.* Volunt enim duo corpora esse in eodem loco, quia Deus facit, quod vnum corpus repleat locum, aliud non repleat locum.

Sed contrà est: quia vel aliud corpus non replet locum, quia ab illo Deus aufert quantitatem, & hoc non potest dici, quia qui ponunt, de absoluta potentia duo corpora esse in eodem loco, loquuntur, supposito remanere in ijs eandem quantitatem; vel aliud corpus non replet locum, quia est in loco definitiue, & non circumscriptiue; & si in hoc sensu loquantur, non

benè

benè saluant, aliud corpus non replere locum, nam Deus implet omnia loca, licèt in ijs non sit circumscriptiuè; Corpus Christi Sacramentatum replet locum, in quo est definitiuè, & non circumscriptiuè, Angelus replet locum, in quo est, licèt sit definitiuè, & non circumscriptiuè.

Tertius modus est, *Scoti* loto vbi suprà, quem sequitur *Argentinas in 4. d. 49. qu. 1. art. 4.* Hi volunt, duo corpora quanta non se formaliter excludere, vt se formaliter excludunt calor, & frigus, sed se excludere effectiuè, quatenus habent virtutem, producendi effectus repugnantes, qui sunt replere, & occupare eundem locum; Quando ergo Deus ponit duo, vel plura corpora in eodem loco, impedit, nè illa quanta producant effectus suos, atque adeò facit, nè aliquod corpus repleat suum locum; Deus enim benè potest impedire, nè causa effectiua producat effectum suum.

Sed contrà est primò, quia *Scotus in 4. dist. 1. q. 5. §. ad primum*, dixerat, vnum quantum expellere aliud formaliter ab eodem loco, ergo inconsequenter loquitur, dum *qu. 36.* dicit, expellere effectiuè.

Contrà secundò quia: si vnum corpus non replet locum, ergo ablato altero corpore, locus ille esset vacuus; quod ipse *Scotus* negat eadem *qu. 16. §. alij dicunt*; habet, fatuum est dicere, locum, vbi est corpus gloriosum, esse vacuum, ergo fatuum est dicere, vacuum esse locum, in quo est aliquod corpus, etiam si gloriosum non sit, nam eadem militat ratio de utroque.

Denique contrà *Scotum* militant ea omnia, quæ dicta sunt contrà *Gosfredum* suprà.

Quartus modus est *Thomistarum*, qui sequentes *D. Thomam* loco cit. docent: quòd quia in tantum duo corpora non possunt coexistere simul: in quantum tolleretur eorum distinctio, quæ distinctio pendet à Deo, tanquam à causa prima, & ab intrinsecis principijs essentialibus rebus idèò tàm ex doctrina communis certum sit, posse Deum, se solo prestare effectum suum sine concursu causæ secundæ, possunt duo corpora poni diuinitus in eodem loco, & adhuc seruari distinctionem inter se; quando ergo Deus ponit duo corpora in eodem loco, nihil aliud facit, nisi conseruare distinctionem eorum corporum in eodem loco.

Sed contrà est, quia ex positione duorum corporum in eodem loco, non tollitur eorum distinctio, sicuti non tolleretur eorum distinctio, etiam si eidem spatio temporis corresponderent; esto

tolle-

tolleretur eorum distantia, neque enim res indiuiduantur per extrinsecas circumstantias loci, & temporis, sed, per intrinsecas sui hecitates, vt in metaphysicis probabimus, ergo. Imò intrinsecæ hecitates huiusmodi non possunt à Deo suppleri, quia Deus, licet possit supplere effectus secundarum causarum efficientium, non tamen potest supplere effectus causarum formalium, neque enim ipse Deus potest esse ratio formalis intrinseca alicuius compositi, siue physici, siue metaphysici, vt de se patet.

Quintus modus satis communis, plausibilior, quem, alijs modis refutatis, sequuntur *Auersa qu. 27. de Loco sect. 5. Conimb. hic c. 5. q. 3. art. 2.* Defendit, duo corpora non posse esse in eodem loco, quia quantitas præter effectus posituios, & primarios, quos habet, & nos supra enumerauimus, habet etiam hunc effectum negatiuum, & secundum, qui est exclusio alterius corporis ab eodem loco; hunc effectum negatiuum suspendit, & impedit Deus, quando duo corpora ponit in eodem loco.

Sed contrà est, quia Deus non omnem effectum negatiuum potest suspendere, & tollere, lux enim habet pro sui effectum secundario, & negatiuo expellere tenebras, at expulsio tenebrarum, nec diuinitus impediri, aut suspendi potest, neque enim, possunt esse simul lux, & tenebræ. Similiter effectus secundarius negatiuus vitæ, est expulsio formæ cadauericæ, at hic effectus, quamuis negatiuus, & secundarius à Deo non potest impediri; neque enim simul esse possunt vitæ, & forma cadauerica, anima, & cadauer, ergo à pari non possunt esse simul quantitates duæ, vel plures, ita vt Deus suspendat negationem alterius quantitatis ab eodem loco.

Dices, in formis contrariè oppositis, videlicet, summo calore, & summo frigore, admittit communis sententia, effectum negatiuum, & secundarium esse à Deo suspensum, & manere in eodem subiecto summum calorem, & summum frigus de absoluta potentia, ergo à pari duo corpora posse esse in eodem loco, suspendente Deo effectum negatiuum expulsionis alterius corporis ab eodem loco.

Sed contrà est quia. Calor, & frigus sunt in eodem subiecto communi, respectu cuius exercetur ille effectus negatiuus formalis expulsionis, at duo quanta non sunt in eodem loco, tanquam in subiecto, sed solum habent duas præsentias, quibus respiciunt vnum locum, vnde si vna præsentia habet pro sui effectum formali negatiuo, & secundario, quod sit negatio alterius præsentie, talis

talī negatio non potest tolli, aut suspendi à Deo, sicuti non potest tolli à luce negatio tenebrarum, & negatio formæ cadauericæ à forma vitali, seu ab anima, & vita, imò eadem difficultas posset utgeri in qualitatibus contrariis in summo, calore, & frigore, & communis ea sententia vi horum argumentorum in dubium reuocari.

Dices, quòd quando Deus ponit alterum corpus in eodem loco, in quo aliud supponitur, tribuit illi ubi simile, ac est illud, quod in alio corpore esse supponitur: & ideò illa duo corpora non se excludunt ab eodem loco, quia habent ubi similia.

Contrà est: quia quid est duo illa ubi esse similia? esto sint similia, imò esto sint eadem in specie, quia sunt vnius, eiusdemque speciei, sed non sunt eadem numero, ergo vnum ubi nunciativè consideratum habet pro sui effectui formali secundario negationem alterius ubi, ergo respectu eiusdem loci, non possunt esse duæ vocationes. Quòd si vnum ubi non habet negationem alterius, quare de facto, & naturaliter duo ubi non respiciunt eundem locum, quare duo corpora non possunt esse in eodem loco?

Dices. Duo quanta posse esse in eodem loco, quia hoc dato, nulla sequitur contradictio, sicuti nec sequitur contradictio, posito calore, & frigore in eodem subiecto; at bene sequitur contradictio, positis luce, & tenebris, forma vitali, & forma cadauerica.

Sed contrà est quia; ideò positis luce, & tenebris, forma cadauerica, & forma vitali, sequitur contradictio, quia Deus non potest impedire effectum secundarium, & negatiuum, quem habet lux respectu tenebrarum, forma vitalis respectu formæ cadauericæ, & vniuersaliter, quem habet omnis forma respectu suæ propriæ priuationis, sed suspenso semel, aut à Deo semel impedito illo effectui secundario, & negatiuo, nulla iam amplius erit contradictio, aut oppositio inter lucem, & tenebras, inter vitam, & cadaver, inter formam, & propriam eius priuationem, ergo.

Sextus modus explicandi est *Francisci le Reès disp. 5. §. ult. art. 5.* Vbi docet, quòd dum corpus existit in loco, in tantum naturæ viribus obstitit alterius corporis penetrationi, in quantum posita sua locali extensione exigit à Deo, nè concurret ad introductionem alterius corporis in suum locum, quandiu eum retinet, quando ergo duo corpora ponuntur in eodem loco, impedi-

tur illa exigentia non quidem in actu primo, sed in actu secundo; nam illa duo corpora semper exigunt, Deum non concurrere ad introductionem alicuius tertij corporis in illum locum, eò quia semper retinent suam extensionem, ex qua oritur illa exigentia naturalis vtriusque, nè tertium aliud corpus cum ipsis penetratiuè ponatur, quòusque Deus aliter disponat, miraculosè impediatur effectum talis exigentiæ, seu quòusque Deus impediatur, nè talis exigentia exeat in actum secundum; quo eodem modo explicatur miraculum, quod facit Deus cõseruando duas qualitates contrarias in summo in eodem subiecto, & ità putat *Le Rèc* demonstrasse solutionem huius quæstionis non esse prorsus inexcogitabilem, vt quidem sibi persuadent.

Sed contra hunc modum explicandi adhuc est, quia lux in actu primo exigit, nè Deus ponat, & introducat tenebras in illud subiectum, in quo est lux, & tamen non potest Deus impedire in actu secundo effectum talis exigentiæ, & facere, quòd lux, & tenebræ sint simul, & in eodem subiecto, ergo neque potest impedire exigentiā in actu secundo, seu effectum exigentiæ naturalis, quam habet vnum corpus, nè cum alio penetretur, & sint in eodem loco.

Conclusio mea est. Quando duo corpora supernaturaliter, & diuinitus in eodem loco ponuntur, Deus aufert ab illis vbicationes circumscriptiuas, & dat illis vbicationes definitiuas.

Probatut Conclusio: quia vnum ex præcipuis, & magis efficax argumentum ad probandam possibilitatem penetrationis; imò ad probandum, eam de facto contigisse, desumitur ex eo, quia partes Corporis Christi Sacramentati diuinitus, & miraculosè sunt penetratæ, nam in ordine ad penetrationem, ità se habent duo corpora in ordine ad vnum, & eundem locum, sicuti duæ partes Corporis in ordine ad vnā, & eādem partem loci, sed partes corporis Christi intantum sunt penetratæ, in quantum carent extensione, & vbicatione circumscriptiua, & habent extensionem, & vbicationem definitiuā, ergo miraculum penetrationis duorum corporum in vno loco, vel duarum partium eiusdem corporis in vna parte loci consistit in eo, quòd Deus aufert vbicationem circumscriptiuā, & tribuit vbicationem definitiuā corporibus; quæ vult esse penetrata.

Probatut secundò, quia certum est, Angelos plures posse esse in vno, eodemque loco, nam & in Scripturis habemus, ex corpore vnus obsessi exiisse legionem dæmonum, & è corpore Di-

ut Mariæ Magdalenz fuisse à Christo Domino eiecta septem Dæmonia, sed in tantum plures Angeli possunt esse in eodem loco, in quantum carent vicatione circumscriptiua, & habent definitiuam; sicuti è contrà ideò de facto, & naturaliter duo quanta non possunt esse in vno loco, quia habent vicationem circumscriptiuam, & carent definitiuam, ergo id quod aufert Deus à corporibus, quæ facit esse penetrata, est vicatio circumscriptiua, & id, quod confert, est vicatio definitiua.

Probatnr tertio quia ideò Deus vnum corpus ponit in duobus locis, quia dat illi nouam, & distinctam præsentiam, ergo Deus ideò ponit duo corpora in eodem loco, quia dat illis nouam, & distinctam præsentiam; nimirum dat illis præsentiam definitiuam ablata circumscriptiua.

Dices primò: non potest idem locus duo corpora sibi æqualia suscipere, nisi capacitas eius fiat maior, ergo Deus debet extendere, & ampliare capacitatem loci.

Respondeo; Antecedens esse verum de corporibus circumscriptiue extensis, & vicationis; non de corporibus definitiue vicationis, & extensis, nam corpora definitiue vicata se habent ad instar rerum spiritualium, & Angelorum, qui plures, & plures de facto sunt in vno, eodemque loco.

Dices secundò: si duo corpora essent in vno loco definitiue; locus ille à neutro repleretur, atque adeò locus ille esset vacuus, vnde & posset suscipere aliud corpus, consequens videtur absurdum, ergo.

Respondeo: eum locum ab utroque repleti definitiue; sicuti repletur à duobus Angelis, cum hac sola disparitate, quòd Angeli non obsterent, ne tubintraret corpus, & illa duo corpora obsterent, nisi Deus aliter miraculose disponeret, quia illa corpora adhuc essent apta nata ad existendum circumscriptiue in illo loco, non sic Angeli; ideò locus ille non deberet dici vacuus absolutè, & simpliciter, esto possit dici vacuus secundum quid, & cum addito, idest, vacuus corpore circumscriptiue vicato, quo etiam modo dicitur vacuus ille locus, qui à duobus, vel pluribus Angelis occuparetur.

Quæres, an corpora penetrata possent se mouere?

Respondeo negatiue cum *Auerſa ubi suprà, & Vafq. 1.3. in 3. p.d. 189. c.4. & 5.* quia si se mouerent, deberent acquirere nouum aliquem locum occupatum ab alio corpore, sed non possunt locum illum acquirere, quia corpus præexistens in illo loco illis

refifteret. & impediret, nè subintrarent, ergo quodufque Deus non auferret ab illo tertio corpore vocationem circunfcriptiuam, à qua oritur illa refiftentia, corpora penetrata non poliunt fe mouere, neque fimul, neque alterum eorum. Præterea fi corpora penetrata fe fe mouerent, deberent acquirere præfentiam circunfcriptiuam illis naturaliter debitam, ergo & deperdere definitiuam, fed hanc deperdere non poffent, quia fuppono, eam immediate pendere à Deo in conferuari, ficuti & dependet in primo produci, ergo.

LECTIO VII.

*Replicatio Corporis in duobus, aut pluribus
Locis.*

V Num, & idem corpus poffe effe, feù replicari de absoluta potentia in duobus, aut etiam pluribus locis, in vno circunfcriptiuè, in alio, vel alijs definitiuè, aut etiam in vtroque, aut in pluribus definitiuè, feù modo Sacramentali, certum eft, & vtrò admittitur à *Thomiftis*, contrà quos agendum nobis eft in præfenti, vt defendamus vnum, & idem corpus poffe replicari de absoluta potentia, & effe in duobus, aut etiam pluribus locis circunfcriptiuè. Quarè.

Conclufio fit. Vnum, & idem corpus, vnum, & idem indiuiduum, Petrus, verbi gratia, poteft fupernaturaliter fimul effe, & replicari in duobus, aut etiam in pluribus locis: itaut in vtroque, aut etiam in pluribus exiftat circunfcriptiuè, & modo fibi connaturali.

Ità *Bellarminus lib. 3. de Sacram Euch. cap. 3. Ricc. quod lib. 1. Scotus in 4. d. 10. q. 3. Plaza hic. Marcia hic q. 7. Ruuius, Arria, Quiedo. Conimbricenfes, aliq; Recentiores communiter: præcipuè verò Suarez tom. 3. in 3. p. difp. 48. fec. 2.* vbi fentit hanc opinionem effe valdè confonam principijs Fidei.

Contrà *Thomiftas*, quos fufè relatos habes apud *Complutenfes hic d. 19. q. 8 §. 2.*

Ex Recentioribus cit. *Vafq. tom. 3. in 3. p. d. 189. c. 4. & Lorca in manufcriptis de Euchariftia cit. d. Cabrera hic dift. 1. dub. 5. & a Ioan. de Sancto Thoma q. 16. art. 5.*

Dixi, circunfcriptiuè, & modo fibi connaturali, quia modus exi-

existendi definitiue, aut etiam modus existendi Sacramentalis non est connaturalis corpori, sed supernaturalis, & indebitus, is enim proprius est, & connaturalis rei spirituali.

Probatur Conclusio primò: quia id, quod non implicat, aut contradictionis implicantiā non inuoluit Diuinæ Omnipotentię est concedendum, sed sic Corpus replicari, non implicat, vt ex solutione argumentorum parebit, ergo.

Probatur secundò Idem numero effectus potest supernaturaliter dependere à duplici causa totali in sententia Thomistarū, ergo & idem corpus potest esse in duobus locis; imò & de facto Anima rationalis in omnium Sententia tota est in Capite, & tota est in pede hominis, atque adeò de facto in duobus locis reperitur, ergo saltem de absoluta potentia potest idem corpus in duobus, aut etiam pluribus locis reperiri.

Probatur tertio. In sententia Catholica, & Thomistarum, vt est de Fide: idē numero Christi corpus est in Cœlo, & in pluribus hostijs consecratis etiam valdè distantibus, ergo si idem Corpus modo sibi supernaturali, & indebito; id est, modo definitiuo, & Sacramentali, potest esse, & de facto in pluribus locis reperitur, potest etiam de absoluta potentia idem corpus in pluribus locis reperiri modo sibi naturali, & naturaliter debito, id est, modo circumscriptiuo.

Probatur quartò pluribus apparitionibus omnium potissima, & efficacissima ad probandum intentum, est, apparitio Christi Domini facta D. Paulo, vt habetur *Actuum* 26. quæ apparitio fuit vera, & realis, & non imaginaria, vt de alijs apparitionibus sentiunt satis probabiliter Thomistę, sed apparitio ista Christi Domini fuit omninò vera, & realis, vt docet *D. Thomas* 3. p. q. 56. art. 6. quia aliàs D. Paulus non fuisset testis resurrectionis Christi Domini at eodem tempore Christus Dominus fuit in Cœlo, quia, vt habetur ex Scriptura, Christus Dominus semper erit in Cœlo vsq; ad tempus resurrectionis vniuersalis *Actuum* 3. *quem oportet Cœlum suscipere usque ad tempus resurrectionis vniuersum*, & ex *D. Augustino*, vt refertur c. *Prima Hæresis de Conser. distin. 2. donec finiatur seculum sursum est Dominus*; ergo.

Obijcies primò ex *Io. de S. Thoma* hic q. 16. art. 2. Si idem corpus esset in duobus locis, eius quantitas non esset vna, sed duplex, quia discontinuaretur, nam inter corpus, vt existēs Neapoli, & corpus idem, vt existens Romæ, plura alia loca interciperentur, ergo non esset vna quantitas, ergo neq; vnum corpus, & ex

alia

alia parte, supponitur esse vnum corpus, ergo esset vnum, & non esset vnum, quod est manifesta contradictio.

Respondeo, & vniuersaliter noto, omnia argumenta, quæ à *Thomistis* obijciuntur contrà corpus bilocatum, aut in pluribus locis replicatum, posse contrà ipsos retorqueri, & instari contrà Corpus Christi Sacramentaliter vbicatum in pluribus hostijs, aut contrà Angelum in pluribus locis definitiuè replicatum.

Respondeo secundò directè, tale corpus fore omninò idem entitatìuè, esto localiter sit quodāmodo duplex, quia in duobus locis replicatum; & sanè talis corporis quantitas non discontinuaretur, neque diuideretur, sed in duplici loco poneretur, ideò neque esset duplex quantitas, sicuti neque est duplex corpus.

Obijcies secundò: si vnum corpus posset poni in pluribus locis, posset etiam poni in omnibus, atque adeò posset vbique esse, & imensum; sed hoc est absurdum, vt benè notauit *D. Augustinus epist. 3.* vbi habet, *nullum corpus posse esse vsquam* ergo. Imò est manifesta hæresis Vbiquitarum, asserentium, Humanitatem Christi ab Incarnatione semper fuisse vbique, ità *Ioannes Brentius*, & alij, vt refert *Surius in sua historia*, ergo.

Respondeo, in primis à pluribus, iisque grauissimis Theologis satis probabiliter defendi, posse Vbiquitatem, & Immensitatem de absoluta potentia alicui Creaturæ communicari, si, scilicet, illi plures, & plures, imò & infinitæ communicarentur Vbicationes, vt ostendi *Disp. 13. Lect. 3.* Sicut enim in aliorum sententia potest communicari Creaturis aternitas, & infinitas secundum quid, ità potest communicari, & imensitas. De facto tamen immensitatem fuisse communicatam, aut Humanitati Christi Domini, aut alij creaturæ, manifesta est hæresis.

Obijcies tertio *Matth. 28. ult.* Dixit Angelus ad mulieres, loquutus de Christo Domino; *non est hic, surrexit enim*, qui modus loquendi causalis, in tantum est verus, in quantum supponit, Christum non posse esse simul in sepulchro, & extrà Sepulchrum.

Præterea *D. Augustinus* arguens contrà Manichæos asserentes, Christum esse in Sole, aut esse ipsum Solem, ait, *secundum præsentiam corporalem simul, & in Sole, & in Luna, & in Cruce esse, non potest*, ergo.

Respondeo, Angeli locutionem esse veram, quia procedit, & fundata est in modo naturali, & ordinario exutendi vnum corpus in vno tantum loco, & similiter loqui *D. Augustinum loc.*

cit. Manichæi enim de facto dicebant, Christum Dominum esse in Sole, vel esse Solem.

Obijcies quartò. Vnum corpus de facto, & naturaliter est in vno loco sibi adæquato, ergo non potest esse in duobus, aut pluribus sibi adæquatis, aliàs quilibet illorum locorum esset adæquatus, & non esset adæquatus, esset adæquatus, ex suppositione; non esset adæquatus, quia excederetur ab alijs, vel alijs locis, is enim est locus adæquatus, qui nec excedit, nec exceditur à locato, sicuti illud obiectum est adæquatum scientiæ, quod non excedit, neque exceditur à scientia.

Respondeo. Idem argumentum posse vrgeri de anima rationalis, quæ tota est in omnibus partibus corporis, tanquam in locis adæquatis, & in effectû dependente à duabus causis adæquatis, & totalibus.

Dico igitur, in præsentî locum dici adæquatum non in eo rigore, quo obiectum dicitur adæquatum scientiæ, sed dici adæquatum, quia de se absque alterius ope, aut concursu, est capax continere totum corpus.

Obijcies quintò. Si idem corpus esset in duobus locis, mutaretur localiter, quod enim ponitur in alio loco, mutatur localiter, seu mutatur secundum locum, ergo deserit priorem locum, mutari enim secundum locum, est transire de vno loco ad alium.

Respondeo in primis, mutationem secundum locum esse duplicem, nimirum, positivam, & negativam, positiva est mutatio de loco ad locum, altera merè negativa est mutatio de non loco ad locum; in illa quidem deseritur prior locus, in ista acquiritur novus locus, etiamsi nullus alius deseratur.

Præterea: quando corpus in alio loco diuinitus replicatur, Deus producit nouum vbi, per quod illud corpus alibi replicatur; verbi gratia, Petrus existens hic Neapoli, debet diuinitus constitui, seu replicari Romæ, producit Deus in Petro, vbi Romanum, per quod Petrus constituitur formaliter præsens Romæ, non deferendo tamen Neapolim, cui est præsens per aliud vbi Neapolitanum.

Obijcies sextò ex *Vasquez*. si corpus esset in duobus locis replicatum, posset virtute naturali se mouere; verbi gratia, lapis tabule superpositus ablata tabula ad centrum naturaliter descenderet, & agens liberum posset se, quocunque, vellent mouere, ergo iam naturaliter posset corpus semel replicatum, iterum, &

iterum replicari, hoc videtur absurdum, ergo.

Respondeo. Idem Argumentum posse instari de Angelo replicato, & de corpore Christi Domini Sacramentato, de quo certum est moueri se se ad motum specierum.

Respondeo directè huic argumento, corpus replicatum non posse virtute naturali moueri, sed nouo miraculo, & nouo Diuinæ virtutis influxu indigere, vt se posset moueri, ratio est, quia corpus replicatum, non potest moueri, nisi deperdendo præsentiam illi supernaturalitèr concessam, & hanc deperdere non potest, quia hæc immediatè à solo Deo dependet, ergo tale corpus non potest se mouere, nisi de nouo Deus velit, illum moueri, & velit ab illo deperdi præsentiam diuinitus, & supernaturalitèr concessam: ad id, quod dicitur de corpore Christi, quod certum est, moueri; dico, illud moueri motu specierum, & per accidens; per se autem, & proprio motu progressiuo non potest moueri, vt docet *Auersa hic qu. 27 sect. 6.*

Respondent alij, vt *Franciscus Le Reès disput. 5. ar. 7. §. 2.* tale corpus replicatum moueri, & acquirere nouas præsentias connaturalitèr; nec esse absurdum, corpus semel diuinitus replicatum, posse se de nouo replicare, & acquirere de nouo plures, & plures præsentias, licèt hæc secunda, & aliæ, & aliæ replicationes non essent omninò naturales, sed connaturales, quia penderent ab illa prima replicatione supernaturali.

Sed contrà est; quia, talis motus, & talis acquisitio plurium præsentiarum de nouo, esset omninò supernaturalis, aut si inauis, esset omninò præternaturalis, ratio est, quia motus naturalis fit, quando corpus deperdit vnā præsentiam, & aliam acquirit, sed in tali casu non deperderetur vlla præsentia, imò aliæ, & aliæ acquirerentur de nouo, retentis prioribus supernaturalitèr concessis, ergo verè talis motus non esset naturalis, sed vel erit dicendus supernaturalis, vel præternaturalis.

Dices; videtur omninò absurdum, quòd ingens lapis suspensus maneret in aere absque eo, quòd ad centrum vergeret, si lapis supponatur esse replicatus, & auferretur tabula, cui est suprapositus; ergo dicendum est, omninò illum lapidem descendere naturali virtute, aliàs suppone te, qui negas lapidem descenditurum, illi lapidi prægrandi, & magno, & tuo experimento proba doctrinam, quam adducis.

Respondeo: lapidem illum descensurum quidem, sed non virtute naturali, nolo experimento me supponere, quia, an-

Deus faciat statim descendere illum lapidem sua diuina virtute ; vel non, mihi ignotum est, & incertum : Hæc sunt argumenta, de quibus loquens *D. Augustinus* 22. de *Ciuit. Dei* cap. II. ait, *ecce qualibus argumentis omnipotentia Dei humanæ contradicit infirmitas, quam possidet vanitas.*

LECTIO VIII.

Quæ accidentia corpori Bilocato naturaliter deberent competere.

VNa, ex præcipuis difficultatibus, quibus conantur aduersarij Conclusionem nostram de corporis replicatione euertere, desumitur ex diuersitate, & contrarietate multiplicium accidentium, quæ corpori bilocato, seu replicato competere.

In hac re, vt clarè, & distinctè procedamus, accidentia omnia, de quibus difficultas esse potest, sic diuido. Nam alia sunt accidentia localia, seu ad locum relatiua, & alia sunt accidentia absoluta, & nullum dicentia respectum ad locum.

Accidentia localia sunt, quæ competunt corpori, non ratione corporis, sed ratione loci, vt esse suprâ, & infrâ; propè, & longè; hic moueri, alibi quiescere : hic esse dexterum, alibi esse sinistrum. Accidentia absoluta loco sunt, esse album, esse musicum.

Iterum accidentia localia, alia sunt essentialiter affixa loco, vt sunt ea, quæ mox enumeraui, esse propè, esse longè, esse suprâ, esse infrâ; & alia sunt per accidens, & merè extrinsecè dependentia à loco, quia nimirum dependent ab obiectis, vel causis extrinsecis necessariò existentibus in aliquo loco, vt hic lætari, & ridere ratione obiecti excitantis risum, alibi plangere, ratione obiecti causantis mœrorem, tristitiam, & lachrymas : hic percuti, & vulnerari ab inimicis hic existentibus, alibi non vulnerari, nec percuti, quia alibi non sunt inimici, & hostes, qui percutiant, & vulnerent.

Iterum accidentia absoluta à loco, alia sunt contradictoria, vel contraria, & alia sunt disparata. Contraria sunt, vt amare, odio habere, assentiri, & dissentiri, esse in peccato mortali, & esse in gratia, viuere, & mori, videre, & esse cæcum. Contradictoria sunt, vt videre, & non videre; amare, & non amare, assen-

assentiri, & non assentiri; hæc sunt contradictoria formalia, quia in his adest formaliter negatio, & affirmatio: contraria enim sunt contradictoria virtualia, & facile reduci possunt ad contradictoria formalia, si explicitè, & formaliter particula negatiua non apponatur. Accidentia disparata sunt, vt album, mulicūm, coloratum.

Iterum hæc accidentia disparata, vel spectant ad naturale complementum corporis, vti sunt naturales rei proprietates, vel sunt pura, & mera accidentia omninò extrinseca, vt scientia, calor, albedo.

De his omnibus accidentibus sunt duæ difficultates.

Prima est, quænam accidentia debeant competere corpori replicato.

Secunda est, quænam possint, tam naturaliter, quàm supernaturaliter corpori replicato competere, & conuenire.

Prima difficultas. hac præsentī lectione examinatur.

Conclusio sit. Accidentia spectantia ad naturale complementum corporis, debent naturaliter replicari ad corporis replicationem; Similiter & accidentia, quæ non spectant ad naturale complementum, dummodo tamen sint vnita cum corpore replicato.

Ita Vasquez 3. p. d. 182. cap. 4. Ruuius 4. Phys. qu. 1. Nugno quæst. 76. art. 2. Auerſa quæst. 27. sect. 7. 9. dico Quarto. Arriaga disp. 16. sect. 10.

Probat̃ur quia: ea, quæ spectant ad naturale corporis complementum, sunt cum illo naturaliter vnita, & connexa, ergo durante hac vnione, omnia illa accidentia debent naturaliter ad replicationem corporis replicari. Consequentia tenet quia, naturaliter vbicumque est vnio, ibi debent esse extrema vnita, vnio enim est essentialiter extremorum vnio. Similiter vbicumque est vnum extremum, debent quoque esse ea omnia, quæ sunt cum illo vnita, si enim A. est vnitum cum B. vbicumque est A, ibi quoque debet esse B,

Hinc Corpus Christi Domini, quando in Sacramento replicatur, replicantur omnia, quæ sunt cum illo vnita; Sanguis, Anima, Diuinitas, quæ propterea dicuntur esse in eo corpore ob naturalem concomitantiam, vt loquitur Concilium Tridentinum sess. 13. c. 3. Confirmatur ex Arist. 2. Top. l. 24. motis nobis, mouentur omnia, quæ sunt in nobis, ac si dixisset, replicatis nobis, replicantur naturaliter omnia, quæ sunt in nobis.

Dixi naturaliter, quia, sicut supernaturaliter, & diuinitus corpus replicatur, ita posset ab illo tolli vnio, quam naturaliter habet ad plura accidentia, cum quibus est vnitum. Hinc si Petrus, verbi gratia, existens Neapoli replicaretur Romæ, vtrobi- que haberet non solum naturales proprietates, vt sunt esse risi- bile, admiratum, & huiusmodi, sed etiam vtrobiue esset Lo- gicus, Philosophus, Iurisperitus, vtrobiue intelligeret, & ama- ret, vtrobiue esset musicus, & candidus.

Dices primò. Corpus Christi replicatum in Sacramento non retinet extensionem localem, & tamen hæc est naturaliter debi- ta corpori, ergo non omne accidens naturaliter debitum, re- plicatur.

Respondeo primò. Extensionem illam localem non esse ac- cidens à loco absolutum, de quo est Conclusio: Dico secundò ralem extensionem supernaturaliter impediri per collationem, & præsentia definitiuæ.

Dices secundò: Humanitas est vnita verbo, & tamen non, vbicunque est verbum, ibi est humanitas, vt patet ex damnata hæresi Ioannis Brentij, & aliorum vbiquistarum, ponentium, humanitatem Christi fuisse vbique ab instanti Incarnationis, sicuti ipsum verbum est vbique.

Respondeo; non omnia, quæ sunt vnita, vbi est vnum, ibi debere esse aliud connaturaliter, sed id verificari tantum, quan- do duo sunt vnita adæquatè; ita vt vnum non magis latè pateat, quàm aliud: non verò quando duo sunt vnita inadæquatè, ita vt vnum magis latè pateat, quàm aliud, quando enim duo sunt vnita adæquatè, ita vt vnum non magis latè pateat, quàm aliud, tunc vbi est vnum naturaliter, est aliud, vbi est Petrus, ibi est, esse musicum naturaliter; vbi est Corpus Christi, ibi est, & Sanguis. Si verò duo sint vnita inadæquatè, & vnum magis latè pateat, quàm aliud, vti sunt gemma, & anulus; oculus, & anima; Sol, & Cælum, tunc non vbicunque est vnum, est & aliud; sed in tali casu, vbi est minus, ibi est maius, & non è contrà: & ita, vbi est gemma, ibi est anulus, vbi est oculus, ibi est anima, vbi est Sol, est Cælum, sed non è contrà, neque enim vbicunque est anulus, est gemma, vbicunque est Anima, est oculus, vbicunque est Cælum, est Sol.

In casu argumenti, Humanitas, & verbum sunt vnita inadæ- quatè, & magis latè patet verbum, quàm Humanitas, idèò vbi- cunque est Humanitas, ibi est Verbum, sed non vbicunque est

Verbum, ibi debet esse, & Humanitas.

Conclusio: quæ naturaliter vni corpori repugnant in vno loco, non replicantur ad replicationem loci, neque possunt illi competere utrobique. Ità *Franciscus Le Rec's disp. 5. art. 7. §. 3. Arriaga disp. 14 sect. 9. Ouid. Contr. punct. 10. §. 2.*

Probatur quia Dualitas, vel etiam pluralitas loci non auget naturalem capacitatem, & virtutem corporis replicati, ergo ea, quæ illi non replicato repugnant, repugnant etiam si millies, vel in mille locis replicetur; hinc est, vt Baiulus, qui in vno loco positus non potest centum pondera portare, si poneretur esse in pluribus locis, neque posset centum illa pondera portare.

Similiter; quia Petro repugnat in vno loco circa idem obiectum scire, & errare, ideò etiam repugnat Petro bilocato, vel pluries replicato, scire, & errare; amare, & odio habere, assentiri, & dissentiri.

Dices primò; dualitas temporis auget virtutem causæ, & corporis existentis in duplici differentia Temporis, ergo & dualitas loci eundem effectum præstabit. Consequentia tenet à paritate rationis; Antecedens probatur, quia Petrus, qui hodie pede non potest conficere triginta milliaria, potest ea conficere hodiè, & cras.

Respondeo: disparitatem esse, quia dualitas temporis non distrahit vim, & virtutem corporis, nam eadem tota virtus Petri est hodiè, & cras; at dualitas loci, distrahit, & quodammodo diuidit virtutem causæ; virtus autem ad plures effectus distracta, & quodammodo diuisa, minor est ad singulos præstandos, minor est virtus Baiuli ad portanda simul duo onera, eo quia simul applicatur ad illa duo portanda, quàm si ad vnum portandum applicaretur hodiè, & ad aliud portandum applicaretur cras. Et vniuersaliter pluris est dualitas, vel pluralitas temporis, quàm dualitas, vel pluralitas localis, in diuerso tempore Petrus, verbi gratia, potest viuere, & mori, existere, & non existere, peccare mortaliter; & de peccatis conteri, & tamen non potest Petrus diuersis in locis existere, & non existere, viuere, & mori, peccare, & de peccato conteri, aliàs simul posset in diuersis locis damnari, & saluari, esse in Paradiso, & in Inferno, quo nihil absurdius.

Dices secundò. Diuersitas loci tollit contradictionem, vt diximus in Summulis *Leff. 8.* ergo ea, quæ vni corpori repugnant, si repliçetur in distinctis locis, non repugnabunt.

Respondeo diuersitatem loci tollere repugnantiam, quæ est in corpore ratione loci, sed non tollere repugnantiam, & contradictionem, quæ competit corpori ratione corporis, & non ratione loci, sicut esse propè, & non propè, est repugnantia respectu corporis existentis in vno loco. Sed non est repugnantia respectu corporis replicati in duobus locis, quia propè, & non propè, sunt accidentia localia, & non pugnant ratione duorum locorum, ac viuere, & non viuere, repugnant ratione corporis, ideo quantumuis bilocetur corpus, aut in pluribus locis replicetur, semper repugnantiam habet ad hoc, vt dicatur Viuere, & non viuere, mori, & non mori, saluari, & damnari.

LECTIO IX.

Accidentia, quæ possunt competere Corpori replicato.

EX dictis superiori Lectione certò deducitur, omnia accidentia, quæ debent replicari ad replicationem corporis, posse quoque replicari, plus enim est debere replicari, quam posse replicari. Modo de alijs accidentibus, quæ non debent replicari, videndum est, an possint replicari.

Conclusio prima sit. Accidentia localia, quæ sunt, vel essentialiter affixa loco, vel aliquo modo à loco dependent, etiam de absoluta potentia non possunt replicari replicato corpore.

Ità *Auersa loco cit. Reès disp. 4. ar. 8. §. 1. Et est communis.*

Probatur primò. Conclusio; quia hæc accidentia, si sunt affixa essentialiter vni certo loco, sunt intransferibilia ad alium locum, non enim rerum essentialiter etiam de absoluta Dei potentia possunt mutari, ergo accidentia localia, & essentialiter affixa vni certo loco, non possunt replicari.

Probatur secundò quia: non debet priuatus doctor à communi sententia, & opinione recedere, ductus solum ex eo quia, implicantiæ ipse non inuenit in ijs, quæ ad Diuinam spectant Omnipotentiam; nam licet ipse in eo, quod asserit, implicantiæ non agnoscat, indè non valet inferre, ergo implicantiæ non est, quia fortasse est, & ipsum latet, nam, vt benè habet *Arist. 8. Top. 3. nihil prohibet alicui videri, quæ non sunt magis, quam verat* Quando verò plures Doctores in eo conueniunt, vt implicantiæ

tiām in aliqua conclusione non agnoscant. tunc possumus tūc eam conclusionem sustinere, difficilius est enim plures errare, quam vnum: in hanc rem accipe prudens monitum *Arist. 1. Top. c. 8. non est ponendum id, quod est contrarium multorum opinio- nibus & 8. Top. 2. Inopinabilem positionem cauendum est, sus- tinere.*

Probatur tertio: Conclusio quia si vbi Neapolitanum trans- ferretur Romani, ibi non posset exercere suum effectum forma- lem, à quo quia realiter non distinguitur, iam transferretur; pro- batur sequela quia, vbi Neapolitanum Romæ non posset subie- ctum à se ubicatum Neapoli, ubicare Romæ, quia Roma non esset Neapolis, imò Neapolis longè distaret à Roma, vti de facto distat, non ergo vbi Neapolitanum posset constituere Petrum, verbi gratia, præsentem Neapoli, si tale vbi esset Romæ, & Ro- mæ non esset Neapolis.

Respondebis. Vbi esse essentialiter affixum vni loco, non tollit, quominus possit ad alium locum trahi, & esse alibi ac- cidentaliter, non enim repugnat essentialiter tale, fieri acciden- taliter oppositum, sic albedo essentialiter alba, potest fieri acci- dentaliter nigra, & calor essentialiter calidus, potest fieri acci- dentaliter frigidus: calidum enim, & frigidum opponuntur con- trariè, non contradictoriè; contrarietas potest supernaturaliter à Deo tolli, esto nequeat tolli contradictio.

Sed contra est: primò, quia quod est essentialiter tale, nec ac- cidentaliter potest fieri oppositum, fortasse homo, qui est essentia- liter rationalis, potest fieri irrationalis accidentaliter? Angelus, qui est essentialiter spiritalis, poterit supernaturaliter esse materialis accidentaliter? quis hoc dicat, aut sibi persuadeat? Fateor, posse su- pernaturaliter tolli contrarietatem, & oppositionem formatam, quæ habent formæ in ordine ad subiectum, à quo mutuò se excludunt, vnde possunt esse supernaturaliter in eodem subiecto calor, & frigus in summo, at contrarietas, & oppositio, quam habent formæ in seipsis, & ratione sui, Deus non potest tollere, quia non potest confundere essentias rerum, & immutare, quo modo confunderet, & immutaret, si albedo esset nigra, & calor frigidus, & cerrè dato semel, quod albedo possit esse nigra, & calor frigidus, omnia entia præter formaliter, & explicitè contradictoria, essent vnum ens, aut esse possent vnum ens.

Contra secundò: quia si albo potest esse accidentaliter nigra, & nigredo accidentaliter alba, ergo etiam veritas poterit esse

accidentaliter falsa, & falsitas accidentaliter vera, quo nihil absurdius; Et sanè qui ità discutunt, non minus peccant in philosophiam, quam peccauerint olim. Antiqui, qui cum assererent omnia esse vera, etiam ea, quæ opinantur, & apparent, infert *Aristoteles*, ergo omnia erunt simul vera, & falsa; Aduersarij, vel ipsam falsitatem concedunt posse esse veram, ergo magis peccant in Philosophiam, quam Antiqui, quos ideo benè ità redarguit, *Arist. 4. Met.c.5. Qui enim maxime possibile verum vident, hi tales opiniones habent, & talem de veritate sententiam, quomodo socordia illis non sit, qui philosophari conantur? nam querere veritatem, non esset, nisi volucres persequi.*

Quòd verò etiam accidentia dependentia à loco accidentaliter, & extrinsecè non possint replicari; patet, quia Petrus, verbi gratia, existens Neapoli; videt mare Neapolitanum, tale mare non est Romæ, ergo si Petrus replicetur Romæ, non potest videre mare Neapolitanum, nisi fortasse Deus nouo miraculo replicet mare Neapolitanum Romæ.

Dices primò. Subsistentia etiam est modus essentialiter affixus vni naturæ, & tamen per absolutam Dei potentiam, potest terminare alienam naturam, ità tamen, vt quando terminaret alienam naturam, non deferret terminare primam illa naturam, cui dicitur esse essentialiter affixa, ergo à pari, quamuis Vbi sit modus essentialiter affixus vni certo loco, adhuc potest transferri ad alium locum, non tamen deferens priorem locum.

Respondeo. Antecedens esse verum de substantia Diuina, quæ non est aliquis modus limitatus, & finitus, sed est entitas perfectissimè infinita, ideo potest, & naturam creatam terminare; sed non verificari de subsistentia creata, quæ sicuti finita est, ità vnâ naturam, terminat, nec potest etiam supernaturaliter aliam terminare.

Præterea dato, id non implicare: adhuc lata est disparitas, quia de facto habemus subsistentiam Diuinam terminare alienam naturam, at non habemus de facto, siue naturaliter, siue supernaturaliter vnâ vicationem respicere diuersum spatium ab eo, ad quod est essentialiter ordinatum, & ideo non habemus vllum motuum asserendi vicationem extendi ad spatium, quod essentialiter non respicit, quòd tamen motuum habemus de subsistentia Diuina.

Dices secundò: Vnio partium integralium quantitatis vniuit
mate-

materiæ primæ per superadditam vnionem substantialem; Vnio ipsa substantialis connectens materiam, & formam, fit per actionem, ergo iam vnum Vbi potest vbiari per aliud Vbi.

Respondeo in primis. Vnionem partium integralium esse diuersi generis ab vnione substantiali, sicuti & ipsa vnio substantialis, est diuersi generis, & prædicamenti ab actione, per quam fit, & producitur, nõ sic est vnũ vbi respectu alterius, ad illud autem, quod est vltimò determinatum in aliquo genere non potest determinari per aliud in eodem genere, aliàs non esset vltimum in illo genere, vt in *Log. disp. 3. lect. 10.* explicauimus.

Præterea, nos habemus quantitatem, & eius partium vnionem integram separatam à materia in Eucharistiæ Sacramento; habemus etiam vnionem in probabili sententia separatam à productione, & actione, satis enim probabiliter defenditur, vnionem posse creari, at vbi separatam à spatio est, an essentialiter affixum, adhuc non inuenimus, ideò lata est disparitas inter vbi, & vnionem.

Dices tertio. Actus vitalis est essentialiter affixus principio vitali, & tamen de absoluta potentia potest reperiri in subiecto non vitali, nam intellectio potest poni in lapide; ergo vbi quauis essentialiter affixum vni loco, adhuc potest ad alium locum transferri.

Respondeo. Intellectionem poni in lapide mortuo modo, neque enim per talem intellectionem lapis cognosceret, aut intelligeret, vt planum est; at vbi replicatum per aliud vbi non poneretur mortuo modo, quia adhuc deberet præstare suum effectum formalem; & vbi Neapolitanum translatum Romæ, deberet etiam prout existens Romæ, constituere Petrum Neapoli, quod est impossibile. Probat quia, adhuc, vt vbi Neapolitanum constitueret Petrum Neapoli, dum existit Romæ, deberet tale vbi Neapolitanum, Neapolim transferre Romam, quomodo enim vbi Neapolitanum existens Romæ potest constituere Petrum Neapoli, si Romæ non existat Neapolis? sed impossibile est, quod vbi Neapolitanum transferat, & adducat secum Neapolim, ergo.

Respondebis primò. Vbi Neapolitanum existens Romæ non constituere Petrum Neapoli, dum tale vbi est Romæ.

Sed contrà est quia. non potest tale vbi esse sine suo effectu formali, à quo non distinguitur, at vbi Neapolitanum habet pro suo effectu formali constituere Petrum Neapoli, ergo vbi-

cumque sit tale vbi, debet secum ferre, & prestare suum effectum formalem, quem quia secum ferre non potest, ideò bene arguitur, tale vbi esse intransferibile.

Respondebis iterum. Vbi tale constituere Petrum Neapoli, etiam si secum non transferat, & adducat Neapolim.

Sed-contrà est quia. Tale vbi constituere Petrum Neapoli, est facere Petrum præsentem Neapoli, at si Neapolis supponatur esse per multa milliaria distans à Roma, non potest vbi existens Romæ facere præsentem Petrum Neapoli, quia ergò Petrus esset præsens Neapoli ex suppositione, non esset præsens, quia vt existens Romæ, longè distaret, sicuti longè distat Roma à Neapoli, ideò in trasferibile est hoc. Vbi etiam de absoluta Dei potentia, inuolueret enin implicantiã, vt probatum est.

LECTIO X.

An sit possibile Vacuum,

NOmme vacui venit locus vacuus corpore locato; quia verò de facto omnia corpora naturalia sunt arctè coniuncta adinuicem, & connexa, ideò pro certo supponitur, de facto non dari vacuum, nisi fortè nomine Vacui cum vulgo intelligas carentiam corporis crassi, & solidi, qua ratione aer, qui nos ambit, quia non vbique corporibus crassis, & solidis repletus, Vacuum dicitur.

Vacuum ergo philosophicè acceptum omninò abhorret natura, adeò vt sæpè cogantur corpora naturalia contrà propriè inclinationem moueri, vt vacuum tanquam commune malum effugiant, ascendunt enim gratia, descendunt leuia. Plures assignantur rationes, ob quas Natura Vacuum abhorreat.

Quarum prima desumitur ex inclinatione naturali, qua partes viuiculi student sui totius conseruationi, quæ non aliter melius obtinetur, quàm arctissima partium coniunctione, sicuti separatione, & diuisione earundem faciliè labefactatur, & tollitur, cuiuslibet ergo corpori naturali innatus est amor vnionis, & fuga diuisionis.

Secunda ratio desumitur ex eo, quia inferiora hæc, & sublunaria à cælestibus, & superis motibus, seu lationibus reguntur, & gubernantur, ideò debent ima summis esse connexa ad hoc,

ut per corpora intermedia transire possint, & communicare celestes virtutes, et influentia, unde habet *Arist. I. Met. 2. necessè est, mundum hunc inferiorem contiguum esse supernis la-*tionibus, ut inde eius virtus regatur, & gubernetur.

Probatum autem multis experimentis; Naturam nihil intentatum relinquere, ut vacuum videret, & effugiat.

Prima sit. Dum cucurbitula corpori admonetur, caro intumescit, quia nimirum igne extinguitur aer inclusus, unde si caro non intumesceret, & occuparet locum ab aere relicto, iam daretur vacuum.

Secunda est: si terra effodiatur, in excavatam, & effossam terram statim vel aer, vel aqua, aut etiam si proximus sit ignis; descendit, ne vacuum detur.

Tertia est: lagena calefacta, & postea diligenter obturata, frangitur in parte debiliori, dum aeri frigido exponitur; hinc est etiam, quod tormenta bellica distrumpantur, si accenso intus pulvere, angustius sit foramen, vel aliquo modo impeditum, ita ut non possit statim aer subingredi, tunc, ne vacuum detur, tormenta ipsa bellica franguntur.

Quarta experientia. Lucerna turrata ita se habet, ut semper ad eius inferius foramen oleum descendat, ne detur vacuum, aer enim ambiens ab igne consumitur, unde nisi oleum descendat, in foramine eius vacuum daretur.

Plures alia, & serè innumeræ adduci possent experientiæ, sed hæc sufficiunt ad nostrum intentum.

Fateor, quod semel dato supernaturaliter Vacuo, ut dari posset, nullus ambigit, etiam naturaliter deinde potest aliud sequi Vacuum, ita ut à natura nequeat impedi.

Probatum quia, Natura non potest, nec debet providere in illis casibus, quos nescit, sed natura nescit possibile vacuum de absoluta Dei potentia, ergo non debet dare vires ad evitandum vacuum, quod sequitur admissio alio vacuo supernaturaliter.

Dedit autem de facto natura ad evitandum vacuum adhærescentiam corporum, quæ adhærescentia nulla naturali virtute, aut vi tolli potest; ipsa autem adhærescentia est ipsamet quantitas resistens, quantum potest, ne locus aliquis deferatur ab vno corpore, in quem aliud corpus non subingrediatur.

Dices. Saltem Angelus potest vacuum in aliquam parvam mundi partem inducere.

Respondetur communiter negativè, quia virtus Angeli non
super.

superat virtutem omnium causarum naturalium, quatum prima est Deus, qui sicuti est Auctor, ita promotor est, & conservator naturæ. Præterea ex *Paulo ad Heb.* habemus, *Angelis Deus non subiecit Orbem terræ.*

Quæres primò. Si daretur. vacuum fieret nè in eo motus in instanti.

Respondeo negatiuè, quia causa adæquata successione motus, qui de facto est, & sit successiuè, est grauitas mobilis, distantia terminorum, & plenum superandum; at vacuo deest plenum, ergo deest peculiaris ratio integrans causam adæquatam, malum enim est ex vnico defectu.

Neque dicas Plenum, seu Medium superandum non spectare ad integrandam causam adæquatam successione, sed merè per accidens se habere, potest enim dari motus successione per virtutem motiuam, quæ medio, seu pleno resistitiua non sit, vt patet in Angelo, qui successiuè moueatur per medium, & plenum, quamuis eius virtus motiua non sit resistitiua pleno, & medio, à quo proinde resistantiam non patitur, & tamen successiuè mouetur.

Contrà est quia. Corpus naturale essentialiter exigit habere virtutem resistitiuam pleno, & medio, ad hoc vt fieret successiuè eius motus, aliàs natura prouidisset non solum in casibus naturalibus, sed etiam miraculosis, & supernaturalibus prouidendo modum, quo eis motus esset successiuus ablato pleno, & medio supernaturaliter.

Quæres secundò. Possit nè in Vacuo fieri motus Progressiuus?

Respondeo negatiuè, quia motus progressiuus requirit grauationem, quæ in Vacuo non est: Probatur quia; ad motum progressiuum requiruntur duo motus, primus; adducendo per condensationem, & deducendo per rarefactionem musculos, quibus adductis perattollitur, quibus deductis, deprimitur.

Secundus motus fit impellendo pedem eleuatum in locum vltiorem, nam si solum attollimus, & deprimimus pedes eodem in loco, nihil viæ conficimus, non progredimur, sed sistimus eodem in loco, vt patet in ea saltatione, quæ ob id, Canaria dicitur, hic autem impulsus in locum vltiorem fit per grauitatem ipsius pedis, grauitatem capitis, grauitatem humerorū, aliorumque membrorum, correspondentem, seu æquantem, & alibrantem pondus corporis, vt se fiet; vnde quādo currimus
vel

vel locum arduum ascendimus, vel quando minorem laborem volumus sentire, caput demittimus, quia talis grauitatio capitis melius impellit pedem in partem vltiorem, vnde dato, quod pes non adhærescat pauimento, posset quidem fieri eleuatio, & depressio pedum, sed quia non fieret inpulsus in vltiorem locum cum defectu grauitatis, non posset fieri motus progressiuus.

LECTIO XI.

An detur spatium imaginarium.

Quam certum est dari spatium reale, & locum extrinsecum, tam incertum est, & omnino Controuersum, an detur spatium imaginarium: Et quidem si nomine spatij imaginarij, veniat spatium à nobis imaginatum, atque confictum ad modum, & similitudinem spatij, & loci realis, non est debium, dari tale spatium, quia in libera potestate cuiusque Philosophi est, tale spatium confingere, & imaginari. At si nomine spatij veniat aliquid reale, de hoc est difficultas, & controuerfia.

Conclusio. Spatium imaginarium verè non datur.

Ità *Vasq. l. p. disp. 29. cap. 3. Suarez in Met. Disp. 5 l. sect. 1. num. 9. Franciscus Le Rees disp. 5. art. vlt. §. 1. Pererius lib. 1 l. c. 5. Arriaga, & Ouiedus hic, ubi citat Moncaum, Fasolum, Hurtadum, & subdit, hanc sententiam tam esse communem.*

Contrà *Albertinum t. 2. disp. unica de Predic. Vbi quæst. 2. Auerfam qu. 27. sect. 2. Petrum d Sancto Ioseph in sua Idea Theol. Spec. lib. 1. cap 5. Resolut. 3. & alios paucos.*

Probatur Conclusio: quia tale spatium, vel est negatiuum, quid, vel positiuum, certè non est quid positiuum, quia non est materia, neque forma, neque corpus, aliquod, aliàs non deberet dici spatium imaginarium, sed omnino reale, quia positiuum, si negatiuum quid, vel est pura negatio, vel priuatio; non priuatio, quia priuatio est in subiecto reali apto nato ad habendam formam, cuius est priuatio, sed tale subiectum non est assignare, ergo spatium imaginarium non est priuatio.

Sed neque est pura negatio, quia negatio, vel obijcitur intellectui, vel in aliquo positiuo fundatur, tanquam in subiecto, si spa-

si spatium imaginarium consisteret in negatione, prout obiectiue in intellectu, iam tale spatium esset fictum, & chymericum; sed neque potest dici, quod sit in aliquo subiecto fundatum, quia tale subiectum non est assignabile, ergo verè tale spatium non datur.

Respondebis, tale spatium esse capacitatem quandam, seu non repugnantiam ad posse repleti corporibus, quæ non implicent, & quæ posset Deus creare; sicuti creaturas esse possibiles, est, eas habere non repugnantiam ad existendum.

Sed contrà est, quia; posse repleti, est proprietas spatij veri, & realis, hoc enim est, quod est replebile, nihil enim replebile non est: Insto adhuc, ista capacitas est alicuius subiecti capacitas, assignent Aduersarij, quodnam sit tale subiectum?

Ad instantiam adductam de non repugnantia creaturarum, elico, per eam non repugnantiam creaturarum, explicari possibilitatem creaturarum: an benè, examinabimus in Metaphysicis. Sed dato per eam non repugnantiam benè explicari rerum possibilitates; inde sequitur, tale spatium imaginarium fore possibile, non actuale; ergo iam actu tale spatium non datur: an sit possibile, non examino in presenti.

Denique addo, quod licet non repugnantia quò ad nomen videatur esse quid negatiuum, re ipsa tamen est quid positivum, nam repugnantia est negatio, si ergo non repugnantia formaliter esset negatio, iam daretur negatio negationis, ergo non repugnantia est ens positivum; quid ergo erit materia, an forma substantialis, vel accidentalis, an aliquod compositum, præter hæc nihil aliud est inuenire in rerum natura.

Dices primò Destructis corporibus interiectis inter Cælum, & terram, remaneret aliquod spatium inter illa corpora, non positivum, ergo negatiuum.

Probaturs antecedens, quia ea, quæ distant, certè per aliquod interiectum spatium distant.

Respondeo. distantiam inter duo corpora formaliter haberi per reales vbicationes, materialiter haberi per interiectum corpus medium, & tertium, quod propterea aliquando interiacet, aliquando non; destructis ergo corporibus medijs, & interiacentibus, Cælum, & terra distarent per proprias sui vbicationes, distare enim, sicuti esse propinquum, formaliter habetur per vbicationem.

Replicabis : ab ijsdem vbicationibus habetur distantia , & approximatio , quare ergo destructis corporibus interiacentibus , Cœlum , & Terra potius dicuntur distare , quàm esse propinqua ? seu quare illæ vbicationes causant potius distantiam , quàm approximationem ?

Respondeo ; rationem esse , quia vbicationes illæ dicunt relationem ad corpora intermedia , & ineriacentia , quæ supponuntur esse destructa , nam ea corpora , inter quæ vel sunt , vel possunt esse corpora intermedia , & interiacentia , dicuntur distare ; Ea verò , inter quæ aliud corpus non intermediat , nec potest intermediare , dicuntur præsentia , & propinqua , quare interiacentia corporum se habet merè materialiter , & tanquam conditio , sinè qua non resultat effectus formalis distantie .

Dices secundò : communis conceptus non potest esse falsus , sed omnes concipiunt immensa spatia , & vacuitates extrà Cœlum , ergo , Confirmatur , quia vbi nunc est mundus , antea non erat , sed poterat esse , ergo iam datur capacitas ad constituendum hunc mundum , sed talis capacitas est spatium imaginarium , quia nomine spatij imaginarij intelligitur capacitas ad continendum corpus , ergo .

Respondeo negando antecedens , neque enim conceptus communis , quia communis debet esse necessariò verus , nam , vt bene aduertit . *Arist. 4. Met. c. 5. l. 21. verum non pluralitate , neque paucitate iudicari censere debent ; Dulce agrotis videtur amarum , quodd si omnes agrotarent , aut infirmi essent , duo autem , vel tres sani , aut mentis compotes essent , fortè dulce deberet necessariò esse , aut dici amarum , quia sic pluribus , & fortè omnibus videretur ?*

Dico præterea . cum esse communem conceptum vulgarium hominum , non Philosophorum : aut denique communem esse conceptum de spatijs possibilibus , quia reuera possibilia sunt plura corpora extrà Cœlum , quæ sunt capacia ad continenda , & terminanda alia corpora , seu sunt locus possibilis aliorum corporum .

Ad confirmationem dico ; Mundum esse modo actu extensum , & quantum , quo pacto antea non erat , non quia modò repleat aliquam vacuitatem , seu inanitatem , quæ fuerit capax Mundi ; nam Mundus non est in loco , vltima enim Mundi pars est vltimum Cœlum , quod secundum extremitatem sui superficiem , & partem superiorem non est in loco .

Dices tertio. Deus communiter à Theologis dicitur esse in spatijs imaginarijs, ergò reuerà hæc spatia sunt aliquid reale.

Respondeo : non ab omnibus Theologis eam propositionem admitti, quia plures id apertè negant, vt videre est apud *Quidam hic Controuer. 15 punct. 3.*

Præterea dico ; Deum esse in spatijs imaginarijs, quia potest esse præsens pluribus, & pluribus corporibus à se producibilibus, & hoc absque sui vlla intrinseca mutatione, quia nihil intrinsecum acquirit de nouo, quando fit de nouo præsens alicui creaturæ, cui semper per suam immensitatem coexistit, quantum est ex parte immensitatis, ex defectu creaturæ est, quod illi aliquando non coexistat, quia nimirum ipsa creatura non existit, & secundum quod de nouo existit creatura, incipit de nouo illi coexistere Deus per sui immensitatem.

LECTIO XII.

Temporis natura definitione, & diuisione vestigatur.

Sicuti rerum naturalium aliæ sunt permanentes, & aliæ sunt successiuæ, ità Tempus duplex est ; Tempus rerum permanentium, quod solet dici tempus intrinsecum, & magis propriè, atque communius, Duratio, & aliud est tempus rerum successuarum, putà, motus ; & hoc tempus solet dici tempus extrinsecum, non quia sit ipsi motui extrinsecum, sed quia ità est intrinsecum vni motui, vt sit extrinsecum alteri motui, ità tempus, quo durat motus Cæli, est extrinsecum non respectu motus Cælestis, sed respectu motus Rotæ, quam in hisce sublunaribus mouet figurus.

Hinc subdiuiditur tempus extrinsecum, ita vt aliud sit vniuersale, & commune, aliud particulare, & proprium. Tempus vniuersale, & commune est motus Cæli, præsertim verò motus primi mobilis, quia duratio huius motus, est mensura, & regula omnium motuum tum cælestium, tum sublunarium. Tempus verò proprium, & particulare est duratio cuiusque motus sublunaris, sæpè autem per vnum motum sublunarem mensuramus, & regulamus alium motum, sic per motum horologii mensuramus, & regulamus, exempli gratia, deambulationem, vel lectionem.

Et

Et quia omnis mensura debet esse fixa, certa, & stabilis, ideo motus primi mobilis, quia est maximè certus, firmus, vniformis, & regularis, est omnium aliorum motuum regula, & mensura, inter motus verò sublunares, ille motus, qui est alio certior, & stabilior, est mensura alterius, & regula.

Tempus ergo extrinsecum definitur ab *Arist. 4. phys. cap. 11. t. 101. Tempus est numerus motus secundum prius, posteriusque*.

Dicitur primò *numerus*, in hac definitione. Vbi nomine numeri Aristoteles intelligit mensuram; Tempus enim est mensura motus, quia per ipsum tempus cognoscimus, quantus sit, vel fuerit motus: aptè autem nomine numeri venit mensura, quia, vt docuit *Arist. 1. Met. cap. 2.* & experientia ipsa probatur; omnis mensura consistit in vnitatem, aut numero, nam per vnā quantitatem semel, aut pluries alteri applicatam cognoscimus, quanta sit altera quantitas: Est autem tempus mensura siue actiua, siue passiua; nam quando per motum Cœli mensuramus motus sublunares, duratio motus Cœli est mensura actiua, duratio motuum sublunarium est mensura passiua.

Dicitur secundò, *Motus*, quia tempus primò, & per se mensurat motum, per accidens verò, & secundariò mensurat etiam quietem motui oppositam, vnde solemus dicere, rem tanto, vel tanto tempore quieuisse; Ideoque tempore etiam mensuratur res alia quæcunque permanens, imò & quidquid ad modum, & similitudinem motus finit, & labitur.

Dicitur tertio in ea definitione; *secundum prius, posteriusque*, vt denoteretur successio, quæ est essentialis temporis, eius enim partes aliquæ sunt priores, aliquæ posteriores, ita vt non possint assignari duæ, nè dum plures, quæ simul existant, & vna non sit post aliam.

Obijcies primò: ex *D. Augustino lib. 11. confess. cap. 23. scilicet cessarent Cœli lumina, & moueretur rora figuli, non esset tempus, quo metiremur eos gyros, & diceremus, aut aequalibus morulis agi, aut alias tardius, aliis velocius moueretur, alios magis diuturnos esse, alios minus? aut cum hoc diceremus, non & nos in tempore loqueremur, aut non essent in verbis nostris, aliæ longæ syllabæ, aliæ breues, nisi quia illæ longiori tempore sonuissent, istæ breuiore? ergo per D. Augustinum motus Cœli non est tempus. Confirmatur ex eodem in fine eiusdem capituli.*

Nemo ergo mihi dicat cœlestium corporum motum esse tempo-

ta, quia & cuiusdam voto, cum sol stetit, ut Victor Iosue prælium perageret, sol stabat, sed tempus ibat; unde & concludit. Video igitur tempus quandam esse distensionem.

Respondeo. D. Augustinum solum velle motum Cœli non esse tempus particulare; non verò negasse, esse tempus vniuersale. Præterea ibi Augustinus loquitur de motu Solis, & Syderum, non de motu primi Mobilis: nos motum primi mobilis dicimus esse tempus vniuersale, non motus Syderum, aliorumque Cœlorum: nam hos motus, licet admittamus, posse dici tempus vniuersale respectu motuum sublunarium, absolute tamen solus motus primi mobilis est tempus vniuersale, quia est mensura, & motuum Cœlestium, & motuum sublunarium.

Verum est etiam, quod ultimo concludit D. Augustinus, Tempus esse distensionem quandam, quia reuera est quantitas successiua, & successiua quædam extensio.

Obijcies secundò ex eodem Augustino 11. Confess. c. 26. tempore metimur tempus, & tempore breuiore metimur longius, sicuti spatii cubiti spatium transiri, ergo tempus non est numerus, seu mensura motus.

Respondeo; non esse absurdum per vnum tempus mensurari aliud; nempe per tempus notius mensurari id, quod est ignotius, sicuti motus mensuratur motu, & per motum, seu tempus horologii mensuramus motum, & tempus ambulationis, & rursus motum horologii per alium motum magis regulatum, & notio-riorem, vel alterius horologii, vel alterius motus, vterius mensuramus, & metimur.

Obijcies tertio. Temporis nihil existit à parte rei, ergo est merum ens rationis; nam eius præterita pars non est, sed fuit; futura erit, sed nondum est, præsens verò ita est, vt propriè esse non dicatur, quia est in fluxu, seu in transitu. Confirmatur quia: Tempus est mensura, sed mensura dependet ab anima, & ab intellectu, quia mensura est id, quo quantum cognoscimus, unde ex Arist. habemus notabilem textum hic, id est, 131. Impossibile est tempus esse, si non sit in anima, & ex D. Augustino lib. cit. Confess. c. 27. In te anime meus tempora melior, noli mihi obsistere turbis affectionum tuarum.

Respondeo. Tempus dependere ab anima, & intellectu, in quantum est actualis mensura; nam non possumus mensura quantum cognoscere, nisi anima, & intellectus cognoscant; at secundum rationem successionis est simpliciter ens reale. Unde Sua-

rex disp. 50. Met. sect. 3. benè notat. Tempus materialiter esse extrà animam, sed formaliter compleri per animam.

Duratio permanens subdividitur, ità vt alia dicatur simpliciter duratio, alia dicatur Aeuum, alia denique Aeternitas.

Duratio simpliciter est rerum permanentium, & successiuarum, vt est omne corpus naturale corruptibile; Aeuum est proprium rerum ab intrinseco incorruptibilium, & quæ licet habuerint principium, non tamen habituræ sunt finem, ità Angelus, & Anima rationalis, quæ propterea dicuntur Aeuiterna.

Denique Aeternitas est propria solius Dei, quia est duratio rei non habentis neque principium, neque finem; idèdque definitur à Boetio 5. de Consolatione Philos. prosa 6. definitione illa communiter recepta à reliquis Philosophis, interminabilis vitæ tota simul, & perfecta possessio.

In qua definitione dicitur primò *interminabilis vita*, quia Deus est viuens vita intellectuali, & caret omni termino; principio, scilicet, & fine. Dicitur secundò *tota simul, & perfecta possessio*, quia Aeternitas non admittit prius, & posterius, sed est tota simul, & perfectè stans, vndè D. Augustinus lib. II. Confess. c. II. loquens de corde humano considerante aeternitatem Dei; sic habet. *Quis tenebit illud, & figet illud, & ut paululum rapiat splendorem semper stantis aeternitatis, & comparet eam cū temporibus nūquam stantibus, & videat esse incomparabile?* Et c. 13. *Anni tui nec eunt, nec veniunt, isti enim nostri, & eunt, & veniunt, ut omnes veniant. Anni tui omnes simul stant, quoniam stant, nec euntes à vententibus excluduntur; quia non transeunt.*

LECTIO XIII.

An duratio distinguatur à Re Durante.

Redit pugna cū Nominalibus, Complexistis, & Connotantibus, asserentibus rem durare, & coexistere tempori reali extrinseco, nihil aliud esse, quàm complexum ex re, & differentia temporis tunc incidentis, aut rem durare esse esse rem ipsam, prout connotantem tempus extrinsecum, nonnulli ex Recentioribus, vt *Auersa* 1. tom. Philos. q. 28. sect. 3. & *Quiedo Contr.* 16. punct. 1. §. 2. negant, durationem distinctam

à re durante, quamuis concessissent vbi cationem distinctam à re vbi cata contra *Nominales, Complexistas, & Connotantes*. Eadem mihi semper est sententia, idem semper votum, aut omnes modos admittendos, aut omnes negandos quia de omnibus modis, seu pro omnibus modis, eadem militat ratio.

Conclusio. Duratio est modus distinctus à re, quæ durat, & à tempore, quo durat.

Ità *D. Thomas* 1. p. q. 10. art. 2. *D. Bonaventura* in 2. d. 2. ar. 1. qu. 3. *Henricus quodlib.* 2. qu. 2. quest. var. q. 3. huius *Conimb.* 4. phys. c. 14 q. 2. art. 2. vbi pro se referunt *Ricoh.* in 2. d. 2. art. 1. qu. 3. *Mayron*, & *Argentina*, *Pererium* lib. 12. c. 5. *Prop.* 2. *Ruuium tract. de Tempore* qu. 4. *Franciscum Le Reës* disp. 7. ar. 2. *Complut.* disp. 21. qu. 3. §. vbi referunt *Iauellum* qu. 10. huius lib. *Socin.* 12. *Met.* qu. 58. *Iulianus de Castelnus* in *Log.* disp. 8. dub. 7. *Vasq.* p. 1. qu. 3. art. 40. dub. 1. *Salar* 10. 1. in 2. tract. 7 disp. 1. sect. 12. *Fonseca* lib. 5. *Met.* c. 13. q. 10. sect. 2. *Arriaga* disp. 15. sect. 1. subsect. 1. vbi habent, hanc sententiam tanquam probabiliorē opposita defendi à Recentioribus grauissimis.

Contrà *Scotum* in 2. dist. 2. qu. 2. *Bassolis* qu. 1. eiusd. d. *Gabrieli* ibid. *Gregorij*, & *Ochami* qu. 10. *Masium* in presenti c. 12. sect. 4. *Suarez* 1. 2. *Met.* disp. 50. sect. 1. n. 5. *Quied.* disp. 16. p. 1. §. 2. *Auersam* quest. cit. & alios.

Probatur primò Argumento communi pro omnibus modis, quia: Non potest intelligi transitus subiecti de vno contradictorio ad aliud absque intrinseca mutatione eiusdem subiecti, aliàs de eodem prorsus immutato verificarentur prædicata contradictoria, quod est impossibile, sed res de non durante in primo instanti suæ existentie intelligitur fieri durans in alijs instantibus sequentibus, ergo debet in re fieri aliqua intrinseca mutatio per receptionem modi durationis. Confirmatur ex *Arist.* 3. phys. c. 1. t. 9. si duplum non erat, & nunc duplum existit, si non utrumque, alterum saltem mutatum esse, necesse est.

Respondebis, rem durare, esse rei existentiam, & tempus extrinsecum connotatum à tali existentia, vel complexum ex rei existentia, & tempore extrinseco.

Sed contrà est; quia in primo instanti res ità existit, vt connotet illud primum instans, adeò vt in illo primo instanti sit complexum ex rei existentia, & tempore extrinseco, & tamen in illo primo instanti res non dicitur durare, ergo durare, est quid

quid diuersum à rei existentia, & tempore extrinseco.

Replicabis, etiam in primo illo temporis instanti res durat, & in phrasi philosophica debet dici durare, quia coexistit illi primo instanti: esto, phrasi vulgari res in primo instanti non dicatur durare.

Sed contrà primò: quia is est communis modus loquendi in scholis, vsurpatus etiam à viris doctissimis, vt videre est apud *Complutenses disp. 21. num. 26.* imò & communis conceptus, quem omnes habemus de duratione, est, quòd durare, sic perseuerare, & continuare in esse; at in vno instanti res non dicitur perseuerare, aut continuare in esse, sed pro illo vno instanti, nec dicitur perseuerare, neque non perseuerare, sed præcisue se res habet, ergo perseuerare in esse, est quid distinctum ab existentia, & esse rei.

Contrà secundò quia: esto in primo instanti realis existentia res dicatur durare; sanè in aliquo priori intelligitur res existens, antequam intelligatur durare, ergo quando intelligitur durare, aliquid aliud intelligitur ex parte obiecti, quod non intelligitur, dum concipitur res existens, sed hoc aliquid aliud se tenens ex parte obiecti, & rei durantis, nihil est aliud, quàm modus durationis, ergo.

Probatur secundò Conclusio, impugnando principale fundamentum oppositæ sententiæ, quia; Ideò duratio non est modus distinctus à re existente, & tempore extrinseco, quia impossibile est, rem existere, & non coexistere tempori incidenter existenti, verbi gratia, impossibile est Petrum existere, & incidenter existere, seu fluere horam vigesimam primam, quin Petrus coexistat huic tempori incidenter existenti, & horæ vigesimæ primæ incidenter fluenti, sed Petrus durare, nihil est aliud, quàm Petrus coexistere huic tempori incidenter fluenti, ergo durare, nihil est aliud, quàm complexum, seu coexistentia rei, & temporis incidentis, præciso quocunque alio modo durationis superadditæ; sed hæc ratio, esse inefficax, & hoc fundamentum ex eo esse ruinofum, conuincuntur, quia facta suppositione, quòd Petrus existat, & quòd existat incidenter hora vigesima prima, non possunt inuicem non coexistere, quia temporis non existit nisi nunc, & instans, idest, temporis non existit, nisi vniuersa pars, ideoque si eodem modo supponamus, vnum tantum, existere locum extrinsecum, non posset Petrus existere in rerum natura, quia huic loco extrinseco coexisteret, & tamen da-

ta suppositione, quod vnus tantum locus extrinsecus existeret, adhuc daretur Vbi, & modus superadditus, quo Petrus constitueretur formaliter praesens tali loco, ergo à pari, esto, Petrus existente, & existente tempore reali, non possit non esse coexistentia, & complexio Petri, & temporis, non proinde Petrus formaliter duraret per talem coexistentiam siue modo durationis intrinsecum.

Præterea: saltem Deus posset videre, & intelligere existentiam Petri, & existentiam horæ vigesimæ primæ, quin intelligeret istam coexistentiam, & complexionem Petri, & horæ vigesimæ primæ, ergo ista coexistentia non consistat solum in existentia Petri, & horæ vigesimæ primæ, sed in aliquo alio, quod vltèrius deberet intelligere Deus, vt intelligeret istam coexistentiam, quod aliquid aliud non potest esse, nisi iste durationis modus superadditus.

Denique si doctrina hæc transferatur ad tempus præteritum, & futurum, clarè patebit, posse esse rem, & tempus reale absque ista coexistentia; nam Adamus exiit, & dies externa etiam exiit, tamen Adamus, & dies externa non coexistebant. Similiter Antichristus existet, & dies crastina existet, & tamen Antichristus, & dies, crastina non coexistent, ergo potest res existere, & tempus reale existere, absque eo, quod simul coexistent, ergo simul coexistere; est aliquid aliud præter vtriusque existentiam, & consequenter erit modus durationis.

Respondebis: exiitisse Adamum, & diem externam, sed non exiitisse simul; similiter exiturum Antichristum, & diem crastinam, sed non simul.

Optimè: sed quæro, quid dicat, *Tamen simul*; certè non dicit solum existentias, temporis, & rei, sed aliquid aliud; quod ego dico, esse modum durationis superadditum.

Probatur tertio. Conclusio quia: si nullum tempus existeret, si cessarent Cæli lumina, & motus, si omne aliud tempus particulare destrueretur, Angelus adhuc duraret, sed non duraret per istam coexistentiam ad tempus, quod nullum esse suppono, ergo duraret per modum intrinsecum durationis: neque dicas, Angelum tunc durare per coexistentiam ad tempus reale possibile; quia suppono, Tempus etiam omne implicare.

Respondetis: Angelum tunc durare per coexistentiam ad tempus conditionatum, idest, quia coexisteret huic veritati conditionatæ, si tempus esset possibile, hæc pars temporis modo

flue-

fluere; Sed contrà est quia: ista veritas conditionata actu reali-
ter à parte rei; nihil est; quia obiectum conditionatum nihil
est, nisi deputata, & adimpleta conditione, ergo quandiu adim-
pleta non est; & deputata conditio, perindè se habet obiectum
conditionatum, ac si esset Chymara, ergo Angelus in tali casu
non potest dici; durare per coexistentiam ad tempus conditio-
natum, seu ad veritatem illam conditionatam.

Probatùr quartò quia: Tempus realiter distinguitur à motu,
seu duratio successiua realiter distinguitur à re successiua, ergo
etiam duratio permanentis realiter distinguitur à re permanente:
consequencia tenet ab equitate rationis.

Antecedens probatur ex *Arist.* c. 11. vbi ex professo probat,
tempus distingui à motu, nam t. 101. aperte habet; *non ergo
Tempus est motus, sed ut motus ipse numerum habet*; subdit
deindè duas rationes; primam t. 102. quia tempus est mensura
motus, ergo distinguitur à motu; *sunt autem id, quònumera-
mus, & id, quòd numeratur, non eadem, sed diuersa*. Alte-
ram rationem adducit c. 12. t. 109. quia tempus dicitur longum,
& breue, paucum, & multum, non autem velox, aut tardum,
certum est autem de motu dici, quòd sit velox, & tardus, verba
formalia sunt. *Perspicuum etiam est, & cur velox quidem, ac
tardum non dicitur, multum autem, & paucum, & longum,
ac breue dicitur.*

Confirmatur ex D. Augustino *lib. 11. confess. c. 23.* vbi cum
multis probasset, Tempus non esse motum, ita concludit. *Ne-
mo ergo mihi dicat cœlestium Corporum motus esse tempora,
quia & cuiusdam voto cum Sol stetisset, ut victor Iosue præ-
lium ageret, Sol stabat, sed tempus ibat. Per suum quippè
spatium temporis, quod ei sufficeret, illa pugna gesta; atque
finita est. Video igitur tempus quandam esse distensionem.*

Confirmatur secundo ex D. Thoma aperte l. p. q. 10. ar. 2. in
Deo duratio eius propria non distinguitur ab illo; fecus verò
in creaturis.

Probatùr secundo idem antecedens quia. Tempus est de
genere quantitatis discretæ, & successiue, motus verò est de ge-
nere actionis, imò tempus est essentialiter successiuum, adeò ut
impossibile sit assignare; quòd dux, nè dum plures partes tem-
poris simul existant; & non implicat, neque impossibile est, duas
partes motus simul existere, nam idem numero motus, qui sic
successiue, & per partes naturaliter, & de facto, potest fieri si-
mul,

mul, & in instanti de absoluta Dei potentia.

Dices. Tempus nihil est aliud, quàm ordinatio partium motus, sunt enim in motu partes, sed sine tempore non sunt ordinatæ, per tempus formaliter ordinantur, ita vt vna sit prior, altera sit posterior.

Optimè, sed in substantia sunt partes entitatiuæ, in probabili plurium Philosophorum sententia, sed non sunt ordinatæ, ordinantur per quantitatem, & extenduntur, itaut vna fiat immediatè præsens vni, mediatè verò cæteris; ideòque quantitas permanens ponitur res distincta à substantia; sic ergo, esto sint partes in motu, sed sunt inordinatæ, ordinantur per tempus, ergo iam tempus est distinctio, seu ordinatio partium motus secundum prius, & posterius, ergo est res distincta à motu.

Licet autem tempus reuerà sit entitas distincta à motu, tamen est eiusdem motus proprietas naturalis, quia consequitur naturaliter ad motum, nec vnquam reperitur tempus suè motu, vt benè notat *Arist. locis cit. præsertim verò t. 99. In motu quoque similitudine rationis prius esse, posteriusue necesse est; at verò prius, atque posterius in tempore etiam est, ex eo. sunt, quia semper alterum ipsorum, alterum sequitur* Et t. 98. *Quæcum ita sunt, patet tempus, nec motum esse, nec esse etiam, absque motu & clarissimè 8. Phys. cap. 1. t. 12. Tempus effectus quidam est motus.*

LECTIO XIV.

Soluuntur argumenta in oppositum.

Contra Doctrinam superiori Lectione traditam, & explicatam.

Obijciunt Aduersarij primò. Nulla est necessitas multiplicandi entia, & superaddendi huiusmodi entitatem durationis, ergo. Antecedens probatur, quia Deus durat in diuersis temporibus sinè duratione distincta; similiter, fit de non volente volens absque sui mutatione, ergo etiam res creata potest fieri de non durante durans, absque eo, quòd intrinsecè mutetur per receptionem modi durationis superadditæ.

Respondet; à disparatis non tenere consequentiam, & illationem, neque enim ex eo, quòd actus intellectus, & actionis
non

non distinguuntur à substantia Dei, valet inferre, quòd neque distinguantur in creaturà.

Præterea directè ad argumentum Respòdeo, disparitatem esse, quia Deus non est indifferens ad durandum hodiè, vel cras, sed ex sui natura est essentialiter determinatus, ad durandum per omne tempus; seu ad coexistendum omni tempori, non sic creaturà, ideò creaturà indiget modo durationis superaddito. Ad Confirmationem dico, non esse hic transferendam difficultatem illam prorsus inintelligibilem, alioquin eodem argumento posset probari, neque dari vbi, nec vnionem, nec alium quencunque modum.

Obijciunt secundò. Res aliquo modo durat antè ipsam durationem, ergo res non distinguitur ab ipsa duratione.

Antecedens probatur, tum quia, res in illo priori verè existit extrà suas causas, ergo durat, sed non habet modum durationis, ergo. Confirmatur, quia, res in illo priori est subiectum durationis, ergo caret duratione, quam deindè in alio instanti recipit, ergo res durat antè durationem.

Respondeo. Rem in illo priori naturæ non intelligi esse sine duratione; esto, quòd in illo priori res intelligatur esse extrà suas causas, id tamen non sufficit ad hoc, vt dicatur durare, quia ad hoc vltèrius requiritur, vt sit in hoc, vel in illo instanti determinato, quod non habet in illo priori, sicuti ob eandem rationem, licèt in priori naturæ antè vbiationem existat, non tamen est vbicata, quia esse vbicatum, dicit esse in hoc, vel in illo loco, quod in eo priori non habet.

Ex his patet responsio ad Confirmationem; rem enim esse subiectum durationis importat prioritatem naturæ, seu prioritatem causalitatis, quæ prioritas non dicit rem esse in hoc instanti; id enim per durationem formaliter habetur, sicuti rem esse in loco, habetur formalitèr per vbi, quod etiam rem vbicatam supponit in prioritate naturæ, seu causalitatis.

Obijciunt tertio; quando res est successiua, potest se ipsa tollere indifferentiam ad coexistendum diuersis partibus ab alia re permanente, quin in illa re permanente sit aliqua mutatio, vt patet in arbore iuxta aquas plantata, quæ eadem immota manens, iam his, iam illis aquis responder, ergo similiter si ponantur res, & tempus extrinsecum, iam tollitur indifferentia rei ad existendum, & durandum suè in hoc, suè in illo tempore.

Respondeo negando consequentiam: quia magna in hoc ar-

gumento committitur Aequinocatio, & Aduersarij supponunt quod deberent probare, scilicet, quod sit res, & instans, in quo dicatur durare; res enim non habet instans; nisi per durationem; sicuti neque habet locum, nisi per ubi; quare eodem argumento posset probari, non dari ubi; nam supposito vno tantum loco extrinseco, sicuti vnum supponitur instans statim intelligitur ablata indifferentia rei ubicatae in ordine ad locum; ideo ut Argumentum propositum viui habeat, & efficaciter probet, facienda est praecisio ab omni tempore, qua praecisione facta, sine dubio intelligitur existentia rei indifferentis ad existendum siue hoc, siue illo temporis instanti, quae indifferentia tollitur per durationem.

Ad instantiam de Arbore, disparitas est clara, quia arbor illa per diuersas vicationes correspondet diuersis partibus aquae, non ergo manet illa arbor inuariata, licet maneat eodem modo situata.

Obijcies quod, optimè potest tolli ea indifferentia rei ad existendum potius in hoc instanti, quam in alio per actionem sui productiuam, aut conseruatiuam, ideo enim res in hoc instanti determinato existit, quia in hoc instanti est producta, vel conseruata à causa secunda, seu à prima; ergo superflue additur modus durationis. Quod argumentum praesertim urget in nostra sententia, qui volumus effectum esse hunc, quia est productus ab hac causa in his potius circumstantijs loci, & temporis, quam alijs, ergo quilibet effectus, & res quilibet respicit determinatè hunc locum, & hoc tempus.

Respondeo: per actionem productiuam, & conseruatiuam tolli indifferentiam, quam habet res ad existendum siue in loco, siue in tempore; tolli, inquam, effectiue, non formaliter, quia adhuc deberet admitti modus durationis, per quem formaliter ea indifferentia tollatur; statim ergo, ac res producit, aut conseruatur, emanat ab illa modus durationis, per quem formaliter constituitur in loco, & tempore determinato.

Obijcites quintò: in vna, eademque re sunt plures entitates, vel ergo tot debent poni modi durationis, quot sunt entitates, vel vniens sufficit modus durationis, neutrum dici potest, ergo non primum, quia vna sufficit quantitas ad quantificandas omnes entitates vnius, eiusdemque rei, ergo vnica sufficere videtur duratio; ex alia parte non videtur sufficere vna duratio, quia vnus modus non potest diuersas entitates modificare; ergo

ad hoc, ut plures entitates durent, plures debent poni durationes.

Respondeo: non sufficere vnam durationem; disparitas inter quantitatem, & durationem est, quia quantitas recipitur in materia, quæ vna est semper in vna re; at duratio recipitur in existentia rei, vnde sicuti in vna re sunt plures essentiae, ita quoque sunt plures existentiae, & consequenter plures durationes.

Obijcies sextò: si darentur duratio distincta à re permanente, putà ab Angelo, vel talis duratio esset successiva, vel permanens, & tota simul: non secundum, quia sequeretur, Angelum habentem talem durationem, ita necessariò existere per tantum, & tantum tempus, ut nequeat tali tempore à Deo destrui, & annihilari, si enim duratio Angelica essentialiter faceret coexistere Angelum per horam, per totam illam horam, Angelus non posset destrui, quia à Deo rei essentia non potest tolli, hoc autem videtur absurdum, & maximum inter præiudicium perfecto dominio, quod habet Deus semper omnem creaturam, quia perfectum dominium consistit in eo, quod possit ad libitum Deus disponere de creatura, quò ad illius productionem, & annihilationem, ergo.

Ex alia parte non potest dici, quòd talis duratio sit successiva, & variabilis, sicuti enim res successiva non potest durare per durationem permanentem, ita res permanens non potest durare per durationem successivam; imò sequeretur, ut volebant aliqui ex Antiquis, omnia esse in continuo motu, & fluxu æquè enim res successivæ, ac permanentes continuò fluere, & variarentur; denique existentia rei non variatur, aliàs variaretur etiam rei productio, & conservatio, ergo nec variatur duratio, quæ in existentia recipitur.

Fateor tamen data hac duratione successiva, & fluente, optimè saluari perfectum Dominium Dei suprà talem creaturam, quia posset Deus ad libitum illam destruere, & annihilare.

Respondeo, quòd licet cum *D. Bonau. in 2. d. 2. ar. 1. q. 3.* plures doctissimi Philosophi defendant durationem Angeli, verbi gratia, esse variabilem, & successivam iuxta varietatem, & successionem temporis, cui Angelus coexistit per durationem; adhuc ramen sustineo; Durationem Angeli esse permanentem; quod sanè non derogat perfecto dominio Dei, quia in tantum talis Angelus, vel alia creatura non posset ad libitum destrui à Deo,

à Deo , inquantum ipse Deus ex mera sui liberalitate voluit tali creaturæ dare potius hanc durationem , quàm aliam ; unde talis creatura necessariò per tantum , & tantum tempus existeret, necessitate consequenti, & quæ dependet ex libera , atq; spontanea voluntate Dei .

LECTIO XV.

Quomodo res incipiant, & desinant .

PRO complemento huius disputationis explicandum remanet, quomodo res incipiant , & desinant . Cæterum , rem incipere , est rem transire de non esse ad esse , sicut è contrà desinere , est transire de esse ad non esse ; assignandus, & explicandus remanet modus, quo res incipiant, & desinant . Et quia res aliæ sunt permanentes , aliæ sunt successivæ , diversus erit modus incipiendi , & desinendi in rebus permanentibus , ac successivis .

Auctores ergo , qui admittunt indivisibilia in continuo , & indivisibilia , seu instantia in Tempore , assignant duos modos incipiendi , & desinendi tam in rebus permanentibus , quàm in successivis .

Docent ergo primò . Res permanentes incipere intrinsecè , & desinere extrinsecè ; incipere intrinsecè est incipere per primum sui esse, itaut valeat dici; nunc primò res est , seu in hoc instanti primò res est, immediatè antea , seu in instanti immediato res non erat. Similiter res permanentes desinere extrinsecè, idest, desinere per ultimum sui non esse , itaut valeat dici ; nunc ultimò res non est, immediatè antea erat, seu in hoc ultimo instanti res non est, at in instanti immediato erat.

Docent secundò, res successivas incipere , & desinere extrinsecè : incipere extrinsecè, idest, incipere per ultimum sui non esse, itaut valeat dici, nunc ultimò res non est, immediatè post erit, seu in hoc ultimo instanti res non est, in instanti, seu tempore immediatè sequenti erit : desinere verò extrinsecè, idest, desinere per primum sui non esse, itaut valeat dici , nunc primò res non est, immediatè antea erat, seu in hoc primo instanti res non est, in instanti immediatè antecedenti erat.

Ità discurrunt *Greg. in 2. d. 17. qu. 2. art. 2. Ruuius 6. Phys. tract. de Incep. & Desit. rerum Mafius c. 10. sect. 2. qu. 10. Ferrarien. 3. contr. gent. c. 65. §. utrum autem Sotus 6. Phys. qu. 3. Toletus qu. 4. Conimb. lib. 8. c. 8. q. 2. art. 5. & 6. Pererius lib. 14. c. 9. Compluten. disp. 27. qu. 1. per totum, & alij tùm Antiqui, tùm Recentiores apud ipsos.*

At verò illi Auctores, qui omninò indiuisibilia impugnant, & reiiciunt, diuerso modo philosophantur, & discurrunt. Volunt, omnia incipere intrinsecè, & desinere extrinsecè; incipere intrinsecè, quia primo sunt, desinunt extrinsecè, quia primò non sunt; est tamen aliqua differentia inter entia permanentia, & successiua, quia entia permanentia, vt forma substantialis, verbi gratia, aut etiam res spiritualis, vt anima rationalis, incipit tota simul, itàut verum sit, dicere; nunc primò tota res est; entia verò successiua, vt motus, incipiunt successiue, & per partes, itàut in prima parte temporis, quo motus incipit, existat tantum vna pars motus.

Ità discurrunt *Franciscus. Le Reès hic disp. 7. ar. ult. Auerſa 1. tom. Philos. qu. 30. sect. 1. & 2. Arriaga disp. 16. sect. 12. & alij plures apud ipsos.*

Conclusio sit. Res siuè permanentes, siuè successiue incipiunt intrinsecè per primum sui esse, & desinunt extrinsecè per vltimum sui esse, itàut res permanens tota simul incipiat, & desinat, res verò successiua incipiat, & desinat per partes.

Probatur Conclusio primò, quia: ità clariùs, & explicatur, & intelligitur, quid sit rem incipere, & desinere, quàm in opposita sententia, cuius Auctores rem alioquin facillimam, obscurissimis terminis implicant, & confundunt.

Probatur secundò quia: si res successiua, putà motus, verbi gratia, inciperet extrinsecè, nimirum in eo instanti, in quo verum est dicere, nunc nondum est motus, sed immediate post erit, sequeretur, quòd motus inciperet esse, & non inciperet esse; quod est absurdum, & inuoluens contradictionem; sequela probatur, quia motus inciperet esse ex suppositione; probo, quòd non inciperet esse, quia reuerà in illo instanti, dicitur de motu, nunc primò non est, sed nondum est, ergo iam non incipit esse, quod enim incipit esse, aliquo modo est, & non potest dici, quòd non sit, quia particula, non, vtpotè malignantis naturæ, & vniuersaliter distribuens, tolleretur omne esse, atque adedò etiam pri-

primum esse à motu, quo dicitur incipere intrinsecè per primum sui non esse.

Similiter si motus desinit extrinsecè, desinit, itàut sit verum dicere, nunc ultimò est; quod etiam contradictionem inuoluit; nam si res, & motus desinit, nullo modo est, desinere enim, est non esse, ergo si motus desinit, iam non est; Sed per te ità desinit, vt quando desinit, dicatur etiam esse, ergo est, & non est, quod est omninò impossibile, & manifestam inuoluens contradictionem,

Dices, Motus non habet primum sui esse, nec ultimum sui non esse, quia in sententia negante indiuisibilia, motus constat ex partibus infinitis, quarum non potest assignari prima, & ultima, prima, quæ sit, & ultima, quæ non sit.

Respondeo: in motu non posse assignari primum, & ultimum, quod sit indiuisibile; benè tamen posse assignari primam, & ultimam partem, quæ sit diuisibilis in alias, & alias; sicuti & in ligno quadripalmari, quod etiam constat ex partibus infinitis, potest assignari primus palmus, & ultimus, scù quartus palmus.

DISPV TATIO V.

DE MOTV.

Complectimur hac Quinta Disputatione omnia, quæ de Motu tractat Philosophus Tertio, Quinto, Sexto, Septimo, & Octauo Physicorum Libro. Nolo morari in probanda existentia motus, sensibus cateroquin obuij, & euidentissimi; ea enim, quæ sensibus patent, in Quæstionem vocanda non sunt; sicuti nec ea, de quibus, qui dubitant, aut controuertunt, digni sunt pœna, ita monet Aristoteles 1. Top. cap. 9. Non oportet omne problema, & omnem positionem considerare, sed quam dubitabit aliqui ratione indigentium, & non pœna, vel sensu; nam dubitantes, utrum oporteat Deos colere, vel parentes honorare, pœna indigent; Qui verò utrum nix alba, an non, sensu. Hinc prudenter Diogenes, Zenoni existentiam motus localis

impu-

impugnanti , non aliter , quam ambulando respondit . Quare cum Arist. 3. Phys. c. 3. t. 22. concludo . Vniuersa censere , quiescere , & huius querere rationem insum possibiendo sensum , imbecillitas est profectus mentis , ac hebetudo . Imò negare motum , docet Arist. 8. Phys. c. 3. t. 22. non solum est aduersus Philosophum naturalem , sed aduersus etiam omnes scientias , ut simpliciter dicam , opinionisque omnes , propterea quod omnes motu utantur .

LECTIO I.

Motus definitur , & diuiditur .

A Ristoteles 3. Phys. t. 6. sic definit motum , *Motus est actus entis in potentia , prout in potentia* . Definitionem hanc Philosophi omnes Recentiores , & Antiqui recipiunt , & mirantur , adeo ut *Simplicius* dixerit hanc inter alias ab Aristotele excogitatas definitiones , accuratam esse . & mirando spiritu prolatam . Sed hanc motus definitionem mirabitur , qui voluerit , inquit , *le Reès disp. ult. art. 2. ego nec mirari possum , nec probare . si quidem quantum perplexa sit , nemo non videt ; Adde Interpetrum in eius expositione dissidium* .

Consentio cum *le Reès* , quia verè talis definitio mihi semper visa est obscura , itaut variis Interpetrum & Recentiorum expositionibus , & declarationibus vix ad clarum , & dilucidum sensum trahi potuerit , ut videre est apud *Auersam hic quest. 26. sect. 9* .

Placeret alteram Motus definitionem , quam ibidem Philosophus adducit , recipere : *Motus est actus Mobilis , quatenus Mobilis , idest , Motus est actus quidam , seu quædam tendentia ; qua Mobile tendit ad aliquem terminum acquirendum ; atque ita nomine actus venit tendentia quædam ad terminum , seu quædam acquisitio termini , seu quædam veluti Via ad terminum ; nomine Mobilis venit subiectum Motus , & id , in quo Motus recipitur ; sicuti è contrà nomine Mouentis venit causa efficiens motum* . Sæpè idem subiectum , quod recipit motum , causat quoque , & efficit motum , nam Petrus , verbi gratia , qui localiter motu progressiuo mouetur , & causat eum motum progressiuum , & in se quoque tan-

quam in subiecto recipit talem motum, ideòq; est Mouens, seu Motor, & Mobile.

Verum quia, Motus specificatur à termino, ab eoq; accipit distinctionem, & diuersitatem, ideò quatuor assignantur species motus, sicuti quatuor sūt diuersi termini acquisibiles per motum; Nam vel per motum acquiritur forma substantialis, & sic est Generatio, seu mutatio substantialis, cui opponitur corruptio, quæ est deperditio formæ substantialis. Vel acquiritur quantitas, & sic est augmentatio, quæ nihil est aliud, quàm acquisitio quantitatis. Vel acquiritur qualitas, & sic est alteratio, quæ est acquisitio qualitatis, vel denique acquiritur locus, & sic est latio, seu motus localis, qui est omnium euidentissimus, reliquis prior, & certissimus Naturæ Index.

Iterum motus localis, vel est Circularis, quo mouentur Coeli, & Altra; vel est rectus; Hic iterum subdiuiditur, ità ut alius sit rectus sursum, & hoc motu mouentur corpora leuia, vt ignis, & Aer. Alter est motus rectus deorsum, & hoc motu mouentur corpora graua, vt Terra, & Aqua.

Cæterum, licet nomine motus veniat etiam mutatio, tamen propriè, & in rigore, aliud est motus, & aliud est mutatio; Motus enim est successiuus, mutatio est instantanea, non quia ipsa fiat tota simul, & non successiuè, nam, vt dixi, *Disp. 1. Lect. 8.* Mutatio includit ad minus duo instantia, primum, in quo vltimò sit priuatio, & alterum, in quo sit forma; quare dicitur esse *Instantanea*, ratione termini, idest, ratione formæ substantialis, quæ tota simul, & indiuisibiliter acquiritur. Reliqui motus sunt successiuè, quia eorum termini, putà, Quantitas, Qualitas, & Locus acquiruntur successiuè, & per partes.

An verò successio sit essentialis motui, an accidentalis; consequenter ad ea, quæ superiori Lect. dicta sunt, tempus, nimirum, esse quid realiter distinctum à motu, concludo, & dico; successiōnem esse prædicatum accidentale motus, non essentialē.

Probat; quia eadem est illuminatio specie, siuè fiat successiuè, & per partes, siuè fiat tota simul, & in instanti, quia idem lumen produciunt, siuè totum simul, siuè per partes post partes producantur, ergo successio est prædicatum accidentale motus, non essentialē.

Rursus ratione principij, à quo fit, & elicitur motus; alius est motus naturalis, qui fit ab intrinseco, & nativo principio, vt motus deorsum Terræ, & Aquæ; alius est praternaturalis, qui fit à prin-

principio extrinſeco; non tamen reluctantē, aut contranitente paſſo, ſed potiùs inclinante, vt cū lapis deorſum proijcitur; alius eſt violentus, qui fit à principio extrinſeco, ſed tamen reſiſtente, & contranitente paſſo, ſeu ſubieſto talis motus, vt cū lapis ſurſum proijcitur.

Denique motus alius eſt directus, alius eſt reflexus: Motus directus fit, quando recta linea procedit mobile, & in obſtaculum non impingit; Reflexus motus eſt, quando mobile impingit in aliquod obſtaculum, & reſilit, ſeu retrocedit, vt cū pila impingit in parietem, & ab illo retrocedit, & reſilit.

LECTIO II.

Vnitas ſpecifica Motus.

Quia Motus eſt Ens incompletum, non aliam habet Vnitatem ſpecificam, niſi incompletam; Queritur, à quonam eam accipiat, & vnde poſſimus cognoscere, cuius ſpeciei ſit motus, quem elicit Mouens, ſeu Motor.

Sunt autem quatuor illa, ex quibus ſpecies motus deſumi po-
teſt; nimirum, Terminus à quo; Mobile, ſeu ſubieſtum motus;
Mouens, Motor, ſeu principium motus: Denique terminus, ad
quem; Prima ſententia deſcendit, vnitatem ſpecificam motus de-
ſumi à termino, à quo, & à termino, ad quem, ita *Albertus Sa-*
xon. 5. Phyf. q. 6. Aſtudillo ibidem, Burleus q. 1. & plures Mo-
dorni, quos ſuppreſſo nomine citat Ruuius hic c. 2. q. 1.

Sed contra eſt; quia duplex aſſignatur terminus, à quo, nempe
terminus negatiuus, ſeu priuatiuus, & eſt carentia formæ per
motum producendæ, alter terminus poſitiuus; nimirum forma
poſitiua; à qua mobile tranſit per ſui motum ad aliam formam
poſitiuam, Terminus negatiuus, ſeu priuatiuus eſt terminus per
ſe, formalis, & eſſentialis motus, at terminus poſitiuus per acci-
dens ad motum requiritur. Exempli gratia, dealbatio, per
quam paries de nigro fit albus; habet duplicem terminum à quo,
nempe poſitiuum, qui eſt nigredo, à qua tranſit ad albedinem,
ſit enim paries de nigro albus; eadem dealbatio habet alterum
terminum negatiuum, ſeu priuatiuum, & eſt carentia albedinis;
tranſit enim paries de non albo ad eſſe album.

Hoc poſito ſic argumentor; Terminus poſitiuus non poteſt

dare unitatem specificam motui, quia per accidens est ad motum, & æque fiet motus, siue terminus positivus detur, siue non detur in motu; terminus privativus semper est idem in quocumque motu, ergo neque terminus à quo privativus potest dare speciem motui.

Respondebis; dealbationem esse transitum non à carentia, quomodocumque, sed à carentia albedinis; quare licet carentia, ut sic, eadem sit respectu cuiuscunque motus, tamen talis carentia diversa specie est iuxta diversitatem formæ, seu termini, cuius est carentia; Porro dealbatio, non est motus à carentia, ut sic, ad albedinem, sed est motus à carentia albedinis ad albedinem, ergo etiam terminus à quo negativus, seu privativus concurrat ad specificam unitatem motus.

Sed contra est: quia carentia albedinis, si quam habet diversitatem ab alia carentia, habet ratione termini ad quem, & ratione formæ, cuius est carentia, ergo in se ipsa, & absolute spectata, eadem est in omni motu, & consequenter non potest dare motui unitatem specificam.

Secunda sententia defendit motum specificari à termino ad quem, sed huius sententiæ Auctores divisi sunt inter se; nam aliqui volunt, Motum specificari à termino ad quem remoto, & ultimo, verbi gratia, motus localis specificatur à loco extrinseco, qui est eius terminus ultimus, & remotus, non ab Vbi intrinseco, quod est eius terminus proximus, & immediatus; ita *Paulus Venetus, & Toletus, relati ab Aversa qu. 26. sect. 12.* Alij volunt motum specificari à termino proximo, & immediato, atque adeo motum localem specificari ab Vbi intrinseco, calefactionem à calore; ita *Aversa loco cit. Franciscus Le Reës Disp. ult. ar. 4. Ruuius lib. 4. c. 6 q. 1. Sotus q. 3. Comimbrius. q. 1. Valesius Controu. 25. cap. 8. & communiter alij Moderni.*

Sed contra hanc sententiam est, quia non sufficienter explicat adæquatum specificatum motus, non enim à solo termino ad quem specificatur motus; Nam ad eandem formam substantialem possunt terminare Creatio, & Generatio substantialis, sed motus ab actione non distinguitur, ergo tam possunt esse duo specie motus, quamvis habeant eundem terminum ad quem, ergo aliunde petenda est specificatio motus, & aliud huius specificationis principium debet assignari. Et sanè in casu posito, Creatio, & Generatio specie differunt, quia Creatio est independens à subiecto, Generatio verò à subiecto dependens; ergo

etiam subiectum concurrir ad specificationem motus.

Contra secundò quia : Intellectio elicit a Angelo specie differt ab intellectione elicit a intellectu humano, quamuis utraque intellectio supponatur habere idem obiectum nedum materiale, sed etiam formale, ergo etiam motus localis elicitus à potentia motiua Angeli, erit specie diuersus à motu locali elicitus à potentia motiua hominis, quamuis uterque motus supponatur habere eundem terminum ad quem, tendere ad eundem locum, & habere idem specie Vbi intrinsecum, ergo inter alia specificatiua motus debet enumerari mouens, seu motor, & principium elicitiuum motus.

Tertia sententia, hactenus relatis probabilior, asserit, adæquatum specificatiuum motus esse tria, nimirum; Terminum ad quem, mobile, seu subiectum, motorem, seu principium elicitiuum motus; Quæ doctrina sic est intelligenda, vt singula ex his sint specificatiuum inadæquatum, tria simul sumpta sint specificatiuum adæquatum. Ità *Auers. loco cit. Dico tertio. Arriaga Disput. 12. sect. 1.*

Conclusio. Adæquatum specificatiuum motus sunt terminus ad quem, subiectum, & principium motus.

Probatur primò ex impugnatione aliarum sententiarum, quia adæquatum specificatiuum motus non est solus terminus ad quem, neque solum subiectum, neque solum principium, ergo sunt tria hæc simul, idest, terminus, subiectum, & principium.

Probatur secundò quia ita se habet motus respectu termini, ad quem tendit, & principij, à quo fit; sicuti se habet actus respectu obiecti, quod attingit, & potentie, à qua elicitur, Motus enim est quidam actus, vt ex eius definitione patet; sed actus habet pro sui adæquato specificatiuo non solum obiectum, sed etiam potentiam, à qua elicitur; seu (vt alij loquuntur) non solum Actus specificatur à ratione formali, quæ, hæc enim se tenet ex parte obiecti, sed etiam à ratione formali, sub qua, quæ se tenet ex parte potentie, & solet dici diuersa attingibilitas, qua potentia obiectum attingit, vt in Disp. de Anima, vt in proprio loco explicabimus, ergo; Imò hanc doctrinam aperte docent plures graues Theologi de actu naturali, & supernaturali, quos volunt habere idem obiectum, seu motiuium, & tamen specie differre ratione diuersi principij, & diuersæ attingibilitatis; ità *Coninch. de Moralitate actuum disp. 5. d. 1. 2. & 3. Granadus. p. 1. disp. 1. sect. 4. num. 17. Molina in Concordia Card. Ioannes de Lugo in*

Manuscriptis, & alijs; ergo etiam motus sumit suam unitatem specificam non solum à termino ad quem, sed etiam à principio, à quo fit, & producitur, quia idem terminus ad quem potest diuerso modo attingi, ad eundem enim locum extrinsecum diuerso modo tendit mobile, quod mouetur motu recto, & mobile, quod mouetur motu circulari; nam per motum rectum acquiritur de nouo totus Locus, per motum verò circulem acquiritur de nouo à mobile pars loci; cæteroquin in eodem semper loco reuoluitur mobile, quod circulariter mouetur, paret in motu Cœli, quod propterea dicitur moueri secundum partes, non secundum se totum.

Obijciens primò; subiectum motus idem est in omni motu; subiectum enim motus est materia prima, ergo subiectum non concurret ad specificationem motus; sicut neque concurret terminus à quo priuatiuis, quia idem est in omni motu.

Respondeo, negando antecedens; Creatio enim in materia prima non recipitur, nec ab illa dependet, & motus localis Animæ rationalis separatæ, aut Angelî non recipitur in materia prima, ergo iam non omnis motus recipitur in materia prima, ac proinde non idem est subiectum omnium motuum. Imò in sententiâ Thomistarum asserentium, subiectum accidentiam esse compositum, nullus motus recipitur in materia prima, quia omnis motus, sicuti & omnis alia forma accidentalis in composito recipitur.

Obijciens secundò; si terminus sit specie diuersus, quamuis idem sit principium motus, motus tamen est diuersus specie, calefactio enim, & frigefactio specie distinguuntur solum ex eo, quod per calefactionem producitur calor, per frigefactionem verò producitur frigus, & quia calor, & frigus specie distinguuntur, ideo & calefactio specie distinguitur à frigefactione.

Respondeo; quòd quia diuersitas & distinctio comparatur malo, & unitas bono; sicuti malum habet ex vnicò defectu, & bonum ex integra causa, ita ad unitatem specificam motus requiritur unitas specifica termini ad quem, subiecti, & mouentis; ad distinctionem verò, & diuersitatem specificam sufficit diuersitas, & distinctio specifica vnius ex his hinc est, ut si ante sola diuersitate specifica termini ad quem, diuersus sit specie motus.

Obijciens tertio: ex *Arist. 5. Phys. c. 4. §. 31. & lib. 7. c. 1. §. 5.* Motus specificatur à termino ad quem, ergo non specificatur à principio, à quo fit.

Respondeo in primis argumentum ab auctoritate negatiue non valere, vt eruditè obseruat *Sonc. 8. Met. q. 1.* ex eo enim; quòd *Arist.* non asserat, motum specificari à principio, seu à motore, nò licèt inferre, quòd negauerit motum à principio, & Motore specificari.

Præterea dico: Aristotelem, & cùm eo communiter alios Philosophos contradistinguere motum naturalem à violento ratione principij, à quo fiunt, & ratione subiecti, in quò recipiuntur, vt hic *Leff. 1.* ostendit; nam motus violentus fit à principio extrinseco cū renitètia subiecti, seu mobilis; At verò motus naturalis fit à principio extrinseco, nullam conferente viam passio, idest, siue renitètia subiecti, seu mobilis ad talem motum; Cohærenter ad hanc Doctrinam *Arist. 1. Celi c. 4.* ponit Cælum esse corpus diuersæ omninò speciei, & quintæ cuiusdam substantiæ ab omni corpore sublunari, quia habet motum circulaem, qui est diuersæ omninò speciei tum à motu grauium, & leuium, tū etiam à motu progressiuo Animalis, ergo diuersitas specifica motus arguit diuersitatem specificam etiam subiecti, & mobilis recipientis motum.

Deniq; elementa probantur esse corpora specie diuersa, quia habent motum specie diuersum; Leuia enim, vt Ignis, & Aer, moventur sursum; Graui, vt Terra, & Aqua moventur deorsum, ergo à diuersitate specifica motus tanquam à signo, & à posteriori desumitur specifica diuersitas mobilis, & subiecti.

Dices, Idem specie calor est productus à Sole, & ab igne, vt *Disp. 2. Lect. 2.* dictum est, ergo ex diuersitate specifica principij, & moventis, vti sunt Sol, & ignis in casu adducto, non desumitur specifica diuersitas motus.

Respondeo. Solem, & ignem esse idem principium mouens formaliter, & in ratione virtutis motiue, & calefactiue, esto distinguantur entitatiuè, & materialiter.

Patet ergo non solum à termino ad quem, à mobili, & subiecto, sed etiam à motore, & principio motus desumendam esse eiusdem motus specificam diuersitatem.

Replicabis: Motum violentum, & naturalem, sicut etiam rectum, & circulaem; rectum sursum, & rectum deorsum differre accidentaliter, non essentialiter, & specificè: aut ad summum distingui specificè, non specie Logica, sed Phylca, qua ratione differunt homo albus, & homo niger.

Sed contra est, quia, vt bene vrget *Ruuius 4. Phys. c. 6. qu. 1.*

n. 35. hæc responsio stiuola est, nec ullus classicus Auctor tali modo loquendi vsus est, vt dixerit, hominem album specie physica differre à seipso, vt nigro; quis enim differentiam mere accidentalem appeller specificam, & essential'em?

Contrà secundò; quia talis responsio manifestè est contrà *Aristotelem*, qui 8. *phys.* c. 8. docet motum rectum sursum, & motum reflexum deorsum non continuari, sed potius dari quietem in puncto reflexionis subdens rationem; quæ specie distinguuntur, non possunt continuari; at si motus sursum, & deorsum differrent specie accidentaliter, opinisè possent continuari, ergo qui dicit, motum sursum, & deorsum accidentaliter differre, contradicit *Aristoteli*.

LECTIO III.

Vnitas Numerica Motus.

Communis sententia cùm *Arist.* lib. 5. *Phys.* c. 4. r. 34. docet, unitatem numericam motus esse desumendam, ex unitate numerica mobilis, seu subiecti; ex unitate numerica termini ad quem, & ex unitate numerica temporis; quare tunc motus est vnus numero, quando recipitur in vno subiecto, habet vnum numero, terminum ad quem, & fit vno tempore.

Raphaël Auerisæ s. I. *Philos.* q. 26. sect. 9. discedens à communi sententia distinguit in motu duo, nimirum, entitatem motus, & eius continuitatem; concedit continuitatem motus dependere à tempore, & consequenter motum vnum continuatiuè, si fiat vno tempore, & non interrumpatur; at entitatem motus ponit esse independentem à tempore, atque adeò motum esse vnum numero, non dependere à tempore.

Hanc *Auerisæ* Doctrinam non approbo, quia licet entitas motus ab eius continuitate realiter distinguatur, sicuti entitas quælibet permanens distinguitur à qualitate permanente; tamen physicè à parte rei, nō est reperire entitatem motus absque continuitate eiusdem, ergo motus non est physicè vnus numero, nisi vnum sit tempus, & consequenter vnitas numerica motus desumenda est etiam ab unitate temporis.

Replicabis; entitas motus non dependet à tempore, sicuti neque à loco, si motum localem excepias; ergo erit idem numero motus

motus entitatiuè suæ fiat hoc tempore, suæ alio.

Sed contrà est quia: ex dictis *Disp. 2. Lect. 15.* Quilibet causa est ex sui natura determinata ad producendum hunc potius numero effectum, quàm alium, in his potius circumstantiis loci, & temporis, quàm alijs, ergo iam quilibet effectus etiam entitatiuè consideratus, dependet aliquo modo ab his numero circumstantiis loci, & temporis; & consequenter vnitas numerica motus desumenda est etiam ab vnitate numerica temporis.

His ità stabilitis, & explicatis. Principalis difficultas, & Controversia est; An ad vnitatem numericam motus concurrat etiam vnitas numerica motoris, seu mouentis.

Conclusio est. Ad vnitatem numericam motus præter vnitatem numericam mobilis, termini ad quem, & temporis, requiritur vnitas numerica motoris, seu mouentis.

Ità *Auersa loco supracit. 5. Dico primo. Peterius lib. 13. c. 8. ad 2. Conimbr. 5. Physic. cap. 4. qu. 5. ad primum, & alij Moderni, quos suppresso nomine citat Ruuius lib. 5. Phys. c. 4. qu. 2.*

Contrà *Ruuium loco cit. num. 42.* & omnes illos, qui vnitatem numericam motus desumunt tantum ex illis tribus, videlicet, vnitate numerica termini ad quem, mobilis, & temporis; His adde *Complutenses hic disp. 23. qu. 2. §. 3. Auersam, ubi supra. Franciscum Le Reës Disp. ult. art. 4.*

Probatur Conclusio primò auctoritate *Arist. lib. 8. Phys. t. 49.* At vero si continuus est motus, unus est; unus autem si & ab uno mouente, & unus sit, quod mouetur, si enim quoddam aliud, & aliud mouebis, non continuus totus motus, sed consequenter eris.

Probatur secundò Conclusio: quia motus idem est, ac actio, sed vna numero, actio non potest esse, nisi ab vno numero agente, seu motore, actio enim seipsa à tali numero agente dependet, ergo.

Confirmatur: quia ex dictis *Disp. 2. Lect. 16.* effectus productus ab hac causa, non potest idem numero produci ab alia, ergo à fortiori motus dependens ab hoc motore, seu mouente, non potest fieri ab alio, quia magis dependet motus à motore, seu mouente, quàm effectus, motus enim se ipso, & non per aliquid aliud dependet à motore, sed effectus à motore, seu agente dependet mediaturè, & per motum, seu actionem, ergo.

Denique quia mouens, seu motor concurret ad vnitatem specificam

efficaciam motus, ergo & ad eius unitatem numericam, Consequenter tenet à paritate rationis. Antecedens probavi Lect. superiori.

Obijcies primò: si aliquid corpus viuum à loco superiori descendens in medio aere moriatur, eodem motu continuo mouebitur vsque ad terram, non enim potest quiescere in aere, quia grane est, ergo iam erit vnus, & idem motus continuus; at mobile, seu subiectum motus est diuersum specie, nè dum numero, nimirum corpus viuens, & mortuum, ergo ad unitatem numericam motus non concurrit vnitas numerica mobilis, seu subiecti.

Confirmatur quia: si detur Arbor, cuius vnà pars sicca sit, altera viridis, mouebitur eodem numero motu, & tamen pars sicca, & viridis specie differunt, nedum numero, ergo iam vnus numero est motus, quamuis non sit vnum numero mobile, seu subiectum.

Respondet; in assignatis casibus semper esse idem subiectum inhesionis, & radicale, quod est materia prima; esto subiectum denominationis, & compositum, Varietur, & numero diversificetur. *Ruius, & alij Thomista hic*, qui subiectum accidentium ponunt compositum Respondent huic Argumento, non esse vnum numero motum; quia discontinuatur, non quidem per interruptionem aliquam, aut moram temporis, sed per extrinsecam mutationem corporis, quod de viuo fit mortuum; & similiter arbor, cuius pars de viridi fit sicca.

Obijcies secundo: Tempus accipit unitatem à motu, tempus enim est intrinseca duratio motus, ergo tempus non potest concurrere ad unitatem motus, aliàs concurreret ad propriam sui unitatem.

Respondet. Tempus intrinsecum, seu intrinsecam durationem motus accipere unitatem à motu: at tempus extrinsecum non accipit à motu, sed dat unitatem motui, ideòque definitur numerus, & mensura motus secundum prius, & posterius.

Obijcies tertio: subiectum mouetur, seu mutatur de calido in frigidum, & hoc per vnum numero motum, sed talis motus habet duos terminos, ad quos, nempe, frigus, quod augetur, & intensitur, & calorem, qui remittitur, & diminuitur, ergo vnitas numerica motus non desumitur ab unitate numerica termini, ad quem.

Confirmatur quia, si lapis à concavo Lunæ descendens magno

quo impetu pertingeret ad Centrum Terræ, & facto foramine, rediret ad Lunæ concavum, iam erit vnus motus, neque enim talis lapis in Centro Terræ quiesceret; & tamen habet duplicem terminum, ad quem, nempe concavum Lunæ, & Centrum Terræ.

Respondet; in primo casu ibi esse duos motus, vnus est acquisitionis, alter deperditionis, quia per primum motum acquisitionis acquiritur frigus, per secundum deperditur calor: In secundo casu de motu lapidis, dico; vel esse duos motus, & lapidem in Centro Terræ aliquantulum quiescere; vel si lapis ille in Centro non quiescit, iam continuaretur motus, atque adeo esset idem natus, & continuatius; haberet enim vnum terminum ad quem, nempe concavum Lunæ, à quo recessit, & ad quem supponitur redire.

LECTIO IV.

Velocitas, & tarditas Motus.

INter alia motus accidentia primum locum tenent velocitas, & tarditas, sicut enim tempus dicitur longum, & breue, multum, & paucum, ita motus dicitur velox, & tardus ab Arist. lib. 4. Physic. cap. 12. s. 109. Inò si motus inuicem comparentur, vnus alio dicitur velocior, & tardior; Aquila dicitur velocius moueri, tardius Testudo; velocius mouetur Sol, tardius tota figuli.

Difficultas hoc tempore famosa, & grauis est, in quo consistat velocitas ista, & tarditas motus, seu quid formaliter sit, vnum motui esse alio velociorem.

Et sanè communis conceptus, quem habent omnes de velocitate motus, est, quod ille motus dicatur velocior, quo mobile equali, aut minori tempore maius spatium percurrit; hinc Ideo Aquila dicitur velocius moueri testudine, quia Aquila vna parte temporis pertransit duas partes spatij, seu loci, ac testudo vna parte temporis pertransit vnā partem spatij, seu loci; quare id, quod celerius, & velocius mouetur plus magnitudinis in equali tempore transit, aut plus magnitudinis minore in tempore transit. Aristoteles 6. Phys. c. 11. s. 12.

Si ergo Aquila vna parte temporis pertransit duas partes
sp-

spatii, ideòque dicitur celerius, & velocius moueri Testudine; iam ergo vna pars temporis correspondet, & coexistit duabus partibus spatij, seu loci; & consequenter mobile velox, & Aquila dum est in vna parte temporis, simul erit in duabus partibus loci, quod naturaliter impossibile est.

Explicandum est igitur, quomodo fieri possit, vt vnus motus velocior sit, alter verò tardior, absque eo, quòd inde sequatur, idem mobile, Aquilam, verbi gratia, simul esse vno, eodemque tempore in duobus locis.

Primò ergo nonnulli nobiles Recentiores explicant, & componunt velocitatem motus per quasdam morulas, & interruptiones; volunt enim Aquilam eodem tempore percurrere maius spatium, & acquirere maiorem locum, quàm acquirat Testudo, non quia Aquila vno, & eodem tempore sit praesens duplici loco, (id enim impossibile est) sed quia motum non interrumpit per quasdam morulas, id est, quia in pertranscunda vna parte spatij non infumit duas partes temporis; è contrà Testudo tardius mouetur, quia interrumpit motum per morulas, & infumit duas partes temporis in pertranscunda vna parte spatij, moratur enim, & aliquantulum quiescit, atque adeò interrumpit motum Testudo, dum mouetur ad acquirendam vnam partem spatij, & ideò infumit duas partes temporis in illius acquisitione. Hinè est, vt ille motus velocissimus sit, qui nullas habet morulas, ille magis, vel minus velox, qui pauciores, vel plures habet morulas; ille tardissimus, qui plures, & plures habet morulas.

Ità discutunt *Arriaga disp. 16. Phys. sect. 11. Quidetur Controu. 17. §. 2.* & pro se citant *Galenum lib. 1. de dignoscendis pulsibus c. 1. Vallesius lib. 3. controu. Medic. c. 8.* Sed ante illos ità sunt philosophati *Democritus, & Epicurus, vt refert Alex. 2. Nat. q. c. 1. Auic. 2. suff. c. 11.*

Sed contrà hunc modum explicandi velocitatem, & tarditatem motus primò est: quia qui per morulas tarditatem motus explicant, necessariò coguntur negare cùm Zenone motum, ergo.

Pròbatur antecedens, quia qui tarditatem per morulas explicant, cùm Zenone tempus ex punctis, seu momentis componunt, vt videre est apud Recentiores loco vbi suprà; ergo cùm eodem Zenone debent motum negare, Zeno enim semper sibi constans, & tempus ex punctis composuit, & motum negauit; reuèrà enim connexa sunt ista duo, Tempus ex punctis componere,

nere, & motum negare, vt apertè concessit *Arist. 6. Phys. c. 9. 1. 80.* vbi respondens argumento tertio, & rationi tertiæ, quæ Zeno sibi persuadebat non dari motum, & sagittam quiescere, dum velocissimè fertur; ait. Philosophus, illud argumentum concludere in sententia Zenonis componentis tempus ex momentis, ergo negare motum, & tempus componere ex momentis, connexa sunt adinuicem, & per consequens connexa sunt ista tria, admittere morulas, componere tempus ex momentis, & motum negare.

.. Quod, vt clariùs innotescat, adducamus tertium illud Argumentum Zenonis, & responsionem Aristotelis, Zeno ergo sic argumentabatur; Id, quod mouetur singulis momentis non potest moueri, neque enim potest dari motus in instanti, & momento, momentum enim est indiuisibile, & caret partibus prioribus, & posterioribus, motus autem constat ex partibus prioribus, & posterioribus, ergo non potest dari motus in momento, nec in pluribus momentis, cum ergo tempus ex momentis componatur, non potest fieri motus in tempore, ergo mobile non mouetur, sed quiescit, ergo sagitta, etiam quando videtur velocissimè ferri, non mouetur, sed quiescit.

Aristoteles huic argumento respondet. Valere, & efficaciter concludere in sententia Zenonis admittere tempus componi ex momentis, & consequenter efficaciter concluditur tali argumento negatio motus in sententia admitteute tempus ex punctis componi, vt isti Recentiores admittunt, ergo iam ex niente Philosophi, qui tempus componunt ex momentis, conuincuntur tali argumento ad negandum motum, quia & Zeno tali argumento conuictus, negauit motum.

Audiamus modo verba formalia *Arist. loco cit. Tertia ratio ea est, quæ quiescere dicit sagittam cum fertur, accidit autem id ex eo, quia tempus sumitur ex momentis constare, quod si non dederis, ratio continuè exprabit.*

Probatur secundò idem Antecedens, de quo suprà; quia primum mobile, quia nullas habet morulas velocissimè mouetur per Aduers. Sagitta verò, quam videmus velocissimè moueri, comparatiuè ad primum mobile, tardissimè mouetur, ergo iam sagitta habet innumerabiles morulas, ergo innumerabilibus vicibus quiescit; non ergo mouetur sagitta, etiam dum velocissimè fertur, sed quiescit: Quòd si adhuc sustineas, sagittam mo-

teris; Testudo; quæ tardissimè omnino, imò & motu in infinitum tardiori, & tardiori mouetur, vicibus infinities innumerabilibus quiescet, non ergo movebitur, atque ita iam actum est de motu, nisi velis fortasse, motum, & quietem, motum, & non motum, rem eandem facere.

Dices. Motum Testudinis esse ferè insensibilem; Bene. Sed iam motus, quem omnes hucusque Philosophi, sensibus evidentissimum fecerunt, vix erit sensibilis, aut erit ferè insensibilis.

Vidcant Aduers. quomodo datis morulis, seu vno dato absurdo, quàm multa accidant, vt loquitur *Aristoteles* 1. *Phys.* 1. II. & 1. 23.

Contrà morulas secundo principaliter: quia si Testudo tardius mouetur, quàm Aquila, quia moratur, quiescit, & motum interruptit, ergo iam motus tardus non est vnus numero motus, sed duplex, vnus enim numero motus est, qui est continuus, & ad sensum patet, motum tardum esse continuum; neque enim videmus Testudinem quiescere, & morari, interrompendo motum, ergo contrà sensum est, admittere huiusmodi morulas, & interruptiones in motu tardo. Confirmatur ex *Arist.* 5. *Phys.* c. 3. s. 35. vt motus sit vnus, oportet tempus vnum esse, & non intercapedines fieri.

Respondetis, multa esse, & concedi in rerum natura, quæ sensum effugiant; quamuis ergo hæc morulæ sensibus non pateant, negandæ tamen ob id non sunt.

Bene, sed ea, quæ admittuntur, quamuis sensibus non pateant, non sunt de genere sensibilium; vt Angeli, & substantiæ aliæ etiam materialiæ, nequæ spirituales; at motus, & quies sunt de genere sensibilium, & spectant ad sensibile commune, vidè. *Diogenes* Zenoni neganti motum; respondit ambulando. *Aristoteles* negantes motum recenset in eorum numero, qui sensu indigent, & 2. *Phys.* ridiculum ait, tentare demonstrare naturam, quia per motum sensibus evidentissimum patet, & innotescit; Zeno, qui motum sensibus evidentissimum negauit, sensibilis, & risu excipitur, ergo si verè istæ morulæ sunt aliquid motus tardi, debent sensibus innotescere.

Contrà Morulas tertio principaliter: quia Sol velocissimè mouetur, eius tamen motus tardior est, quàm sit motus primi mobilis, quod omnium citissime, & velocissimè mouetur, sed in velocissimo motu Solis nullæ sunt morulæ, ergo. Minor probatur, quia non est maior ratio, cur Sol dicatur velocissimum sui motum

motum potius interrompere in hac parte temporis, quàm in alia, ergo nunquam motum interrompet.

Respondet *Arriaga loco cit.* Deum determinare, in qua parte temporis debeat Sol qui escere, & motum interrompere.

Sed contrà est: quia motus Solis est motus naturalis, ergo & eius quies est naturalis, & consequenter ab eruditis Philosophis debet talis interrupcionis assignari causa naturalis, & non recurrere ad Deum cùm Anaxagora, & Vulgo.

Præterea: motus Solis, quia circularis, est vniformis, ergo non potest in vna parte temporis quiescere, & in alia moueri, esto motus rectus grauium, & leuium velocior sit in fine, quàm in principio, contrà quòd accidit in motu violento proiectorum, quibus virtus inqressa causatiua motus, quia paulatim, procedendo versus finem, minuitur, & decrescit, consequenter sit, vt motus proiectorum tardior sit in fine, quàm in principio, at in motu Solis, quia circularis, semper est vniformis, & æquè velociter sit in omni sui parte; in hoc enim cōsistere motus vniformitatem docet aperte *Arist. 5. Phys. c. 4. t. 44. cuius enim eadem est velocitas, is est vniformis, cuius verò non eadem est, is est discontinuus 8. phys. c. 9. t. 50. Solus motus circularis vniformis conuincitur ex eo, quòd in motu recto partes propinqua fini celerius mouentur; at in motu circulari, in quo non est finis, sicuti neque principium, quia in eo non est primum, & vltimum, partes omnes sunt eiusdem rationis.*

Contrà Morulas quartò principaliter: quia si in motu darentur morulæ, sequeretur, quòd quando Rota circulariter mouetur, quia partes eius interiores tardius mouentur, quàm exteriores, aliquantulum morarentur in vno instanti, dum exteriores mouentur, ergo iam discontinuantur, & consequenter omnes partes Rotæ discontinuarentur, quod esse falsum ex eo deprehenditur, quia si à centro Rotæ ad illius circumferentiam duceretur linea; hæc mouente se Rota, maneret recta, ergo partes illius Rotæ non discontinuarentur, aliàs illa linea non maneret recta, sed inflecteretur.

Huic Argumento, quod à multis putatur Achilles contrà morulas, non multum fido, quia minus absurdum est, partes Rotæ discontinuari, & illam lineam inflecti, quàm admittere morulas, ergo Aduers. qui admittunt morulas, facilius concedent partes illas discontinuari, & illam lineam inflecti: licet enim talis discontinuatio ad sensum non pateat, non proinde negabitur

ab Aduersarijs, qui mōrulas non vident, & pro morulis constantissimè pugnant.

Deindè quamvis plerique concedant, partes interiores Rotæ tardiùs moueri, id tamen sua difficultate non caret; nam motus Rotæ est motus circularis, atque adeò habet analogiam cum motu Cœli, At in motu Cœli circulari non ità se res habet, vt partes interiores Cœli tardiùs moueantur, quia motus circularis est vniformis. vt suo loco fusiùs explicabimus, ergo cum ille motus Rotæ sit vniformis, quia circularis, non ità faciliè debet admitti, partes illius Rotæ tardiùs moueri, imò potius dicent Aduers. partes illius Rotæ exteriores, & interiores aequè velociter, aequè celeriter moueri.

Conclusio sit. Velocitas motus benè explicatur per Vbi fluens, quod habet motus.

Probatur; quia tota difficultas explicandi velocitatem motus reducitur ad hoc, quia mobile velox debet vna parte temporis percurrere duas partes spatij. atque adeò eodem tempore duobus locis coexistere, atque adeò coexistere loco, & spatio maiori se, sed hoc faciliè intelligitur, & explicatur posito Vbi fluente, ergo. Probatur minor, quia proprium est Vbi fluentis constituere rem in loco maiori se; nam si per horam mobile palmare, moueatur suprà spatium quadripalmare, occupabit totum illud spatium in illa hora, ergo iam successiuè, & fluenter mobile palmare coexistit spatio quadripalmari, atque adeò coexistit spatio maiori se. Antecedens patet, quia per hoc contradistinguitur Vbi fluens ab Vbi permanente, quòd Vbi permanens, facit rem permanentem coexistere spatio æquali se, est enim proprium rei quiescentis, & permanentis coexistere spatio æquali se; è contra Vbi fluens, & successiuum facit rem successiuam, & se mouentem, coexistere spatio maiori se, modo explicato, ergo à primo ad vltimum posito Vbi fluente, faciliè intelligitur, & explicatur velocitas motus, & quòd mobile velox vna parte temporis correspondet duabus partibus loci.

Confirmatur ex *Arist. 6. Phys. c. 9.* Vbi respondens argumento, quo Zeno probabat, non dari motum, quia quod mouetur, semper est in loco sibi æquali, atque adeò semper quiescit, & nunquam mouetur.

Respondens, inquam; *Aristoteles* huic argumento, docet, id, quod mouetur, esse in loco maiori se; datur ergo per *Aristotelem* Vbi fluens, quo mobile coexistit spatio maiori se.

Confirmatur secundò; quia à *Saxonia hic q. 10. Bart. Amico trañ. 25. in 6. Phys. art. 5.* fusè probatur; mobile, dum est in motu, occupare spatium maius se, & ità explicatur ab his Auctoribus indiuisibile, si daretur, posse moueri occupando spatium maius se, non est ergo nouum in Philosophia, mobile coexistere spatio maiori se, dum est in motu; & consequenter velocitas motus benè explicatur per Vbi fluens.

Dices primò: etiam Testudo, dum mouetur, habet Vbi fluens; nam vbi fluens producit per motum, ergo etiam Testudo coexistit spatio maiori se, atque adeò vna parte temporis coexistit duabus partibus spatij; ergo nullum erit discrimen inter mobile velox, & tardum, inter Aquilam, & Testudinem.

Respondeo. Testudinem per motum acquirere spatium maius se, sed tale spatium nunquam erit maius, aut æquale spatio; quod percurrit mobile velox; tarditas autem motus debet semper explicari relatiuè ad velocitatem, dicitur enim motus tardus, quia æquali tempore percurrit mobile tardum minus spatium, quàm percurrat mobile velox, vt supra explicatum est, esto igitur spatium acquisitum à Testudine per motum sit maius Testudine, at non est maius, imò nec æquale spatio, quod per motum acquirit mobile velox. Habent ergo Testudo, & Aquila vbi fluens, dum mouentur, sed non idem vbi fluens, sicuti enim vtriusque motus est diuersus, ità & vbi fluens in vtroque est diuersum.

Dices secundò. Si per vbi fluens mobile existit in loco maiori se, id non fit vna, & eadem parte temporis, sed per plures partes temporis, Corpus enim palmare per vbi fluens occupat spatium quadripalmare vna hora, ità tamen, vt per primum quadrantem horæ occupet primum palmum loci, per secundum, quadrantem, secundum palmum loci, & sic deinceps vsque ad quartum, ergo iam non eadem parte temporis corpus palmare occupat locum se maiorem.

Respondeo: quòd si partes temporis comparentur cum partibus spatij, quas pertransit mobile velox, benè probat argumentum, vnani partem temporis correspondere vni parti loci, seu spatij; at si partes spatij, quas pertransit mobile tardum, comparentur cum partibus, quas pertransit mobile tardum; statim apparebit, vnani partem temporis correspondere duabus partibus spatij, nam mobile tardum in primo quadrante horæ non pertransit vnum palmum spatij, sed illius medietatem, mobile ve-

erò velox pertransit illam eandem medietatem, & alteram, ergo iam mobile velox illa vna, & eadem temporis parte se mouens, ac se moueat mobile tardum, pertransit duas partes spatij, vbi mobile tardum è contrà eodem tempore percurrit vnam partem spatij.

Dices tertio: Benè explicatur velocitas, si dicamus, mobile velocius habere maiorem extensionem localem, arque adeò extendi in ampliorem locum, & mobile tardum habere minorem extensionem localem, & contrahi in minorem locum, ergo non est recurrendum ad Vbi fluens.

Respondeo. Maiorem, & minorem extensionem localem non posse haberi sine Vbi, licet enim localis extensio radicaliter habeatur à quantitate, maior tamen, vel minor extensio localis relatiuè ad certum locum habetur ab Vbi peripiente, in re successiva habetur ab Vbi fluente, & successiuo.

Quòd si queratur causa effectiua velocitatis motus. Sententia communis est, eam causari à maiori, vel minori virtute, quæ est in mobili ex *Arist. 2. Cali. 1. 36.* à maiori, vel minori resistentia mediij, per quod fit motus *4. phys. 71.*

Denique à figura mobilis, quæ est aptior, vel ineptior ad scindendum medium.

In causis verò liberis maior, vel minor velocitas dependet etiam ab earum arbitrio, quia causæ liberæ aliquando tardius, aliquando velocius eligunt se mouere.

LECTIO V.

An verum sit. Omne quod mouetur ab alio mouetur.

Aristoteles *7. Phys. t. 1. & 2. 3. Phys. dt. 28.* pronunciat hoc axioma iam satis vulgatum, & famosum in scholis, *Omne quod mouetur, ab alio mouetur*; De veritate huius Axiomatis valde dubitant nobiles Philosophi, ità vt plures, qui in cæteris Aristotelèni, tanquam veritatis Oraculum agnoscunt, in hoc puncto de veritate pronunciati Axiomatis, ab illo recedant, & falsum esse Axioma, defendant.

Ità *Scotus in 1. d. 3. q. 7. & 9. met. q. 14. & ibidem Antonius Andreas, Gregorius Ariminus in 2. d. 6. q. 1. art. 13. Iandunus 8. phys.*

phys. q. 12. Com. 3. lib. 1. de Cælo Comment. 28. Nouissime Arriaga tom. 1. in par. 1. & Thomas Campanella iuratus hostis Aristotelis in suo Triumphato Atheis cap. 3. ubi pro se citat Senecam, & Telesum; ex Antiquis hanc sententiam propugnarunt, Plato apud Aquar. ad Perr. 7. phys. q. 1. Academici omnes, precipue verò Macrobius 2. de Somnio Scipionis, denique Democritus, & Epicurus, bi enim posuerunt Athomos se mouentes.

Contrà alij. Verum esse Aristotelis axioma defendunt. Ità D. Thomas hic in 1. 28. lib. 8. phys. & 3. contrà gentes c. 13. & p. 1. q. 2. art. 1. Complutenjes hic disp. 39. q. 6. § 1. Ruuius lib. 8. phys. cap. 4. q. 1. Suarez t. 2. Met. Disp. 3 sect. 7. num. 11. Conimb. lib. 7. phys. q. 2. Bartholomeus Amicus t. 1. phys. tract. 26. quæst. 3. dub. 2. Rees disj. ult. art. ult. Quibus addè Aegidium in 3. q. 16. Capreol. in 1. d. 3. q. 3. Ferrarien. lib. 1. contrà gentes, cap. 23.

Hanc Aristotelis sententiam tueri debent omnes Theologi, qui communiter asserunt ex creaturis posse naturali lumine cognosci, & demonstrari existentiam Dei.

Ità Granadus tom. 1. de existentia Dei Disput. 2. Valentia 10. 1. q. 2. p. 3. Ioseph ab Augustino 1. q. 2. art. 3. diff. 1. nu. 22. Fasolus 1. p. q. 2. d. 2. q. 1. art. 3. Beccan. in Manuel. t. 1. tract. 1. Petrus à Sancto Ioseph. in sua Idea Theol. Specul. lib. 1. c. 2. Nouissime Recapitus p. 1. & alij innumeri.

Huius difficultatis solutio pendet ex declaratione illius axiomatis, statim enim ac fuerit explicatum, in quo sensu axioma illud intelligendum sit iuxta mentem Philosophi; innotescet eius veritas, & efficacia.

Vnum ergo moueri ab alio stat dupliciter; primò quidem, vnum potest intelligi moueri ab alio eiusdem ordinis, vt si mobile sit corporeum, seu materiale, & intelligatur moueri à motore corporeo, & materiali; secundò, vnum potest intelligi moueri ab alio diuersi ordinis, vt si mobile sit corporeum, motor verò sit spiritualis. Iterum dupliciter potest intelligi, quòd motor sit spiritualis, primò quidem si motor sit primus, & nulli subordinatus; secundò si motor non sit primus, sed secundus, & alteri subordinatus. His positis.

Conclusio prima. Axioma illud, omne quod mouetur ab alio mouetur, debet intelligi iuxta mentem Philosophi, de motore diuersi ordinis, & primo; ità vt sensus sit, omne quod mouetur, mouetur ab alio, qui est motor spiritualis, & primus.

Probatum apertissimis verbis Philosophi, qui cum multis ratio-

nibus probasset, quidquid mouetur ab alio moueri, subdit. *Quapropter, & Anaxagoras recte dicit, mentem impassibilem, in-
quiens, & inmixtam esse, quoniam motus principium ipsum
facit esse, sic enim utique solum mouebis, cum sit immobilis, &
vinces cum sit inmixtus; ergo iam Arist. vult, omne quod mo-
uouetur, moueri ab alio, qui sit motor spiritualis, & primus
mens enim impassibilis, & inmixta, est motor spiritualis, & pri-
mus.*

Quod autem loquatur etiam Aristoteles de mobili corporeo, & materiali; patet ex alijs verbis, quæ habet c. 6. t. 40. *neceffe
igitur est, omne quod mouetur esse diuisibile in semper diuisi-
bilia; hoc enim ostensum est prius in ijs quæ vniuersaliter de
natura; quod omne, quod per se mouetur, continuum est: si ergo
mobile debet esse continuum, & diuisibile, debet esse corpore-
um, & materiale.*

Conclusio secunda. Axioma Aristotelicum in sensu explica-
to, verum est, & satis firmum.

Probatur primò: quia omne quod mouetur in suo motu est
subordinatum primo motori, ideòque *Meteor. I. docet Arist. est
autem ex necessitate contiguus quodammodo iste superioribus
lationibus, ut omnis eius virtus inde gubernetur: sed esse sub-
ordinatum primo motori, est dependere ab illo in motu, atque
adeò ab illo moueri, ergo. Minor probatur: quia omne quod mo-
uetur, in suo esse est subordinatum primo enti, ergo & in suo
motu, in suo moueri, & operari est subordinatum primo motori,
sicuti enim res se habet ad esse, ita & ad operari, nam modus
operandi sequitur modum essendi, ut est commune axioma vni-
uersaliter receptum in scholis, ergo firmum stat, & inconcussum,
omne quod mouetur, ab alio mouetur.*

Probatur secundò Conclusio destruendo principale argumẽ-
tum Aduersariorum, illud enim fundatum est in eo, quòd Aristoteli
rationes, quibus suum axioma probat, sunt inuefficaces, & in-
sufficientes, sed hoc est falsum; ergo.

Probatur minor primò solutione eorum, quæ in contrarium
obiiciunt Auctores eius sententiæ.

Probatur secundò: quia rationes adductæ ab Aristotele ad
probandum illud axioma, quamuis singillatim acceptæ efficaci-
ter non probent, probant tamen efficaciter, si simul sumantur, id
enim speciale est argumentis Aristotelicis, ut simul sumpta effi-
caciter probent, sequus verò singillatim accepta, ut eruditè notat

Burleus super 7. Phys. super 7. Phys.

Probatur tertio; quia communis est sententia Theologorum; posse naturali lumine ex creaturis deueniri in cognitionem Dei; qui est primus motor, imò *Franciscus Le Reès in Met. disp. ult. ar. 1. §. 1.* docet, id esse de fide, & sanè probatur varijs scripturæ locis, *Act. 17. querere Deum, si forte attulerent; ad Romanos c. 1. inuisibilia Dei per ea, quæ facta sunt, intellectu conspiciuntur, sempiterna quoque eius virtus, & Diuinitas. Job. 36. 35. omnes homines videt eum, unusquisq; intuetur procul.* sed nullum argumentum aliud assignari potest, quo probetur, & conuincatur efficaciter existentia Dei, præter hoc Aristotelicum, quidquid mouetur ab alio mouetur, sed non ab alio, & ab alio in infinitum, ergo tandem recurrendum est ad primum motorem immobilem, ergo.

Confirmatur, quia cognitio Dei est fundamentum totius vitæ rationalis, ergo naturali lumine debet attingi, & cognosci existentia Dei, & primi motoris, quam Aristoteles induens personam Theologi ex Anaxagora appellat mentem impassibilem, & innixtam, aliàs non benè arguerentur ab Apostolo loc. cit. tanquam inexcusabiles Gentiles, eo quòd cum cognouissent Deum, non sicut Deum glorificauerunt, sed Aduers. negant Aristotelis argumenta efficaciter conuincere existentiam Dei, & primi motoris, & nullum aliud argumentum ipsi adducunt, deberent autem adducere, ergo.

Non dubito, quòd si aliquod argumentum ab ipsis adduceretur, pluribus, & efficacioribus pateret impugnationibus; facile est, impugnare, quæ alij dicunt, at aliquid adducere, quod alij non impugnent, hoc opus, hic labor est.

Probatur quartò: quia si id, quod mouetur, mouetur motu violento, iam patet moueri ab alio extrinseco motore; si mouetur motu naturali, vel mobile est animatum, vel inanimatum: si animatum, iam in eo datur vna pars, quæ cæteras mouet; quæ pars ab Aristotele dicitur esse Cor, à Galeno Cerebrum; rursus ista pars, quæ reliquas mouet, & est principium motus in reliquis partibus mouetur à generante, à quo sicuti accepit esse, ita & accepit virtutem motuam. Denique si id, quod mouetur, est inanimatum, quia mouetur motu naturali, & omnis motus naturalis est à principio intrinseco, videtur moueri seipso, & non ab alio; adhuc tamen tale mobile inanimatum mouetur ab alio motu naturali, quia eius intrinsecum principium motus actum, quod

est forma, est à generante, eius intrinsicum principium motus passiuum est materia prima, quæ etiam est à Deo per creationem, ergo iam omne quod mouetur quocumq; genere motus, ab alio mouetur.

Obijcies primò: In Doctrina Aristotelica, & communi: Per hoc contradistinguuntur viuētia à non viuētibz, quia viuētia mouentur se ipsis, & non ab alio; è contrà non viuētia, ergo falsum est vniuersaliter, *quidquid mouetur ab alio mouetur*; sufficit enim ad falsitatem alicuius propositionis vniuersalis, quod in aliquo casu particulari non verificetur.

Respondeo. Viuētia se ipsis moueri, quia in ijs est assignare vnā partem, quæ reliquas partes mouet, quod de non viuētibz non verificatur; Cæterum viuētia non dicuntur seipsis moueri, quasi, *Tò seipsis*, excludat primum motorem, à quo mouentur tam viuētia, quàm non viuētia, in hoc enim parificantur viuētia, & non viuētia.

Obijcies secundò: ex *Arist. 8. Phys. 1. 35.*

Lapis mouetur à baculo, baculus à manu, & sic sistitur; ergo non omne quod mouetur ab alio mouetur.

Respondeo: tale exemplum ab Aristotele adduci, vt ostendat non dari processum in infinitum in motibus, sed tandem deueniendum esse ad vnum primum motorem immobilem; quare vera est illa propositio, quid quid mouetur ab alio mouetur, quod vsque petueniamus ad primum motorem.

Negat autem Aristoteles manum ab alio moueri, non quia, velit, non moueri à primo motore impassibili, & immixto; sed quia non mouetur ab alio motore passibili, & mixto proximè, & immediatè; esto à generante, tanquam motore mixto, & passibili mediatè, & remotè moueatur; & quia mouens remotum simpliciter, & absolutè non est mouis, ideò dicit manum non moueri, sed ibi sisti motum.

Eodem modo responderetur ad aliud Argumentum, quod fieri solet de Lenibus, & Grauibz, quæ videntur moueri à propria eorum grauitate, & leuitate, hæc enim mouentur à generante; quod dedit illi grauitatem, & leuitatem, tanquam virtutes eorum motiuas, esto deindè, quod quia generans est causa remota, & mediata motuum eorum, simpliciter dicantur, graui, & leui seipsis moueri.

Obijcies teritiò. Si verum esset, *omne, quod mouetur ab alio mouetur*, maximè quia, vt habetur, *8. phys. 1. 40. impossibile est,*
idem

idem esse actu, & potentia; nam id, quod mouetur, est potentia, seu habet passionem, id quod mouet, est actu, & habet actionem; potentia autem, & actus sunt contradictoria, sed hæc ratio nulla est, ergo.

Probat minor: quia eadem anima rationalis est potentia, prout potest intelligere, & est actus, prout elicit actum intelligentionis.

Respondeo. Aristotelis verba esse intelligenda de potentia formali, & actu etiam formali, impossibile enim est, idem simul esse formaliter potentiam, & actum, quia mutuò se negant, & excludunt actus formalis, & potentia formalis; at non esse intelligenda ea verba de potentia formali, & actu virtuali, id enim, quod est potentia formaliter, potest virtualiter esse actus, vt probat exemplum adductum de Anima rationali intelligente, & obseruat. *D. Thomæ p. 2. qu. 77. ar. vbi ait; Accidens causari a subiecto, ut est actu, in eoque recipitur ut est potentia.*

Colligite ex his. Ità omne, quod mouetur ab alio moueri, vt tamen deueniendum sit tandem ad aliquod, quod moueat, & non moueatur, nam in tantum verum est; quidquid mouetur ab alio mouetur, in quantum omne quod mouetur, mouetur ab alio, tanquam primo mouente, & prima causa motus, sed primum mouens non potest ab alio moueri, aliàs non esset primum; haberet enim alium priorem antè se, à quo moueretur, ergo. Deinde, si id, quod mouet, moueretur, vel moueretur eodem genere motus, & hoc est impossibile, impossibile enim est, quod docens doceatur, & discat, quod sanans sanetur, quod alterans alteretur, augmentans augmentetur; Sed neque potest moueri diuerso genere motus, quia necesse non est, vt motuum sit mobile, id enim appellat Arist. simile figmento: ergo. Dixi necesse non est, quia per accidens potest moueri diuerso motu, sic sanans potest discere.

Præterea si mouens omne mouetur necessariò, iam daretur infinitum actu in mouentibus, quia nõ posset assignari primum, & vltimum mouens, ergo iam in mouentibus, & motis daretur actu infinitum, vbi enim non est assignare primum, & vltimum, ibi actu est infinitum.

Colligite secundò. Primum motorem esse immaterialem, & inpermixtum, quia si esset materialis, & permixtus, non posset semper vincere mobile; & consequenter defatigaretur, & vinceretur aliquando, & sic cessarent motus Cœli, & consequenter

Omnia deordinarentur, & confunderentur.

Colligite tertio. Primum motorem esse virtutis infinite, quia sicuti non recipit motum ab alio, ita non recipit esse ab alio, ergo iam habet esse infinitum; non enim est assignabile, à quo accipiat limitationem in suo esse, cum ipse sit primus motor. Altera ratio Aristotelis est, quia ipse mouit tempore infinito, impossibile est autem, quod mouens tempore infinito sit finitæ virtutis; quæ ratio, quia supponit mundi, seu motus aternitatem, contra id, quod docet fides, est inefficax, & sophistica, vt loquitur *Barthol. Amicus loco cit. ar. 1 nu. 4. lit. E.* In quo puncto licet Philosopho Christiano ab Aristotele recedere; apte enim in hanc rem cadit illud; amicus Aristoteles, sed magis amica veritas.

LECTIO VI.

Alie Quæstiones de Motu resolvuntur.

Quoniam omnia non possunt pro dignitate, & fusè tractari; resoluemus hic breuiter, & perstringemus nonnullas alias quæstiones de motu leuioris momenti.

Prima Quæstio est: Vnde desumatur contrarietas motus.

Responderetur. Contrarietatem motus desumendam esse ab ijs, à quibus sumitur eiusdem motus specifica diuersitas, nam, vt benè ait *Arist. 8. Phys. c. 8. t. 64.* Contraria specie differunt, & non vnum sunt: Quia ergo motus ad æquatum specificatiuum coalescit ex termino ad quem, ex motore, & ex mobili; ab his etiam desumitur eiusdem motus contrarietas; Ad hoc ergo, vt motus sit contrarius, debet habere contrarietatem aliquam, vel in motore, vel in mobili, vel in termino ad quem, ad hoc, vt motus non sit contrarius, requiritur, vt in nullo sit contrarietas. Simili ratione, qua dicebamus suprà, diuersitatem specificam motus sumi ex quolibet specificatiuo, vnitatem verò specificam ex omnibus specificatiuis simul sumptis; ratio est, quia plura requiruntur ad negandum, quàm ad affirmandum, plus enim negat negatio, quam affirmet affirmatio, negatio enim, vt in Logicis diximus, vniuersaliter distribuit; vt ergo motus non sit contrarius, seu, vt non habeat contrarietatem, in nullo sui specificatiuo debet contrarietatem agnoscere, ad hoc verò, vt contrarietatem

habeat, sufficit in aliquo ex specificatiuis contrarietatem adesse; hinc motus localis Angeli, & hominis opponuntur, & contrariantur ratione principij; motus sursum, & deorsum opponuntur ratione termini, ad quem; motus Celi, & inotus Elementorum ratione subiecti, seu mobilis, similiter opponuntur.

Cæterum motus esse contrarios formaliter, est, esse impossibiles in eodem subiecto, seu mutuo se ab eodem subiecto excludere; in hoc enim consistit formalis contrarietas motus, sicut & cuiuscunque alterius rei, vnde habet Philosophus 3. *Phys. t. 64. motus esse contrarios, eo quod se inuicem impediunt.*

Cæterum contrarietas non solum est inter motum, & motum, sed etiam inter motum, & quietem; Quies enim priuatiue opponitur motui, quia est priuatio motus; vnus verò motus opponitur alteri quodammodo positiue; quia duo motus sunt entitates positiue, inter quas intercedit oppositio positiua. Dixi quodammodo, quia oppositio propria, & in omni rigore est inter qualitates, quæ per mutuam actionem se ab eodem subiecto excludunt, vt infra dicemus; at motus non sunt qualitates, quæ se per actionem excludant, esto aliqui eorum, vt alterationes, habeant pro terminis, qualitates, vt calefactio, & frigefactio.

Dices: ergo iam vni duo essent contraria, nam vni motui; puta motui sursum, opponeretur motus deorsum, & opponeretur quies; sed hoc est contra *Arist. 10. Met. t. 14. & 1. Cali. t. 9.*

Respondeo. Vni duo esse contraria, & opposita diuerso genere contrarietatis, & oppositionis, scilicet, positiue, & negatiue, vt benè concedunt hic *Iauellus qu. 12. & Bartholomæus Amicus tract. 24. in 5. Phys. dub. 2.*

Secunda Quæstio solet esse; an detur quies in puncto reflexionis.

Suppono ex *Arist. hic t. 62.* reflexionem motus esse, cum mobile motum à puncto A. versus B. recedens ex B. mouetur versus A. quod quatuor modis contigit. Primò, quando post motum naturalem sequitur alius naturalis, vt in motu constrictionis, & dilationis cordis. Secundo, quando post violentum sequitur præternaturalis, vt cum lapidi moto sursum occurrit Mons Aeneus impellens deorsum maiori velocitate, quam exigat natura lapidis. Tertio, quando post motum violentum sequitur alius violentus, & cum pila ad murum immissa, violent-

ter resilit, vel quando duo ludunt pila, quorum vnus iacit pilam in alterius manum, à qua & repercutitur. Quarto demum, quando ad motum violentum sequitur naturalis, vt cum lapis sursum motus relictus suæ naturæ descendit. Quibus positis.

Respondeo ad Quæstionem; quando vterque motus est naturalis, aut naturalis sequitur ad violentum, tunc datur quies in puncto reflexionis; quando verò violentus, aut præternaturalis sequitur ad violentum, non datur quies.

Prima Responsionis pars patet ex *Arist. 8. Phys. i. 63. Auerf. Com. 65. Ruuio hic, & alijs*: ratio est, quia natura nihil producit, vt statim corrumpat, non enim quod augetur, statim decrescit, sed datur tempus consistentiæ; quæ mouentur ad aliquem locum, mouentur, vt ibi aliquantulum quiescant; inter motus inspirationis, & respirationis, compressionis, & dilatationis cordis, datur aliqua quies, aliàs defatigaretur animal, ergo iam, quando motus naturalis sequitur ad naturalem, datur quies in puncto reflexionis.

Similiter si ad motum violentum sequatur naturalis, vt cum lapis sursum proiectus, naturali sua vi descendit, etiam in tali casu datur quies in puncto reflexionis.

Ita *Aegid. 8. Phys. 65. Capreol. dist. 15. qu. 1. ar. 3. ad 4. & alij*, quos refert, & sequitur *Barth. Amicus tract. 24. in 3. Phys. ar. 5. Concl. 3.* Ratio est, quia virtus impressa paulatim minuitur, vt mox dicemus de tarditate motus in fine, ergo deueniendum est, vt tanta sit virtus impressa, quanta est grauitas lapidis, sed à proportionem æqualitatis, id est, quando equalis est actiuitas agentis, & resistentia passi, nulla sit actio, nullus motus, ergo lapis sursum proiectus aliquantulum ibi quiescit, vt debilitato impetu, & remissa virtute impressa, descendat.

Vnde patet, à quo lapis detineatur ibi, detinetur enim ab impetu impresso, qui licet non possit amplius mouere, potest tamen impedire actionem grauitatis, præsertim adiutante aere ad resistentiam.

Secunda Responsionis pars: quam concedunt plures. cit. à *Barth. Amico ubi supra art. 3.* Probatum quia, Pila, quæ alliditur ad murum, & reflectitur; non potest moueri motu reflexionis à muro, qui persenerat immobilis, nec ab aere, qui quiescit, quiescente mobili, ergo motus ille reflexus debet causari ab illo primo agente, quod pilam ad parietem impulit, sed talem motum non potest causare agens, si admittamus quietem in puncto

Ad reflexionis, cessante enim motu agentis, cessat virtus ab illa prius impressa, ergo iam debet continuari motus rectus, & reflexus, & non interrompi per quietem, alioquin non esset assignabile, à quo produceretur motus reflexus.

Similiter quando lapillus projicitur sursum, & mons à Caelo cadens, illi fieret obuius in medio descensus, non daretur quies in puncto reflexionis, quia aliàs retardaretur mons descendens magno impetu, sed hoc est falsum, ut de se patet, iam ergo in hoc casu non datur quies in puncto reflexionis, sed est vnus continuatus motus directus, & reflexus.

Dices: ex *Arist. 3. Phys. d. tex. 62.* nullus motus præter circumlatam potest esse perpetuus, sed si non daretur quies in puncto reflexionis, posset motus perpetuari, posset enim in infinitum continuari per reflexionem, ergo danda est quies in puncto reflexionis.

Respondeo: in motu naturali dandam esse huiusmodi quietem, aliàs sequeretur, illum fore perpetuum, quia virtus motiua naturalis non minuitur paulatim, ut contingit in virtute motiua, & virtute impressa proiectis, at in motu violento non est admittenda quies, nè sit perpetuus; adhuc enim negata quiete, non sic perpetuo, quia virtus ipsa causatiua motus paulatim deficeret.

Questio tertia solet esse, à quo moueantur projecta. Et sanè certum est, projecta moueri à projiciente, tanquam à causa remota; hanc non querimus, quia non est propriè causa ex dictis *Disp. 2. Phys. Lect. 4.*

Sed querimus causam proximam, & immediatam motus projectorum, verbi gratia, projicitur pila sursum, vel deorsum, vel in gyrum, aut etiam impingit in parietem, queritur, quæ sit causa proxima, & immediata huius motus.

Antiqui ergo Expōitores Aristotelis *Themistius, et Auerf. in 1. 82. lib. 8 Phys. quos sequitur D. Thomas 3. de Caelo Lect. 7. Burleus 3. Phys. 32. Aegidius Lect. 29.* assignarunt causam immediatam motus projectorum esse aerem, quatenus minurum à projiciente commouetur aer, qui deinde commotus aerem subsequenter propellit, & ita successiue deferretur proiectus lapis; donec languescēte commotione aeris, tandem quiescat.

Sed contrà est, quia experientia patet, quod si quis aerem propinquum lapidi maxime commoueat, & agiter, nunquam lapidē mouebit, ergo nō projicitur lapis ab aere commoto, & agitator

Communis sententia defendit; Proiecta moueri à virtute quadam impressa à proiiciente, quæ virtus immediatè eliciat motum proiecti. Ita Suarez disp. 23. sect. 10. V. asq. p. 2. d. 81. Toletus 8. Phys. 86. Ruuius in tract. de motu violento qu. 2. Conimb. 7. Phys. c. 2. q. 1. art. 8. Franciscus Le Reès disp. ult. ar. 7. S. I. Barth. Amicus 1. 2. de Gen. tr. 5. a. 4. ubi plures alios refert.

Probatur primò à priori, quia videmus non moueri lapidem, nisi ipse tangatur à proiiciente, etiam si proiciens moueat aërem circumstantem vsque ad lapidem.

Probatur secundo: quia eò tendit sagitta, quò dirigitur à proiiciente, ergo aliquid sagittæ imprimitur, nam motus ità directus non potest tribui aëri ob sui volubilitatem, vnde videmus, aquam descendentem diuidi circà finem motus, & hoc propter concursum aeris propellentis aquam cum magna fluctuatione. Confirmatur, quia proiciens habet vim causandi motum, ergo etiam habet vim causandi virtutem motiuam, quia aliter non posset causare huiusmodi motum, cum proiectum ab ipso separetur, nisi loco sui substitueret virtutem motiuam, & ideò benè ait Philosophus 4. Phys. tex. 68. motum projectorum posse fieri etiam in vacuo, in quo non est aer.

Probatur tertio: quia non potest assignari ratio, cur motus hic sit velocior paulò post initium, (vt colligitur ex maiori istu,) quàm in ipso initio, & in fine, nisi assignetur ista virtus impressa; hæc enim durat aliquo tempore, & adiuuatur à maiori concursu aeris paulò post initium, non sic autem ipso initio, & multò minus in fine, quando iam languescit, & imminuta est ista virtus impressa, contrà quòd accidit in motu naturali, qui est à virtute naturali, quæ versus finem motus non languescit, aut minuitur, ergo.

Hinc etiam redditur ratio, cur bombardæ quò longiores, eò pilas velocius, & longius explodant, quia nimirum ignis genitus ex puluere plus impetus imprimit toto illo tempore.

Similiter cur plus iaciuntur globuli madidi, quàm sicci, quia nimirum globulus madidus citius concipit impetum, & virtutem impressam, ideò citò elabatur, & longius extruditur.

Denique ex eo manifestè conuincitur, ab aëre non moueri proiecta, quia sæpè proicitur lapis contrà validissimum ventum, quo totus aer commouetur in contrarium, nam impossibile est, talem motum causari ab aëre commoto, & agitato validissimè in contrariam partem.

Dices : quādo quis laxat lapidem ex funda, id facit per motum circulare, quo aliquandū girat fundam ; sed talis motus lapidis proiecti non potest causari à proijciente, seū exonerante fundam, ergo . Probatur minor, quia motus lapidis est rectus , sed motus rectus, non potest causari à motu circulari, sicuti neque motus rectus versus Oriens potest causari à motu recto versus Occidens, ergo.

Respondeo , quod fundibularius girata funda, tandem recta via dirigit lapidem, ideòque causat motum rectum, qui proinde non à giratione fundæ, sed à recta proiectione causatur.

DISPV TATIO VI.

DE MV NDO,

ET COELO.

Physica, sicut & cuiuscunque Scientiæ speculatiuæ, munus est, partes, seū species Obiecti sui speculari . Explicatis ergo Principijs, Causis, & Proprietatibus Corporis naturalis, progredimur ad Partes, seū Species eiusdem Corporis explicandas; Sunt autem in primis Mundus ipse, seū Vniuersum; Elementa, & Mixta siue Animata, siue Inanimata, Aristoteles agit de Mundo in speciali Libello, quem scripsit ad Alexandrum Macedonie Regem, Vbi nomine Mundi intelligit, Coagmentationem ex Cælo, Terra, & reliquis rebus, quarum natura illis continetur; seū, ut paulò infra, Mundus est rerum omnium ordo, ornataque descriptio . Quatuor Libris, quos de Cælo inscripsit, agit de Cælo prius, tum de Elementis .



LECTIO I.

An Mundus potuerit esse ab æterno.

Non quærimus, An de facto fuerit ab æterno, de fide enim est, quod fuerit in tempore, de possibili igitur quærimus, an potuerit esse ab æterno.

Nomine æterni, seu æternitatis venit Duratio infinita carens Principio, & Fine, seu non habens primum, & ultimum in sui esse, & sui duratione, ut patet ex definitione æternitatis communiter recepta in Scholis à nobis supra *Disp. 4. Lect. 1.* relata, & explicata.

Pro intelligentia igitur, & solutione difficultatis Propositionis:

Pono primò. Duo esse in vniuerso entium Genera; nempe, entia successiua, & entia Permanentia. Entia successiua sunt, Tempus, motus, seu etiam plures, & plures series variarum generationum; Entia permanentia sunt, Angelus, Anima rationalis, & alia huiusmodi.

Pono secundò. Creaturam posse esse ab æterno, dupliciter intelligi; primò quidem, quasi ipsa Creatura exigit essentialiter, vel continualiter æternitatem; Secundò, si ponamus, æternitatem illi non repugnare. Certum videtur, Creaturam nec essentialiter, nec connaturaliter exigere æternitatem, non exigere essentialiter, quia aliàs Creatura sic essentialiter æterna, non differret à Deo, cui est essentialis æternitas; non exigere connaturaliter, quia aliàs Deus miraculosè impediret æternitatem Creaturarum; An ergo Creaturæ repugnet æternitas, hic est Punctus propositionis difficultatis.

Conclusio Prima. Ens successiuum, Tempus, motus, & variarum series Generationum non possunt esse ab æterno.

Ita *Durand. in 2. dist. 1. q. 1. art. 3. Sotus 8. Phys. q. 3. Conimb. ibidem. Ruuius lib. 8. Phys. tract. de æternit. mundi q. 3. nu. 27. Murcia disp. 1. q. 3. Suarez. disp. in met. disp. 20. Sect. 6. & disp. 29. Sect. 1. & 2. Pererius lib. 15. cap. 13. Barth. Amicus tract. 2. de mundo q. 3. dub. 4. art. 6. Conclus. sexta. Le Rès disp. 1. de mundo art. 3. §. 1.*

Centrà Nominales relatos à Ruuiò ubi suprà. *Vasq. 1. p. 177. Arriagam disp. 17. sect. 2. Ouied controu. 19. puncto 3. Complu-*

enses disp. 29. q. 4. §. 11. qui referunt plures alios ex Thomistis Antiquos, & Recentiores.

Probatur Conclusio quia ; Tempus, Motus & variarum series generationum sunt entia essentialiter successiva, ergo essentialiter includunt prius, & posterius; sed æternitas essentialiter excludit, & negat prius, & posterius, quia æternitas est duratio tota simul, ut clarè patet ex eius Definitione communiter in Scholis recepta, ergo non possunt combinari ista duo, ens successivum, & æternitas.

Conclusio secunda. Aliqua Creatura Permanens, ut Angelus, potest de absoluta potentia esse ab æterno.

Ità D. Thomas p. 1. q. 46. art. 2. & in 2. d. 1. q. 2. ibidem Caiet. & 2. contra Gentes c. 38. ibidem Ferrarien. & alij plures Thomistæ, quos citant, & sequuntur Ruuius 8. Phys. tract. de ætern. mundi q. 1. Complutenses disp. 29. q. 3. §. 2.

Nominalium Schola. Greg. q. 3. Gab. ibidem, Ocham. q. 8. Ex Recentioribus. Suarez in met. disp. 20. sect. 6. Pererius lib. 15. c. 13. Conimb. 8. Physic. 2. 2. q. 6. Arriaga disp. 17. Phys. sect. 2. subsect. 2. Ouied. Cont. 19. punct. 1. & alij plures apud ipsum.

Contrà Henricum quodlib. 1. q. 7. & 8. Albertum magnum in summa tract. 1. q. 4. mem. 4. & in 2. dist. 2. art. 10. Bonau. ibidem q. 2. & Rich. q. 4. Mars. q. 1. art. 2. Le Reès Disp. 1. de mundo art. 3. §. 2.

Scotus utramque partem problematicè defendit, sed videtur magis inclinare in sententiam D. Thomæ, & communem, quàm in oppositam Sententiam Henrici, Undè & D. Thomæ Sententiam peculiari argumento à se excogitato confirmat in 2. d. 1. q. 3. §. & ex hoc arguitur.

Probatur Conclusio primò; argumento generali, & communi ijs omnibus, quæ conceduntur posse fieri de absoluta Dei potentia, quia: Creaturam esse ab æterno, seu Creaturam esse coæternam Deo non implicat, ergo de absoluta potentia potuit Angelus, verbi gratia, esse ab æterno.

Antecedens multipliciter probatur, primò quia: si Creatura esset ab æterno, non repugnaret, quòd una esset alteri coæterna, ut apertè patet ex celebri Authoritate D. Augustini 6. de Tri. c. 1. ubi habet, si ab æterno esset Sol, aut Ignis, ab æterno illuminaret, aut calefaceret, & 10. de Ciuit. c. 31 si pes ab æterno, vel in æternitate fuisset in puluere, semper ei subesset vestigium, & hom. 26 super Ioannem, affert exemplum de virgulto, & ima-

glne eius in aquis producta, ego cum Deus sit ab æternò, non repugnat, aliquam Creaturam fore illi coæternam.

Probatur secundò quia: in Diuinis verè Filius procedit, & producit à Patre, & tamen est illi coæternus, ergo etiam Creatura potest esse coæterna Deo, quamuis ab illo producat.

Respondebis; processionem, & productionem Verbi Diuini à Patre esse necessariam, productionem verò Creaturæ à Deo fore liberam, & contingentem.

Contrà est quia: Agens liberum potest habere operationem in eodem instanti, in quo incipit esse, vt est Communis doctrina de Angelo, qui in eodem instanti, quo capit esse, habuit liberam operationem suæ voluntatis, per quam se disposuit ad recipiendam gratiam in eodem instanti, ergo à fortiori Deus simul, ac fuit, potuit habere creaturam sibi coæternam.

Probatur tertio quia. Antiquorum Sapientissimi posuerunt de facto Mundum ab æternò, ergo nullam agnouerunt implicationem in coæternitate Creaturæ cum Deo.

Confirmatur quia plures ex Auctoribus Contrariæ Sententiæ, defendunt, Mundum capisse in tempore, non posse naturali ratione demonstrari, Mundum non esse ab æternò, ergo mundum esse ab æternò, non implicat, si enim implicaret, posset naturali ratione, & assignata implicantia ostendi, mundum exisse in tempore, & non fuisse ab æternò.

Probatur quartò idem Antecedens quia, Creaturam esse coæternam Deo, nou repugnat infinitæ Dei potentia, nec finitæ, & limitatæ entitati Creaturæ, duratio enim est accidens, ergo siue duratio sit finita, siue infinita, non minuit, nec auget perfectionem Creaturæ, sed additur illi, saluis eius Essentia, & Proprietatibus.

Obijcies primò: Sancti Patres contrà Arium impiè asserentem, Verbum Diuinum esse Creaturam, & non Deum, vñ sunt hoc argumento. Verbum Diuinum est coæternum Patri, ergo non est Creatura, sed hoc argumentum non esset efficax, si Creatura posset esse coæterna Deo; ergo.

Respondeo. Argumentum SS. Patrum fuisse efficacissimum, quia erat argumentum ad hominem, Ariani enim conuicti auctoritate Sacra Scripturæ utrumque concesserunt, creaturam non esse ab æternò, & Verbum Diuinum ab æternò, qua data concessione, manifestè deducebatur, ergo Verbum Diuinum non est Creatura.

Si qui ex SS. Patribus asserunt; Creaturæ repugnare æternitatem, piè sunt explicandi, quòd repugnet æternitas ab intrinseco, & connaturaliter à Creaturis exigita, non quòd absolute illi repugnet.

Obijcies secundò: In Creatura prius est non esse, quàm esse, quidquid enim creatur, transit de non esse, seu ex nihilo, ad esse, & per consequens prius est, non esse Creaturæ, quàm esse, sed in æternis non est assignare prius, ergo implicat creaturam esse, æternam.

Confirmatur quia: si Creaturæ semel concedatur duratio æterna, non poterit per totam æternitatem annihilari, & destrui, sed hoc est contrà rationem Creaturæ, quæ de sui natura annihilabilis est, & destruibilis, inò est contrà perfectum Dei Dominium, quod habet super omnem Creaturam, de qua debet, posse liberè disponere in quolibet momento, quoad eius conseruationem, & destructionem, ergo.

Respondeo. Ad Creationem sufficere, quòd non esse præcedat esse in priori naturæ, atque adeò necesse non esse, quòd præcedat non esse in priori temporis, sola autem prioritas temporis repugnat æternitati, cui sicuti non repugnat prioritas originis, ut patet in patre, qui est prior origine Filio, sibi aliàs coæterno, ità nec repugnat prioritas naturæ.

Ad Confirmationem dico. Argumentum valere etiam in Creatura durante per horam, in qua non potest annihilari, & destrui, sufficit ergo tùm ad rationem Creaturæ, tùm ad saluandum perfectum Dei dominium supra talem Creaturam, quòd sit ab intrinseco annihilabilis, & destruibilis, esto per accidens, & ex mera Dei libera voluntate sit inanimabilis, & indestruibilis; vide quæ dicta sunt *Disp. 4. L. 13. de Duratione permanente*.

Obijcies tertio, si creatura fieret ab æterno, non posset operari ab æterno, vel si operaretur, deberet per infinitum tempus perserverare in eadem operatione, quia si solum per finitum tempus in ea duraret, non habuisset eam ab æterno, quia æterno non datur prius, sed ex tempore, hæc autem repugnant, ergo etiam repugnat, Creaturam esse æternam.

Respondeo. In tali casu, vel Creaturam æternam nullam elicere operationem, suspendente Deo miraculosè concursu, ad omnem operationem aliàs elicibilem à tali Creatura in eadem operatione, nulla enim repugnantia est in hoc, quòd Deus

conseruet aliquam Creaturam in eadem operatione simultaneâ per infinitum tempus, dixi simultaneâ, quia operatio successiua, cum includat prius, & posterius, repugnat durationi æternæ, quæ indiuisibilis est, & tota simul.

LECTIO II.

Cæli Natura, & Essentia.

Licet Philosophi sit de omnibus speculari ex *Arist. 4 Met. 1. 5.* tamen à Cælorum speculatione, & contemplatione multos terret Cælorum à nobis infinita ferè distantia, si enim *difficile æstimamus, quæ in terra sunt, & quæ in prospectu sunt, inuenimus cum labore, quæ in Cælis sunt, quis inuestigabit? Sap. 9.*

Nihilominus reprehendendi non sunt, qui de Cœlesti corpore Quæstiones instituunt, vt enim habemus ex *Arist. 2. Cæli tr. 62. videtur, veneratione dignam esse magis, quàm temeritate reputantes, promptitudinem illam, si quis propter Philosophiæ sitim, etiam paruas in ijs sufficientias amet, de quibus maximas habemus dubitationes.* Cœlorum ergò natura se nobis offert prius inquirenda.

Pono autem in Vniuerso esse quatuor prima, & maxima corpora, quæ appellamus Elementa, Ignem, Aerem, Aquam, & Terram; nam reliqua Corpora ab his distincta, sunt ex his mixta, atque composita, & ideò horum comparatione Elementa dicuntur Corpora simplicia, non quia non sint composita ex Materia, & Forma, ex genere, & differentia, sed quia non sunt composita ex alijs corporibus, vti sunt reliqua corpora, quæ propterea sunt, & dicuntur mixta.

Fuit ergo Antiquorum sententia ponentium, Cœlum esse naturæ elementaris, sed erant inter se diuisi, atque diuersi; nam, *Empedocles apud Plutarchum 2. de Placitis*, Cœlum putauit esse aerem igne concretum in duritiem chrystalli, vt frigore aqua congelatur. Alij, vt *Aegypti* putarunt, esse Aquam; alij Terram, vt *Anaximenes apud Plutarchum lib. 2. de Placit. c. 7.* Alij naturæ ignitæ, vt *Anaxagoras apud Plutarchum 2. de Placit. c. 13.* & Recentiores, *Bernardinus Telesius I. de rerum natura c. 38. Campanella in Atheism. c. 11. cap. 8. Stephenus Aragonius in Enchir.*

Denique alij putabant, Cælum esse mixtum, & compositum ex Elementis, vt *Plato apud D. Augustinum 8. de Ciuit. Dei c. II.* ex floribus, seu delicijs Elementorum.

Sententia communis, & probabilior defendit, Cælum esse corpus simplex, & naturæ omnino diuersæ ab omnibus, & singulis Elementis, ideòque communiter dicitur quintæ cuiusdam, naturæ, & essentiæ distinctæ à quatuor primis corporibus. Ità *Arist. I. Cæli t. 5.* & alibi passim; Aristotelem sequuntur Theologi *D. Thomas in 2. dist. 14 q. 1. art. 2. ubi Bonau. Riccardus, & Scotus*, sequuntur moderni Philosophi, vt videre est apud *Conimb. I. Cæli cap. 2. q. 15. & nouissime Barth. Amicus tr. 4. qu. 1. Dub. 1. art. 2. Ruuius lib. 1. cap. 1. qu. 4. Rees disp. 2. ar. 1.*

Conclusio. Cælum est corpus simplex, & naturæ omnino diuersæ ab Elementis.

Probatur primò apertissimis verbis Philosophi *I. Cæli t. 16. est aliquis præter corpora, quæ hic, & circa nos sunt, tantò nobiliorem habens naturam, quantò quidem plus distat ab his, quæ hic sunt. Et t. 9. 2. consueuimus extremum, & sursum vocare Cælum, in quo & Diuinum omne collocatum esse, dicimus, 2. Cæli t. 13. Corpus enim quoddam Diuinum est, & I. Meteor. cap. 3. refert Antiquos putasse, Cælum esse quoddam Diuinum corpus, eo quod semper curreret, & moueretur; & Aether fuisse appellatum, quasi nulli eorum, quæ apud nos sunt, existens idem, & τῆσος enim Græcis est quid omnino alterum, & diuersum.*

Probatur secundò quia: Essentia, & natura corporis naturalis nulla alia via potest nobis melius innotescere, quàm per motum localem, qui est eius præcipua, & magis sensibilis proprietates, seu passio; sed Corpori cælesti conuenit motus localis omnino diuersus à motu Elementorum, ergo est naturæ, & essentiæ omnino diuersæ ab Elementis, Minor probatur quia, Cælo per se, & connaturaliter conuenit motus circularis, seu circà medium, sed motus circularis est omnino diuersus à motu recto sursum, seu à medio, qua ratione mouentur Aer, & Ignis, & à motu recto deorsum, seu ad medium, qua ratione mouentur Terra, & Aqua, ergo.

Cæterum Cælum moueri motu circulari, & circà medium, est Cælum moueri circà Terræ centrum, quod est punctum indiuisibile descriptum in medio Terræ, & Cæli, atque adeò totius Vniuersi; è contrà Ignis, & Aer mouentur à medio, & sur-

sum, quia longè recedunt à Centro Terræ, & quaquà versus ad Cælum rectà ascendunt; è contrà Terra, & Aqua mouentur ad medium, quia ad Centrum rectà descendunt.

Probaturn tertio, quia Cælum est incorruptibile, constat ex Stellis, tanquam ex partibus etherogeneis; obtinet locum superiorem ad omnia elementa, ergo est naturæ omninò diuersæ ab elementis, quæ corruptibilia sunt saltem secundum partes, sunt omninò homogenea, & occupant loca inferiora ad Cælum, ideoque testatur *Arist. I. Cæli 1.22.* omnes barbaras nationes, Cælum constituere locum, & sedem Dei, quia corpus immortale est, & cæterorum nobilissimum, *omnes enim homines de Dijs habent existimationem, & omnes eum, qui sursum est locum. Deo attribuunt, & Barbari, & Græci quicumque putant esse Deos, tanquam videlicet immortalis immortale coaptatum sit, impossibile enim aliter.*

Obijcies primò, Eadem sunt accidentia Cæli, & Ignis, ergo cum ex accidentibus dignoscatur natura, & essentia Corporis naturalis, Cælum erit Ignis. Antecedens probatur, quia conueniunt in raritate, luciditate, diaphaneitate, & denique in leuitate, leue enim ex *Arist. I. Cæli tr. 67.* supereminet omnibus, at Cælum supereminet omnibus, ergo.

Confirmatur quia, si haberemus aliquam particulam Cæli hic, vel illa euolaret sursum, & sic esset Ignis, vel descenderet deorsum, & sic esset vel Aer, vel Aqua, Sed quod dicitur de vna Cæli particula, de toto Cælo verificatur, quia ex *Arist. I. Cæli 1.72.* quò una gleba, & tota Terra fertur: Ignis, & Scintilla feruntur in eundem locum, ergo.

Respondeo: quòd sicuti accidentia alia sunt generica, alia sunt specifica, vt pater, ideò ex eo, quòd Cælum, & Elementa conueniant in aliquibus accidentibus, non bene arguitur, quòd conueniant in natura, & essentia specifica; nam illa accidentia, si leuitatem excipias, generica sunt, & ideò ex illis arguitur Cælum, & Elementa conuenire in ratione generica, scilicet in materia prima, quod vltro admittimus. De leuitate dico, eam quidem esse accidens specificum Elementi ignis, sed non omne, quod omnibus supereminet, est leue, id enim verificatur solum de ijs, quæ sursum mouentur, non de ijs, quæ mouentur circulariter, & in hoc sensu debet intelligi *Arist. l. cit.*

Ad Confirmationem Respondeo, illam particulam cæli, nec ascendere, neq; descendere, sed stare, & quiescere, violenter rationem ob defectum virtutis moue.

Obij-

Obijcies secundò si cælum esset naturæ distinctæ ab elementis, maximè quia mouetur circulariter, Sed hic motus conuenit etiam Igni, & Aeri, vt patet ex impressionibus ignitis, & aqueis, vt patet ex fluxu, & refluxu, ergo.

Confirmatur quia; cælum non habet motum simplicem, sed mixtum, nam aliquæ partes cæli ascendunt, aliquæ descendunt, & Planetæ modo accedunt ad centrum mundi, modo à tali centro recedunt, ergo.

Respondeo. motum circularem cælo per se, & naturaliter conuenire, Igni vero, aut Aeri omninò per accidens: similiter fluxum, & refluxum non esse naturalem aquæ, & præterea eum, motum fluxus, & refluxus, non esse circularem. Ad confirmationem

Respondeo: Motum cæli esse maximè regularem, & vniformè, & solum respectu nostri modo ascendere, & modo descendere; Planetarum motus vniformitas non est mensuranda ex centro mundi, sed ex centro sui, circa quod mouentur, & à quo regulantur, idè licet respectu centri mundi Planetæ non moueantur vniformiter, vniformiter tamen mouentur circa proprium suum centrum.

Obijcies tertio. In cælo sunt virtutes, & qualitates actiue elementorum, ergo & naturæ eorundem; tenet consequètia quia, virtutes Elementorum sunt eorundem Proprietates, quæ sunt ab Essentia eorum, atquè natura inseparabiles.

Antecedens probatur, quia in cælo sunt calor, & humiditas, dicitur enim Sol calidus, Luna humida ab Astronomis, ergo: Confirmatur quia in cælo, & Planetis sunt veri colores, nam Sol apparet aureus, Luna argentea, sed colores sunt qualitates secundæ, quæ oriuntur ex primis, seu ex primarum mixtione, ergo.

Respondeo. Qualitates primas, calorem, humiditatem, frigus, & siccitatem reperiri virtualiter, seu causaliter, non actu, & formaliter in Cælis; Colores verò non esse reales, sed apparentes, vt benè probat *Contarenus lib. 5. de Elementis*.

Obijcies quartò. Auctoritates tum Aristotelis, tum etiam Sanctorum Patrum, Aristotelis quidem, quia 3. *cali* 1. 1. & 2. *Met.* 1. 5. docet ex Elementis compositum esse cælum, & partes cæli, vt sunt astra. Sanctorum Patrum, quia ipsi, vt referunt *Conimb. de cælo* c. 1. q. 1. ar. 1. & *Molina* 1. p. de operibus sex dierum disp. 3. & 5.

Beccanus in *Manuali tract. 4. c. 2.* docent, ex Scripturis in

cœlo esse Aquas, vt patet ex illo Plalmi, & aquæ, quæ super cœlos sunt, & ex illo *Gen. I.* Diuisit aquas ab aquis.

Respondeo. Et primò cum Aristotele, ibi nomine cœli intelligere Vniuersum, quod ratione Sphericæ figuræ cœlo assimilatur, & clarè patet ex *I. cali. 1.96. Totum ac Vniuersum cœlum dicere, consueuimus.* Ad auctoritatem Sanctorum Patrum, dico, eos loqui non ex sensu Scripturæ, sed ex sensu Platoniorum, vel nomine cœli intelligere aerem; vel denique per Aquas, intelligi cœlum chrySTALLINUM, quod est simile aquæ ob sui transparentiam, & homogeneitatem, quia nullum habet astrum.

LECTIO III.

An Cœlum constet ex Materia eiusdem rationis cum materia Sublunari.

Cœlum constare ex Materia, & Forma, certum est in Schola Aristotelis, quæ nullum agnoscit corpus naturale, quod non sit Compositum ex materia prima, & forma; licèt enim de possibili, & supernaturaliter Doctissimi Recentiores quam plurim; vt *Amicus suo tom. de Mundo tract. 4. q. 2. Dub. 2. Arriaga* hic, & alij, satis probabiliter defendant; possit dari substantiam materialein completam, & simplicem, quæ non sit composita ex Materia, & Forma, sed sit sola materia capax Quantitatis, de facto tamen, & naturaliter, nulla est substantia completa, quæ non sit composita ex materia, & forma.

Quæritur modò; an materia cœli sit eiusdem speciei cum materia corporum sublunarium.

Pono ad intelligentiam, & solutionem Quæstionis; Materiam primam dupliciter posse considerari. Primo quidem nudam, & spoliatam contrarijs qualitatibus, quo pacto solent Scholastici appellare materiam remotam. Secundo posse considerari affectam contrarijs qualitatibus, quo pacto illam appellant materiam proximam, quia vt est affecta contrarijs qualitatibus, est proxima radix corruptionis, corruptio enim à contrarijs qualitatibus originatur, quidquid enim corrumpitur à contrario corrumpitur: axioma est Aristotelicum ab omni Schola, & communi omnium suffragio receptum, & approbatum.

Primo ergo Nonnulli, ponunt materiam Cœli esse diuersæ speciei

speciei à materia Corporum sublunarium.

Ità Thomista quamplurimi, quos fusè relatos sequuntur Ruuius lib. I. c. 2. q. 6. Amicus tom. de Cælo tract. 4. q. 3. dub. I. nu. 6. Conimb. I. de cælo c. 2. q. 6. Suarez disp. 13. sect. II. Fonseca 2. Met. c. 3.

Secundo alij ponunt, materiam cæli esse eiusdem rationis specificæ.

Ità Antiquissimi Philosophorum, quos citant Ruuius, & Amicus ubi supra, Scotus in 2. dist. 14. qu. I. §. secundum Theologos Bonau. ibidem dist. 11. q. 1. Aegidius eadem dist. & opusc. de materia cæli, Ocham q. 12.

Tertiò. Subtilissimi Recentiores neutram in partem se determinant, quia putant, id esse omnino incertum, & non posse ratione naturali demonstrari.

Ità Arriaga Disp. Vltima sect. I. n. I. Francisc. Le Reys disp. 2. ar. 1. Ouied. dist. Vnica Punt. 2.

Conclusio. Cæli materia non est diuersæ speciei à materia sublunari.

Probaturn primò clarissimis verbis Aristotelis, quem proferre Auctores contrariæ Sententiæ, gloriântur: nam I. celi c. 8. v. 68. ex eo probat, non esse plures Mundos, sed vnum, quia omnia Corpora naturalia eandem habent naturam, & eandem potentiam; imo si plures essent Mundi, hi quoque constarent ex corporibus eiusdem naturæ, quod si negaueris, omnia corpora Mundi vnus, qui de facto est, esse eiusdem naturæ, & eandem habere potentiam, iam Mundus iste non verè, & vniuocè, sed æquiuocè vnus diceretur. Audi verba formalia. Prætered Mundus Vniuersus ex eisdem naturis constare cùm sint eiusdem naturæ, necesse est Corporum etiam vnumquodque potentiam eandem habere, necesse est, vt Terram, Ignem, & ea, quæ inter hæc collocantur, si enim æquiuoca hæc sunt, & non secundum eandem speciem dicuntur ea, quæ illic, & quæ apud nos sunt, & ipsum Vniuersum æquiuocè diceretur Mundus.

Probaturn secundo Argumento, quo vsi sunt Nominalium, & Recentiorum Scholæ, ad impugnandos modos rerum, puto enim eo efficaciter concludi, materiam cæli non esse diuersæ speciei à materia sublunari; sic, nō sunt multiplicanda entia speciei diuersæ sine necessitate I. Phys. t. 50. Deus enim, & Natura nihil frustra faciunt I. celi t. 32. sed nulla est necessitas ponendi materiam cælestem specie differre à sublunari, ergo.

Maiores probatur quia ; si quæ esse necessitas , maximè esset ad saluandam cœli immortalitatem, & incorruptibilitatem, sed hæc etiam saluatur posita materia, quæ sit eiusdem speciei, dummodo tamen contrarijs qualitatibus careat, omnis enim corruptio non à materia ut sic , sed à materia, ut affecta contrarijs qualitatibus oritur, ut innumeris suæ doctrinæ locis, sepius repetit Arist. præcipuè verò *Libel. de Longitudine; & Breuit. Vita c. 2. Quare cui non est contrarium, & ubi non est, impossibile est corrumpi, quid enim erit corrumpens, si contrarijs quidem corrumpi accidit solis; ubi notanter est positus terminus exclusiuus, solis. ut omnino excluderetur materia à numero Causarum, à quibus corruptio originetur, unde I. celi l. 20. ex eo probat, Cælum esse ingenerabile , & incorruptibile, quia caret contrarijs ; rectè videtur natura id, quod futurum erat ingenerabile, & incorruptibile, exemptis à contrarijs, in contrarijs enim est generatio, & corruptio, ergo quamuis in Cælo ponatur materia eadem specie cum hac sublunari, non proinde sequitur, non fore Cælum Incorruptibile.*

Confirmatur; in cælo ponitur Quantitas eiusdem rationis specificæ cum quantitate sublunari, & tamen non sequitur Cælum fore partibile, & diuisibile, sicuti nunquam visa est pars aliqua Cœli diuisa à reliquo corpore, ergo quamuis in Cælo materia eadem specie ponatur, non tamen sequitur, illud fore corruptibile, sicuti nunquam per tot sæcula vnquam visa est aliqua pars Cœli corrupta, aut destructa.

Quod autem cælum careat contrarijs qualitatibus præter Autoritatem Arist. supra cit. redditur ratio à posteriori, & à priori. Ratio à posteriori desumitur ex motu circulari, qui est proprius, & naturalis corpori cælesti, motui enim circulari, nullus alius motus est contrarius, illi enim non est contrarius motus rectus, nam vno motui recto v.g. sursum est contrarius alter motus rectus deorsum, motus ergo rectus opponitur alteri motui recto, non circulari, alijs vni duo essent contraria, motui enim sursum esset contrarius motus rectus deorsum, & motus circularis: contra Philosophum I. celi l. 23. unus motus vni est contrarius. si ergo cælum caret motu contrario, caret etiam qualitatibus motibus contrarijs, ergo & qualitatibus actiuis contrarijs, à quibus motuæ originantur.

- Ratio à Priori desumitur ex ipsa essentia, & formalitate cælestis formæ, hæc enim intrinsecè est incorruptibilis, & exigit essen-

essentialiter habere vnionem inseparabilem cum materia, ergo vti sui incorruptibilitatem, & immortalitatem seruet, sua virtute resistitiua impedit, ne in Cœlestem materiam introducatur qualitates contrariæ, à quibus omnis corruptio, perniciēs, & interitus naturaliter oritur. Quod autem forma cœlestis intrinsecè sit incorruptibilis debet omnino tanquam certum supponi etiam ab Auctoribus contrariæ Sententiæ, nam, vt benè notat *Amicus hic. tract. 4. q. 3. dub. 1. art. 1.* præsens Questio agitur inter eos, qui ponunt Cœlum Incorruptibile, qui enim cœlum ponunt corruptibile absque controuersia admittunt, illud constare ex materia eiusdem rationis cūnt sublunari, & elementari.

Obijcies primò. Auctoritatem Aristotelis *12. met. c. 2. & 10. Cuncta verò quæcunque mutantur, materiam habent, Sed diuersam, nam & ipsorum sempiternorum quæcunque non sunt generabilia, scilicet latrone mobilia, attamen non generabilem, sed vnde quo.*

Respondeo, oprime dici materiam esse diuersam, quia materia cœlorum, seu sempiternorum caret qualitatibus contrarijs, quibus non caret materia Inferiorum, diuersa ergo materia proxima, non remota, quæ Responsio clara est ex ipsiusmet verbis clarissimis eiusdem textus, subdit enim Philosophus, *attamen non generabilem, sed vnde quo.* quasi diceret. sempiterna, & quæcunque generabilia non sunt, sed loco mobilia, non habent materiam generabilem, & affectam contrarijs qualitatibus, à quibus habentur originaliter generatio, & corruptio, sed materiam vnde quo, id est, materiam, ex qua constet, & componatur tanquam ex potentia remota.

Obijcies secundò, materia cœli est incapax formarum Sublunarium, nunquam enim potest transmutari, & amissa forma cœli, formas elementares admittere, ergo materia cœli est rationis specificæ omninò diuersæ à Materia elementari, quæ transmutationi subiecta est.

Neque dicas. In materia cœli esse potentiam remotam ad immutationem; nam ista potentia remota materiæ videtur fictitiè excogitata ad effugiendam vim argumentorum in contrariū, ista enim potentia remota nunquam reducitur ad actum, est ergo omnino frustratoria, vnde bene notat *Arist. 1. cœli t. 32. frustra calceamentum hoc dicimus, cuius non est calceatio.*

Respondeo. Idem argumentum posse vrgeri in materia cœlorum, nam materia Solis, verbi gratia, nunquam potest trans-

mutari, admittendo in se formam Lunæ, & tamen materia Solis non est diuersa specie à materia corporis Lunariorum, sicuti ergo quamuis cœli, & astra non possint inuicem transmutari, non sequitur eorum materias esse diuersas specie, ita quamuis Corpora cœlestia; & elementaria non possint inuicem immediatè transmutari, non inde sequitur, cœlestem materiam esse specie diuersam ab Elementari, eodem modo infringitur aliud argumentum, quòd frustra sit, & fictitiè excogitata potentia ista remota, nam tale aliquid debent vel inuiti respondere Aduersarij.

Reuera autem talis potentia remota non est frustra, quia licet non reducat ad omnem prorsus actum, ad quem reducibilis est, reducit tamen ad aliquem actum, habet enim aliquam formam cœlestem, neq; enim frustra est potentia visiva in Homine, quâuis non eliciat omnes actus visionis, quos potest elicere; & iuxta hæc sunt intelligenda verba cit. *Arist.*

Obijciens tertio. Homo quamuis habeat animam immortalem, & corpus mortale, non dicitur immortalis, sed mortalis, ergo si cœlum ponatur habere formam incorruptibilem, & materiam, cui non repugnet corruptio, debet potius dici corruptibile, quàm incorruptibile.

Respondeo. disparitatē esse quia. Anima Rationalis est vnita materiæ, & corpori modo solubili, & separabili, vt patet in morte Hominis, quæ nihil est aliud, quàm separatio Animæ à Corpore. At forma Cœli est vnita materiæ Cœli modo inseparabili, aut incorruptibili, patet enim numquam à materia Cœli fuisse separatam formam cœli, ideo cœlum dicitur simpliciter, & absolutè incorruptibile.

Colligite ex his primo. Cœlum esse omninò incorruptibile, non quidem ratione materiæ, quæ quantum est de se capax est transmutationis, & corruptionis, quatenus est origo, & radix omnis corruptionis, & transmutationis, sed ratione formæ nobilissimæ, & propemodum Diuinæ, quæ omnem transmutationem, & corruptionem à Cœlo reijcit sua virtute resistitiua impediens, ne qualitates contrariæ in materiam Cœlestem introducantur.

Colligite secundo, posse, & de facto esse allatam rationem, naturalem ad probandam identitatem specificam materiæ cœlestis, & sublunaris; argumentum enim petitur ex eo, quòd non sint multiplicanda entia sine necessitate, magni sit ab illis iisdem Authoribus, negantibus talem Demonstrationem, eoque vrun-

tur cùm Nominalium Schola ad impugnandum modum Relationis, & alias entitates modales, ergo etiam in presenti materia, Argumentum illud habet suam vim, & efficaciam iuncta præsertim facili Argumentorum in contrarium solutione; non enim semper afferenda Demonstratio mathematica, nec de omni obiecto potest haberi, vt ex Arist. alibi ostēdi, in qua re est notabilis *tex. I. Meth. c. 9. Eruditi est, eatenus exactam in unoquoque genere, explicationem, requirere, quatenus dari eius natura patitur, nam & Mathematicum utentem suasionibus approbare, & ab Oratore demonstrationem exigere, simile vitium videtur.*

DISPUTATIO VII.

DE PROPRIETATIBVS, SEV

ACCIDENTIBVS COELI.

Proprietates Cæli, seu maius dicere, Accidentia sunt, *Motus, Soliditas, seu Fluiditas, iuxta varias Sententiâs, Lumen, & Influentia.* His perspectis innotescet melius; & clarius se prodet *Essentia, & Natura Cælorum, ut enim habemus ex Arist. I. de Animat. II. Accidentia conferunt secundum magnam partem ad cognoscendum ipsum quid est, ubi per Tò quid est, essentia; & Natura rei phrasi Aristotelica intelligitur.*

LECTIO I.

An Cælum moveatur, & quo motu.

Nullus Philosophorum, aut Astronomorum, quem legerim, ponit Cælum, & Terram, utrumque, scilicet hoc corpus naturale, esse immobile, & stare, aut utrumque moveri, sed om-

nes in duas extremas abiere Sententias: Aliqui enim Cælum moueri, & Terram stare, & quiescere; alij Terram moueri, & Cælum stare, atque quiescere, posuere.

Vt quid probabilius dici possit, videamus.

Suppono, Quæstionem hanc esse de motu locali, nam nullo alio genere motus potest Cælum, aut Terra, moueri, cum enim Viuentia, & Corpora animata non sint, non possunt moueri motu spiritali Intellectionis, qui est proprius Animæ Rationalis; nec motu sensationis, qui est proprius animæ sensitiuæ; nec denique motu augmentationis, aut generationis, qui est proprius animæ sensitiuæ, nec denique motu augmentationis, aut generationis, qui est proprius animæ vegetatiuæ; solum ergo est Quæstio de motu locali.

Suppono secundò. Motum localem alium esse mixtum, alium simplicem. Motus mixtus competit corpori mixto; motus simplex aut. est rectus, aut circularis, Circularis fit circa medium, & per lineam circularem aequè distantem à Centro Mundi, seu à medio; Motus rectus fit per lineam rectam, & est vel à medio, & sursum; vel ad medium, & deorsum, motus verò mixtus est is, qui neque fit per lineam circularem aequè distantem à Centro Mundi, neque fit per lineam rectam sursum, aut deorsum, sed est compositus ex ascensu, & descensu, quate motus molæ fabri, aut rotæ figuli, quamuis circularis sit, est mixtus, quia constat ex ascensu, & descensu, & non fit per lineam circularem aequè distantem à medio, siuè à Centro Mundi.

Suppono Tertio, quatuor motus locales excogitatos fuisse ab Astronomis in Cælo. Primus appellatur motus Diuinus, qui peragitur spatio viginti quatuor horarum, & fit ab ortu in occasum, & tribuitur Primo Cælo, seu Primo mobili; alter est motus retrogradus proprius Planetarum, quo motu videtur Planetæ retrogredi, & retrocedere ab occasu in ortum, Tertius denique est motus, quem appellant trepidationis, seu motum accessus, & recessus, & hoc mouentur stellæ fixæ, quæ tunc modo accedunt, modo recedunt, videntur quodammodo tremere, & trepidare. Quartus, quidam motus tardissimus est.

De motu diurno, qui spatio viginti quatuor horarum absoluitur, & per quem Dies naturalis constituitur, potissimum præfens Difficultas procedit.

Fuit ergo Antiquorum Sententia, Terram moueri circularitèr, quæ quæ versùs circundare Cælum, & Cælum quiescere, ac stare immotum.

Ità *Nichæus Syragusius, Philolaus Ponticus Heraclides, & Etphantus, Pythagoras apud Sax. q. 13. art. 2. & q. 24. & apud Symp. de Placitis Pythag.*

Ex Recentioribus Astronomis sequuntur hanc Sententiam, *Copernicus de Reuolut. orbium celest. Didacus Astunica in Job Galileus in quadam epistola ad Magnum Hetrurie Ducem. Guilelmus Gilbertus in suo opere de magnet. lib. 6. Andreas Casalpinus lib. Peripat. quest. q. 4.*

Altera Sententia ponit, Terram immobilem, seu inmotam stare, atque quiescere, Cælum circa Terram moueri.

Hanc sententiam docuit varijs suæ Doctrinæ locis *Aristoteles*, quem omnes *Philosophi, Theologi, Astronomi omnes* sequuntur, imò *Sacra Card. Congregatio deputata ad Indicem Libr. sub Paulo V. peculiari Decreto edito die 5. Martij Anni 1616.* Contrariam opinionem omninò damnauit, & reiecit.

Conclusio. Cælum, & Astra mouentur, Terra stat immota, & quiescit.

Probaturs primò Auctoritate Sacræ Scripturæ. *Eccles. 1. Terra autem in æternum stat, oritur sol, & occidit, & ad locum suum reuertitur, ibique renascens gyrat per meridiem. Psalm. 92. firmavit orbem terræ, qui non commouebitur Ps. 101. fundasti Terram super stabilitatem suam, non inclinabitur in sæculum Sæculi Paralip. 16. Deus fundauit orbem immobilem.*

Probaturs secundò, Auctoritate *Arist. 2. Cæli à t. 73. vsque ad finem, ubi ex professo probat, Terram esse Centrum Vniuersi, esse in medio, & immobilem stare, eodem lib. 2. c. 3. t. 18. necesse est igitur Terram esse, hæc enim quiescit in medio.*

Confirmatur ex historia *Iosue 10. ubi, vt miraculum narratur, quòd Sol orante Iosue steterit, & Luna spatio vnus Diei.*

Confirmatur secundò ex historia *Ezechix, in cuius gratiam Deus reduxit umbram per liueas, quibus iam descenderat in horologio Achaz terrorum decem gradibus, vt habetur 4. Reg. 20. retrò redijt Sol, & addidit Regi vita.*

Probaturs Tertio: Auctoritate Sanctorum Patrum, qui docent Cælos ab Angelis moueri, vt apertè docent *Philastrius, & Dioscorus Tarsensis apud Tannerum disp. 6. q. 4. d. 3. ubi oppositam Sententiam hæresis, vel erroris nota damnatur; denique accessit Decretum Sacræ Congregationis, de quo supra.*

Probaturs quarto pluribus Rationibus, Quarum Prima est. Terra est Centrū respectu Vniuersi; imò est Contrum respectu Cæli, & qui-

quidem Centrum grauitatis, vt loquuntur Astronomi, sed de ratione Centri est, quòd moto Corpore, non moueatur, ergo Terra stat immobilis, & quiescit. Maior patet quia; ad Centrum requiruntur duo, & quòd sit in medio, & quòd sit ferè insensibile, vtrumque habet Terra, quæ & est in medio totius Vniuersi, & Celi, & respectu vtriusque se habet, vt punctum, vt communiter admittunt Astronomi. Præterea omnia grauiatendunt ad Centrum, sed omnia grauiatendunt ad Terram, ergo ipsa est Centrum. Minor etiam facillè probatur quia, hæc est differentia inter centrum grauitatis, & magnitudinis, quòd Centrum grauitatis illud est, quòd moto Corpore non mouetur; Centrum verò magnitudinis est illud, à quo lineæ ductæ ad circumferentiam sunt æquales, ergo.

Secunda ratio est, quia si Terra moueretur, vel moueretur motu recto, vel moueretur motu circulari, neutrum dici potest, ergo; non potest moueri motu recto, quia versus quamcunque partem moueretur, ascenderet, patet quia, moueretur versus Cælum, quod vndeque Terram circumambit, & claudit. Sed nec potest moueri motu circulari, aliàs sequeretur, Vrbes ferè singulis Horis Climata, & Zonas mutare, quod est contrà experientiam, Nostra enim Neapolis, quam incolimus, semper eadem verna, temperie, semper eadem Cæli benignitate fruitur, vix medio hyeme frigoris rigorem sentimus, & æstate media caloris incendia facillè toleramus temperantibus Zephyris continuo flantibus Aestus, Solisque ardores, ergo.

Confirmatur quia: quòd moueretur circulariter, (excepta prima Sphæra,) moueretur pluribus motibus, & obliquè ferretur, sed Terra non potest moueri pluribus motibus, aut obliquè ferri, quia tunc non vniuniformiter se haberet ad Stellatfixas, & tamen oppositum patet ad sensum, oriuntur enim, & occidunt stellæ fixæ semper in eodem loco respectiuè ad Terram, ergo.

Tertia ratio est quia. Idem est motus totius, & partis, vt supra probauimus ex *Arist. 1. Celi l. 72.* Sed videmus partes Terræ solo motu recto ad medium moueri, ergo & tota Terra ad medium, & ad seipsam mouetur.

Quarta Ratio est quia, omne Corpus naturale adepto suo fine, & loco quiescit, sed locus naturalis Terræ est in medio, ergo quiescit, & non mouetur.

Respondebis cum Tycho Brahe *Epist. ad Mathematicum Lantgrauianum*; Terræ locum non esse medium Vniuersi, & Cæli,

Cæli, quia in tali medio fedet Sol, & Terræ locum esse in medio Planetarum, ita ut sub se habeat, Venerem, Mercurium, & Lunam, supra verò Martem, Iovem, & Saturnum.

Sed contra est. Terra est Corpus grauiissimum, ergo non potest esse suprâ Ignem, & Aerem, imò & supra aliquos Planetarum, grauiissimum enim substat omnibus, sicut leuissimum omnibus supereminet: ex 4. *Cælit.* 26. Deindè Sol, sicuti Pater est luminis, ita debet omnibus Planetis lumen impartiri, sed id melius præstat, si ponatur in medio Planetarum, ergo non in medio Mundi, se in medio Planetarum debet Sol poni.

LECTIO II.

Argumenta Contraria solvuntur.

Non desunt diuersi Generis Argumenta, quibus Terræ Motum, & Cæli Quietem conentur euincere Auctores Contrarię Sententię.

Obijciunt ergo primò. Auctoritatem Sacrę Scripturę *Psal.* 113. *a facie Domini mota est Terra. Iob.* 9. *qui commouet Terram de loco suo, & columnę eius concutiuntur.*

Confirmatur primò quia Terra hebraicè dicitur, *eretx*, quod currere, & circumuolui significat. Confirmatur secundò Auctoritate *D. Augustini.* 2. *de Gen. ad. litteram c.* 10. *Ita rem posse soluari per metum Terra immoto Cælo, sicut ab alijs saluatur per motum Cæli immota Terra.*

Respondeo primò. ea Scripturę loca esse intelligenda de motu Terræ secundum eius partes, non secundum totum, vel intelligi de motu Terrę, cuius duo genera assignat *Arist.* 2. *Meteor.* 2. tremor, & pulsus; tremor fit, cum Terra modò ad hanc, modò ad illam partem inclinatur; pulsus, cum ex imo Terra concutitur, & sursum, deorsumque iactatur; qui motus non in omni Regione, & omni Tempore, sed rarò, & aliquibus in Regionibus, præsertim vero in Insulis, & locis cauis, atque fungosis accidit.

Ad primam Confirmationem dico, fortassè Hebræos fuisse in illa opinione, vel Terram dici, *Eretx*, ex motu secundum partem. Denique patet *D. Augustinum* loqui de possibili, non de facto, neque enim putandum est, *D. Augustinum* voluisse apertis testimonijs

monitiis Sacre Scripturæ in contrarium, contradicere.

Obijcies secundò Auctoritatem Arist. qui 2. *Phys.cit.3.* Definit naturam, quòd sit Principium motus, & quietis, ergo Terra mouetur etiam aliquando. Confirmatur quia, ex eodem *Arist.lib.4. Cali t.21.* graue est, quod mouetur deorsum, & leue sursum, ergo Terra saltem motu recto deorsum fertur, & 1. *Cali t.27.* habet, quo una gleba, & tota Terra fertur; sed partes Terræ tendunt deorsum, ergo.

Respondeo ad primum locum, naturam esse Principium motus, & quietis, ità vt particula, ET, sumatur disiunctiue, non copulatiue.

Præterea dico, Terram quoque moueri, & quidem motu naturali, quando extrà proprium locum, & sedem violenter detinetur; at non quando est in propria sede, & loco. In eodem sensu intelligenda sunt, & explicanda alia verba Arist.

Obijcies tertio. Terra indiget Cælo, & non Cælum Terra, ergo potius Terra voluitur circà Cælum, quàm è contrà, vt caro, quæ assatur, voluitur circà ignem, non è contrà.

Confirmatur quia; non debet fieri per plura, quod potest fieri per pauciora, sed per motum solius Terræ potest regi Vniuersum, ergo debet poni, Terram solam moueri, & negare motus plures, & plures Orbium Cælestium, & Stellarum.

Confirmatur secundò. Facilius mouetur Terra, quàm orbes cælestes, Terra enim minimæ est quantitatis comparatiue ad Cælum, respectu cuius ab Astronomis dicitur esse inftar puncti, & quælibet Stella minima maior est Terra.

Respondeo. Terram indigere Cælo, vt ab illo regatur, & gubernetur, & consequenter passiuè se habere respectu Cæli, à quo & lumen recipit, & inluxus, & ideo non potest circà Cælum moueri, aliàs actiue se haberet, & potius regeret, quàm regeretur.

Præterea regimen Vniuersi meliùs saluatur per motum Cæli circà Terram, quia ità meliùs Stellæ, & Planetæ communicant suos influxus, & qualitates omnibus Terræ partibus.

Ad primam Confirmationem. non quæ benè saluari per solum motum Terræ regimen Vniuersi, vt patet ex Rationibus adductis; Præterea Opinio probabilis est, vnum esse Cælum, sicuti vna est Terra.

Ad secundam Confirmationem dico, facilius parua corpora, quàm magna moueri, quando cætera sint paria, at non sunt cætera

terra paria in casu nostro, quia Terra, quauis partium sit corpus respectiue ad Cælum, tamen summè grauis est, vnde summa sui grauitate, & ponderositate, quàm difficillimè potest moueri.

Obijcies quartò. Motus primi mobilis est efficacissimus, ergo debet secum rapere non solum Orbes cælestes, sed etiam Terram; imò facilius Terram, quæ minor est, & non habet motum contrarium, quem tamen habent orbes cælestes inferiores primo mobili.

Respondeo; Terram esse summè grauem, & longè distantem à primo mobili, ideò non posse ab illo rapi.

Obijcies quintò. Saturnus, Mars, Venus, & Mercurius mouentur circà Solem; Stelle Borbonicæ mouentur circà Mercurium; Stellæ Medicæ circà Iouem, & denique Stellæ Austriacæ circà Saturnum, & vniuersaliter Stellæ minores mouentur circà maiores, ergo Terra, quæ est Orbis minor, mouebitur circà Cælos.

Confirmatur quia. Terra est figuræ circularis, sed talis figura est maximè apta ad motum circularem, ergo. Minor probatur, quia Cælum Empyreum, quia quiescit, est figuræ quadratæ, ergo Terra ideò est figuræ circularis, quia circulariter mouetur.

Respondeo. grauitatem, & ponderositatem Terræ ob stare, nè moueatur motu circulari, quæ grauitas, & ponderositas non reperitur in stellis assignatis.

Ad Confirmationem dico. Terræ à Platoniciis fuisse attributam figuram Cubam, ab alijs fuisse attributam Figuram Tympani, ab alijs figuram Pini, vt refert *Damasc. lib. 2. de Fide Orthodoxa c. 9.* Sed dato, Terram esse figuræ sphaericæ, indè non argui, eam circulariter mouèri, nam illa figura licet conferat ad motum, non tamen est contraria quieti, & quidem ideò Terra est figuræ globosæ, & sphaericæ, vt partes eius, quæ semper ad Centrum, & ad medium mouentur, æqualiter distent à Centro.

Obijcies sextò: Corpori nobilissimo debetur nobilissima passio, sed Cælum est corpus nobilissimum, ergo illi debetur potius quies, quàm motus, quies enim nobilior est motu, omnia enim Corpora naturalia ad quietem, tanquam ad finem, ordinantur.

Respondeo. Corpora naturalia ordinari ad quietem in proprio

prio loco, sede, & Centro, & ideo quies terminans motum Corporis ad proprium locum, est perfectior motu, sed quies opposita motui ordinato ad communicandam suam virtutem pluribus, & ad regimen Vniuersi non est nobilior motu, sed ignobilior motui, qui Cœlo competit etiam dum est in proprio loco, non est otiosè, sed communicatiuè, & actuosè.

Obijcies septimò, existentibus in naui videntur litora, & Vrbes moueri, cùm naui ipsa reuerà moueatur, & consequenter motus ille litorum, & Vrbiũ, est apparens, non verus, & realis, ergo à pari, motus Cœli non est realis, sed apparens habitantibus in Terra, quæ verè, & realiter in gyrum mouetur, & circumferitur.

Nequè dicas: Sensus decipi, & falli, at rem hanc iudicandam esse intellectu, & ratione.

Contra enim est quia; ex *Arist. I. de Gen. t. 19. sensus scientie habet virtutem, & I. Cœli t. 22. Videtur Ratio yis, quæ apparent attestari, & ea, quæ apparent, rationi.*

Respondet; ex eo conuinci euidentem disparitatem inter motum Terræ, & motum naui; quòd si quis existens in naui, sagittam Cœlum versus eiacularur, redit sagitta, non in naui, sed in locum, & situm longè à naui distantem; at è contra existens in Terra, sagittam eodem modo eiacularur, redit sagitta ad eundem situm, & locum, vnde eiiculata est; patet ergo Terram non moueri, sed stare; si ergo Terra stat, debet Cœlum necessariò moueri, nullus enim asserit, vtrumque hoc corpus stare, & quiescere, non ergo motus Cœli est apparens, sed verus, & realis.

LECTIO III.

Motor Cœli, & Rotator.

Suppono certum iam esse iuxta Principia Diuinæ, & Catholicæ Fidei, ac iuxta communem Theologorum, & Philosophorum sententiam, Cœlos non esse animatos; habetur enim in Concilio Lateran. *Cap. firmiter de Summa Trinitate, & Fide Catholica. Vbi non alia cognoscitur natura intellectualis præter Angelicam, & humanam.* Consequenter ex his certò deducitur, Cœlum à propria forma non moueri, vti mouentur

De Proprietatibus, seu Accidentibus Cæli. 275

cætera viuientia, & animata; ideo Cælo data est à natura figura globosa, quæ est omnium figurarum minimè motiua motu vitali, quia vt habet *Arist. 2. Cæli 1. 59. nullum habet Instrumentum ad motum, & 1. 49. docet*. Astra non moueri proprio motu, & à se, quia *nullum habent organum, neque dicendum est, naturam habuisse curam animalium, & hac tam pretiosa des- pexisse*.

Quia verò dantur corpora, quæ licet viuientia, & animata non sint, tamen à propria eorum intrinseca virtute mouentur, vt Elementa, quæ ab innata grauitate, & leuitate mouentur; siue deorsum, siue furtum, ideo locus est difficultati, An Cæli à propria forma intrinseca, vel innata aliqua virtute intrinseca moueantur, an ab extrinseco aliquo Principio, & Motore.

Suppono etiam, certum esse, non esse vllam repugnantiam in hoc, quòd Cæli à propria forma, aut innata aliqua virtute intrinseca moueantur, sicuti de facto mouentur Elementa; Proce- dit ergo difficultas de facto, & quid sit connaturalius nature, statui, & conditioni Cælorum; & quidem sermo est de principio non passiuo, sed actiuo, nam principium passiuum motus cælestis est materia prima, quæ Cælo, sicuti & omni corpori naturali intrinseca est, & altera pars componens.

Primò ergò. Nonnulli posuerunt Cælum moueri à princi- pio intrinseco, seu propria eorum forma.

Ità ex Antiquis *Democritus, Epicurus, et Straton Lamp. Sac- chus*, ex Modernioribus. *Io. Maior 2. Cæli c. 5. Alber. de Saxo- nia 8. Phys. q. ult. Voles. Contr. 11. Phys. Gab. in 1. dist. 12. qu. 1. Bassolis qu. 2. nouissimè Tassonus in suis Quæstis qu. 3. 5. et ali- bi posuit*, Cælum moueri à calore, quem etiam posuit, esse for- mam Orbium cælestium Tenentur huic sententiæ se subscribere omnes illi, qui posuerunt, Cælum esse animatum, & viuens, omnia enim animata, & viuientia se ipsis, & à propria forma, seu vita mouentur.

Secundò alij, ponunt Cælum moueri ab extrinseco Principio, quod licet aliqui dicant esse Deum; communiter tamen in vtra- que schola, Philosophica, scilicet, & Theologica, certum est, Cælum moueri ab extrinseca assistente intelligentia, seu Ange- lo, Auctores huius sententiæ susce- relatos habes apud *Amicum tom. de Calo 1. act. 5. dub. 2. art. 2. apud Conimb. 2. de Calo 1. 5. qu. 5. art. 2. Ruuium lib. 2. qu. 8. Quersam qu. 34. sect. 7. & alios innumeros.*

Imo *D. Thomas* qu. 6. de Pot. art. 3. putat sententiam Fidei, quod Angeli, seu substantiæ separatae moueant corpora cœlestia; *D. Bonau.* in 2. d. 14. ar. 3. qu. 2. docet, eam sententiam esse Rationi, & Fidei magis consentaneam.

Conclusio sit, Motor Cœli, seu Rotator est intelligentia assistens, seu Angelus.

Probatur primo. Auctoritate *Arist.* 8. Phys. t. 52. *moueri enim ab alio, et eorum, quæ sunt in Cælo quibusdam principijs inest, quæ secundum plures feruntur rationes.* 12. Met. t. 8. 43. *videmusque præter simplicem lationem totius, quam dicimus primam substantiam, et immobilem mouere, et coeteras etiam lationes, quæ errantium sunt, sempiternas, & paucis interiectis, necesse est harum quoque lationum vnamquamque à parte immobili, et æterna substantia moueri, & paulò infra. Constat itaque necesse est, tot substantias esse natura perpetuas, et per se immobiles, ac absque magnitudine ob causam prius dictam.*

Probatur secundo quia, omne corpus naturale, quod mouetur à propria forma, aut etiam motiua virtute intrinseca, mouetur ad acquirendum proprium, & naturalem locum, vt patet in elementis, & mixtis inanimatis, quæ mouentur virtute prædominantis elementis; iuxta verò animata, ita mouentur ab anima, vt tamen in ijs vna sit pars immota, quæ reliquas moueat. Sed Cœlum mouetur non ad acquirendum proprium locum, vt mouentur elementa, & mixta inanimata, quia semper sunt in proprio loco naturali, neque mouentur, ita vt in ijs vna pars immota reliquas moueat, quia Cœlum nec est animatum, nec in eo assignabilis est pars immota, quæ reliquas moueat, quia motus Cœli est vniformis, & regularis, atque adeo non est assignanda pars immota, & partes, quæ mouentur, ergo à propria forma, aut naturali virtute non mouentur.

Probatur tertio, quia in fine, & consummatione Mundi, Cœli quiescent à motu, ergo si de facto mouerentur ab intrinseca forma, seu virtute, quies illi esset violenta, & miraculosè per totam æternitatem in quiete illa perdurarent, quod est absurdum, ergo.

Quod autem motor Cœli, debeat esse substantia spiritalis, & immortalis, patet, quia, si esset substantia materialis, & corporea, in mouendo Cœlo defatigaretur, defatigatio enim conuenit potentijs indigentibus organo ad operandum, sed ex tali defatigatione maximum oriretur inconueniens, nempe deordinatio,

rio, & maxima confusio totius vniuersi, vnde habet *Aristot.* 2. *Cæli* t. 3. *Cælum moueri sine labore, quia nullam habet resistentiam ad motum, quo fertur, ideoque esse irrequiescibile, et, c. Physic. ult. docet, id, quod mouet circulariter, esse immobile, alias non posset continuare motum circularem, quia defatigaretur, et 12. *Met.* c. 8. monet, quod quia *Cælum* est irrequiescibile, debet moueri a substantia per se immobili, et aeterna. Quod etiam talis substantia debeat esse intelligens patet ex eo, quia motus *Cæli* est ordinatissimus, sed intellectus est causa ordinis, ex 1. *Met.* c. 2. ergo.*

Obijcies primo. Si motus *Cæli* esset ab extrinseco, talis motus esset illi violentus, quia motus ab extrinseco motore est violentus mobili. Confirmatur, quia si forma *Cæli* non moueret *Cælum*, esset in *Cælo* otiosa, quia ad nihil inferuiret, ergo. Respondeo, tunc motum esse violentum, quando ita est ab extrinseco, vt mobile resistat tali motui, in casu nostro *Cælum* non resistit, imò potius naturaliter ad talem motum inclinatur, ideo non est violentus.

Ad consumptionem nego, talem formam fore otiosam, quia inferuiret ad componendum *Cælum*, tanquam altera compars, & ad excipiendum motum ab intelligentia causatum.

Obijcies secundo. Si intelligentia moueret *Cælum*, vna intelligentia sufficeret ad mouendos omnes *Cælos*, sed hoc est contra *Arist.* qui 12. *Met.* t. 37. tot ponit intelligentias, quot *Orbes cælestes*, ergo.

Probatur sequela maioris, quia *Cælum* non habet grauitatem, nec resistentiam, ergo vnica sufficeret intelligentia ad omnes *Cælos* mouendos, & rotandos.

Respondeo. Plures ex Philosophis concedere sequelam illam maioris, & aliqui volunt, vel formicam, aut etiam Infantem positum extra *Cælos*, posse illos, vel vno digito mouere; Dico tamen non sufficere vniam intelligentiam ad omnes *Cælos* mouendos, quia intelligentia debet esse præsens *Cælo*, quod mouet, ad hoc, vt possit illi imprimere, & impulsu aliquem dare, sed vnus Angelus non potest esse præsens vni *Cælo* secundum omnes eius partes, imò, vt probant *Theologi* p. 1. q. 52, vnus Angelus ob limitationem sue præsentie, non potest esse simul præsens in *Cælo*, & in *Terra*; ergo neque potest esse præsens omnibus *Cælis*, qui inter se magis distant, quam *Cælum* à *Terra*.

• Dico igitur, vnam intelligentiam non posse mouere omnes Caelos ob eorum distantiam, & vastitatem; neque enim potest esse præsens omnibus Cælis.

• Obijcies tertio. Angelus non potest esse præsens, neque vni Cælo; & tamen quilibet Angelus mouet vnum Cælum, ergo, quod Angelus non possit esse præsens omnibus Cælis, non obstat, quo minus possit Cælus omnes mouere. Confirmatur, quia intelligentia mouet Cælum per intellectum, & voluntatem, sed intellectus Angeli se extendit ad omnes Cælus, ergo.

Respondeo, quod cum Cælum sit continuum, & magna sit virtus motiua in Angelo, potest Cælum totum mouere, quamuis vni parti tantum assistat, & præsens sit, vt Figulus mouet rotam, etiam si toti Rotæ non sit præsens.

• Ad Confirmationem dico. causare motum non esse actum intellectus, & voluntatis, sed potentie motiue, à qua causatur talis motus in Cælo, vnde sicut ait *Arist. 1. de Anima t. 64.* quod dicere *Animam irasci simile est, at si quis dicat, animam texere, aut edificare*, ita dicere, intellectum Angeli mouere, idem est, ac dicere, intellectum Angelicum texere, aut edificare.

LECTIO IV.

An Cæli sint solidi, vel liquidi.

NOro primo, non posse Philosophos naturales de soliditate Cælorum, sicuti nec de eorum numero quidquam determinare, nisi assumant personam astronomorum; quid enim in Cælis fiat, quidue agatur in regionibus illis, tam longè distantibus à nostro aspectu, nequie intellectus perspicere, quia opesentium, oculorum præferim, destitutus; à sensibus enim, præcipue vero ab aspectu, & oculorum ministerio; omnem nostram naturalem viri cognitionem testatur *Arist. 1. Met. 1.* & ipsa probat experientia. Astronomi ergo, vt aliquam ex regionibus illis remotissimis expiscarentur cognitionem, varijs instrumentis, & tubis magna diligentia, & arte factis conati sunt visum, & aspectum elongare; & in illas regiones inferre; obseruauerunt in Cælis plures motus, notas Stellas, & Cometas, quos deinde in Philosophantium scholas inuexere, & euulgarunt.

Hinc variæ Opinionēs, & Sententiæ Philosophorum, exortæ sunt, & omnes fundatæ in Observationibus factis ab Astronomis, ac in ipsorum Fide, & testimonio, vnde vel ipse *Arist.* 1. *Meteor.* 3. reprehendit quosdam ex Antiquis, quia non considerabant id, quod sufficienter per Mathematica, & Astrologica Theoremata, ostendebatur. Et 12. *Met.* c. 8. & 44. *Pluralitatem lationum ex peculiarissimâ Mathematicarum scientiarum, videlicet, ex Astrologia considerandam esse, ostendit.* Quibus tamen non obstantibus,

Noto secundo; non semper, nec omnibus Mathematicis Observationibus, esse cūm *Arist.* 12. *Met.* supracit. credendum; non semper, nec in omnibus Astronomum Fidei, & testimonium standum. Si quid præter ea, quæ nunc dicta sunt, hīs videatur, qui circa hæc versantur, diligere, utrosque, adhibere verò certioribus.

Et ratio ulterius est quia, Non omnes Astronomi conveniunt in iisdem observationibus, sed unus alteri contradicit; Aliquando Fides assensuum est suspecta, ut faretur Astronomorum celeberrimus *Tycho Brahe lib. 2. de Mundi Aetherii Phænomen.* c. 10. memb. 3. *Ibid. Hægecius apud Tychonem loco cit.* retractat suas observationes circa Cometam anni 1577. Sæpè errant Astronomi, accipiendo unam Stellam pro alia, & uā errasse iam circa dictum Cometam, notat *Tycho* ubi supra. Errant partim in computu, partim in lapsu temporis, quo fuit facta observatio vitio Horologii, vel quia instrumenta non fuerunt exacta, & idem *Tycho Nolcho* obijcit.

Videris planè quot erroribus observationes Astronomicæ subiectæ sint, ideòque benè *Ruuius lib. 2. de Cælo* c. 5. qu. 2. Observationibus huiusmodi non fidet, nisi per multas annorum centurias à pluribus Mathematicis, & Astronomis periculis probentur.

Noto tertio, Plures esse observationes, à quarum Fide dependet solutio difficultatis propositæ.

Prima est, Cælum, non solum moveri motu Diurno spatio 24. horarum ab ortu in occasum, sed etiam motu contrario ab occasu in ortum, Præterea moveri motu quodam laterali à Meridie ad Septentrionem, quo motu visum est quodammodo Cælum tremere, & trepidare, ideòque appellatus est ille motus trepidationis. Denique moveri motu quodam omnium tardissimo.

Secunda est. Planetas aliquando visos esse procedere, aliquando retrocedere, & esse retrogrados, aliquando inmotos stetitisse, ideòque dictos, Stationarios.

Tertia: eosdem Planetas modo ad nos accessisse, modo recessisse, modo appropinquasse Terræ, modo à Terra longè distasse, & remotos fuisse.

Quarta. In Sole, & Luna esse quasdam maculas in figura vallium, & montium, quibus propterea Luna modo gibbosa, modo demissa apparet.

Quinta. Mercurium, & Venerem apparuisse instar Lunæ plenæ, & orbiculatæ, & circa Solem volui, quod etiam observatum est de Stellis Medicæis, Borbonijs, & Austriacis circa alios Planetas.

Noto quarto. Certum esse in schola Aristotelica, non posse vni corpori simplici competere nisi vnum motum simplicem, & consequenter tot esse multiplicanda corpora cœlestia, quot sunt motus in Cœlo observati: Similiter quia certum est in eadem schola, Cœli motum esse maximè vniuniformem, & regularem, non posse varietates observatas in moribus Planetarum, & aliorum Astrorum vni motui convenire, aliàs non esset regularis, & vniiformis, ideòque illas varietates refundendas esse in varietatem, & diversitatem corporis cœlestis, per quod fit ille motus.

Prima ergo sententia, quam defendunt nonnulli Philosophorum, & Astronomorum antiquissimi, posuerunt Cœlos esse solidos: Hi tamen diuisi sunt inter se: nam aliqui pro multiplicitate, ac varietate motuum cœlestium, & planetarum, multiplicarunt, & variarunt numerum Cœlorum, statuerunt enim Cœlos undecim, præter Empyreum, Sedem Dei, & Beatorum, quorum septem pro septenario numero planetarum, & alios quatuor, nempe primum mobile, decimum Cœlum, ChrySTALLINUM, & Firmamentum, seu Cœlum stellatum, in quo sint 1022. notæ magnitudinis Stellæ.

Ita Ptolomæus I. *Almag. cap. I.* Plato in *Timeo* Ioseph I. *Antiq. I.* Philo lib. de Gigantibus, & alij innumeri non solum Philosophi, & Astronomi, sed etiam Sancti Patres, quos fuscè relictos lege apud Amicum tom. de Cælo tract. 5. q. 5. art. 2. Conimb. 2. de Cælo c. 5. qu. I. art. I. Avers q. 22. sect. 6.

Reliqui posuerunt Cœlos numero decem præter Empyreum, nempe septem pro septem planetis, octauum dant Stellis, nonum vocant

vocant primum mobile, decimum glaciale, seu ChrySTALLINUM, ita plures, quos citant *Conimb. ubi supra*, & refert *Arriaga disp. de Calo sect. 4 subsect. 1. nu. 46.*

Alij posuerunt vnum Cælum, circum circa fornicatum, in cuius circulis moueantur, & rotentur corpora planetarum, ita *Hurtad. hic disp. 2 q. 1. §. 20.* sed ante *Hurtadum*, *Lucillus Philalæus 2. de Calo com. 7. circa t. 51.* admisit vnum Cælum solidum, sed in eo plures canales, cavitates, seu spiras, per quas planetæ mouerentur, & rotarentur.

Iterum illi, qui vndecim, vel decem Cælos admittunt, in quolibet Cælo totali admittunt Cælos parciales, numero tres; duos extremos, & vnum mediū; duos extremos faciunt in circuitu inæquales, in vna medietate vastiores, & profundiores, in alia subtiliores; orbem mediū in toto circuitu æqualem, duos extremos appellant concentricos, idest, habentes idem centrum cum centro mundi, tertium appellant eccentricū, quia non habet idem centrum cum centro mundi; mouetur planeta in tertio orbe, qui propterea dicitur, deferens planetam. Addunt denique Emicyclum, idest minimum circulum, seu circellum, intra quem planeta totetur, qui circellus est in orbe deferente; Putant hi Auctores per huiusmodi Cælos parciales saluare omnes varietates, & diuersitates motuum planetarum, & quod modò magis, modò minus distent à Terra, & quod modo sint retrogradi, modo Stationarij.

Hæc sententia mihi videtur esse valdè cognata, & affinis opinionioni eorum, qui, vt refert *Albertus Magnus lib. 2. Cæli tract. 3. c. 11.* asseriebant, plures esse Cælos, quam Stellas, imò & cuiuslibet Stellæ correspondere 182. Cælos, iuxta numerum dierum, quibus Sol transit ab vno Tropico ad aliud, quasi omni die transeat Stella ab vno Cælo ad aliud.

Moses quidam Aegyptius tot posuit Cælos, quot sunt Stellæ, siue errantes, siue fixæ.

Eudoxus, & *Calippus* celebres Astronomi tempore *Aristotelis*, vt patet. ex *12. Met. 1. 47.* posuere 47. aut etiam 55. Sphæras Cælestes, & distinctos Cælos.

Denique *Auerfa qu. 32. sect. 6.* ponit vnum Cælum solidum, & fixum, in quo sunt omnia astra tam errantia, quam fixa, ita tamen, vt Cælum sit distinctum in plures amplas Zonas, seu fascias, per quas astra discurrant.

Secunda sententia ponit tres Cælos, nempe *Empyreum*, Cælum

Ium stellatum pro Stellis fixis, tanquam nodis, & clavis in tabula, quod Aplane appellant Græci, idest, non errans, denique aliud Cælum magnum pro planetis, quod Græci Plane, idest, errans appellant: primos duos ponit solidos, & duos, tertium fluidum, & molle.

Ita Isidorus lib. 3. *Aethim.* c. 9. Riccardus Victorinus lib. 2. *Except.* c. 7. Anselm lib. 1. *de Imag. Mundi* s. 24. Hugo Carenfis *Ps. stillis* in Gen. Blancanus in *Sphæra* Arriaga *disp. unic. de Cælo* sect. 4. subsect. 2. Alios lege apud Taunernm 1. p. d. 6. q. 3. d. 2. n. 19.

Tertia sententia vnum ponit Cælum Sydereum, in quo sunt omnia astra, tam errantia, quam fixa. Ita sentit D. Ioan. Chrysost. *hom. 4. in Gen. & super Psal. 148.* ubi docet, contra dicere sacris litteris Philosophos, qui plures ponunt Calos. Iustinus Martyr. in *qu. Orthodoxorum* qu. 57. Theod. *qu. 11. in Gen.* Clement Romanus lib. 2. *Recognit. D. Amb. lib. 2. exam. c. 1. D. Damascen. lib. 2. Fide* c. 6. sequitur Outed. *disp. unic. de Cælo* p. 3. s. 2. Tychon. *Brake accuratissimus Astronomus lib. 2. Prognost.* c. 8. per quod astra mouentur, ut aues in aëre, pisces in mari. Et quidem tale Cælum Sydereum, liquidum, & molle ponitur.

Conclusio sit. Vnicum est Cælum Sydereum molle, & fluidum.

Probatur primò. Auctoritate Philosophi 12. *Meteor.* c. 8. & 10. *Cali* 1. 90. ubi multis probat, Cælum esse vnum, ergo fluidum; sic enim inestas satisfiat pluralitas motuum; & apparentiarum. Confirmatur, quia 1. *Meteor.* 3. idem probat Cælum non ignescere, quia Stellæ per Cælum discurrunt, quæ consequentia non benè inferretur, si Cæli essent solidi; imò totum oppositum deberet inferri, nempe, Calos ignescere, quia ex attritu corporis solidi, ignis elicitur, verba sunt. *Stellarum etiam discursus satis declarant, Caleste corpus neque calidum esse, neque ignescere.*

Probatur secundò. quia posita fluiditate Cæli, corporis cæteroqui vastissimi, & penè immensi, saluantur mira facilitate pluralitas motuum, & omnes apparentie; phænomena huiusque siue excogitata, siue obseruata diligentissimè ab Astronomis, & ex alia parte non multiplicantur tot Cæli totalos, paruales, Epicycli, circuli, & circelli, ergo tenenda vnius Cæli fluiditas.

Consequentia tenet, Antecedens probatur, quia plures motus obseruati ab Astronomis bene possunt tribui pluribus astris, ita ut

vnumquodque Aſtrum, aut quælibet conſtellatio habeat ſuum motum diſtinctum, atque diuerſum Planetæ verò magis diſtincti à terra, quando ſunt in concavo; videntur retrogredi, ſtare comparatiuè ad alios, qui citius mouentur, videntur procedere relatiuè ad eos, qui tardiùs, ergo data Cœlo fluiditate, ſaluantur omnes motus, & omnes apparentias.

Probatur tertio, quia data Cœlorum ſoliditate cogimur, vel plures, & plures Cœlos totales, & partiales, Epicyclos, Circulos, & Circellos concedere; imò & de nouo multiplicare ad multiplicationem apparentiarum, quas de nouo, & ſæpè cum errore deprehendunt Aſtronomi, vel ponere in Cœlo, corpore cetero qui perfectiſſimo, plures canales, cavitates, & ſpiras, aut faſcias, per quas aſtra diſcunt ſalua, & incolumi Cœli ſoliditate, ſed tot Cœlos ferè in infinitum multiplicare ad libitum Aſtronomorum ſæpè errantium, in obſervationibus, videtur eſſe contrà bonam Philoſophiam. Canales verò, cavitates, & ſpiras, ſeu etiam faſcias permeabiles admittere, videtur obſtare perfectioni corporis cœleſtis, quod propterea eſſet vndique perforatum, & in fruſta conſiſtum, ergo

Confirmatur; quia in ſcripturis habemus aſtra moueri, & planetas, non Cœlum, ergo pluralitas motuum, & apparentiarum eſt ſaluanda per multitudinem aſtorum, non Cœlorum. Antecedens patet ex *Iof. 10. ſtet Sol contra Gabaon, & alij locis*.

LECTIO V.

Argumenta in Oppoſitum ſoluantur.

Objiciunt primò Auctoritatem *Ariſt. 1. Cœli t. 41. vbi probat Ariſt. Aſtra in Cœlo non moueri, ſicuti piſces in mari, & aues in aere, & 1. Meteor. 3. habet motus rei ſolitæ, & Solis, & reliquorum Syderum aerem potiſſimum ſecernit*.

Reſpondeo: Ariſt. primo loco cit. totum eſſe in probando; Cœlum non eſſe infinitum, ſed tamen moueri tempore infinito, & moueri motu circulari, vbi, an aſtra moueantur, vti piſces in mari, aut aues in aere, ſin ſecus, nè verbum quidem facit. Ad ſecundum text. Solem dici ſolidum, ſumpta ſoliditate pro incorruptibilitate, non pro duritie; aliàs ſi Cœlum ſolidum eſſet, & durum, igneſceret per motum ſui, & ex collisione cum Aſtris;

quod

quod eodem tex. negat Arist. vt patet.

Obijcies secundo. Auctoritatem Sacrae Script. *Iob. 37. Tū forſitam cum eo fabricatus es Cœlos, qui ſolidiſſimi, quaſi aere fuſi ſunt.* Confirmatur, quia de *D. Paulo* legimus *1. Cor. 12.* raptum fuiſſe uſque ad tertium Cœlum, ergo non eſt vnum Cœlum, ſed plures, & tres ad minus.

Reſpondeo primo: per ſoliditatem intelligi incorruptibilitatem, vel ibi exaggerari Diuinam Omnipotentiam; quæ Cœlos alioquin fluidos, perinde ac ſi eſſent ſolidiſſimi, & duriffimi, immunes à corruptione, & illaſos ſeruat, vt ibi explicat *Pineda*. Ad confirmationem dico: nomine tertij Cœli intelligi Empyreum, quod dari, cercum eſt ex Sacris Scripturis, Theologis, & Patribus; vltra quod non nego, dari Cœlum aereum, quamuis enim non, ita propriè nomen Cœli poſſit aeri attribui, in Scripturis tamen, imò & in communi modo loquendi etiam aer, Cœlum appellatur; volucres Cœli, familiarior eſt ſermo, vel in ipſis Scripturis Sanctis.

Obijcies tertio; Si Cœli eſſent liquidi, ad nos deſluerent, quod eſt contrà experientiam, ergo; Antecedens patet in aqua, quæ ſi ponatur in ſublunio, ſtatim deſluit, & deſcendit.

Reſpondeo. Cœlos non eſſe fluidos, & liquidos, vt aqua, & oleum, verbi gratia, ſed ſicuti eſt aer, qui firmus ſtat in ſuis regionibus, & ad nos non deſcendit; aut deſluit.

Obijcies quarto. Si Cœlum eſſet liquidum, & per illud aſtra diſcurrerent, eſſet corruptibile, ergo. Sequela probatur, quia Aſtra Cœlum ſunderent, & diuiderent, ergo corrumpere, & deſtruerent, idem enim eſt corruptile eſſe, & diuiſibile.

Reſpondeo. Non omne diuiſibile eſſe corruptibile: materia prima eſt diuiſibilis in ſuas partes entitatiuas, & tamen non eſt corruptibilis, ſed ſaluatur ingenerabilis, & incorruptibilis, diuideretur ergo Cœlum, & ſtatim reuineretur, vt videmus fieri in aqua, quæ diuiditur ad ingreſſum ligni, aut alterius corporis, ſed ſtatim reuinitur, & recontinuatur.

Obijcies quinto. Planetæ mouentur duplici motu ab ortu in occaſum motu primi mobili, & ab occaſu in ortum proprio motu, at id non poteſt ſaluari, niſi planetæ ponantur eſſe in aliquo cœlo, quod vno motu moueatur, ipſi verò planetæ alio motu ſibi proprio moueantur, vt contingit in exiſtentibus in naui, qui duplici motu mouentur, nempe motu nauiſ, & motu ſibi proprio; bene enim vni corpori ſimplici poteſt competere duplex

De Proprietatibus, seu Accidentibus Cæli. 285

plex motus, vnus per se, alter per accidens, at non potest duplex motus per se competere.

Respondeo. à Philosophis plurimis ostendi, nec corpori simplici, nec composito, posse duos motus simul neque per se, neque per accidens competere, quia aliàs idem corpus esset in duplici loco, & duas haberet vbiationes, sed dato, id non repugnare, vt multi defendunt, quia esset motus circularis, & fieret super diuersos Polos, Dico; verè planetas non moueri duplici motu, sed vno, qui cùm sit tardior, videntur planetæ quodammodo retrocedere à loco, ad quem feruntur.

Obijcies sextò: si cælum esset fluidum, maximus ederetur Sonus armonicus, & concentus, si enim, auicula se se mouente per aerem, Sonus efformatur, & auditur: à fortiori, cùm se mouent tot astra errantia, & fixa per cælum, sonus maximus, & armonicus ederetur, vt volebat *Pythagoras*, quem latè impugnat *Arist.* & quia est contrà experientiam, non enim talis motus exauditur; & quia maximi soni destruunt vel inanimatorum corpora, vt sonus tonitruu lapides, & corpora validissima dissipat, id autem non facit Cælum, vt patet experientia, & docet *Arist. cæli* 1. 51. 32.

Respondeo in primis; Cælo sonum armonicum concedere, non esse ità absolum, & inconueniens, vt supponitur, habemus enim ex Scripturis; *Concentum Cæli quis dormire facit, Iob. 5.* nec obstat, quòd à nobis non exaudiatur, quia assueti mundi rumoribus, concentum Cæli audire non possumus, vt fabri ferrarij ob consuetudinem alios in platea loquentes, aut etiam cantantes, non exaudiunt; *Pythagoræ* exemplum est.

Sed hæc dicta sint concinnè, & musicè. Ad argumentum, dico, sonum non edi, quia soni Cælum est incapax, sicuti nec ignescit, quia incapax est ignitionis, nec potest Ignem villo modo concipere.

Dices *Disp. 4. Lect. XII.* sæpè facta est mentio de primo mobili, quod diximus moueri motu regularissimo, ab eoque desumi; tanquam à prima mensura omne tempus, sed si datur primum mobile, debent quoque dari & alij Cæli, non ergo vnum est cælum, sed plures ponendi sunt Cæli.

Respondeo: nomine motus primi mobilis à nobis intelligi motum Stellarum fixarum, qui onanini est regularissimus, & maximè vniformis, licet & alij queque motus planetarum regulares, & vniformes sint, quia directi ab intelligentia assistente.

LECTIO VI.

Quæstiones aliæ Resolutæ.

Certum est: motum Cœli esse ordinatum ad regimen, & gubernationem vniuersi; Regit ergo, & gubernat cælum inferiora hæc causando calorem, impartiendo lumen, & influendo alias qualitates nobis occultas, quibus indigent ad sui conseruationem hæc sublunaria, & inferiora.

Prima ergo Quæstio est; An calor, quem experimur à Cœlo causatum, & productum, sit productus à motu Cœli, an à lumine, an ab utroque.

Respondeo, calorem in suprema Aeris regione causari à motu; in alijs vniuersi partibus causari à lumine. Ratio est: quia in suprema aeris regione accendantur, & inflamnescent Comete, & aliæ impressiones ignitæ, quæ non possunt accendi per lumen, quod non agit, nisi reflectat in corpus opacum; cum ergo in suprema aeris regione nullum sit corpus opacum, lumen non potest agere, neque causare calorem, quo accendantur Comete; Produçitur ergo ibi calor à motu, atteritur enim cœlum cum aere, mox ignis, & calor eliciuntur, simili ratione, quæ ex percussione silicis, ignis, & calor eliciuntur. Hinc Axioma vulgatum, motus est causa caloris.

Dices. Motus non est calidus, ergo non potest causare calorem, quia nemo dat, quod non habet.

Resp. Motum non esse calidum formaliter, sed esse calidum virtualiter, habet enim virtutem congregandi omnes partes calidas, & siccas eius corporis, quod mouetur, expulsis partibus frigidis, & humidis, ideòq; corpus, quod mouetur per motum incalescit, & ignescit. Similiter & in animali per motum spiritus calidissimi congregantur, ideò animal per motum incalescit, & tandem in motu prolixiori defatigatur, quia calidorum spirituum dispendia patitur, quia spirituum inopia laborat, quos in motu consumpsit.

Secunda Quæstio est. An lumen, quod in inferioribus à cœlo nominus communicatum, atque diffusum, sit à Sole tantum, an etiam ab alijs Astris, & planetis; quod idem est, ac quærere,

An astra distincta à Sole, proprium lumen habeant, quod inferioribus hisce impartiant, & communicent.

Respondeo. Maiorem luminis partem esse à Sole, qui propterea dicitur Pater, & Fons luminis.

Probatur: quia quadripartita anni distinctio in Ver, Aestatem, Autumnum, & Hyemem procedit ab inæqualitate luminis à Sole communicatis; Aequinoctia, & Solstitia ab eadem luminis inæqualitate mensuramus, & sumimus.

Dixi, maiorem luminis partem, quia etiam ab alijs astris, præsertim verò à Luna, omnium planetarum viciniori Terræ aliquid luminis communicatur, & ideò reddit rationem *Arist. I. cæli. 42.* cur noctes in Plenilunio sint calidiores, quia tunc maior lucis copia à Luna inferioribus hisce communicatur.

Patet ergo, & reliqua astra habere aliquid luminis, quod communicet; Verù à Sole habet incrementum, & diuitias luminis, Patet hoc ex Ecclesiâ, & obscuratione Astrorum, Lunæ præsertim, quando est in tali situ, & positione, quod nequeat à Sole lumen accipere, tunc enim obscuratur, & eclipsatur Luna; Accidit autem talis obscuratione, & Ecclesiâ, cum inter Solem, & Lunam interiacet Terræ globus niger, & opacus, quem non potest lux peruadere, & transire. Hinc est etiam, quòd Luna sæpè apparet manca, aliquando vix fulgida, quia nimirum non semper æquale lumen à Sole illi communicatur.

Dices: sæpè etiam eclipsatur Sol, ergo si ecclesiâ sit, quia per interpositionem corporis opaci à Sole lumen non communicatur, etiam Sol accipit lumen à Luna, vel ab alio Astro, inter quod, & Sol corpus aliquod opacum interponatur.

Respondeo. Solem in seipso nunquam pati ecclesiâ, aut obscurationem, quia nunquam patitur diminutionem luminis; sed obscurari respectu nostri aspectus, cum enim Luna ponitur inter aspectum nostrum, & Solem, non videtur Sol à nobis, ideòq; obscuratur Sol, & eclipsatur nostro aspectui.

Quæstio tertia solet esse. An Astra præter lumen, & calorem, alias quoque qualitates communicent.

Responsio communis est affirmatiua, & quia has Qualitates cognoscimus in effectibus, non in seipsis, ideò appellantur qualitates occultæ; talis est virtus Polaris attrahendi magnetem: virtus, qua Gallum excitat media nocte ad cantum, ut Soli ex Antipodis ad nos reuertenti, applaudit; tales quoq; causæ insoliti cuiusdam, & extraordinarij effectus, quorum causa nobis ignota est.

Quæstio quarta solet esse . An astra possint animam , & voluntatem hominis mouere ad vitia , aut virtutes impellere , aut cogere .

Responsio communis est negatiua , quia nequeunt corpora in spiritus quidquam agere directè ob improporcionem agētis corporei ad passum spirituale , & incorporeum ; dixi directè , quia indirectè , alterando corpus possunt astra , in animis turbationes immittere , quia animus sequitur dispositiones corporis ; Hinc Axioma vulgatum ; *astra inclinant , non necessitant* : ideòque facile potest homo prudens malos influxus auertere , & præcauere ; hinc illud , *Sapiens dominabitur astris* .

DISPV TATIO VIII.

DE ELEMENTIS.

Progredimur ad Elementa cùm Aristotele , Tertio , & Quarto Libro de Cælo , Elementa & ipsa , sunt Corpora simpliciter Incorruptibilia , & Ingenerabilia , uti Cælum , sed corruptibilia , & generabilia secundum quid , seu secundum aliquas eorum partes , quale non est Cælum . De his non admodum graues , aut Celebres difficultates occurrunt ; acriter tamen pro Aristotele pugnandum est nobis contra plures ex Modernis , quorum aliqui vel Ignem è medio tollunt omninò , vel extra propriam Sedem , & Locum , nempe Luna Concauum , exulare , cogunt . Alij Aerem , quo spiramus , & viuimus , nobis interdiciunt . Alij Terram , & Aquam concedunt , sed esse Elementa , negant . Alij quia calidos nos esse volunt , aut frigidos , humiditatem , & siccitatem exterminant ; Aptè in hanc rem cadit illud , nullam esse scditatem , quam aliquis Philosophorum non impensè sequatur , & amet , nullam esse sententiam adeò absurdam , quam philosophantium aliquis non posse à se iuso defendi , arbitretur .

LECTIO I.

Elementorum Essentia, & Natura .

Elementum dicitur quasi eleuamentum, quia ex Elementis, per eorum mixtionem eleuatur, & formatur mixtum; vel quasi alimentum, quia ex Elementis, saltem mediatè, nutriuntur mixta.

Non vna ab omnibus assignatur elementi exacta definitio; sed varia à multis iuxtà varias sententias de Elementorum formis essentialiter constitutiuis, vt mox videbimus. Describuntur hic à Philosopho *1. 31. esse prima corporum, in quæ alia resoluantur, & diuiduntur, ipsa verò non in alia diuersa*, quia, nimirum, Elementa sunt prima, & maxima corpora, sunt primæ, & præcipuæ partes (post Cælum) integrantes hoc vniuersum; ex his fiunt, & componuntur reliqua omnia corpora, quæ ob id dicuntur mixta, ipsa verò Elementa neque componuntur ex alijs corporibus, nec in alia resoluntur.

Materiam Elementorum esse eandem, & communem cum reliquis corporibus non est dubium. De eorum formis essentialiter constitutiuis multæ sunt, & variæ opiniones Philosophorum.

Primò. Nonnulli formas essentialiter constitutiuas Elementorum posuerunt qualitates actiuas, nempe calorem esse formam substantialem ignis, humiditatem aeris, frigus aquæ, siccitatem Terræ.

Ità plures ex antiquis Græcis Expositoribus Aristotelis, quos fusè citant *Auerſa tom. 2. quæst. 41. sect. 3. Barth. Amicus 10. de Gen. lib. 2. dub. 2. art. 1.* nouissimè hanc sententiam docuit *Cæsar Cremoninus in peculiari libello hac de re edito.*

Secundò alij. Formas Elementorum posuerunt esse qualitates motiuas, Leuitatem Ignis, grauitatem Terræ. Ità *Auerroes 2. Anim. Comm. 18. Achillinus 3. de Elem. dub. 2. Thomas Braduordin tract. de proportionibus Motuum. Nobil. Plam. 1. de 1. Gen. cap. 8. lib. 2.*

Tertiò alij, formas Elementorum posuerunt esse animatas.

Ità Platonis Schola, vt refert *Marsilius Ficinus in Symposio Platonis.*

Quartò alij, formas Elementorum, sicuti & aliorum corpo-

rum, posuerunt esse substantias, Ità Aristotelis schola, *D. Thomas I. de Gen. cap. 18. Aegidius I. de Gen. quest. 19. & alij omnes.*

Conclusio. Formæ essentialiter constitutiue Elementorum sunt substantiales, non accidentales.

Probatur primò: quia nullum est in Aristot. schola cettius principium, & vniuersalius, quàm omne corpus naturale constare ex materia prima, & forma, tanquam ex partibus substantialibus, imò hoc est totius Aristotelicæ Philosophiæ primum, & vnicum fundamentum, vt patet expressè ex his, quæ docet toto primo Libro Phys. sed elementa sunt corpora naturalia, eiusdem conditionis, & naturæ, ac sunt alia, ergo constare debent ex materia prima, & forma, tanquam ex partibus substantialibus.

Confirmatur quia: aliàs nulla esset differentia inter compositum substantiale, & accidentale; hoc enim constat ex vna parte substantiali, quæ est materia prima, & altera accidentali, quæ est forma aliqua accidentalis, ergo cùm elementum sit compositum substantiale, debet constare ex materia, & forma substantiali, aliàs quomodo substantia ex non substantijs erit?

Quòd si dicas, Elementa non esse composita substantia: & quodnam aliud corpus, seù compositum substantiale erit, si prima corpora, & omnium nobilissima non sunt substantia? Imò nec homo esset compositum substantiale, & eius forma, nempe anima rationalis, esset accidens quoddam, vt voluit *Galenus*, ponens animam esse temperiem primarum qualitarum, sed hoc est contrà Fidem, vt est definitum in Concil. Lateran. sub Leone X. ergo.

Probatur secundò: quia substantia non suscipit magis, & minus, substantiæ nihil est contrarium ex *Lib. de Prædicam. & ex 5. Phys. t. 10.* ad substantiam non est motus, quia caret contrario, substantia non est per se sensibilis, sed sentitur, & innotescit per accidentia, sed hæ qualitates suscipiunt magis, & minus, sunt inuicem contrariæ, sicuti & primo sensibiles, ergo non sunt formæ substantiales elementorum.

Respondebis: esse formas essentielles, non substantiales, ac formæ essentielles, seù ipsæ essentiæ accidentium sunt per se sensibiles, suscipiunt magis, & minus, capaces sunt contrarietatis, ergo.

Benè, sed iam Elementa non essent substantia, sed accidens;
non

non essent composita substantialia, sed accidentalia, essent aggregata per accidens, ut aerius lapidum, aut Strues lignorum, quod est hactenus inauditum in scholis.

Denique probatur expressis verbis *Arist. 3. Met. 1. 17.* ubi loquens de Elementis, habet; *Horum autem caliditates, & frigiditates, & huiusmodi, passiones, non substantia sunt. Lib. de sensu, & sensibili c. 4.* docet, Ignem, & Terram agere, quatenus in ijs adest contrarietas, quæ habetur à qualitatibus, sed non agere quatenus ignem, & Terram, ergo qualitates, & ex his orta contrarietas non pertinet ad essentiam Ignis, & Terræ, verba sunt. *Quid igitur ignis, & quid Terra nihil natum est agere, vel pati, nec aliud quidquam, quæ autem inest contrarietas in eis, hæc omnia agunt, & patiuntur.*

Obijcies primò 4. *Celi Arist.* appellat gravitatem, & levitatem differentias elementorum 4. *Meteor. in principio*; Qualitates dicuntur causa, & principia elementorum, ergo sunt eius partes componentes 3. *de Anima 1. 10.* docet, rationem carnis consistere in calido, & frigido.

Respondeo ad primum tex. gravitatem, & levitatem esse differentias accidentales, non essentielles. Ad secundum qualitates esse principia, & causas dispositivas, non componentes. Ad tertium, rationem carnis non formaliter, sed dispositivè consistere in quadam temperie calidi, & frigidi.

Obijcies secundo: Mixta fiunt, & constant ex qualitatibus Elementorū, ergo qualitates sunt partes essentielles Elementorū.

Respondeo. Mixta non constare ex Elementis, nec ex illis fieri, idest, componi ex eorum substantijs, & naturis, aliàs mixta essent aggregata per accidens, sed constant ex Elementis, & ex illis fiunt, quia ex qualitarum Elementarium certa temperie tanquam prævia dispositione fiunt, & componuntur.

Obijcies tertio. Formæ Elementorum corrumpuntur, non nisi à contrario, ergo iam habent contrarium, ergo sunt qualitates, non substantię.

Respondeo: idem argumentum posse fieri de formis mixtorum, quæ corrumpuntur à contrario, & tamen non sunt qualitates, sed substantię.

Dicendum ergo. Formas naturales corrumpi per introductionem alterius formæ substantialis impossibilis cum præcedenti, non verò per aliquam qualitatem, quæ sit illi immediate contraria.

Questio solet esse hic . An dentur elementa pura, idest, quæ careant extraneis, & sibi non debitis formis, tam substantialibus, quàm accidentalibus.

Respondendum est : Elementa substantialiter esse pura , quia in eorum materia non est mixtio formarum, & forma Elementi est omninò diuersa, & contradistincta à formis mixtorum. Non tamen esse pura qualitatiuè , quia saltem Elementa , quæ apud nos sunt, permixta sunt, & inquinata varijs, & diuersis peregrinis corporibus , & extraneis qualitatibus , ditescit enim mare piscibus, Aer Auibus, Terra serpentibus, Ignis frigidis qualitatibus : dixi, saltem quæ apud nos sunt, quia in proprijs eorum centris, quò noxiæ, & contrariæ qualitates penetrare non possunt , mihi satis probabile est , natiuam elementa conseruare puritatem, & simplicitatem .

LECTIO II.

Elementorum qualitates actiue.

V Traque schola, Medicorum, scilicèt, & Philosophorum.

Docet primò : Dari quatuor qualitates contrarias omnium primas, easque sensibiles, nimirum, Calorem, Frigus, Humiditatem, & Siccitatem; & quidem has qualitates dici sensibiles per antonomasiam, quia tangibiles, & sensui tactus subiectæ, tactus autem est primus omnium sensuum, vniuersalissimus, omnibus animalibus communis, & per totum corpus diffusus. Simpliciter enim dantur aliæ qualitates his priores , & etiam sensibiles, non sensu tactus, sicuti nec contrariæ, vt lux, Diaphaneitas, & aliæ similes .

Docet secundò . Singulis Elementis binas concedendas esse qualitates, nempe igni calorem, & siccitatem; Aeri calorem, & humiditatem; Aquæ humiditatem, & frigiditatem. Terræ siccitatem, & frigiditatem, ità tamen, vt vna vni Elemento sit propria, & connaturalis, ac veluti primò, & per se competens, altera veluti non ità propriè, & connaturaliter conueniat . Sic igni calor , aeri humiditas, aquæ , frigus , Terræ siccitas primò , & principaliter sit à natura data, & attributa.

Primò . Huic communi doctrinæ contradicunt aliqui apud Plat. Opusc. de 1. Frig. Cardanum 2. de subtilitate, existiman-

tes frigus non esse qualitatem positivam, sed priuationem caloris, & siccitatem esse priuationem humiditatis.

Sed contrà est quia. Ad sensum patet, frigus esse operativum, ergo non est sola caloris priuatio, consequentia tenet, quia non ens non operatur. Antecedens probatur, quia frigus expellit calorem, vt patet in niue, quæ vitro inclusa, vitrum infrigidat, & manum vitro approximata, ergo.

Nec obstat, etiam tenebras lucem expellere, & à morte tolli vitam, Quia hæc est expulsio formalis, non effectiua; Ratio est, quia priuatio non inducitur in subiectum seipsa primò, & immediatè, sed mediatè, & destructa prius causa conseruatiua formæ oppositæ, sed frigus seipso primò, & immediatè inducitur in subiectum, non destructa causa conseruatiua caloris: indè est, posse naturaliter esse simul calorem, & frigus in gradu remisso, vt patet in aqua tepida, & supernaturaliter posse esse simul etiam in gradu intenso, & summo.

Contrà secundò principaliter: quia si frigus est priuatio caloris, è contrà posset dici, quòd calor sit priuatio frigoris, quia nullum habemus fortius argumentum pro entitate positiva caloris, & non pro entitate positiva frigoris.

Contrà tertio quia. Si frigus est priuatio caloris, ergo grauitas est priuatio leuitatis, seu carentia intrinseci vacui, & leuitas erit carentia grauitatis, vt dicebant Antiqui *Democritus*, & *Leucippus*, quos ideò benè redarguit *Arist.* 4. *Cæli* c. 1. & 2.

Contrà quarto: quia id naturaliter esse operatam naturam, debet eruditus Philosophus asserere, quod est conformius eidem naturæ, sed conformius naturæ est, ponere frigus qualitatem positivam, quàm puram negationem, quia melius est esse, quàm non esse, natura autem semper intendit id, quod melius est 2. *Cæli* 1. 59. Quoniam enim in omnibus, inquirimus, quòd melius est desiderare naturam semper, melius autem esse, quàm non esse: licet hic vsurpare verba *Scaligeri Exercit.* 18. si frigus nihil est, nisi caloris priuatio, soleas abijce, & pileum, Cardane, quo tempore ex Alpibus Rheticis nos Boreas vris.

Secundò contradicunt communi Doctrinæ *Anax. I. Met.* apud *Plutarchum*, *Stephanus Aragonius* in suo *Enchirid.* existimantes, calorem non distingui à raritate, sicuti neque frigus à densitate; si calidum vnitur, inquit *Arriag.* efficitur frigidum, si aperiarur, densum vertitur in calidum; mors calidi, densitas est, mors frigidi, raritas est.

Sed contrà est : quia ferrum ignitum est calidissimum, & tamen densissimum; Aer, maximè in media sui regione, frigidissimus, & tamen maximè rarus, & tenuis, ergo.

Dices . Aer expiratus compresso ore est frigidus , quia densus, expiratus aperto ore est calidus quia, rarus, ergo.

Responder *Arist. sect. 26. Problem. 47. prob.* anhelitum semper esse calidum; & dum emittitur ore compresso, sentitur frigidus, quia aer frigidus circumstans ab anhelitu expulsus mouetur vnitè, quod non accidit, quando eum patulo ore efflamus, hinc est etiam, quòd aer flabello percussus sentitur frigidus, quia flabello percussus vnitur.

Tertiò contradicunt communi Doctrinæ *Vallesius 2. de natura, & Arriaga de Gen. disp. 4. sect. 2. subsect. 1.* Ponentes humiditatem, & siccitatem non esse duas qualitates realiter distinctas; volunt enim, humiditatem esse fluida corpora, siccitatem verò, esse carentiam corporum fluidorum.

Sed contrà est quia : Contrà *Arriagam* redeunt omnia argumenta facta contrà eos, qui ponèbant frigus esse carentiam caloris, quorum aliqua ipse *Arriaga* approbat, iisque vitur contrà Authores illius sententiæ; tale est primum, & secundum argumentum, ut patet discurrenti.

Contrà secundò : quia hæc sententia videtur omninò coincidere cum sententia *Democriti, & Leucippi* asserentium, leuitatem esse negationem plurium corpusculorum, seu athomorum, grauitatem verò esse copiam athomorum; ponit enim *Arriaga* humiditatem esse copiam corporum fluidorum, siccitatem verò esse carentiam corporum fluidorum, sed illa reiicitur ab *Arist. loco ubi supra*, ergo reiicienda quoque est sententia *Arriaghe*.

Contrà tertiò : quia si humiditas, & siccitas non essent entitates positivæ, quælibet illarum produceretur in instanti, ceterer enim contrariò; Prætereà non minus ad sensum patent calor, & frigus, quàm humiditas, & siccitas, ergo vel omnes debent negari, vel omnes admitti.

Contrà quartò : quia siccitas maximè resistit, ergo est entitas positiva, & patet consequentia in adamante, ferro, & marmore, quæ quia maximè resistunt, entia sunt positiva; Antecedens probatur in morbis siccis, qui difficillimè curantur; humiditas quoque maximè resistit igni, ut patet in str. e viridium lignorum, quæ ab igne quàm difficillimè absumentur, ergo.

Contrà quintò : quia si humiditas sunt corpora fluida, ergo calor

calor sunt spiritus calidi, & frigus erunt corpora frigida, & consequenter denegandus erit etiam calor; unde facto aliqui negant, & tamen *Arriaga* acriter pugnat pro calore, & frigore.

Quartò. Nonnulli contradicunt communi Doctrinæ, asserendo, esse quidem calorem, sed non esse primam qualitatem, quia non datur ignis quattuor Elementum, cui calor attribuitur, tanquam nativa proprietas. Ità *Morandus in Curs. Phil. tract. 1. de elem. qu. 4.*

Sed contrà est quia; etiam si calor non ponatur esse nativa proprietas Ignis, aut etiam si non detur Ignis quattuor elementum, adhuc potest dari calor, qui sit prima qualitas, & conveniat alicui ex omnibus reliquis elementis, quod enim absurdum est uni elemento tres qualitates attribuere contrà communem sententiam? si negatur calor, & negatur quaternarius numerus elementorum, quod etiam est contrà communem sententiam?

Ex his colligitur primò; firmam, & inconcussam manere sententiam communem, atque adeò esse primas qualitates numero quatuor, esse omnes entitates positivæ, & reales.

Colligitur secundò. Binas qualitates singulis elementis convenire, ità tamen, ut igni primò conveniat calor; Aeri, humiditas; Aquæ frigus; Terræ siccitas; in tantum enim *Arriaga loco ubi supra*, negat Aeri primò convenire humiditatem, in quantum ponit, humiditatem non esse qualitatem, sed iam probavimus, humiditatem esse qualitatem positivam, ergo Aeri bene potest attribui humiditas, sicuti & aquæ frigus.

Dices; Aqua eo ipso, quòd habet summum frigus, congelatur; sed est absurdum, dicere, aquam natura sua esse congelatam, esset enim inepta piscibus, qui eam habent pro sui regione, inepta quoque esset ad porum, & ad irrigationem plantarum, ergo.

Respondeo. Aquam congelari ob defectum fluiditatis, & humiditatis, exiecatum enim, & constipatur, & sic in glaciem vertitur.



LECTIO III.

Qualitatum Actinarum Descriptio.

Formas omnes in ordine ad earum effectus, à quibus illæ non distinguuntur, consuevit schola definire, & describere. Et quidem definimus, quando earum effectus primarios assignamus; describimus, cum effectus secundarios manifestamus, & exponimus. Omitto definitiones harum qualitatum, quia effectus earum primarij de se satis noti sunt, & obuij, caloris est enim calefacere, frigoris frigefacere, siccitatis exiccare, humiditatis humectare. Adduco descriptiones, quia harum qualitatum effectus secundarij non sunt ita manifesti, ac noti.

Describitur ergo ab *Arist. 1. de Gen. c. 2. 1. 8.* Calor in concreto, sic; *Calor est, qui congregat ea, quæ sunt eiusdem generis; segregat, quæ sunt diuersi generis.* è contrà frigidum est, quod coniungit; & congregat, quæ eiusdem, & quæ sunt diuersi generis, vbi per *Tò congregare*; intelligit Aristoteles vnire, per separare, intelligit Aristoteles disunire, & sciungere: sicuti ea intelligit, esse eiusdem generis, quæ conueniunt in iisdem accidentibus, & affectionibus, quamuis sint diuersæ omninò essentia, & naturæ, verbi gratia, in fluxibilitate, & liquabilitate, in quo sensu, vinum, aqua, oleum sunt eiusdem generis; è contrà ea intelligit esse diuersi generis, quæ disconueniunt in iisdem accidentibus, quamuis sint eiusdem essentia, & naturæ, quare vapor aqueus, & aqua sunt diuersi generis, sicuti etiam sunt terrestris exhalatio, & terra.

Illustratur Doctrina exemplis; nam quando per calorem ignis liquantur metalla, congregantur omnes partes homogeneæ, & eiusdem rationis, segregatis extraneis, & impuriioribus, verbi gratia, segregantur ab auro scoria, & aliæ partes terreæ. E contrà frigus omnia simul congregat, & adunat, homogenea, & etherogenea, quæ sunt eiusdem, & quæ sunt diuersæ rationis, vt patet in congelatione, in qua simul concrescunt, paleæ, ligna, & herbe.

Dices, actione caloris lac coagulatur, & in eo paleæ adunantur, ergo etiam calor congregat etherogenea; Similiter & Solis actione in luto videmus alia extranea adunari, ergo.

Respon-

Respondeo; non sola actione Solis lac coagulari, sed per coagulum crassum, & viscosum, quo & extranea adunantur, ut paleæ. In luto per accidens obdurescunt & paleæ, cum iam Sol à luto humiditatem expulerit.

Dices secundò: In sanguine è venis emissò, segregat frigus partes etherogeneas, nam partes terreas projicit in profundum, aqueas, & biliosas tollit ad summum.

Præterea tam frigus, quam calor disgregant homogenea, & vasa vitrea distrumpunt; nam si calor intrà eorum, aut castaneam inclusus, rarefiat, liberiores quærens locum corticem frangit, atque distrumpit. Phiala vitrea vi aquæ congelatæ, finditur, & frangitur, ergo ratione frigoris etiam homogenea separantur.

Respondeo: eas partes non ratione frigoris, sed ductu propriæ naturæ terreæ descendere, biliosas ascendere, illæ quia graves, hæ quia leues: Ad alium casum, dico; eosdem effectus oriri à calore, & à frigore, sed non eodem modo, nam à calore segregantur homogenea vi rarefactionis; à frigore verò vi condensationis, & constipationis.

Iam verò describitur humiditas in concreto; Humidum est interminabile proprio termino, facile terminabile existens alieno.

Siccum autem faciliè terminabile proprio, difficile alieno. Caterum terminari termino proprio, est habere propriam figuram, & consistentiam, terminari, termino alieno est per aliud figurari.

Explicatur, Aqua, quæ est humida, nullam propriam figuram retinet ex se, sed potius se accommodat propriæ figuræ vasis; è contra verò terra sicca, & lapides retinent tenaciter propriam aliquam figuram, nec recipiunt figuram alterius corporis.

Dices. Farina, Cinis, Arena, Pulvis sicciſſimus faciliè quocunque alio termino figurantur, si intra vas aliquod includantur; ergo.

Respondco, hæc, & similia retinere proprias figuras, quamvis quia tritissima sunt, videantur habere formam continentis, & ad situm continentis accommodentur, quo pacto etiam ignis, qui regulariter in figuram pyramidis solet assurgere, & elevari, se se accommodat ad figuram fornacis.

Verum quia harum qualitatum quædam sunt dissymbolæ, & contrariæ, ut calor, & frigus, humiditas, & siccitas; quædam sunt

sunt symbolæ, & consimiles, vt calor ignis, & calor aeris; humiditas aquæ, & humiditas aeris; Solet quæri, an hæ qualitates specie differant, an verò sint eiusdem speciei,

Respondeo huic quæstioni cum *Conimb. 2. de Gen. c. 3. q. 6. Tolesio eod. lib. 7. Hurt. disp. 6. & alijs.*

Qualitates symbolas esse eiusdem speciei, aliàs primæ qualitates essent plures, quàm quatuor, ut numeranti facilè patet. Præterea sequeretur, vni duo esse contraria contrà *Aristot. 10. Met. t. 10. & 16. 1. Cæli t. 10.* Frigori enim aquæ esset contrarius tam calor ignis, quàm calor aeris. Denique qualitates symbolæ se se inuicem intendunt, ergo sunt eiusdem speciei, intensio enim qualitatis fit à simili in specie.

Hinc ea elementa, quæ consimiles, & symbolas qualitates habent, dicuntur symbola, quæ verò dissimiles, & dissymbolas, dicuntur dissymbola; aqua ergo, & ignis dissymbola sunt; ignis, & aer symbola. Terra, & aqua symbola, terra, & aer dissymbola.]

Ex his, talis colligitur elementorum definitio: Elementa sunt prima corpora, quorum singulis binæ primæ qualitates conueniunt.

LECTIO IV.

'Qualitates motiue Elementorum.'

Grauitatem, & leuitatem, quæ sunt motiue virtutes Elementorum, Aristoteles definit in concreto, vt clariùs haberetur earum notitia; concreta enim notiora sunt abstractis. Habet ergo 3. *Calit. 10. Graue est, quod mouetur deorsum;* Leue quod mouetur sursum, & *1. Cæli 37. Graue est illud, quod aptum est ferri à medio,* vbi nomine medijs, venit centrum Mundi, idest, minima pars in medio terræ situata; Ex qua Aristotelis doctrina, hæ definitiones constituuntur.

Grauitas est principium motus, quo corpus naturale tendit deorsum, & ad medium; Leuitas est principium motus, quo corpus naturale tendit sursum, & à medio.

An verò hoc principium motus sit ipsa forma substantialis corporis grauis, & leuis, an sit aliqua virtus, & qualitas distincta.

Non.

Nonnulli Recentiores, qui ponunt potentias ab Anima non distingui, simili ratione ponunt, Gravitatem, & Leuitatem non distingui à formis substantialibus Elementorum, quæ deorsum, vel sursum feruntur.

Sed quicquid sit de potentijs Animæ, qua de re suo loco difficultas exannabitur: plures, & satis notæ experientiæ declarant gravitatem, & leuitatem à formis substantialibus corporum grauium, & leuium distingui. Quarum prima est, quia in aqua, & vapore est eadem forma substantialis, & tamen vapor ascendit, & fertur sursum; aqua descendit, & fertur deorsum. Secunda est, quia in modica terra, & magna, est eadem forma substantialis terræ, & tamen plus grauitat magna terra, quàm modica, vnde & velocius fertur deorsum magna terra, quàm modica, quia in magna terra est maior ponderositas, idest, grauitas in plures partes dilatata, atque diffusa, quamuis aliàs intensiue eadem grauitas tam in parua, quàm in magna terra. Tertia, quia in Sanctissimo Eucharistiæ Sacramento nulla est substantialis forma panis, & tamen adest grauitas, ergo grauitas, & leuitas sunt qualitates distinctæ à formis substantialibus.

Fateor tamen, qualitates istas motiuas oriri, & originari à formis substantialibus tanquam à principio radicali, sicuti potentia oriuntur ab anima, & omnis proprietas ab essentia. Dixi tanquam à principio radicali, quia ad productionem harum qualitarum concurrunt etiam primæ qualitates actiue, calor & frigus, imò etiam raritas & densitas, videmus enim leuia corpora, esse quoque calida & rara; ita sunt aer, & ignis: sicuti graua esse densa, & frigida, ita sunt terra & aqua: Principium ergo radicale leuitatis, est forma substantialis, affecta tamen calore, & raritate, sicuti principium grauitatis est forma substantialis, affecta tamen frigore, & densitate.

Est autem leuitas duplex, sicuti & grauitas, leuitas simpliciter, & hæc competit igni, qui propterea fertur à medio, & sursum simpliciter, idest, ad locum simpliciter superiorem, vnde ait Arist. 4. Cæli 1.6. *leue est, quod supereminet omnibus*. Altera est leuitas secundum quid, quæ competit aëri, qui propterea fertur à medio, & sursum secundum quid, idest, ad locum secundum quid superiorem: similiter & grauitas est duplex. Grauitas simpliciter, & hæc competit terræ, quæ propterea fertur ad medium, & ad locum simpliciter inferiorem, seu infimum.

num, vnde ait *Arist. l. c. graue est, quod substat omnibus* ; Grauitas secundum quid competit aquæ, quæ fertur ad medium, & ad locum inferiorem secundum quid, idest, supra terram, & infra aerem,

Solet hic quæri. An grauitas simpliciter, & grauitas secundum quid: similiter, an leuitas simpliciter, & leuitas secundum quid, differant specie, an verò sint eiusdem speciei.

Respondeo. Grauitatem simpliciter, & grauitatem secundum quid differre specie. Probatur primò, quia qualitates actiue mediæ, quia specie non differunt ab extremis inuicem intenduntur, sed qualitates motiue mediæ inuicem non intenduntur, leuitas enim non potest intendi à leuitate ignis, imò nec vniri quidem possunt, ergo.

Probatur secundò: quia grauitas terræ, & aquæ differunt specie, ergo etiam leuitas ignis, & aeris; consequentia tenet à paritate rationis, Antecedens probatur; quia nisi illæ duæ qualitates ponantur differre specie, non posset reddi ratio, cur multa aqua in Sphæra aeris grauior sit modico plumbò, in Sphæra verò aquæ modicum plumbum grauius sit multa aqua, deberent enim semper æqualiter grauitare aqua, & plumbum, quod est terreæ naturæ, & grauitatem terræ habet; at supposita differeñtia specifica harum grauitatum, facilè redditur ratio experientiæ adductæ, magis enim grauitat multa aqua, quàm modicum plumbum, quia in ea Sphæra vtrumque Elementum grauitat, aqua & terra; at in aquæ Sphæra, grauitat terra, seu plumbum, aqua verò, cum sit in propria Sphæra, & sede non grauitat.

Hinc colligitur solutio alterius quæstionis; An Elementa in proprijs Sphæris, seu sedibus grauitent, & leuitent, an verò quiescant.

Dico enim, Elementa in proprijs Sphæris quiescere; Ratio est, quia omne corpus naturale acquisito sibi loco naturali, & proprio quiescit, ergo Elementa in proprijs locis naturalibus quiescunt; Natator non sentit pondus aquæ supra humeros; sentiret autem, si aqua grauitaret, & descenderet: videmus frequenter dolia plena aquis, innicem funibus connexa, & benè ligata à litore maris ad naues deserti super mare, & non mergi, aut in profundum descendere, mergerentur autem, si essent plena vino, quod est terreæ conditionis, & naturæ, ergo iam aqua in propria sede, & Sphæra quiescit.

Fateor ; quòd si in eodem elemento aliquæ partes sint crassiores, aliquæ rariore ; illæ descendunt ; ascendunt istæ, simili ratione, qua in lebetè partes terræ descendunt, leuiore, & puriores ascendunt .

LECTIO V.

Numerus Elementorum, & Situs.

ARistotelis Schola quatuor statuit Elementa, Ignem, Aerem, Aquam, & Terram ; Ignem supremo in loco posuit, deinde Aerem, mox Aquam, vltimo loco Terram, quæ cum Aqua vnum corpus, vnum globum facit, ita tamen, vt sit discooperata aquis, Diuina Prouidentia sic disponente, & ordinante, vt possint animalia viuere, fruges, & fructus oriri, herbæ, & plantæ germinare, quod sanè fieri non posset, si tota Terra esset cooperta aquis .

Quaternarius hic numerus Elementorum, sic positus & situs pluribus rationibus probatur ab *Arist. 2. de Gen. & 3. Cæli per totum*. Prima est, tot sunt Elementa, quot sunt simplices, & primæ qualitates, sed hæ sunt numero quatuor, ergo. Secunda ; tot sunt Elementa, quot sunt qualitates simplices motiue ad motum rectum, sed hæ sunt quatuor, ergo. Tertia ratio : quatuor sunt loci differentię, nempe locus summus, & summo proximus, infimus, & infimo proximus ; ergo etiam quatuor sunt Elementa, quæ sibi tales exigunt locorum positiones, & differentias. Quarta ratio : vnumquodque componitur ex his, in quæ resoluitur, sed lignum, verbi gratia, resoluitur in quatuor Elementa, dum combuitur, in aquam, & terram, concedunt vel ipsi Aduers. & Chymici omnes, insuper apparet ignis, apparet etiam tenuissimum corpus, quod est aer ; ergo.

Hæc omnes rationes non quidem singillatim acceptæ, sed simul sumptæ quaternariū huius Elementorū numerum sufficienter probant, iuncta præsertim communi auctoritate, non modò Philosophorum cuiuscunque sint Classis, & Scholæ, sed etiam Medicorum ; *Hipocr. lib. de nat. hominis, Galeni 2. de Elementis*.

Sed primò huic communi Doctrinæ contradicunt nobiles Recentiores *Rees lib. 2. de Calo Disp. unica art. 2. per totum, Arriaga, & Quied. lib. 2. de Gen.* Hi negant adductis rationibus cessi.

efficaciter probari, quaternarium numerum Elementorum; vnde & conantur rationes adductas soluere, & diluere, tanquam inefficaces ad probandum intentum.

Sed contrà est, quia Recentiores hi, singulas fortasse solunt, sed non omnes simul acceptas, & conglobatim sumptas; Præterea altè retinendum est illud, quod sæpius ex Arist. notavi, non omnium rerum possibilem esse demonstrationem.

Sed accipe hujus rei luculentius testimonium ex eodem Arist. I. Actb. c. 9. *Eruditi est, eatenus exactam in unoquoque genere explicationem requirere, quatenus pati eius natura potest, & Mathematicam utentem suasionibus approbare, & ab Oratore demonstrationem exigere, simile vitium videtur.*

Secundò contradicunt alij, vt Pasqualigus, qui negat aerem esse elementum.

Sed contrà est quia. Si aer non esset Elementum, maximè quia, non est distinctus ab aqua, sed hoc est falsum, ergo.

Probatür minor quia: si aer esset essentialiter aqua, so reduceret ad pristinum statum, vt patet in exhalationibus, & vaporibus aqueis, sed id est contrà experientiam, ergo. Confirmatur, quia diuersæ qualitates competunt aeri, ac competunt aquæ, vt patet ex dictis suprâ; ergo.

Tertiò contradicunt, Cardanus 2. de subtilit. Tassonus in suis Quæstis lib. I. q. I. Morandus 2. de Gen. tract. I. q. 3. Thomas de Corbo in sua summa tract. I. c. 2. Hi ponunt tria tantum elementa, Aerem, Aquam, & Terram; negant omninò ignem, volunt enim omnia, quæ ab Aristotelicis dicuntur ab igne fieri, à calore Solis fieri, sicuti de facto multe generationes conceduntur fieri à calore Solis in visceribus Terræ.

Sed contrà est; quia videntur, qui negant ignem, sensu indigere, ad sensum enim patet, & ignem dari, & ab igne multa consumi, atque comburi;

Neq; potest dici, ignem esse excessum quendam caloris, atq; adeò esse accidens quoddam, non corpus substantiale.

Nam hæc ratio probaret, nullum dari elementum, posset enim similiter dici, aquam esse excessum quendam frigoris, aerem excessum humiditatis, Terrâ excessum siccitatis; Præterea excessus iste caloris, calor est, ergo prima qualitas, simplex, ergo alicui corpori simplici primò, & per se naturaliter debita; hanc omnis schola, & communis Populorum, & gentium vox vna, vocat ignem.

Contrà secundò, quia ideò ignis non datur, seu non est corpus, quia sinè alio corpore reperiri nequit, statim enim, ac ignis est sinè alio corpore, quo vititur, vt pabulo, petit, ideò non est corpus, sed accidens. Contrà, inquam, quia pisces non sunt aqua, & extrà aquas pereunt, ergo non sunt corpora, sed accidentia.

Quartò huic doctrinæ contradicunt Chymici, qui omnia elementa negant, præter aquam, & terram? Imò *Paracelsus lib. 2. ad Athenienses*, vnicum ponit elementum: Loco Elementorum, quæ potius dicunt esse corpora mixta, & resolubilia in alia corpora, ponunt hæc tria, quæ dicunt omninò simplicia, Sal, Sulphur, & Mercurium; Sal vocant corpus primò sapidum, Sulphur corpus subtile primò inflammabile; Mercurium corpus primò spirituosum, & tenuissimum.

Sed contrà est; quia tenebriones hi è fumarijs calis, fumosis, que fornacibus prodeuntes, nihil ferè suprà carbonariam artem sapiunt, vt loquitur *Le Rees loco ubi suprà art. 3.* ergo ineptè communem sententiam damnant.

Contrà secundò: quia vnicum eorum fundamentum est quia, vel ipsa, quæ Aristotelici elementa, & prima principia dicunt, resoluuntur in sal, sulphur, & mercurium, ità se fuisse expertos ipsi fatentur, qui contrariam opinionem defendunt; suspecta igitur est eorum fides, etenim oportet eos arbitros esse, non aduersarios, qui veritatem sunt iudicaturi sufficienter, ex *Arist. l. l. Cali t. 101.*

LECTIO VI.

Transmutatio Elementorum.

OMnia Elementa posse inuicem transmutari, & vnum in aliud conuerti, certum est eque apud Antiquos, ac modernos Philosophos. At, an omnia possint inuicem immediatè transmutari, adhuc sub Iudice lis est.

Primò ergo, Nonnulli negant, posse omnia Elementa inuicem immediatè transmutari, sed solum symbola, vt ignem, & aerem, non aquam, & ignem.

Secundò alij, concedunt immediatam transmutationem quòd omnia Elementa,

Conclusio. Omnia Elementa etiam dissymbola inuicem immediate transmutantur.

Probatur primò auctoritate *Arist. 2. de Gen. 1.24.* vbi habet, *uniuersaliter manifestum est, quoddam ex omni generari natum est.* Quod etiam ostendit Inductione, probat enim ex igne aquam, & ex aere generari terram; habet enim *1.26. ex Igne quoque Aquam, & ex Aere Terram; & rursus ex Aqua & Terra Aerem.*

Probatur secundò ratione eiusdem *Arist.* quia. Omnia Elementa ratione suarum qualitatum sunt adinuicem contraria; imò magis sunt contraria dissymbola, & quæ nullam habent cognitionem ad inuicem, quàm symbola, & cognata, ergo quodlibet ex illis potest in aliud agere, introducendo in illud suas proprias qualitates, & dispositiones, & tandem illud in se conuertero.

Confirmatur, quia si gutta Aquæ coniiciatur in fornacem, ignis, statim in ignem conuertitur, & si scintilla ignis in Oceanum mergatur, statim in aquam conuertitur, ergo.

Respondebis. Scintillam ignis conuerti prius in aerem, similiter & guttam aquæ, antequam ignis in aquam, & aqua in ignem conuertatur.

Sed contrà est, quia vndè habes scintillam Ignis prius in aerem conuerti; quæ ratio te mouet ad id asserendum? Ego certè rationem habeo à priori, qua moueor, ad concedendum immediatam transmutationem, quia inter ignem, & aquam adest maxima contrarietas, & actiuitas, quibus positus non potest non sequi transmutatio.

At inquires; est ratio à posteriori in contrarium; quando enim ignis scintilla in Oceanum mergitur, videtur ascendere, quidam fumus; hic est aer, in quem immediate transmutatus est ignis; similiter, quando gutta aquæ in fornacem projicitur, fumus ascendit, hic est aer, in quem immediate conuersa est aqua.

Benè; sed iam absolutè, & simpliciter negas aquam conuerti in ignem, non enim conuertitur immediate, nec mediatè, quia aqua prius conuertitur in aerem, seu fumum, quem videmus euolare, ergo iam ibi fit conuersio, nec vltèrius procedit; nullo ergo modo aqua in ignem conuertitur.

Probatur terrio: quia in sublimi, & prima aeris regione accenduntur Cometæ, trabes ignitæ, stellæ cadentes, fulgura, fulmina,

mina, quia nihil aliud sunt, quam terrestres exhalationes in ignem conuersæ. Aqua conuertitur in vaporem, & fumum, at fumus si accendatur, & ignem concipiat, nihil aliud est, quam flamma; ergo.

Obijcies primò: non potest dari transitus ab extremo ad extremum non transeundo per medium ex 5. *Phys.* 1. 22. ergo non potest dari transitus ab elemento dissymbolo ad dissymbolum, quæ extremè distant, nisi prius conuersio fiat in elementum, & symbolum, ergo.

Respondeo. Axioma illud, non potest dari transitus &c. habere locum in motu locali, qui non potest fieri à loco A. ad locum C. nisi quis prius transeat per locum B. Deindè etiam tale axioma habere locum in actione, quæ diffunditur per subiectum, sed non habere locum in Elementorum transmutatione, neque enim Elementa dissymbola sunt extrema, vt supponit argumentum, licèt in nulla qualitate conueniant.

Obijcies secundò. Si posset ignis conuerti in aquam immediate, sequeretur, ignem nunquam extinguere, sit enim ignis. aut lampas accensa, hæc consumpto oleo, nutritur aqua, deinde aere existente intrà lampadam, postmodum aere existente intrà cubiculum, atque ita nunquam exstingueretur. Imò & terra tandem aliquando anihilaretur, posset enim conuerti in aerem, in quem iam conuerterebuntur cacumina montium, & sic deinceps tota terræ vastitas in aerem verteretur, & transmutaretur.

Respondeo. Ignem non quocunque pabulo, & Elemento nutrirì, licèt enim ignis maxime sit actiuitatis, & edacitatis, tamen cætera Elementa maximè sunt resistentiæ, atque adeò non sinunt se ab igne conuerti, atque consumi; hinc patet experientia, consumpto oleo, ignem quoque consumi.

Eodem modo respondeo ad alteram instatiam, Terram resistere aeri, ideòque non posse totam in aerem verti, & transmutari.

Obijcies tertio; lateres in ardentissima fornace positi, integri perseverant, ergo iam terra in ignem non conuertitur. Similiter si pugillus terre in flumen proijciatur, non conuertitur in aquam, sed simul cum aqua videmus terram defluere, ergo.

Respondeo. Ad primum casum, terram & ignem esse symbola, & cognata, non dissymbola: Præterea, lapides durissimi

ab igne consumuntur, & in calcem vertuntur: latezes ignem concipiunt, & si in igne diu durarent, non dubito, eos tandem consumendos esse, & conuerrendos vel in ignem, vel in aerem. Ad secundum casum dico, pugillum terræ, non statim verti in aquam, sed temporis progressu.

Neque enim ad id necessarium est auxilium agentis extrinseci, quia independenter ab omni extrinseco agente, qualitates Elementorum sunt actiue, & contrariæ, ergo seipsis agunt. Admoueat igni manum, & experimento probet. *Morandus* doctrinam suam, fortasse non calefiet manus, aut non absumetur.

Quæres. Quomodo intelligendum sit dictum Philosophi, *a. de Gen. 1. 25. facilius est transmutatio Symboli in Symbolum quam dissymboli in dissymbolum.* Videtur enim esse transmutatio æquæ facilis, aut æquæ difficilis vnius symboli in symbolum, ac vnius dissymboli in dissymbolum; sicuti enim se habet proportio vnius ad vnum, ita duorum ad duo, sed in primo casu vna qualitas ab vna corrumpitur, in secundo duæ qualitates corrumpuntur à duabus, ergo.

Respondeo, verè ita se habere proportionem vnius ad vnum, sicuti se habet proportio duorum ad duo, quando sunt cætera paria; at hic cætera non sunt paria, quia duæ qualitates, quæ supponuntur actiue, sunt minus actiue, quàm sint resistitiue qualitates oppositæ, si enim aqua deberet in ignem conueri, frigus, & humiditas aquæ sunt qualitates minus actiue, quàm sint resistitiue calor, & siccitas ignis, difficilior est ergo iste transitus, quàm sit alius, quo aqua vertitur, & transmutatur in aerem, nam magis actiuus est calor aeris, quàm sit resistitiuum frigus, calor enim est summè actiuus, at frigus non est summè resistitiuum, qualitas enim summè resistitiua, est siccitas.

LECTIO VII.

Elementorum Congressus, & Mixtio.

ELEMENTA in vnum locum conuenire, & congregari ad faciendum tertium corpus ab ijs diuersum, quod propterea appellatur mixtum, citrà omne dubium est; agunt enim adiutricem,

& reagent, & patiuntur Elementa, donec tandem ex mutua eorum actione, & reactione, ex mutuo eorum congressu, & pugna, tertium quid, seu mixtum oriatur.

Quia verò Scholæ frequenter vtuntur hac phrasi, mixtum componi ex Elementis, fieri ex Elementis, constare ex Elementis, examinemus, in quo sensu est intelligendum, mixtum constare ex Elementis, ita nè vt formæ substantiales Elementorum maneant in mixto, an verò in mixto maneant proprietates Elementorum, & virtutes, quæ sint Elementorum Vicariæ, & eorum vice, ac loco substitutæ.

Primò ergo ponunt aliqui. Elementorum formas substantiales in mixto manere.

Secundò alij ponunt. Elementa formaliter quidem concurrere, & conuenire in vnum locum ad faciendum mixtum, sed in eo non remanere formaliter, & secundum eorum substantiales formas, quia facto mixto, recedunt formæ substantiales Elementorum, & remanent earum virtutes, seu qualitates, non quidem in summo, vti erant in Elementis, sed refractæ, & remissæ.

Conclusio. Elementa manent in mixto non formaliter, sed virtualiter, idest, secundum eorum virtutes refractas, & remissas.

Dixi, secundum eorum virtutes refractas, & remissas, quia hi, qui ponunt, Elementa in mixto remanere virtualiter, diuisi sunt inter se; nam alij explicant, quòd remaneant secundum eorum virtutes refractas, & remissas, vt docet *Scorus loco ubi supra* (quem & ego sequor;) Alij è contra volunt Elementa in mixto remanere virtualiter, non solum quia remanent secundum eorum virtutes, sed etiam quia forma mixti, vtpotè perfectior formis Elementorum, continet illas virtualiter, vt anima rationalis virtualiter continet animam vegetatiuam, & sensitiuam.

Probatur Conclusio quia. Si in mixto essent formæ substantiales Elementorum, iam mixtum esset aggregatum quoddam per accidens, & non vnum per se, coalesceret enim ex vna materia, & pluribus formis substantialibus, sed hoc est absurdum, vt patet, ergo.

Respondebis. huiusmodi formas substantiales esse subordinatas formæ mixti, sicuti in sententia adiuuante formam corporeitatis, & alias formas partiales, non ut aggregatum per ac-

eidens, quia formâ corporeitatis, & aliæ partiales subordinatæ sunt formæ totali.

Sed contra est, quia de formis partialibus est eadem difficultas, ergo per illam non soluitur ista alia de formis substantialibus Elementorum, nam est contrâ bonum modum philosophandi, vnam difficultatem per aliam, & rem controuersam per aliam æquè controuersam, explicare.

Præterea lata est disparitas inter formas partiales, & formas Elementorum in mixto; *Scotus* enim formas partiales admittit, & negat formas Elementorum in mixto remanere, ratio autem disparitatis est; quia formæ partiales exercent suos peculiare effectus formales, forma corporeitatis dat esse corporis, forma carnis dat esse carnis, forma ossis, dat esse ossis; at formæ Elementorum in mixto non dant esse suum formale, mixtum enim non est ignis, non est aqua, non est terra, aut aer, nec uni suæ parti dat esse ignis, alteri esse aeris, aut aquæ, aut terræ, esto mixtum habeat calorem, qui est proprius ignis, frigiditatem, quæ est propria aquæ, ideo dixi, remanere in mixto qualitates Elementorum.

Addidi, refractas, & remissas, quia hæ qualitates in summo, & intensæ, sunt proprietates Elementorum, & ideo in tali gradu non possunt alijs corporibus conuenire.

Ex his etiam patet. Formam mixti non continere virtualiter formas Elementorum, sicuti secundum aliquos Anima rationalis continent virtualiter animam vegetatiuam, & sensitiuam: nam anima rationalis exercet omnes operationes animæ vegetatiuæ, & sensitiuæ, sed forma mixti non exercet effectus, & operationes Elementorum, neque enim forma mixti dat esse ignis, aut esse aquæ, sicuti anima rationalis dat sentire, & vegetare; dat esse sensitiuum, & vegetatiuum.

Obijcies primò. Vnumquodque resoluitur in ea, ex quibus constat, sed mixtum resoluitur in elementa, nam si strues lignorum viridium accédatur; videmus ex illa prodire flammam, fumum, humorem, & cineres, quæ quatuor Elementis, igni, aeri, aquæ, & terræ, correspondent. Confirmatur, ex floribus, & herbis stillarij ministerio distillantur aquæ, ergò.

Respondeo. Flammam, fumum, humorem, & cineres non esse Elementa, sed mixta quædam Elementis similia, & de nouo virtute ignis generata, nam si fumus esset ignis, aut aer, ascenderet sursum, at contrarium experimur in carbonibus, fumus enim

enim ex illis elicitus deorsum tendit,

Ad confirmationem dico. Aquam ex floribus, & herbis distillatam non esse aquam elementarem, unde bene notat *Auerſa* ubi suprà, eam aquam non esse aptam ad Sacramentum Baptismi, ad quod requiritur aqua elementaris. Aut dicas, in poris corporis cuiuscunque reperiri sæpè aliquas particulas Elementorum, quæ deinde calore ignis, aut etiam Solis foras extrahuntur.

Obijcies secundò. Non potest assignari, à quo corrumpantur formæ Elementorum, ergo remanent in mixto. Antecedens probatur, quia non possunt illæ formæ ad inuicem corrumpi per mutuas eorum actiones, & reactiones, quia non datur excessus virtutis vnius Elementi suprà aliud, & præterea Elementa fuerunt à Deo creata, & producta, ergo à solo Deo possunt destitui, & corrumpi, neque enim possunt Elementa corrumpi, & destitui à forma mixti, quia hæc ex ipsis Elementis fit, & generatur.

Respondeo. Formas Elementorum corrumpi, & destitui formaliter à forma mixti, quæ cum sit in eadem materia incompositibilis cum formis Elementorum, vi illius ab eodem subiecto, & materia excluditur; effectiue verò formæ Elementorum destruntur ab agente producente formam mixti; neque enim formæ Elementorum creatæ fuerunt à Deo, uti est creatæ anima rationalis, sed à Deo fuerunteductæ initio mundi ex materia, unde Deus in Elementorum creatione, seu productione se habuit, ut agens naturale, ideo possunt illæ formæ ab alio agente naturali destitui, & corrumpi.

Præterea Anima rationalis est creata à Deo, & tamen à corpore, cui est vnita vi agentis naturalis, separatur, & excluditur, ego eodem modo, quamuis formæ Elementorum essent creatæ à Deo, adhuc ab agente naturali possent à materia mixti excludi, & tolli.

Obijcies tertio. Si Elementa dicerentur esse in mixto virtualiter modo explicato, etiam vnum Elementum virtualiter esset in alio, nam calor ignis est etiam in aere, sed hoc secundum non dicitur, ergo nec illud primum.

Respondeo. Elementa contineri in mixto virtualiter, quia in mixto sunt non modo virtutes actiue, sed etiam motiue elementorum, & virtus motiua vnius Elementi non continetur in alio Elemento: Hinc mixta dicuntur moueri iuxta virtutem prædominantis Elementi: sic calida mouentur sursum, frigida deorsum.

DISPVATIO IX.

DE CORPORE GENERABILI,

ET CORRVPTIBILI.

AD Inferiora tandem, & ad corpora omninò generabilia, & Corruptibilia in comuni devenimus. Alij disputationem hanc inscribunt de oru, & interitu; Alij cum Aristotele de Generatione, & Corruptione; idem sensus est, licet phrasi diuersa utantur: nomine Generationis venit productio formae substantialis in subiecto. Dixi forma substantialis, quia eius productio, & primò intenditur à Natura, & est huius Disputationis primum Obiectum, & scopus; dixi in subiecto, ut contradistinguiatur generatio à Creatione, quae in subiecto non fit, & est à subiecto omninò independens. Generationi opponitur corruptio, quae est destructio formae substantialis in subiecto, sicuti & Creationi opponitur Anihilatio, quae est totius destructio; Aristoteles ubi dicit I. de Gen. 17. Generatio vnius est corruptio alterius, intelligendus est in sensu materiali, seu reali, quatenus, scilicet, à parte rei nunquam contingit generatio alicuius formae, quin sit alterius formae destructio, & corruptio; non enim potest intelligi in sensu formali, quia productio, formaliter non potest esse destructio, ens non potest esse non ens.



LECTIO I.

Terminus formalis generationis.

TRia sunt, quæ per generationem fiunt, seu vi generationis existunt; Forma, unio, & compositum; Verum non in omni generatione forma existit vi generationis; nam in generatione hominis anima rationalis non existit vi generationis, præsupponitur enim iam existens, ut potè creata à Deo; sicuti etiam materia prima quia creata à Deo, non existit vi generationis, nullo modo.

Ideò nec de materia prima, nec de forma in generatione hominis est, ulla difficultas in præsentia. De composito concedunt omnes, illud esse terminum totalem generationis; unde bene ait Philosophus *1. Phys. l. 82. quidquid fit, compositum est*.

Videamus, An unio, vel forma, sit formalis terminus generationis, nam ad hæc duo difficultas tota restringitur.

Suppono autem, ut eruditè notant *Barthol. Amicus 1. de Generatione. 2. art. 2. Ioan. Lugo de Incarn. disp. 11. sect. 2.* Terminum formalem generationis dici id, quod primò, & per se attingitur per generationem, seu primò, & per se existit vi generationis; At id existit primò, & per se vi generationis, quod primò attingitur per generationem, & non existit ratione alterius, quod prius per generationem attingatur, imò cætera per illud, seu ratione illius attinguntur, & existunt; Simili ratione, qua in scientijs, & Artibus id dicitur obiectum formale quod primò, & per se consideratur, & attingitur, ità ut cætera ratione illius, seu per illud considerentur, & attingantur, ità obiectum formale Physicæ est naturalitas, hæc enim primò, & per se consideratur à Physicis, ità ut cætera ratione illius, & sub formalitate naturalitatis, considerentur; Id ergo, quod primò, & per se attingitur per generationem, seu existit vi generationis, erit terminus illius formalis, cætera verò erunt terminus, vel materialis, vel totalis, vel aliqua alia ratione ad generationem spectabunt.

Prima sententia ponit, terminum formalem generationis esse formam.

Ità ex Antiquis *quamplurimi*, quos fuscè relatos habes apud Amicum ubi supra, ex Thomistis *Socin. 7 met. q. 21. Flandris*

qu. 12. ar. 2. ex Scritistis Antonius Andraas 7. met. 4. Controu. 5.
 Phys. qu. 1. ex Recentioribus Vafq. p. 3. tom. 1. disp. 19. c. 2. Co-
 nimb. lib. 1. de Gen. c. 4. qu. 15. concl. 3.

Secunda, ponit terminum formalem generationis ex æquo for-
 mam, & vnionem, sed formam, vt vnitam.

Ita Ruusius lib. 1. de Gen. c. 4. tract. 1. qu. 3. Affer. 3. num. 42.
 Morandus 1. de Gen. tract. 1. q. 3. nu. 9. Verum Ruusius nu. 46.
 in fine, clarus se explicans ponit, solam Formam esse Termini-
 num formalem, vnionem vero esse conditionem, sine qua non.

Tertia sententia ponit, Terminum formalem esse vnionem.

Ita Auerſa to. 2. Philos. qu. 37. sect. 3. Amicus vbi suprâ. Quie-
 dus 2. de Gen. puncto 4. Hurtad. in Phys. disp. 11. sect. 5. Sua-
 rex. tom. 1. in 3. p. d. 8. sect. 3. S. in hoc. Aureolus apud Capreo-
 lum.

Conclusio. Terminus formalis generationis est vnio.

Probatr quia: Terminus formalis generationis, sicut & cu-
 iuscunque actionis est is, qui producit, & existit vi genera-
 tionis primò, & per se, quatenus non ratione alterius, sed se-
 ipso fiat, & producat, cætera verò, quæ per actionem fiunt,
 ratione illius fiant, vt supra exemplificauimus; & vltius po-
 test declarari exemplo vnionis, quæ attingens parietem colora-
 tum, habet pro termino formali colorem, quia color per se at-
 tingitur ratione alterius, imò potius paries ratione coloris at-
 tingitur, & si non esse color, non attingeretur.

Sed in Generatione, Vnio primò, & per se attingitur, primò,
 & per se generatur, non forma, cætera verò dicuntur genera-
 ri, & fieri vi vnionis, non vi formæ; ergo, Probatr minor
 quia: Forma in primis non in omni generatione fit, & pro-
 ducitur, vt patet in Generatione Hominis: deinde in alijs ge-
 nerationibus, Compositum non dicitur generari, & fieri ratione
 formæ, nam bene potest produci vnio, quin fiat, & generetur
 Compositum, non ergo forma, sed vnio est terminus formalis.

Respondebis cum Auctot. Secundæ Sent. saltem Forma, vt
 vnita, erit Terminus formalis Generationis.

Sed contra est, quia vel forma vt vnita, dicit solam Vnio-
 nem, & sic ista Responsio non differt à nostra Conclusionē: vel
 dicit solam formam, & id etiam est sufficienter impugnatum
 Argumento facto in probatione Conclusionis; vel dicit formam,
 & Vnionem simul, & sic idem est dicere, formam vt vnitam,
 ac dicere Compositum, sed Compositum est Terminus totalis,
 non

non formalis in omnium Sententia, ergo; vel denique, Tò forma vt vnita, dicit tertiam entitatem, quæ in Homine, est humanitas, in equo equinitas, & de hac eadem ratio militat, ac de ipso Toto, seu Composito, quia Equinitas, & tercia entitas sit, & generatur; fit, & producitur vi generationis, ergo.

Obijcies primò. Generatio est mutatio à priuatione ad formam, ergo sicuti terminus formalis à quo, est priuatio formæ, ita terminus formalis ad quem est ipsa forma, non ergo est vnio.

Respondeo. Verè terminum formalem generationis sub formalitate mutationis esse formam, vt bene probat Argumentum, ac sub formalitate, & conceptu Actionis, & productionis, non forma, sed sola vnio est terminus formalis.

Obijcies secundò, forma non fit vi vnionis, sed fit seipsa æquè, ac vnio, ergo & ipsa est terminus formalis, vti est vnio.

Respondeo. Formam ita fieri seipsa, vt tamen ratione formæ non dicatur fieri Compositum, at Vnio ita fit seipsa, vt ratione Vnionis dicatur fieri compositum; ad terminum formalem actionis vtrumque requiritur, & quod seipso fiat, & quod cætera, quæ fiunt, denominentur fieri ratione Vnionis; Imò & ipsa forma aliqua ratione etiam dicitur fieri ratione vnionis, quia producitur, vt vniatur, vt vi vnionis faciat Compositum.

Obijcies tertio. Forma non est terminus materialis, talis enim est materia, ergo est terminus formalis.

Respondeo; quòd si forma comparetur cum vnione æquè est terminus materialis ac materia, quod maxime verificatur in Generatione Hominis, in qua ad Generationem æquè presupponitur materia prima, ac presupponatur Anima Rationalis, in alijs verò Generationibus; certum est, posse produci formam absque eo, quòd resultet compositum, supernaturaliter, ac nò potest produci vnio, quin resultet Compositum. Si verò forma comparetur cum materia prima relatiuè ad Compositum, vltro admitto, Formam esse Terminum formalem, quia est pars formalis Compositi naturalis.



LECTIO II.

An detur Resolutio vsque ad Materiam Primam.

Satis famosa est, & celebris hæc Controuersia inter *Thomistas* ex vna parte, *Scotum* & *Recentiores* ex altera: solet sub alijs terminis sic proponi; An in Genito remaneant eadem Accidentia, quæ erant in Corrupto. Et sensus Controuersie est, An quando destruitur Compositum, & dissoluitur, sicuti remanente eadem materia prima, introducitur noua forma substantialis, & forma vetus, quæ prius existerat, recedit, & abit, ita quoque Accidentia, quæ formam veterem comitabantur, recedant, & abeant, recedente, & abeunte veteri forma, an verò potius remaneant cum materia prima, simul cum qua transcant ab vna ad alteram formam.

Vbi verum est. Accidentia specifica, quæ ad formam, tanquam proprietates necessariò consequuntur, quia sunt ab illa, prorsus inseparabilia, naturaliter abite, & recedere cum abeunte, & recedente forma, neque enim remanent risibilitas, aut admiratiuitas recedente anima rationali. Dubium est de accidentibus alijs vtrique formæ communibus, & quodammodo genericis, vti sunt quantitas, qualitas, Albedo, Nigredo, Cicatrix, & similia.

Pendet, ni fallor, solutio præsentis difficultatis, ex assignatione, & deputatione subiecti, cui inhæreant, & à quo sustententur Accidentia, præcipuè verò quantitas, Dico præcipuè quantitas, nam cætera Accidentia inmediate in quantitate recipi, concedunt communiter omnes. Debet ergo. vt ista difficultas fundamentaliter, & in radice solvatur, assignari subiectum, cui quantitas inhæreat. Si enim tale subiectum cum Thomistis compositum ipsum assignes, & deputes, concedas necesse est, Resolutionem fieri vsque ad materiam primam, & nullum remanere accidens, sicuti ipsum compositum non remanet, sed resolvitur, & destruitur.

E contra si euiceris, quantitatis subiectum esse materiam primam, facile saluabis accidentia à corruptione, quia remanente materia prima, non est, cur accidentia destruantur, & pereant.

Scio Recentiores aliquos deputare pro subiecto accidentium, compositum ipsum, & tamen negare ad corruptionem compositi, accidentia corrumpi, & destrui.

Sed hi premuntur eo vulgato quidem, sed satis efficaci argumento, quo conuincuntur admittere, accidentia transire, & migrare de subiecto in subiectum, si enim compositum est subiectum, & modò est vnum, modò alterum, compositum, si accidentia remanent eadem, transeunt sanè, & migrant de vno subiecto ad alterum, de vno composito ad alterum.

Scio, & alios concedere accidentia recipi in materia prima, & tamen admittunt resolutionem omnium accidentium. Ità *Cosimb. 1. de Gen. c. 4. qu. 18. Fonseca 8. Met. c. 1. qu. 1.*

Sed hi valdè laborant, in assignanda causa, & radice corruptionis horum accidentium, si aliàs quòad eorum esse, & conseruari à materia dependeant.

His ergo medijs sententijs omiſſis, tanquam minùs probabilibus, speculationem omnem, & examen ad sententias conuertamus extremas.

Auctores, qui defendunt dari resolutionem vsque ad materiam, atque adeò accidentia recipi in composito fusè referuntur ab *Amico 1. de Gen. tract. 2. qu. 4. dub. 3. art. 2. ab Auerſa 10. 2. Philos. qu. 37. sect. 6.* Sunt omnes Thomistæ sequentes D. Thomam, quem tamen *4. contra Gentes cap. 81.* ad secundum stetit pro contraria sententia, fateretur *Ferrariensis ibi circa primum dictum.* Nouissimè hanc sententiam iuxta principia Thomistarum sequutus est *Bernardinus Mazziotta in Quæst. Sect. qu. 9. per totam, & fusè, & eruditè.*

Auctores oppositæ sententiæ negantis resolutionem, & destructionem accidentium, sunt in primis *Scotus in 4. d. 11. q. 3. cum eo Scotista, & Tat. 1. de Gen. qu. 1. d. 1. Ioannes de Magistris qu. 1. not. 1.* & omnes Recentiores, quos fusè relatos habes apud *Anicium, & Auerſam loco vbi suprà.* Verum *Scotista* mouentur eo fundamento, quia putant, dari formam corporeitatis, quæ remanet destructo composito, & beneficio huius formæ remanere accidentia, quæ aliàs corrumperentur, & abirent abeunte forma totali: *Recentiores* verò non omnes eo fundamento mouentur, quia non omnes eam formam corporeitatis admittunt.

Conclusio. Non datur resolutio vsque ad materiam primam, sed aliqua remanent accidentia in genito, quæ erant in corrupto.

Probatur primò ex *Arist. I. de Gen. t. 24. si aliqua maneat passio eadem contrarietatis in generato, & corrupto, ut quando ex aere aqua, si ambo transparentia, aut frigida, non oportet huius alteram Passionem esse, in quam transmutatur, & 2. de Gen. 25. in transmutatione Elementorum Symbolorum: unam qualitatem, in qua illa conueniunt, remanet, unde t. 27. habet hæc formalia verba: quando aque corruptum fuerit frigidum, Ignis autem siccum, aer erit; relinquatur enim huius quidem calidum, illius autem humidum.*

Probatur secundò ratione fundamentali, & à priori quia. Quantitas in sola materia subiectatur, tanquam subiecto inhesionis, & sustentationis, ergo sicut destructo composito, & abeunte forma verè, remanet materia prima; tamen in ea remanent omnia accidentia subiectata in quantitate, & ipsa in primis quantitas immutata manet, & inuariata. Consequentia videtur satis clara, & certa. Antecedens (in quo est tota difficultas) probatur quia. Ex vna parte materia prima de se est naturaliter exiguiua quantitatis, tanquam proprietatis sibi debitæ independentè ab omni forma substantiali, & antè omnem formam substantialem, & ex alia parte ipsa est de se sufficientissimum subiectum quantitatis independentè ab omni formâ substantiali, ergo verè quantitas in materia recipitur, sicuti omnis proprietas in sui essentia, à qua fluit, omnis potentia in ea anima, cuius est potentia.

Antecedens probatur quia, materia de sui natura petit esse extensa, & habere extremitatem partium, tùm quia per talem extremitatem contradistinguitur à substantia spiritali, quæ petit è contra esse inextensam, & non habere extremitatem partium, tùm quia nisi sit extensa, non est apta, vt possit recipere actiones agentis naturalis, non enim datur actio agentis naturalis, non in subiectum sine aliquo contactu, & non datur contactus inter agens corporeum, extensum, & quantum, nisi subiectum quoque sit quantum, & extensum, ergo materia de sua natura petit extensionem, & extremitatem partium.

Quòd autem talis exigentia sit in materia antecedenter ad omnem formam substantialem, patet, quia ipsa est subiectum agentis educentis formas, ergo debet præsupponi, aut saltem præintelligi cum omni necessaria dispositione ad exequendum, tale munus subiecti respectu agentis, & formarum, sed hæc dispositi-

positio consistit in eo, quòd sit extensa, & habeat extremitatem partium, ergo de sua natura, & antè omnem formam substantialem materia exigit, & habet talem extensionem, & extremitatem.

Quòd autem etiam de se, præcisa quacunque forma substantiali, imò & antè omnem formam substantialem, sit sufficiens ad exercendum munus subiecti, patet, quia alibi probauimus, materiam habere propriam existentiam, & aliàs si indigeret forma ad exercendum munus subiecti, vel indigeret forma, tanquam ratione formali recipiendi, vel tanquam conditione; non primum, quia iam materia de se non esset ens potentiale, cui proprium est, imò & essenziale recipere, & esse subiectum, imò ipsa forma indueret rationem subiecti, quo nihil absurdus.

Si forma se haberet, tanquam conditio sine qua non, iam aut præexisteret forma substantialis in materia antè formas accidentales, aut esset simul cum illis; quodcunque dicas, sequitur, quòd formæ accidentales non sint præuix dispositiones in materia ad recipiendas formas substantiales, quod est contra formalitatem accidentium, quæ propterea dicuntur entis entia in sententia Thomistarum, quia sunt præuix dispositiones ad formas substantiales, & ad illas de sui natura ordinantur, ergo.

Confirmatur primò, quia in Sententia Thomistarum, materia signata, & affecta quantitate est principium indiuiduationis, ipsa ergo in primis materia est hæc, & indiuidua, si sit affecta, & signata per quantitatem, ergo antè omnem formam substantialem debet esse quanta, forma enim est hæc, & indiuidua per materiam signatam, & affectam quantitate, ergo præsupponit materiam cum quantitate, tanquam radicem suæ indiuiduationis.

Confirmatur secundò quia. est commune dictum valdè notum, & Scholasticis familiare, quantitas sequitur materiam, qualitas formam, sed qualitates ita sequuntur formas substantiales, ut sint illarum proprietates, ut patet in formis substantialibus primorum corporum, seu Elementorum, ergo quantitas idèò sequitur materiam, quia est illius proprietas coetanea, & coeua.

Probatur tertio principaliter, sed ratione à posteriori, deducta ex testimonio sensuum, quod etiam efficacissimum est, tum quia ait *Arist. I. de Gen. t. 19. sensus habet virtutem scientiæ*, tum quia ex eodem *Aristot. I. Cæli t. 22. videtur ratio hys, quæ apparent attestari, & ea, quæ apparent, rationi.*

Quia videmus in Aethiope mortuo eandem nigredinem, quam cernebamus in eo viuo, eandem figuram, eandem organizationem, cicarricem, & quantitatem prorsus eandem, imò & ad breue tempus eundem calorem sentimus. Similiter in herbis à suis radicibus, aut pomis à suis truncis recisis, & abscissis, eundem experimur saporem, odorem, virtutem, & actiuitatem eandem omninò; & sanè si in herbis huiusmodi, & pomis non essent eadem virtutes, pharmaca ex illis confecta, non prodesse, ergo si sensuum arbitrio decidenda lis est; contra Resolutionem vsque ad materiam primam pronuncianda Sententia est.

Probaturs quartò quia: si daretur talis resolutio, corrumpere-
retur aliquis effectus sine causa corrumpente, produceretur sine
causa producente, nam si, verbi gratia, homo intereat vi ignis,
corrumpitur calor naturalis in homine, qui supponitur mori,
sed talis calor non corrumpitur à calore ignis, quia calor non
est contrarius calori. Similiter si homo vi frigoris moriatur,
calor, quem ad breue tempus experimus in mortuo, non potest
produci à frigore, quia vnum contrarium non potest produci ab
altero, imò potius vnum contrarium destruit aliud. ergo iam
in primo casu corrumpitur calor sine causa corrumpente, & in
secundo casu produciturs calor sine causa producente.

LECTIO. III.

Soluantur Argumenta Thomistarum.

AD propriam Sententiam stabiliendam, plura excogitarunt
Argumenta Thomistae, & Recentiores illi, qui Resolutionem
vsque ad materiam primam posuerunt.

Obijciunt primò. Auctor. *Arist.* qui I. de Gen. 1. 23. definit,
Generationem esse mutationem nullo sensibili remanente,
ut subiecto ordine, ac si diceret, nullo remanente accidente,
ux his, quae prius erant, nam ab accidentibus habetur omnis
sensibilitas. Confirmatur ex eodem in lib. de Pradicam. c. de
substantia, ubi habet, *ablatis primis substantijs, nihil aliud
remanet*. ergo destructo composito, & indiuiduo non rema-
nent accidentia.

Respondeo. Ad primum locum; satis clarè patet, *Aristotel.*
loqui

loqui de subiecto denominationis, quod est compositum, non de subiecto inhaesionis, quod est materia prima, quam remanere, admittunt omnes; Ad confirmationem dico, eo argumento etiam probari, non remanere materiam primam, nam nihil aliud remanet ex Aristotele, nihil aliud remanere facta hypothesis, quod primæ substantiæ secundum omnes sui partes tollerentur; atque iam patet, remanere materiam primam, manent ergo etiam accidentia materiæ primæ debita, & connaturalia.

Obijciunt secundò. Quantitas est proprietas debita corpori, Corpus enim per quantitatem constituitur, sed materia prima de se non est corpus, ergo non potest habere quantitatem, nisi sit in ea, vel forma substantialis corporeitatis, vel si hæc non datur, debet in materia præexistere, aut saltem præintelligi forma substantialis totalis prout tribuit gradum corporis.

Respondeo. duplex corpus assignari, physicum, scilicet, & mathematicum; concedo vtrò corpus mathematicum per quantitatem formaliter constitui, quia corpus mathematicum nihil est aliud, quàm trina dimensio; at corpus physicum est ipsamet materia prima, vel se sola, vel prout exigitiua Quantitatis; cæterum materia prima se sola, & ante omnem formam substantialem, siue partialem corporis, & exigit & habet quantitatem, per hoc enim contradistinguitur à re spirituali, quæ non exigit, imò potius habet repugnantiam ad habendam Quantitatem, seu extremitatem partium.

Obijciunt tertio. si remanerent eadem Accidentia in genito, & in corrupto, non euitaretur transitus, & transmigratio accidentis de subiecto in subiectum, nam subiectum adæquatum, & ut quod, est ipsum compositum. Confirmatur, quia ablato actu primo non potest remanere actus secundus, ablato esse simpliciter, non potest remanere esse secundum quid; sed actus primus, seu esse simpliciter est forma substantialis, actus secundus, & esse secundum quid, est forma accidentalis, ergo ablata, & pereunte forma substantiali pereunt quoque accidentia.

Respondeo. Non esse absurdum, accidentia migrare de vno subiecto denominationis ad aliud; esto sit absurdum, migrare de vno subiecto inhaesionis ad aliud, in casu nostro fieret primæ transmigratio, non secunda: Ad Confirmationem, & præcipuè ad id, quod dicitur de actu primo, & secundo, dico; tunc ablato actu primo, auferendum quoque esse actum secundum, quando actus secundus dependet à primo in suo conseruari; secus, si actus

si actus secundus à primo non dependeat in conseruari; hinc ablato Sole aufertur & lux; quia lux in conseruari à Sole dependet, sed ablato igne, non aufertur calor à manu calida, quia calor in conseruari non pendet ab igne: in casu nostro forma accidentalis non dependet in conseruari à forma substantiali, hac ergo pereunte, remanet illa.

Imò si ordo executionis inspiciatur, forma accidentalis est actus primus, quia primò recipitur in materia, & in ea debet præintelligi, tanquam dispositio ad formam substantialem. Ad id, quod additur, de esse simpliciter, & esse secundum quid; patet ipsum compositum habere esse simpliciter; sed quis dicet, compositum esse prius, aut materia, aut accidentibus, aut forma nisi fortasse ad ordinem intentionis recurras, nam ipsum compositum primò est intentum, & volitum à natura.

Obijciunt quartò; si remaneret quantitas destructo composito, & pereunte forma substantiali; iam firmior esset vnio inter materiam, & accidentia, quàm sit inter materiam, & formam substantialem, quod est absurdum, ergo. Confirmatur quia, idem est ordo in respiciendo, & in recipiendo, sed ordo in respiciendo est, quod primò respicitur forma substantialis, ergo hæc primò recipitur, non ergo quantitas est cœua materiæ primæ:

Respondeo. Nullum esse absurdum, aut inconueniens in hoc, quòd firmior sit vnio inter materiam, & accidentia, quàm sit inter materiam & formam substantialem, sapè enim substantia magis est connexa cum aliquibus accidentibus, ac sit cum alia substantia, patet enim, quòd qualibet essentia magis est connexa cum suis proprietatibus, quàm cum alia essentia.

Ad Confirmationem, nego omnino, debere esse eundem ordinem in respiciendo, & recipiendo; imò dico, debere talem ordinem inuerti; & esse omnino oppositum, oppositus est enim vel in ipsa *Thomistarum* sententia ordo executionis, & ordo intentionis, quod enim est primum in intentione, est vltimum in executione, & quod est vltimum in intentione, est primum in executione; ergo, quod primò natura intendit, est forma substantialis; at id, quod primò exequitur, & in materiam inducit, est forma accidentalis, quæ est præuia dispositio ad formas substantiales.

LECTIO IV.

An detur forma Corporeitatis.

Redit iterum pugna *Thomistas* inter, & *Scotum* de Forma Corporeitatis, & cæteris formis substantialibus partialibus.

In primis ponit *Scotus* in composito physico, præsertim animato, potissimum verò in Homine, tot formas substantiales, quot sunt partes etherogeneæ, & substantialiter diuersæ, quia ergo in Homine est pars, quæ dominatur caro, pars altera, quæ denominatur os, neruus, & denique tota materia denominatur corpus, ideo ponit primo formam substantialis Corporeitatis, formam substantialem carnis, formas substantiales ossis, nerui, & similes alias, à quibus proueniant denominationes illæ corporis, carnis, ossis, & nerui. Has formas vocat partiales, vt distinguat à forma totali, seu forma totius, quæ, vt alijs est superior, & perfectior, ita totam materiam informat, actuatur, & vivificat.

Ita *Scotus* cum suis in 4. dist. 11. qu. 3. artic. 2. & 7. met. q. 2. quodlib. 2. q. 11. *Henricus* quodlib. 2. q. 2. & *Schola Nominalium*.

Ex Antiquis hanc sententiam docuerunt *Stoici*, & *Pericles Lydius* ex *Simplicio* t. 69. 1. *Phys.* *Auicenna* 1. suff. 2. tract. 2. met. cap. 2. *Porphyrius* apud *Simplicium* ubi supra. *Auerroes* epit. met. tract. 2. Ex Modernis *Aresius* 1. de Gen. disp. 2. q. 10. sect. 2. *Morandus* 1. de Anim. tract. 1. q. 5. *Pasqualigus*, & alij.

Ex aduerso *Thomistæ* omnes, tanquam superfluas, & sine vlla necessitate inductas, negant formas huiusmodi partiales, & ethereogeneitatem partium diuersarum, vel in varia, & diuersa refundunt accidentia, vel in ipsam formam vnicam, & totalem, quæ pro varia dispositione accidentali, quam reperit in varijs, materiæ partibus, tribuit diuersum esse substantiale, seu diversos gradus entis substantialis.

Illustratur hæc Doctrina exemplo Hominis, in quo Anima rationalis ita informat, & vivificat materiam, vt in primo si-
guo tribuat illi existentiam, seu gradum entis actualis, in secun-

do signo tribuat illi esse substantiale, seu gradum entis substantialis in varijs partibus iuxta varias dispositiones, nam illi parti materię, quę tenuis est, & mollis, tribuit esse carnis, alteri parti, quę est dura, & sicca, tribuit esse ossis; in tertio signo tribuit esse corporis, seu gradum corporeitatis, denique tribuit esse vitę, seu gradum viuentis.

Ira Thomistę omnes, quorum Sententiam docent ex Antiquis *Simplicius 1. Phys. comm. 66. Arr. 1. Phys. t. 63.* ex Recentioribus *Auerſa 2. tom. Philos. q. 45. sect. 2. Suarez disp. 15. sect. 10. Conimbr. 1. de Gen. c. 4. q. 22. Tolet. 2. de Anima q. 1. Oued. contr. 3. Phys. Arriaga disp. 3. Amicus 1. de Gen. Mazzotta in quęst. select. q. 9.*

Conclusio. Dantur forma Corporeitatis, & reliquę formę substantiales partiales.

Probatur Conclusio primo auctoritate *Arist. 2. de Anima t. 4* ubi definit, Animam esse actum corporis organici, ergo iam anima, quę est forma totalis non constituit, sed supponit iam corpus organicum constitutum, non nisi à forma partiali corporeitatis, aliàs si corpus organicum esset tale per ipsam animam, idem esset dicere, anima est actus corporis organici, ac dicere, anima est actus corporis animati. Confirmatur ex *1. de Anima t. 58.* in mixto præter animam, agnoscit *Arist.* formam mixtionis, quam docet constare ex diuersis partibus, carne, ossibus, & nervis, ergo.

Probatur secundò ratione à priori quia, In Composito naturali, præsertim in Homine, dantur plures partes ethereogeneę, & substantialiter diuersę, sed talis substantialis diuersitas non potest oriri, nisi à diuersis formis substantialibus partialibus, ergo.

Probatur minor, quia talis substantialis diuersitas non potest oriri à forma totius, hæc enim homogenea est, & per consequens non potest dare formaliter diuersum esse substantiale; dixi, formaliter, quia id, quod est vniuocum, & homogeneum, bene potest dare diuersum esse, & præstare effectus specie diuersos effectiue, vt patet in intellectu producente diuersos specie actus, in ipsa anima producente diuersas specie potentias; at forma homogenea, formaliter, & dando se ipsam, non potest præstare diuersos effectus formales, sed vnum potest præstare, quia talis effectus ab illa non distinguitur, si ergo ipsa est vna specie, effectus ab ipsa causatus erit vnus specie.

Respondebis . Anima licet formaliter homogenea sit, & una specie, virtualiter continet plures gradus entis, quos in varijs signis intelligitur communicare materię primę, & sic tribuit gradum corporis, gradum entis actualis, gradum substantię diuerse pro diuersitate dispositionum, quas inuenit in diuersis partibus materię, sicuti etiam Anima Rationalis dat esse vegetatiuum, sensitium, & intellectiuium; ergo.

Sed contra est quia . Anima, sicuti & quælibet forma, quamuis perfectissima sit, non potest communicare hos, & similes effectus, seu gradus, quando ipsa non est, sed antequam anima materię adueniat, præsupponitur illa organizata, & habens partes ethereogeneas, imò & recedente tali forma, adhuc illæ partes, & remanent ethereogenę, & sunt illæ eadem, quæ erant antea; vt patet in homine mortuo, cuius corpus, ossa, caro, & nervi eodem modo manent, ac erant in eo iam viuo, ergo talis ethereogenitas, & substantialis diuersitas non est ab anima formaliter, imò nec actiue, quia quod non est, nec effectiue potest quidquam operari. Ideò autem anima eadem intellectiua tribuit esse vegetatiuum, & sensitium, quia est formaliter vegetatiua, & sensitiua, at non est formaliter caro, aut os, aut nervus, ideo & lata est, & clara disparitas.

Respondebis secundo. Eas partes esse accidentaliter diuersas, & ethereogeneas, & talem diuersitatem haberi à diuersis specie accidentibus, esse carnis à mollitie, & tenuitate; esse ossis à duritie & densitate.

Sed contra est quia. Mortuo homine non remanent accidentia, quæ erant prius per *Thomistas*; at remanent caro, & ossa, quæ erant prius, ergo caro & ossa non constituuntur formaliter per accidentia, ergo verè sunt partes substantialiter diuersę.

Præterea, naturalius, seu magis conforme naturę est, ponere has formas substantialiter, quam accidentaliter diuersas, sic enim melius saluatur terminus formalis in generatione hominis, talis enim terminus non est materia, neque forma, quæ supponuntur iam creata à Deo, nec etiam est unio substantialis; quam plures *Thomistę* negant, & hi, qui concedunt, adhuc melius saluant talem terminum, si non solum unionem substantialem admittant, sed etiam formas substantiales partiales, ergo ponendę sunt formę substantiales partiales, nam id, quod melius est, & perfectius, esse ponendum ab æcurato naturę

Scrutatore, & Philosopho, tota natura clamat ex *Aristot. 2. de Gen. 1. 9. quod melius est, desiderat natura semper.*

Nonnulli ex diuersitate accidentium, & operationum partiũ ethereogenezarum, colligunt eorum diuersitatem substantialem, diuersæ enim formæ substantiales innotescunt ex diuersitate, specifica accidentium, & operationum.

Non placet; quia facili se ab hoc argumento expediunt Aduersi, dicendo, ex diuersitate accidentium & operationum colligi diuersitatem formarum substantialium, quando ea accidentia, & operationes diuersæ sunt in diuerso, & distincto supposito, vt cum calor est in igne, frigus in aqua: at si diuersa specie accidentia sint in eodem supposito, tale argumentum non ualeat, nam in eodem intellectu sunt diuersæ specie operationes, imò, & contrariæ, sepè etiam contradictoriæ, vt assentiri, & non assentiri, cum tamen vnus specie sit Intellectus.

Probatur tertio Conclusio Argumento perito è re Theologica, idem numero fuit Christi Domini Corpus mortuum, & uiuum, vt patet ex communi sensu Fidelium, & pluribus testimonijs Sanctorum Patrum, quos fusè cit. *Scotus ubi supra*, sed corpus mortuum non est tale ab Anima Rationali, quæ in eo corpore non erat, alias Christus Dominus non fuisset verè mortuus; Veneramur reliquias, & corpora mortua Sanctorum, ergo iam in ijs remanet eadem forma, quæ prius, sed non remanet Anima Rationalis, ergo forma corporeitatis. In Eucharistiæ Sacramento ex vi verborum ponitur Corpus, & Anima non ponitur ex vi verborum, sed per concomitantiam ex *Trident. sess. 13. cap. 3.* ergo Corpus non constituitur formaliter per Animam, aliàs & ipsa ex vi verborum poneretur, ergo.

Obijcies primò. Auctoritatem Philosophi, qui 4. *Meteor. 1. 54. 3. de Anima 1. 9. & lib. 2. de Hist. Animalium cap. 5.* docet, carnem hominis mortui esse æquiucè carnem cum carne hominis uiui. Et 2. *de Anima 1. 31.* ponit Animas esse veluti figuras, quatum vna continet aliam, quadratum continet triangulum, ergo non sunt plures animæ, sed plures formæ partiales.

Respondeo. carnem hominis mortui dici æquiucè carnem ratione formæ totalis, & vitæ, nam caro mortua caret vitæ, atque adeò caret forma totali, & completa, quam tamen habet caro uiua, sed si vtraque caro, & uiua & mortua considerentur quoad esse specificum parziale, eadem specie est caro mortua, & uiua

& viua; hinc idem Philosophus 4. Meteor. ult. docet; quando oculus potest videre, & exercere functiones vitæ, oculus est. at quando functiones vitæ exercere non potest, oculus dicitur per communitatem nominis cum membris viuis.

Ad secundum tex. ibi negari plures formas totales, & non subordinatas, non tamen negari plures formas partiales, & subordinatas.

Obijcies secundò: hæc formæ partiales sunt ordinatæ ad formam totalem, aliàs non facerent vnum per se, sed vnum per accidens, & per aggregationem, ergo iam non sunt formæ substantiales; hæc enim est differentia inter formas substantiales, & accidentales; quòd hæc sunt entis entia, idest, entia essentialiter ordinata ad substantiam, non sic formæ substantiales, quæ sunt entia simpliciter, & ad aliam vltiorem formam, seu actum non ordinatæ, ergo.

Respondeo. Non esse contrà rationem formalem substantiam ad aliud essentialiter ordinari, nam materiam ad formas, & formas essentialiter ordinari ad materiam, concedant communiter omnes; benè ergò potest vna forma substantialis ad aliam ordinari, si concipiatur, vt quid incompletum, & potentiale respectu alterius formæ superioris, & perfectioris, absque diminutione, aut deperditione sui esse substantialis.

Verum non in eo sensu, accidentia dicuntur entis entia, sed entia secundum quid, quia sunt essentialiter ordinata, seu subordinata ad substantiam, sed quia non sunt primò, & principaliter intentà à natura, sicuti sunt substantiæ, quæ propterea dicuntur entia simpliciter, siue sint formæ, siue sit materia, non enim sola forma substantialis est ens simpliciter, aliàs materia, vel esset ens simpliciter, & iam esset forma, non materia vel non esset ens simpliciter, & sic esset accidens. Imò si accipiatur ens simpliciter prout opponitur non enti simpliciter, æquè forma accidentalis, & substantialis, est ens simpliciter, quia vt subtilissimè notat Scotus ubi supra §. secunda ratio, non enti simpliciter, seu nihilo æquè opponitur. quodlibet ens, quamuis minimum, ac opponatur substantia.

Dices. quare forma substantialis est ens simpliciter, & est primò intentà à natura, forma verò accidentalis est ens secundum quid, & non est primò intentà à natura?

Responderet Scotus ubi supra; quia forma substantialis est hæc, forma accidentalis est hæc, seu quia illa est substantia,

hæc est accidens, quando enim devenimus ad rationem formalem, & immediatam, ulterius non progredimur; sicuti si quæras, quare calor calefacit, frigus infrigidat, nihil aliud respondebis, quia calor est calor, frigus est frigus.

Obijcies tertio. Quidquid advenit enti in actu accidentaliter advenit, sed forma totalis adveniret enti in actu, seu materiæ primæ iam constitutæ in actu substantiali per formas parciales substantiales, ergo forma totalis adveniret accidentaliter,

Respondeo eodem argumento probari, etiam datâ vna forma, eam accidentaliter advenire, quia adveniret materiæ iam dispositæ ad illam per accidentia, quæ cum sint actus, & ipsa constituunt materiam in actu. Præterea, per *Thomistas*, forma totalis, prout dat gradum vitæ, est posterior se ipsa, prout dat gradum entis actualis, & gradum corporis, ergo prout dat gradum vitæ accidentaliter adveniret.

Dicendum est ergo, id, quod advenit enti in actu completo, & alteri nõ subordinato, accidentaliter advenire; secus si adveniant enti in actu incompleto, & alteri subordinato, ut est in casu nostro.

Præterea, non omnè, quod advenit enti incompleto, accidentaliter advenit, nam plures Philosophi ex ijs, qui cum *Thomistis* negant formas istas parciales, admittunt supernaturaliter posse duas formas totales, & completas actuare eandem numerò materiam, quo casu altera earum adveniret enti in actu iam completè constituto, & tamen non adveniret accidentaliter, ex eo, quia, non actuaret illud ens in actu, seu non actuaret compositionem, sed solam materiam; sic in casu nostrâ forma totalis non actuaret compositum ex materia, & forma partiali, sed solam materiam.

Denique sicuti in gradibus metaphysicis res ita componitur, ut ens actuaturn per unum gradum, puta per gradum substantiæ, remaneat ulterius actuabile per alium gradum, puta per gradum animalis absque eo, quod iste alius gradus dicatur accidentaliter advenire, ita materiæ actuatæ per formas parciales, potest advenire forma totalis absque eo, quod dicatur accidentaliter advenire.

LECTIO VI.

*An in eadem materia possint esse duæ totales
Formæ substantiales.*

DE facto in vna materia esse vnam formam totalem, & non posse esse duas, nemo est, qui ambigat, sufficienter enim materia per vnam formam actuatur, & completur, altera ergo superflua est, & omne superfluum natura execratur, & odit, An de potentia absoluta possint esse duæ formæ totales in materia, ad examen vocamus.

Nonnulli hanc Questionem dicunt esse celeberrimam sed nescio, quo fundamento, nam non audiui frequentes de hac re disputationes, aut graues contentiones fieri inter Scholasticos.

Et sanè difficultas non procedit de formis contradictoriè oppositis, siue hæ formæ sine oppositæ contradictoriæ formaliter, siue æquiualemter, certum est enim, has esse impossibiles etiam diuinitus in eadem materia.

Sed notà, non illas formas dici contradictoriè æquiualemter oppositas, quæ quomodocunque possunt ad prædicata contradictoria reduci, aliàs omnes formæ essentialiter diuersæ, essent contradictoriè oppositæ æquiualemter, quælibet enim forma, imò & quodlibet ens implicite dicit negationem omnis eius, quod non est ipsum, atque adeo dicit virtualement, & æquiualemter, contradictionem cum alio omni ente. Sed eas formas intelligo esse æquiualemter contradictorias, quatum vna non potest exercere suum effectum formalem primarium, nisi excludat, & neget alteram, ità Cuiuslibet est æquiualemter contradictoriè opposita rectitudini, quia non potest pedem reddere curui, nisi neget, & excludat rectitudinem ab illo.

Negant Thomistæ posse supernaturaliter esse duas formas totales in eadem materia.

Affirmant Receptiores communiter, & pro se citant Scotum in 4. dist. 19. q. 3. §. quantum ergo. Sed reuera Scotus hic satis dubitanter loquitur, nec se pro hac sententia aperte declarat, en verba: licet Deus possit facere aerem simul cum igne de potentia absoluta, & foris ex eadem materia, tamen ut aer succedit igni, sic sunt impossibiles in simul essendo.

Conclusio supernaturaliter possunt duæ formæ substantiales ,
totales informare eandem materiam .

Probatnr primò . Argumento communi , & ideò efficaci ,
quia in hoc nulla cernitur implicantiã , aut manifesta contra-
dictio , vt ex solutione earum , quæ afferuntur in contrarium ,
patebit ; ergo .

Probatnr secundò à pari . Quia non repugnat , duo corpora
esse in eodem loco , & se penetrare ; duas qualitates contrarias
esse in eodem subiecto , duas naturas esse in vno supposito ;
vt etiam Aduersarij admittunt , ergo nec duas formas esse in
eadem materia .

Qua in re non video magnam esse difficultatem .

Verum Difficultas in eo videtur esse posita , vt assignetur
modus , quo Deus facit huiusmodi miraculum ; seu vt assigne-
tur , quid Deus addat , aut detrahat ab his formis substantiali-
bus , quas ponit in eodem subiecto , in quo naturaliter esse ne-
queunt .

Responsio Communis est . Deum ab vna ex his formis tol-
lere effectum negatiuum , & secundarium , quem habet , de ex-
pulsione alterius formæ ab eodem subiecto , quælibet enim
forma totalis habet pro sui effectũ primario , & positiuo actua-
re materiam , & pro sui effectũ secundario , & negatiuo ,
expellere alias formas totales ab eodem subiecto , qui effe-
ctus secundarius , quamuis sit connaturalis tali formæ , adhuc
tamen per absolutam Dei potentiam , potest tolli , aut im-
pediri .

Sed contrà est , quia expulsio tenebrarum respectu lucis , ex-
pulsio vitæ respectu mortis , expulsio eçcitatis respectu visus , de-
nique expulsio rectitudinis respectu curuitatis , est effectus nega-
tiuus , & secundarius , & tamen non potest tolli , aut impediri ,
ergo nec exclusio alterius formæ totalis potest tolli , aut impe-
diri ab vna forma totali .

Dices . huiusmodi effectus negatiuos , & secundarios habere
necessariam , imò & essentialem connexionem cum suis formis
positiuis , & ideò non posse ab illis nec diuinitus separari .

Benè ; sed etiam exclusio , & negatio alterius formæ totalis est
effectus habens necessariam , & essentialem connexionem cum
forma totali priori , ergo non potest , neque diuinitus à tali forma
separari . Antecedens probatur quia ; forma totalis est adæqua-
tus actus materiæ primæ , sed adæquatus actus potentie , non ex-
cedi-

ceditur à potentia; excederetur autem, si reciperet alium actum contradistinctum, ergo exclusio, seu negatio alterius actus, est effectus essentialiter connexus cum forma totali priori, simili ratione, qua *Thomistæ*; ideò negant effectum eundem posse esse à duabus causis totalibus, quia quælibet ex illis est causa totalis, & adequata.

Puto dicendum; non in eo sensu formam totalem dici adequatam respectu materiæ, quasi non possit ab illa excedi per receptionem alterius formæ, sed dici adequatam, idest totalem, quia explet totam capacitatem materiæ, nec vnâ formam habere impossibilitatem, aut exclusionem, & negationem alterius formæ, neque tanquam effectum secundarium.

Quando ergo Deus ponit duas formas totales, aut plures in eadem materia, extendit eius capacitatem naturalem, & ampliat, dans posse simul sustentare plures formas totales, quas materia suæ naturæ relicta non posset sustentare, sicuti ampliat, extendit, & eleuat aquam ad producendam gratiam, ignem materialem ad torquendos spiritus.

Vndè quod duæ, aut plures formæ totales nequeant esse in eodem subiecto naturaliter, non in impossibilitatem earundem formarum, sed in limitatam capacitatem materiæ primæ refundenda est, sicuti etiam, quod duæ qualitates contrariæ simul esse nequeant in eadem materia, refunditur non in impossibilitatem earum, sed in limitatam capacitatem subiecti in probabili sententia.

Dices; eleuatio aquæ est in genere causæ effectiue, sicuti etiam eleuatio ignis, & eleuatio, & ampliatio materiæ est in genere causæ materialis, quæ non datur, aut quâ difficillimè explicatur.

Respondeo, eleuationem in genere causæ materialis iam fuisse faciliè explicatam, dum diximus, materiam eleuari, quia eius capacitas passiuâ ampliatur sicuti ignis eleuatur, quando eius capacitas actiuâ ampliatur, & benè etiam probari ducta paritate ab eleuatione aliarum causarum.

Dices secundò. Si in materia essent duæ formæ totales, puta, forma auri, & forma ligni, benè posset dici, aurum est lignum, lignum est aurum, sicuti quando in eodem subiecto essent albedo, & dulcedo, benè posset dici, album est dulce, dulce est album. Imò si in eadem materia esset forma equi, & forma hominis posset etiam dici, homo est equus, equus est homo; sed hæc sunt absurda, ergo.

Respondeo, in prædicatione accidentali id, quod in recto importatur est subiectum, at in prædicatione substantiali, id, quod in recto importatur, est forma; ideo bene valet, album est dulce, dulce est album; quia sensus est, subiectum habens albedinem habet dulcedinem; at non valet, aurum est lignum, quia sensus esset, forma auri est forma ligni, quod est falsum; à fortiori non potest dici, equus est homo; quia formæ hominis, & equi sunt, contradictoriæ æquivalenter, quia nequit rationalitas præstare effectum suum primariuni absque exclusione; & negatione formæ equinæ, cum qua rationalitas est essentialiter incompatible.

Dices tertio: si duæ formæ totales possent informare eandem materiam, ergo etiam una forma posset informare diuersas materias, at hoc est absurdum, quia aliàs eadem forma repetiretur in pluribus locis.

Respondeo. supernaturaliter non repugnare eandem formam, & ampliari ad diuersas materias, & extendi ad occupanda plura loca.

DISPV TATIO X.

DE AV GMENTATIONE.

Mixtorum Animatorum vita, & salus in calido, & humido radicali posita est; at humidum continuò vi calbris naturalis depascitur, & absimitur, ideoque facillè Animatorum vita deficeret, nisi amantiſſima nostri natura deperditam substantiam per nutritionem, & abſumptam quantitatem per augmentationem opportunè repararet, quam citiſſimè restauraret; Definitur ergo Augmentatio ab Arist. I. de Gen. c. 2. Quantitatis existentis additamentum, acquiritur enim, & additur viuenti noua quantitas per augmentationem, & quidem maior ea, quæ fuerat vi caloris naturalis deperdita, & consumpta; ceterum quantitatis additamentum, vel fit per iuxta positionem alimenti, quomodo Ignis, quod maior illi ſtuppa extrinsecus ap-
poni-

ponitur, augetur; & crescit; & hoc est proprium inanimatorum, seu non uiuentium, vel fit per intra susceptionem alimentis ab ore animalis in stomachum, & in reliquis subinde partes omnes corporis diffusi, & hoc est proprium animalorum, & uiuentium.

LECTIO I.

Termini Magnitudinis, & Paruitatis.

Omnia corpora naturalia habere terminos aliquos magnitudinis, & paruitatis sue, extra dubium est, nullum enim de facto datur corpus, quod sit infinitum, & careat terminis; At quoniam sint hi termini, & in quantam molem possint corpora naturalia excrecere; aut in quam minimam quantitatem se reducere, incertum est, & controuersum apud Scholasticos.

Qui admittunt indiuisibilia, & modos incipiendi, & desinendi rerum; intrinsecos, & extrinsecos; assignant quoque duos terminos magnitudinis; intrinsecum, quem vocant maximum quod sit; extrinsecum; quem vocant maximum quod non; similiter ponunt duos terminos paruitatis, intrinsecum, quem vocant minimum, quod sit; extrinsecum, quem vocant minimum, quod non.

Nos qui negamus indiuisibilia, terminos intrinsecos, & extrinsecos, inceptionis, & desinentionis rerum rejicimus ex eo, quia res heteroqui clara, obscuritate horum terminorum inuoluitur, & implicatur; eodem motiuo inducimur ad negandos terminos intrinsecos, & extrinsecos magnitudinis, & paruitatis, quia siue huiusmodi terminis intrinsecis, & extrinsecis, potest res clarius, & melius explicari, ut mox patebit.

Nonnulli ergo in omni corpore naturali, siue animato, siue inanimato ponunt terminos determinatos magnitudinis, & paruitatis.

Ita Auerroes 6. Phys. Com. 91. Caietanus 1. p. q. 7. art. 3. Reparien. 1. Phys. q. 7. Iandunus q. 16

Sed contra est, quia patet experientia, ignem semper comburere, & in seipsum conuertere, quidquid illi apponitur, unde fit semper maior, & maior. Similiter non potest assignari pars quantitatis adeo minima, sub qua non possit esse scintilla ignis, vide.

videmus enim de facto, & ipsas paruas scintillas subdiuidi in alias minores, & minores, in quibus tamen semper est ignis, aptus ad combutenda corpora, quamuis magna, & serè in infinitum extensa,

Confirmatur ex *Arist. 2. de Anima 1.41. Ignis augmentum in infinitum abit, quousque fuerit combustibile, natura autem constantium omnium terminus est, & ratio magnitudinis, augmenti, hæc autem anime sunt, & non ignis; & rationis magis, quàm materia.*

Quod autem dicitur de igne, militat etiam in alijs corporibus inanimatis, quorum solus ignis videtur nutriri, & augmentari, etenim ipse videtur solus corporum, aut elementorum, ali, & augmentari, ex *Arist. vbi supra 1. 39. & 40*

Conclusio. Viuentia habent determinatos terminos magnitudinis, & paruitatis.

Ira Scotus in 2. dist. 2. q. 9. Ockamus d. 8. Ravius 1. Phys. Aresius 1. de Gen. q. 35. & alij omnes Antiqui, & Recentiores.

Probatur, quia viuentia habent organa, & instrumenta, quibus exercent operationes suas, ergo debent habere organa proportionata, & debitæ magnitudinis, nam si essent valde magna, non posset viuens ea mouere, & ad libitum in quauilibet partem inclinare, & similiter si essent valde parua, non posset viuens ea mouere, atque dirigere ad sui libitum, ergo debent esse organa huiusmodi, & instrumenta vitæ, magnitudinis debitæ, & proportionatæ, sicuti & instrumenta cuiusque artis debent esse proportionata, & debitæ magnitudinis, alias non possent ab artifice moueri, & adhiberi.

Confirmatur ex *Arist. vbi supra. Natura constantium omnium terminus est, & ratio magnitudinis, & augmenti.*

Confirmatur secundò experientia, quia adhuc visus non est homo magnus, vt mons, neque paruus, vt formica, ergo habet terminos magnitudinis, & paruitatis.

Quinam sint hi termini in quolibet mixto animato, & viuentē, incertum; varij enim sunt, & diuersi iuxta varietatem, & diuersitatem viuentium. Illud est certum, in quolibet viuentē assignari tres status, nempe, statum augmenti, statum consistentiæ, & statum decrementi: & quidem in homine, status augmenti est ab initio vitæ vsque ad annum 21. aut 25. Status consistentiæ ab anno 21. aut 25. vsque ad annum 35. aut 40. hoc tempore

pore homo consistit, neque crescit, neque decrescit.

Denique est status decrementi; quando homo ab anno 35. aut 40. decrescit semper usque ad ultimam senectutem, ita colligitur ex Arist. 3. de Anima t. 59. *neesse est, quod genitum est, augmentum habere, & statum, & decrementum.* Et ratio triplicis status desumitur ex aeternitate caloris naturalis, qui prius, utpotè validior plus acquirit alimenti, quam deperdat de substantia viuentis.

Deindè aliquantulum debilitatus, tantum acquirit, quantum deperdit. Denique notabiliter debilitatus plus deperdit, quàm acquirat.

Obijcies primò: si daretur actu homo maximus, qui intrâ humanam speciem possit excrecere, hic si alimentum sumeret, aut morfu venenosi serpentis intumesceret, transiliret eum terminum assignatæ magnitudinis, ergo.

Respondeo, in primo casu viuens non augmentari, sed stare, non crescere, neque accrescere, ut etiam accidit in statu consistentiæ, in secundo casu viuens intumescere quidem, & in amplio-rem locum se extendere, sed non crescere, quia non nutritur, augmentatio autem comitem habet nutritionem, & non est sola extensio localis maior.

Obijcies secundò. Crocodillus, & nonnullæ arbores augentur tota vita, ergo non omnia viuentia habent terminos magnitudinis. Similiter & vites in terra defossæ, & sæpius emersæ sine termino propagantur, & crescunt, ergo.

Respondeo. Crocodillum, & illas arbores tandem consumi quando enim ad debitam magnitudinem peruenerint; aut consistunt, aut emoriuntur.

Ad confirmationem dico, vites non esse vnum viuens, sed plura viuentia, nimirum, tot viuentia, quot sunt radices diuersæ, quibus vites multiplicantur, & propagantur.

Obijcies 3. ex Arist. 2. de anima t. 41. *omnium natura constantium terminus est*, at etiam non viuentia natura constant, ergo.

Respondeo, ibi terminum, *natura*, accipi pro nascitura, quæ est propria viuentis, imò ibi manifestè docet Philosophus, causam augmenti esse animam, concausam esse calorem, verba sunt: *Hic autem concausam quidem quodammodo est, non tamen simpliciter causa, sed magis anima.*

LECTIO II.

In qua consistat formaliter raritas, & densitas.

Raritas, & densitas consequuntur ad quantitatem; omnia enim quanta, aut rara sunt, ut ignis, & aer; aut densa, ut aqua, & terra; & sic proportionaliter omnia mixta, in quibus aut ignis, & aer prædominantur; aut aqua, & terra. Hinc spiritualia quia carent quantitate, nec rara sunt, nec densa.

At in quo formaliter consistant raritas, & densitas, difficultas, neque levis est, neque ab omnibus eodem modo explicatur.

Dixi, formaliter, quia omnes conveniunt in eo, quod raritas est à calore, densitas à frigore, tanquam à causa effectiva; hinc omnia calida sunt rara, omnia frigida sunt densa, & idem corpus si calefiat, rarefit, & in maiorem locum se contrahit, & restringitur.

Et quidem communis conceptus, quem omnes habent de raritate, & densitate, seu de raro, & denso, est, quod ea sunt rara, quæ habent parvam materiam, & magnas extensiones locales, è contrà ea sunt densa, quæ habent multum materie, & parvas extensionis localis; ita cum D. Thoma 3. p. 9. 77. ar. 3. ad 3. colligunt ex Arist. 4. Phys. t. 84. 85. communiter Scholastici omnes, verba sunt; *Rarum, & densum idem, & una materia ipsorum*. Eadem ergo materia, prout occupat maiorem locum, est rarum, seu raritas; prout occupat minorem locum, est densum, seu densitas, & sic eadem materia à D. Thoma, & Scholasticis, dicitur parva, si habeat extensiones locales minores se; dicitur magna, si habeat extensiones locales maiores se. Clarius sic; substantia palmaris, verbi gratia, si calor rarefiat, extenditur in locum bipalmarem; si verò frigore condensetur, restringitur in locum semipalmarem. Ecce nodus, & punctus gravis, & magnæ difficultatis.

Quomodo enim substantia palmaris, verbi gratia, si calore rarefiat, potest occupare duos palmos loci, nisi pariter intelligamus, quantitatem palmarè esse in duobus locis, putà in loco palinari A, & in loco palinari B. quod si admittas, admittas

neceſſe eſt, naturaliter fieri replicationem eiſdem ſubſtantia in duobus locis, quod eſt impoſſibile; & e contra, quomodo ſubſtantia palmaris, ſi frigore condenſetur, poterit occupare minorem locum, atque adeo locum ſemipalmarem, niſi pariter intelligamus, duos ſemipalmos ſubſtantia palmaris reſtringi, & coarctari ad ſemipalmum loci, & duos ſemipalmos ſubſtantia eſſe in vno ſemipalmo loci; quod ſi admittas, admittas, neceſſe eſt, duas partes ſubſtantia ſe penetrare naturaliter in eadem parte loci, quod non eſt minus impoſſibile, & abſurdum, quam ſit replicatio vnius ſubſtantia in duobus locis.

Ne ergo ad duos iſtos lapides offenderent Scholaſtici, & ſe ab vtroque abſurdo, & impoſſibili ſaluarent, varias excogitarunt ſententias, & varijs modis conati ſunt rarefactionem, & condenſationem explicare, vt & replicationem, & penetrationem pariter euitarent.

Primò ergo nonnulli ponunt. Rarefactionem, & condenſationem fieri per quosdam modos quantitatis, quibus eadem quantitas, ſeu etiam ſubſtantia intelligatur modo in maiorem locum extendi, dum rareſcit; modò in minorem contrahi, & reſtringi, quando condenſatur. Ita plures ex Thomiſtis, *Caiet. 2. 2. q. 24. art. 5. Capreolus in 2. d. 18. q. 1. Soncin. 8. Met. q. 27. Durandus in 2. d. 18. q. 1. ex Recentioribus Conimbricenſes, Ruuius, Huriaſus, Fonſeca, Arefius*, quos citat, & ſequitur *Auerſa tom. 2. Philoſ. q. 28. ſect. 5. nouiſſimè Morandus 21. de Gen. tract. 3. q. 6.*

Sed hi diuiſi ſunt inter ſe. Nam aliqui, vt *Auerſa*, ponunt huiusmodi modum eſſe localem extensionem, per quam quantitas rarefacta maiorem locum occupat, condenſata verò, minorem. Alij, vt *Morandus*, & *Arefius*; ponunt talem modum eſſe præſentiam localem, ſeu Vbi quo partes quantitatis, ſeu etiam ſubſtantia rarefacta magis elongantur, condenſatae approximantur, & ſunt minus diſtantes.

Sed contra hanc ſententiam quia; quocunque modo defendatur, & explicetur hæc ſententia, ſiue per modum extensionis localis, ſiue per modum vbi, relinquit nodum, & punctum exagratæ, & declaratæ difficultatis, inſolutum omnino, atque adeo cogitur admittere replicationem vnius materiae, aut quantitatis in duplici loco, & penetrationem duarum partium materiae, ſeu quantitatis in vna parte loci.

Probatuſ quia; materia rarefacta acquirit maiorem extensionem

sionem localem, condensata minorem; ergo materia palmaris rarefacta occupat duos palmos loci, condensata semipalmum, loci, ergo quando rarefit, replicatur in duplici loco, quando condensatur, se penetrat in semipalmo loci.

Similiter, quando materia palmaris rarefit, eius partes per vbi, & præsentiam localem elongantur, quando condensatur per vbi approximantur: sed quid est aliud partes materiæ palmaris magis elongari, nisi palmarem quantitatem occupare duos palmos loci? quid est per vbi materiæ palmaris partes magis approximari, nisi se penetrare in semipalmo loci? cum aliàs illæ partes relictæ suæ naturæ deberent occupare palmum, loci.

Secundò alij. Rarefactionem, & condensationem explicant per corpuscula penè inuisibilia: Volunt enim in qualibet substantia esse plures cavitates, & poros, repletos corpusculis, quorum si magna copia vi caloris congregata repleant vacuitates illas, iam substantia rarefit, & in maiorem se locum extendit, quia partes eius absque vlla discontinuatione, interpositis, & ininteriacentibus corpusculis, magis elongantur; si verò corpuscula illa in minorem numerum vi frigoris redigantur, statim ea substantia condensatur, & in minorem se contrahit locum, quia nimirum eius partes, ablatis è medio corpusculis, magis approximantur.

Rarefactio ergo, & condensatio non in ingressu, aut egressu corpusculorum formaliter consistit, sed in illa elongatione, aut approximatione, quæ optimè intelligitur fieri, & accidere per ingressum, aut egressum corpusculorum: sic enim facilè evitatur, quòd non fiat replicatio in duobus locis vnius substantiæ, puta palmaris, hæc enim quando rarefit, admittit corpuscula; hæc sunt, quæ occupant locum palmarem B. substantia verò occupat solum locum palmarem A. sibi naturaliter, & præciso casu rarefactionis debitum; quia verò ut rarefacta includit ea corpuscula, ideò, ut rarefacta, dicitur maiorem locum occupare: condensata verò occupat locum minorem eo, quem aliàs naturaliter, & extra casum condensationis occuparet, quia exclusis corpusculis, quæ in suis poris admiserat, ne detur vacuum, debet occupare locum ab illis relictum; non ergo duæ partes substantiæ sunt in vna parte loci, sed in duabus; in vna quidem, quam occupabat se sola, seu ratione sui, in altera, quæ
occu-

occupabatur à corpusculis iam egressus, & per frigus vi condensationis expulsus.

Ità *Arriaga disput. 16. quest. 20. sub sect. 2. Ouid. de Gen. Con. 7. punto 5.* Sed ante illos ità sunt philosophati antiquissimi, *Xanthus*; & alij quos suppresso nomine refert, & impugnat *Arist. 4. Phys. c. 5. per tot. Galenus lib. 2. de sanitate tuenda c. 2. & 1. Valesius 4. Phys. c. 9. Nominales, ut Ocham. opusc. de Eucharistia, Gab. in Canon. Miss. lect. 45.*

Non dubito, *Democritum*, & *Leucippum* eiusdem fuisse sententiæ, hi enim & minimas athomos admittebant, & omnia fieri per athomos explicabant; etiam ergo rarefactionem, & condensationem per athomos fieri, non dubito, asseruisse; corpuscula autem ista, & athomos minutissimas idem esse, Auctores huius sententiæ non negabunt.

Sed contra hanc sententiam est quia; vel hæc corpuscula sunt indiuisibilia, vel diuisibilia Si primum, nullo modo potest per ea explicari maior extensio, quam experimur in substantia palmari rarefacta, quia ex indiuisibili, & non extenso non potest fieri, aut pullulare localis extensio. si diuisibilia ponas corpuscula; tunc, vel sunt aliquid ipsius substantiæ palmari rarefactæ, & sic non euitabis replicationem substantiæ vnius in duobus locis, quia quantitas palmari seipsa occupat vnum palmum loci; ratione corpusculorum occupat alium palmum, seu corpuscula sunt pars substantiæ rarefactæ, quæ est vna, ergo iam vna substantia in duobus locis. Quod si ponas corpuscula non esse aliquid, non esse partem substantiæ rarefactæ, sed aliquid aliud diuersum, iam ergo non est substantia rarefacta, quæ occupat maiorem locum, sed maior iste locus partim occupatur à substantia palmari, partim à corpusculis, non ergo illa substantia, quæ supponitur rarefieri, occupat maiorem locum, atque adeò tollitur omninò rarefactio.

Præterea sequeretur. Substantiam rarefactam esse purum, quoddam aggregatum per accidens ex substantia rarefacta, & corpusculis: nec posset fieri rarefactio, quin de nouo producerentur hæc corpuscula, atque adeò non posset fieri rarefactio, quin fieret generatio substantialis corpusculorum. imò sequeretur, quod substantia rarefacta non esset vnum quid continuū, Aer, vbi gratia, si rarefiat, statim discontinuabitur per aduentum, & ingressum corpusculorum, quæ sunt diuersæ rationis ab aere.

Denique & ipsa corpuscula, cum sint corpora naturalia, & consequenter subiecta rarefactioni, & condensationi, aliquando rarefiunt, & condensantur; sed non per alia corpuscula minora, aliàs darentur corpuscula corpusculorum, ergo.

Vide alias, si placet, Refutationes apud *Hurtadum in disp. de Rarefactione, & apud Arist. 4. Phys. cit.*

Tertiò ergo ponunt alij. Rarefactionem esse acquisitionem quantitatis de nouo, & condensationem esse deperditionem quantitatis; in qua opinione sunt duo modi dicendi.

Primus est *Gottfredi quodlib. 11. q. 3. Mars. in 4. q. 9. art. 2. Pomponatij lib. 2. de augment. c. 10.* Hi volunt, totam quantitatem de nouo produci, & veterem tolli à substantia, quæ ponitur rarefieri, aut condensari.

Secundus modus hanc sententiam explicandi est *Scoti in 4. d. 12. q. 4.* quem sequuntur non modo *Scotistæ, ut Faber. & Bassolis iisdem locis sed etiam Caiet. 3. p. q. 77. a. 5. Tolet. 4. Phys. qu. 12.* Hi volunt in rarefactione aliquam partem quantitatis acquiri, & in condensatione deperdi partem quantitatis.

Qua data sententia optimè, & faciliè explicatur, quomodo substantia per rarefactionem se extendat in maiorem locum, absque eo, quòd se replicet in duobus locis, quia nimirum, quantitas palmaris rarefacta, acquisiuit quantitatem maiorem, ideò non est amplius palmaris, sed bipalmaris, nam à quantitate substantia habet, quòd sit tanta, & tanta palmaris, & bipalmaris, quid ergo mirum, si occupet locum bipalmarem: palmum loci A. & palmum loci B. Simili ratione, quando substantia condensantur, deperdit partem quantitatis, facta est ergo minor, & ideò mirum non est, si minorem locum occupet absque suarum partium penetratione.

Hæc sententia mihi videtur omnium probabilior, quia facile, & adæquatè soluit difficultatem cæteroqui insolubilem, & omnium maximam; licet displiceat primus modus, quo eam defendit *Gottfredus*, quia si per rarefactionem tolleretur vetus quantitas, iam omnia accidentia in tali quantitate subiectata, tollerentur, quod est contra sensum, & experientiam.

Amplector igitur hanc sententiam modo, quo eam defendit subtilissimus *Scotus*, nimirum per rarefactionem acquiri quantitatem maiorem veteri non destructa, per condensationem vero aliquid quantitatis antiquæ, & veteris deperdi, ità enim res optimè componitur.

Conclusio . Rarefactio est acquisitio quantitatis de nouo, veteri non destructa , condensatio est deperditio alicuius partis veteris, seu prius existentis quantitatis .

Probatur Conclusio primò , quia ità euitantur duo illa absurda, & impossibilia , quæ sequuntur datis alijs Sententijs, nimirum , quòd non detur replicatio naturaliter , nec penetratio , & ex alia parte benè , & facilè explicatur , quomodo eadem substantia , rarefacta maiorem, condensata minorem locum occupet .

Probatur secundò , quia extreitas localis , seu extensio partium in ordine ad locum, supponit extreitatem partium, seu extensiodem in ordine ad se , ergo quando est maior , vel minor extensio localis per rarefactionem, vel condensationem , debet quoque esse maior , vel minor extensio in ordine ad se ; at extensio in ordine ad se est formalissimè ipsamet quantitas, ergo. Minor probata est suprà *disp. I. lect. I.* Maior probatur quia , sicut se habet simpliciter ad simpliciter, ità magis ad magis, sed esse extensum localiter habetur ab esse extenso in ordine ad se, ergo esse magis, & minus extensum in ordine ad locum habetur ab esse magis , & minus extenso in ordine ad se, atque adeò à maiori , vel minori quantitate , quæ per rarefactionem , & per condensationem deperdatur .

Confirmatur quia . Qualitas intenditur per additionem, qualitatis ad qualitatem , remittitur per deperditionem qualitatis, ergo & substantia rarefit per additionem quantitatis ad quantitatem , condensatur verò per deperditionem quantitatis .

LECTIO III.

Argumenta in contrarium solvantur .

Objicies primò . Posito , rarefactionem fieri per acquisitionem quantitatis de nouo , sequeretur , fieri penetrationem naturaliter, ergo . Probatur sequela Antecedentis quia : adueniret noua quantitas præexistenti quantitati, ergo iam in eadem materia essent duæ quantitates , ergo penetratio naturaliter .

Respondeo : in primis, non sequi penetrationem, quia pene-

tratio non est, quando duæ quantitates sunt in vna materia, sed quando duæ quantitates sunt in vno, eodemque loco; quod non contigit in casu nostro.

Respondet secundò *Scotus dist. cit. q. 4. §. cum dicis*, quòd non essent duæ quantitates, sed vna, cum enim quantitas, quæ addatur sit homogenea, si vna quantitas addatur alteri, iam fiet vna, sicuti vna gutta aquæ addita alteri, non facit duas aquas, sed vnā.

Obijcies secundò. Species Sacramentales rarefiunt, & condensantur, sed in tali rarefactione, & condensatione, non acquiritur, nec deperditur quantitas, ergo. Maior patet experientia, & ad sensum. Minor probatur quia, in primis, quantitas non potest deperdi, quia immediate à Deo miraculosè conseruatur; at nullum Agens naturale potest Diuinæ virtuti præualere, ergo quantitas non potest deperdi in condensatione; verum neque potest acquiri in rarefactione, quia, non est assignabile subiectū, ex quo ista quantitas vi agentis naturalis educatur, ergo non potest noua quantitas produci vi agentis naturalis rarefacientis Hostiam consecratam.

Respondeo in primis, quòd data sententia *Socinatis 12. Met. q. 26. & Iauelli q. 8.* nimirum, quantitatem immediate non recipi in materia prima, sed in eius potentia accidentali, quæ, destructa substantia panis, vtique remaneret, quia remanent omnia accidentia substantiæ panis, data, inquam, hac sententia, facile soluitur argumentum quòd ad rarefactionem; dicendum est enim, quantitatem nouam educi ab Agente naturali ab illa potentia accidentali, quæ sicuti remanet loco materiæ primæ, ita exercet eius functiones, & sustinet eius vices, vnde sicuti ex materia educuntur formæ accidentales, ita ex illa potentia accidentali materiæ educeretur noua illa quantitas in rarefactione. In condensatione verò deperditur quantitas, quamuis à Deo immediate conseruetur, Deo sic volente; & permittente, vt occultetur mysterium Eucharisticum, & Fides habeat meritum; vt obseruat, & respondet *Scotus q. cit.*

Vbi etiam asserit, *§. si ergo quæras*. nouam quantitatem in rarefactione produci à Deo, nec tamen nouo miracolo, quia ea voluntate, qua disposuit, Eucharistiam esse in Ecclesia, disposuit, quòd circa illas species præsentē Agente naturali, talis rarefactio causaretur, qualis causaretur in substantijs conuersis ab Agente naturali, & hoc nè meritum Fidei euacuaretur, si
vide.

videremus species intransmutabiles.

Dices: ergo Deus aufer Agenti naturali suam propriam actionem.

Respondet Scotus. Deum non auferre Agenti naturali actionem, & virtutem, quam habet, transmutandi subiectum à forma ad formam. Sed negare illi eam actionem, quæ non potest illi competere, nempe transmutationem, & rarefactionem ex non subiecto.

Obijcies tertio ex *Arist. 4. Phys. t. 85.* Rarefactio fit, & condensatio absque eo, quod materia acquirat, vel deperdat aliquid de nono, ergo rarefactio non fit per acquisitionem quantitatis, sicuti neque condensatio per deperditionem quantitatis. verba sunt. *Quare & ipsa moles sensibilis non ideo extenditur, aut constringitur, quia materies aliquid insuper accipit, aut abijcit, sed quia ipsa materia utrumque subire potest, quo fit, ut idem sit rarum, & densum.*

Respondeo. Hoc argumento, & Arist. auctoritate, probati etiam rarefactionem fieri, absque eo, quod materia, vel admittat corpuscula, vel admittat maiorem extensionem localem, aut maius Vbi.

Respondeo igitur, velle ibi Philosophum, quod ad hoc ut materia fiat parua, aut magna; rarefacta, aut condensata, non indigere aliquo alio, ad hoc ut fieret apta, & potens ad huiusmodi, & similes transmutationes, ut attentè consideranti textum patet, præsertim illas particulas; *ipsa materia utrumque subire potest &c.*

Obijcies quarto, eodem modo se habent tarditas, & velocitas in motu, seu quantitate discreta, ac se habeant raritas, & densitas in quantitate continua, sed tarditas & velocitas à nobis supra est explicata per Vbi fluens, ergo etiam raritas & densitas debent explicari per maius, aut minus Vbi.

Respondeo. Disparitatem esse quia. Tarditas & velocitas motus sunt aliquid ipsius motus localis, at terminus motus localis est Vbi, & ideo benè tarditas illa, & velocitas est explicata per Vbi; è contrà raritas, & densitas spectant ad motum Augmentationis, at terminus Augmentationis est quantitas, non Vbi.

Obijcies quinto, lana, & spongia, si manu comprimantur, reducuntur se in minorem locum, si leuentur, maiorem occupant locum, non nisi quia, quando comprimuntur, pellitur aer

intra earum poros inclusus, quando laxantur, Aer iterum sub-
ingreditur, & in earum poros, & cavitates se se insinuat, ergo
rarefactio benè explicatur per ingressum, & condensatio per
egressum corpusculorum. Confirmatur quia; caro facile in-
flatur, pellis facilè distenditur; non nisi quia caro admittit intra
suos poros humorem, & ità in ampliorem locum extenditur;
pellis verò dum in maiorem longitudinem trahitur, eius pori
extenduntur, & maiorem occupant locum, dumque in maiorem
longitudinem trahitur, comprimuntur in crassitie, sitque subtilior,
dum sit longior, ergo.

Respondeo. Has, & similes maiores, aut minores exten-
siones locales factas per ingressum aeris, idest, corporis exte-
roqui satis noti, & obuij, non arcani, & occulti, vti sunt cor-
puscula, non esse propriam, & rigorosam rarefactionem, aut
condensationem, sed potius esse mutationem quandam localem
partium retenta eadem raritate, & densitate earum in se. Ra-
ritas autem, ac densitas propriè est per hoc, quòd eadem ipsa
substantia corporea occupat maiorem, aut minorem locum per
totam continuitatem spatij. Ita notat *Auersa* q. 38. sect. 3.

Obijcies sextò. ex *Ouied. ubi supra p. 2.* data hac senten-
tia sequeretur, ad corruptionem partis quantitatis in corpore
addensato, debere produci aliam partem quantitatis in alio
corpore, vt occuparet spatium relictum à quantitate corrupta,
sed huius nouæ partis quantitatis nulla causa potest assignari,
ergo.

Respondeo: in primis. Hi, qui volunt corpora ad replen-
dum vacuum moueri à virtute communi, facilè se expedient;
dicendo, illam partem nouam quantitatis vtpotè ad vacuum
replendum ordinatam. produci ab illa virtute, & causa com-
muni. Iuxta mea principia, dico nouam illam partem quan-
titatis produci ab Agente, quod supponitur causare conden-
sationem, nam eiusdem Agentis naturalis munus est con-
densare, & impedire vacuum, quod sequitur ex illa conden-
satione.

Obijcies septimò, ex eodem *Ouied.* Per hanc Sententiam non
enacuatur communis difficultas, sed potius transfertur à quanti-
tate ad substantiam, si enim substantia palmaris rarefiat, iam
occupabit duos palmos loci, ergo naturaliter vna pars substan-
tiæ occupat duas partes loci, atque adeò in duabus partibus loci
repligatur; si condensetur, iam occupabit semipalmum loci, ergo

iam duæ substantiæ occupabunt semipalmum loci, & ita datur penetratio, licet enim admittamus substantiã de se non esse palmarem, nec semipalmarem, sed talem esse beneficio quantitatis; tamen dato, quod sit palmaris beneficio quantitatis palmaris, quomodo potest occupare locum bipalmarem, nisi replicetur, in duobus palmis loci, si rarefiat? Similiter quando condensatur, quomodo potest occupare semipalmum loci, nisi duo eius semipalmi se pernerent?


Respondeo, quod quando substantia palmaris occupat duos palmos loci, transit de se esse palmari ad esse bipalmarem beneficio quantitatis, hic est enim effectus formalis, & proprius quantitatis, res aliàs in se minimas, & indivisibiles extendere, & ampliare ad sui extensionem, & ampliationem, & è contra ad sui restrictionem, & diminutionem res ceteroqui ampliatas coartare, & minuire; in condensatione igitur substantia non remanet palmaris, quia deperditur semipalmus quantitatis, ergo & deperditur semipalmus substantiæ; non ergo duo semipalmi substantiæ sunt in semipalmo loci, sed semipalmus substantiæ est in semipalmo loci.



DISPVATIO XI.

DE ALTERATIONE.

Alteratio motus est ad Qualitatem, seu est acquisitio qualitatis: Dicitur alteratio: quia per qualitatem subiectum alteratur, seu fit alterum, & accidentaliter diuersum; & licet per quodcumque aliud accidens, quod non sit qualitas, subiectum fiat accidentaliter diuersum, consuevit tamen utraque Schola, Medicorum, scilicet, & Philosophorum, appellare subiectum alterum, seu alteratum, quando in eo adest qualitas, non quæcunque, sed quæ habeat contrarium, uti sunt, Calor, frigus, humiditas, & siccitas. Nostra hæc Disputatio est de Alteratione sic strictè accepta, quia hæc est, quæ dispositiue facit generabile, & corruptibile corpus naturale, quod est obiectum Physicè considerationis. Verum potissima qualitatis proprietas est, suscipere magis, & minùs, seu intendi, & remitti; ita sentiunt Scholæ omnes cum Aristot. in Prædicam. cap. de Qualit. & probat experientia, Calorem u. g. modo esse validiorem, & efficaciorẽ ad operandum, quia intensior est, & maior; modò esse valdè debilem, & ad operandum minùs validum, quia remissior est, & astiuitatis minoris. Celebris controuersia est Thomistas inter & Scotum, Quid formaliter sit ipsa intensio, & remissio, seu quid sit, ipsum suscipere magis, & minùs in qualitate.



LECTIO I.

In quo consistat intensio qualitatis explicatur.

DVo sunt conceptus, quos habemus communiter omnes de intensione qualitatis, primus, & veluti à priori est, quòd tunc qualitas dicatur, & sit intensior, quando est perfectior, melior, & maior, tunc è contrà sit, & dicatur remissior, quando est imperfectior, deterior, & minor; alter conceptus communis, & veluti à posteriori est, quòd tunc qualitas sit, & dicatur intensior, quando validior est, & efficacior ad operandum; tunc verò remissior sit, quando minùs efficax, & minùs valida est ad operandum.

Hinc ex efficaciore, aut inefficaciore operatione, quam provenire ex aliqua qualitate, experimur, arguimus tanquam à signo, & à posteriori eam esse intensam, aut remissam.

Verum vndè habeatur, & quid formaliter sit; qualitatem esse perfectiorem, meliorem, & validiorem ad operandum quando intenditur, & è contrà, quando remittitur, vndè habeatur, & quid sit formaliter eam esse imperfectiorem, deteriorem, & minus validam ad operandum: in hoc variae sunt ingeniosè Philosophantium opiniones, & sententiæ omninò diversæ.

Thomistæ cum primis. Ponunt, tunc, & in eo casu qualitatem esse intensiorem, atque adeò perfectiorem, meliorem, & validiorem ad operandum, quando in subiecto, cui inhæret est magis, & magis radicata, quando est magis, & magis firmata; è contrà tunc, & in eo casu, qualitatem esse remissam, quando in subiecto, cui inhæret, est minus radicata, & minus in illa firmata.

Ità *Caiet. I. 2. q. 52. art. 2. & 2. 2. qu. 24. art. 5. Capreolus q. I. dist. 19. qu. 2. Hervæus ibidem qu. 5. Medina, Flandria, Soncinas, Astudillo, Sotus, Martinez, Zanardus, Bagnex*, quos citant, & sequuntur *Complutenses Disp. 6. Alterat. qu. 8.* Notuissimè se huius sententiæ Patronum declaravit *Bernardinus Mazziota in qu. Sel. qu. II.*

Verùm in quo consistat, seu quid formaliter sit, maior ista radicatio, ista maior firmitas Qualitatis in subiecto, cui inhæ-

ret; mirum, quàm variè explicant, & in singulis, quas adducunt, explicationibus, quàm enixè, & operosè desudent omnia celebriorum *Thomistarum* Ingenia; nec vlla hucusque adducta est explicatio, quæ plenè, & adæquatè satisfaciat, vt propterea ex hoc liceat desumere efficax, & præcipuum Argumentum pro impugnatione, & refutatione eius Opinioni, & Sententiæ.

Primò igitur contra *Thomistas* Argumentor. Non potest explicari, quid sit, seu in quo consistat maior ista radicatio qualitatis intensæ, aut minor radicatio qualitatis remissæ, ergo non benè per maiorem radicationem intensio, & per minorem radicationem remissio qualitatis explicatur.

Respondent primò *Bagnex 1. de Gen. cap. 4. q. 5. Socin. q. 21. Caiet. 1. 2.* maiorem radicationem consistere in eo, quòd qualitas vniatur subiecto vnione magis inseparabili, nam hoc videtur sonare vocabulum, radicari, idest, radices altiores mittere, sicuti Arbor dicitur magis radicata, quando altius radices mittit, & vnione magis inseparabili terræ adhæret.

Sed contrà est quia: calor in aqua intensior est, quàm in manu, & tamen calor ab aqua facilius separatur. Ethica est magis inseparabiliter coniuncta cum corpore, quàm Tertiana, & tamen hæc est intensior. Rubor ortus ex verecundia intensior est, quàm pallor contractus ex longa ægitudine, & tamen rubor faciliè separatur. In ferro ignito intensissimus est calor, & tamen ab illo faciliè separatur, nam extractus ab igne, statim frigescit.

Respondent secundò: *Capreol. in 1. dist. 17. q. 2. Flandria 8. Met qu. 4. Astudillo 1. de Gen. qu. 9.* Qualitatem magis radicari, quia quando intenditur, acquirit perfectiorem existentiam, quando remittitur, habet existentiam imperfectiorem.

Sed contrà est quia, si quando qualitas intenditur, producit perfectior existentia, & quando remittitur imperfectior existentia producit, ergo in intensione producit qualitas, in remissione deperditur, & corrumpitur, quid enim est qualitatem generari, aut corrumpi, nisi acquirere, aut deperdere existentiam, quæ sicuti est terminus ad quem productionis, ita est terminus, a quo corruptionis, vnde tali argumento conuictus *Ranner*, negat fieri intensiorem per existentiam perfectiorem, & remissionem per existentiam imperfectiorem eiusdem qualitatis.

Præterea eadem res est essentia, & existentia, si ergo in intensione producit perfectior existentia, ergo & perfectior essentia, & consequenter producit de nouo qualitas perfectior

Hoc argumento conuicti *Capreolus contra Aureolum ubi supra*, & *Durandus* nobilis prius Thomista, deindè nouæ Scholæ Auctor, concesserunt, Qualitatem intendi per entitatem superadditam de nouo productam, quam *Capreolus* appellat conqualitatem, & in specie concalorem, aut confrigus; *Durandus* verò magis clarè se explicans, vt se iam nouæ Scholæ Auctorem declararet, appellauit apertè Qualitatem de nouo productam corrupta priori.

Sanè *Capreolus*, dum conqualitatem admittit, discedit à *Thomistis* & transit ad alteram *Scoti* Sententiam, quæ defendit, Intensionem Qualitatis fieri per acquisitionem alicuius partis, seu gradus qualitatis de nouo; *Durandus* verò per hoc tantum differt à *Scoto*, quòd vult, ita produci de nouo qualitatem, vt vetus omnino pereat, quòd tamen est contra experientiam, & sensum, qui indicat lumen augeri magis per accessum corporis luminosi, & non per destructionem alicuius luminis præexistentis, & productionem noui luminis. Imo quando qualitas remittitur v.g. calor à frigore, non potest dici, quòd à frigore corrumpatur calor perfectior, & producatur imperfectior, quia vnum contrarium non producit aliud in quocunque minimo gradu, sed omnino illud destruit, ergo Sententia *Durandi*, quòd ad istam partem, qua discedit à *Scoto*, non potest defendi.

Respondet tertio *Aegidius in I. d. 17. q. 1. art. 2. q. 2. art. 2. & I. de Gen. q. 25. Quodlib. 2. I. 4.* qualitatem magis radicari in subiecto, quia illud magis actuatur, seu magis perficit, quòd oritur ex eo, quia in subiecto aderat qualitas contraria, & consequenter non erat debita dispositio requisita ad hoc, vt forma tribuat subiecto totam sui perfectionem, ablata ergo tali indispositione, atque adeo ablata qualitate contraria, puta frigore, verbi gratia, calor magis intenditur, quia subiectum magis perficit, illique communicat totam sui perfectionem, remittitur vero, si subiectum habeat admixtam maiorem copiam frigoris, quia non potest, obistente sibi frigore contrario, communicare subiecto totam sui perfectionem.

Sed contrà est quia: sequeretur, lumen non posse intendi, & remitti, quia lumen non habet contrarium, per cuius admixtionem remittatur, & per cuius ablationem, seu remotionem intendatur, at hoc est omnino falsum, & contrà sensatam experientiam, ergo. Similiter, & Caritas, quæ caret contrario, non posset intendi, imò semper eodem modo intensa reperiretur in

qualibet Anima, quod iuxta principia Theologiæ, & Catholicæ Fidei est omnino absurdum.

Contra secundo quia, quando intenditur forma habens contrarium, iam supponitur subiectum aptè dispositum, & carens contrario, ergo qualitas statim, ac introducitur communicat subiecto totam sui perfectionem, atque adeo non datur locus maiori, aut minori radicationi. Antecedens probatur quia: Agens, quod est potens intendere qualitatem, potens est etiam, ad disponendum, & præparandum subiectum, atque adeo ad tollendam ab eo omnem indispositionem contrariâ, ergo cum introducitur qualitas, putà calor, non inuenitur cum subiecto frigus, quod impediat, nè calor subiecto communicet totam sui perfectionem, nec vllam aliam indispositionem.

Respondet quarto *Mazziotta q. II. sect. 4. in Resp. ad 3. Obiect.* Qualitatem magis radicari in subiecto non importare, aliquam variationem in qualitate ipsa, nam eadem qualitas modo magis, modo minus perficit subiectum, sicuti idem obiectum indiuisibile modo maiori, modò minori claritate attingitur, modò minore, eadè quantitas inuariata in se modò minorè locū occupat, quia modo est rarefacta, modò condensata; & denique eadè anima inuariata in se, modo vnum, modo alium præstat effectū formalem, modo dat esse carnis, modo dat esse corporis, ossis, & huiusmodi, sed qualitatem magis radicari in subiecto, quia magis exerit suas vires, quia plures præstat effectus formales, nam initio introductionis formæ in subiectum, non præstat forma omnes effectus formales, quos potest præstare, calor non statim, aut initio suæ introductionis in subiectum, reddit illud calidum vt quatuor, deinde vt sex, denique vt octo, & sic intelligitur magis, & magis intendi, sicuti enim anima initio suæ informationis, seu introductinnis in corpus non exerit omnes suas operationes, neque enim statim intelligit, ac est in corpore, ita & qualitas non statim reddit subiectum summè intentum.

Sed contra est quia: implicat intelligere varietatem in effectū formali formæ, & non intelligere varietatem in forma ipsa, quia effectus formalis non distinguitur à forma, quæ est causa formalis, ergo implicat intelligere qualitatem modo perficere subiectum vt duo, modo vt vnum, modo vt quatuor, ità vt ipsa remaneat omnino eadem, & inuariata.

Ad exemplum, quod assertur de de obiecto indiuisibili, quod
idem

idem inuariatum manens, modo maiori, modo minori claritate attingitur, id non est ità certum, vt supponitur; nam si quod est obiectum indiuisibile, quod inuariatum attingitur maiori, & minori claritate, est Diuina Essentia, at hæc tunc attingitur maiori claritate, quando magis penetratur, & tunc magis penetratur, quando in ea videntur plura possibilia; & si omnia possibilia viderentur, tunc esset visio, & intellectio omnium perfectissima, & clarissima, quæ dicitur Comprehensio, ergo tale exemplum nequicquam prodest *Thomistis*, imò magis fauet sententiæ *Scoti*, ponentis intensiorem fieri per variationem qualitatis, & additionem gradus ad gradum, quia sicuti tunc Diuina essentia clarius, & clarius videtur, quando in ea plura, & plura possibilia videntur, vt concedunt *D. Thom. 1. p. q. 12. art. 3. Beccan. 1. p. 9. q. 13. num. 17. & alij plures*, ità tunc intenditur qualitas, quando plures, & plures gradus adduntur.

Ad aliud exemplum de quantitate; iam probauimus rarefactionem fieri per additionem quantitatis, ex quo posset desumi argumentum à pari in fauorem Sententiæ *Scoti*.

Præterea dicitur, quòd quantitas rarefiat per modum maioris extensionis localis, sicuti extensio ista localis est maior, & maior, per additionem extensionis ad extensionem, ità intensio qualitatis, & radicatio fiet per additionem radicationis ad radicationem; si ergo in ipsa radicatione qualitatis admittitur latitudo gradualis, cur non in ipsa qualitate?

Denique ad tertium exemplum de Anima; iam diximus supra cum *Scoto* dari formam Corporeitatis, & cæteras formas partiales pro illis effectibus formalibus, semper enim cohærenter philosophandum est iuxta principia semel posita.

Præterea sicuti forma substantialis, & Anima, licet pro varia subiecti dispositione præstat diuersos effectus formales, non tamen dicitur intendi, & remitti; ità neque intenditur qualitas, quamuis præstet diuersos effectus formales pro varietate dispositionum, quas inuenit in subiecto. Imò anima ideò statim, ac informat corpus; non intelligit, quia ad intelligendum concurret effectiue, non formaliter; at omnes effectus formales tribuit corpori statim, ac informat, statim enim, tribuit esse vegetatiuum, sensitiuum, & ipsum esse intellectiuium, quod est formaliter ab illa; hæc enim est differentia inter causam effectiuam, & formalem, quòd causa formalis statim, ac est in subiecto, tribuit illi quidquid habet, quidquid potest habere, non sic cau-

sa formalis, seu forma, siue substantialis, siue accidentalis.

Secundò principaliter contra *Thomistas* Argumentor quia ; In omnium Philosophorum sensu , & conceptu , alteratio est motus ad qualitatem, intensio ipsa qualitatis est alteratio, ergo debet assignari terminus formalis, qui producat vi alterationis, & intensiois, sed talis terminus non potest esse ipsa maior radicata, quia hæc non est qualitas, neque est quid intrinsecum qualitatis, sed potius est extrinsecus modus, & unio qualitatis, ideoque diuinitus potest esse qualitas, sicuti & omne aliud quodcunque accidens sine unione ad subiectum, ergo.

Confirmatur quia, ista unio semper eadem est, & tamen qualitas modo magis, modò minus est intensa, probatur quia; ista unio est inhærentia qualitatis in subiecto, hæc inhærentia semper est eadem, ergo per hanc unionem non potest explicari motus alterationis.

Confirmatur secundò quia : Tunc qualitas intelligitur esse intensa, quando est magis actiua, & operatiua, seu quando magis exerit suas vires (vt loquuntur Aduers.) Sed id non habet vi unionis perfectioris, aut perfectioris inhærentiæ, hæc enim non est actiua, aliàs simile posset agere in simile; posset enim agens calidum vt quatuor ex eo, quia haberet sibi magis, & perfectius unitum calorem, agere in subiectum calidum vt quatuor, ad producendum quintum gradum caloris; at hoc vel ipsi *Thomistæ* negant, ergo.

LECTIO II.

Afferitur Sententia Scoti, & Probatur.

Aliera sententia relatæ, & impugnatæ Thomistarum Doctorum opposita, traditur à *Scoto* in 1. d. 17. quem sequuntur Scholæ *Durandi*, *Nominalium*, & omnium Recentiorum, sed ante Scotum fuit *Alfiodorensis* lib. 3. summæ tract. 6. cap. 5. *Gotifredi de Fontibus* quodlib. 11. qu. 3. *Auicennæ* apud *Niphum* 8. Met. disp. 11. cap. 3.

Hæc docet, intensiōem qualitatis fieri per additionem gradus ad gradum, partis ad partem qualitatis; supponit enim in qualitate esse latitudinem quandam gradualem, seu partes entitativas, quatum si vna addatur alteri in eadem subiecti parte, qua-

qualitas intelligitur intendi, & perfici; si verò partes entitativæ qualitæris ponantur in diuersis partibus subiecti, iam qualitas non intelligitur amplius intendi, sed extendi.

Verùm hæ partes entitatiuæ sunt plures, & plures in infinitum, quia qualitas est quid continuum, ubi non sunt tot partes, quin plures, & plures possint esse, ut suprà iam *Disp* 3. cum Aristotele probauimus, atque adeò in qualitate sunt plures, & plures gradus, partes enim qualitatis appellarunt Philosophi gradus, quia per partes has, veluti per gradus ascendit qualitas à statu imperfecto ad perfectum, à gradu remisso ad intensum; & licèt hi gradus sint infiniti, idest, plures, & plures, claritatis gratia à Philosophis tantum octo sunt assignati, ita ut quando qualitas peruenerit ad octo gradus, non possit ipsa vltèrius intendi, & perfici.

Sententia ergo *Scoti* sic explicata.

Probatur primò quia: tunc qualitas est intensa, quando est efficacior, & validior ad operandum, sed non potest fieri validior, & efficacior ad operandum, nisi crescat in entitate sua, operari enim sequitur ad esse, ergo tunc qualitas est intensa, quando habet plus entitatis, seu quando vna pars eius entitatiua additur alteri, quandò vnus gradus additur alteri.

Probatur secundò quia: Subiectum de non calido, verbi gratia, fit calidum per productionem caloris de nouo, ergo de minus calidò fit magis calidum per productionem noui caloris, sicuti enim se habet simpliciter ad simpliciter, ita magis ad magis; imò hic videtur esse apertus sensus Philosophi 4. *Physic.* 1.84. ubi habet, *vti enim ex frigido fit calidum, & ex calido frigidum, eadem, quia erat potentia, sic ex calido fit magis calidum, nullo factò in materia calido, quod non erat calidum, quando minus erat calidum; & clariùs paulò post; neque est accipere flammæ magnitudinem aliquam, in qua & albedo, & caliditas non in sit, sic igitur & prior calor posterioris; ergo iam ex mente Aristotelis datur prior, & posterior calor, vna pars qualitatis post aliam, vnus gradus post alium, habet ergo qualitas latitudinem graduum, habet extensionem, & latitudinem partium, quatum si plures in eadem subiecti parte existant, intendunt sine dubio, & augebunt qualitatem.*

Obijcies primò. *Aristot.* loco mox cit. habet, ex calido fit magis calidum, nullo factò calido in materia, ergo nullo productò de nouo calore.

Respondeo ; claram esse mentem Philosophi ex antecedentibus , & sequentibus verbis ; neque enim negat, produci de nouo calorem, aut non dari latitudinem gradualem , & plures partes entitatiuas in qualitate, sed negat , fieri subiectum magis calidum per calidam materiam de nouo additam ; arguebat enim ibi Aristoteles contrà Antiquos, qui omnes motus naturales conebantur saluare, aut per vacuitatem, aut per repletionem vacui ; par egressum , aut ingressum corpusculorum , quare benè ait , *calidum non fit magis calidum per ingressum corpusculi calidi*, replentis vacuum, sed per productionem caloris posterioris ; qui priori calori adueniat , & superaddatur ; Audi Aristotelem 1.22. *Deindè causam motus non sic esse Vacuum , ut in quo, sed ut utres, ex eo quia feruntur sursum, ferunt, quod ipsi continuum ; sic vacuum sursum fert . Atqui qualiter possibile est, esse lationem vacui ; aut vacui ; vacui enim est vacuum, ad quod fertur .*

Obijcies secundò ex eodem *Arist. in Præd. cap. de Qualit. & Quali.* iustitia , & sanitas non suscipiunt magis , & minus, sed qualia ; ipsa dicuntur magis , vel minus talia ; *iustitiam namque iustitia , aut sanitatem sanitate magis , minusuè dici debere, haud omnino dicunt , attamen hisce , que qualia dicuntur gradus sine dubio , suscipiunt magisque talia , aut minus dicuntur, iustior enim , & sanior alius alio dicitur , & in cæteris simili modo , ergo suscipere magis , & minus intendi , & remitti non competit qualitati ratione sui , sed ratione subiecti, quod afficit, & qualificat, quatenus in illo magis , vel minus radicitur .*

Respondeo . Aristotelem ibi aliorum Opinionem recitare, ut patet ex citatis verbis ; quam Opinionem ipse non approbat , sed neque rejicit, quia in aliquo sensu verum est, iustitiam, sanitatem, & omnem aliam qualitatem in abstracto non suscipere magis , & minus, quia qualitas in abstracto sumitur præcisè secundum prædicata essentialia , quæ non suscipiunt magis , & minus : essentiali enim , ut docet idem *Philosophus 8. Metaph. c. 3. & 10.* Sunt veluti numeri, quibus vel vnâ detrahas, aut addas vnitatem, variantur omnino , & amplius iidem non sunt ; benè autem vnus alio iustior dicitur , aut sanior, quia per hunc modum loquendi in concreto , importatur latitudo gradualis in entitate qualitatis , quæ non essentialiter, sed entitatiuè suscipit magis , & minus, intenditur, & remittitur .

Obijcies tertio, si fieret intensio per additionem gradus ad gradum, daretur qualitas actu infinite intensa, consequens est absurdum, ergo. Probatum sequela mai. quia si esset lignum quadripalmare vniformiter calidum, in qualibet parte proportionali ligni quadripalmaris, essent æquales gradus qualitatis, sed partes proportionales sunt infinitæ, & in omnibus ijs essent æquales partes qualitatis, ergo iam qualitas esset infinite intensa.

Respondeo, quod licet partes qualitatis essent in dato casu æquales secundum intensiorem, quia supponitur lignum vniformiter calidum, non tamen qualitas esset infinita, quia non possent accipi illæ partes, vt æquales in intensiõne; ratio est quia, illæ partes non possunt accipi, nisi prout diuiduntur, siquidem antè diuisionem non est accipere partes, sed prout diuiduntur, diuiduntur ad diuisionem subiecti, & hoc diuiditur secundum partes proportionales, vt supponit argumentum, ergo etiam qualitas intensa diuideretur secundum partes proportionales minores, & minores, non æquales, non ergo esset qualitas infinita.

Obijcies quarto, si qualitatis intensio fieret per additionem gradus ad gradum, vel hi gradus essent distincti numero, vel specie, neutrum dici potest, ergo; non primum, quia in eodem subiecto, & à fortiori in eadem subiecti parte non possunt esse duo accidentia solo numero diuersa, à subiecto enim accidentia indiuiduantur. Sed neq; possunt dici distingui specie, quia ex duobus specie diuersis, non potest fieri vna specie qualitas intensa, ergo.

Respondeo. hos gradus esse veluti guttas aquæ, guttæ enim inuicem separatæ, sunt numero distinctæ, atque diuersæ; vnitæ in eodem loco, sunt quid vnum continuatiuè: hi ergo gradus, quia positi in vna parte subiecti, essent quid vnum numero continuatiuè; sunt autem distincti numero, quando sunt in diuersis subiecti partibus, & faciunt qualitatem extensiuè maiorem.

Ex quibus patet; gradus qualitatis intensæ esse homogeneos, vt guttas Aquæ, non etherogeneos, aliàs qualitas non esset quid vnum continuatiuè, vt reuera est, vnum enim continuatiuè coalescit ex partibus eiusdem rationis, & homogeneis in ratione indiuiduali. dixi, in ratione indiuiduali, quia certum est

ex diuersis specie distinctis , & etherogeneis in entitate specificâ , non posse fieri vnum continuatiuè .

Dices, si primus gradus esset homogeneus cum secundo , & cum alijs qualitas eest æquè intensa , habens vnum gradum , ac sit habens secundum , & octauum , hoc videretur absurdum , & contrâ formalitatem intensionis, ergo .

Respondeo; guttas Aquæ esse homogeneas , & tamen si octo guttæ aquæ ponuntur in eodem loco , aqua erit maior , ita si gradus qualitatis sint in eadem parte subiecti , qualitas erit maior , & intensior, ideòque *Scotus in 1. dist. 23.* ponit gradus esse homogeneos , & qualitatem intendi per additionem gradus ad gradum *in 1. dist. 17. cit.* Esto alij ponant gradus huiusmodi esse etherogeneos , volunt enim primum essentialiter supponi à secundo ; secundum à tertio , & sic deinceps.

Sanè ad Intensionem qualitatis nihil iuuat ponere in gradibus etherogeneitatem , sicuti neque ad alium finem ; tanquam ergò omnino superflua reiicienda est graduum etherogeneitas .

DISPV TATIO XII.

DE ACTIONE, ET REACTIONE.

Idem est Obiectum huius , & præcedentis Disputationis , nempe qualitas , non quidem absolutè , & in seips. considerata , sed prout Instrumentum Actionis , & Reactionis. Nominè Actionis intelligitur Causalitas Agentis , & id , per quod formaliter Agens constituitur actu causans , & Agens ; Actionem à Causa , & ab effectu distingui prouauimus *Disp. 2. Lect. XIV.* Actio duplex est , immanens , & transiens ; illa est , & dicitur immanens , quia manet in eo subiecto , à quo elicitur , de hac non est sermo in præsentī ; Actio transiens est , & dicitur illa , quæ ab agente exit , & transit ad subiectum , quod & passum dicitur ex eo , quia recipit actionem emanatam ab agente .

agente, recipere enim est pati : neque enim Agens dicitur tale ex actione , quam recipiat , sed actione , quam producit , est enim Actio extrinseca , non intrinseca perfectio Agentis ; imò Agens potius tale dicitur ex virtute intrinseca Agendi , quam habet .

LECTIO. I.

An Substantia sit immediate Actiua .

NOmīne substantiæ non venit materia prima, quam constat, esse solum passiuam, nullo modo actiuam . Neque venit ipsum Totum , seu Compositum , nam hoc esse Principium , operatiuum , vt quod, seu Principium operationis denominatiuè , concedunt omnes , quò facit commune dictum ; *Actiones sunt suppositorum* , seu Compositorum, in quo sensu dixit *Philosophus 1. de Anima t. 64. dicere, trāsci Animam, simile est, ac si quis dicat. eam texere, vel edificare, melius enim fortassis est non dicere , Animam misereri aut addiscere, aut cogitare , sed hominem Anima 3. de Anima t. 64. Humanitas non ambulat, sed Socrates.* Reducitur quæstio tota ad formam substantialem, an sit actiua immediate & proximè , an verò agat solum remotè, & mediare ; idest , mediantibus qualitatibus ; exempli gratia ignis A. producit ignem B. Quæritur, Principiū quo, & immediate effectiuum, seu productiuum ignis B. est nè Calor; an forma substantialis ignis A. Aliqui, vt nulli eorum, qui in extremis abeunt Sententias, displiceant, medium tenent; volunt formam substantialem operari mediare, & immediate, remotè, & proximè ; concurrere medijs qualitatibus, & seipsa immediate .

Ità *Suarez disp. 18. met. sect. 2. Arriaga disp. 11. sect. 2. subsect. 4. & alij. Thomiste , & Scotus* in extremas , & omninò contradictorias abeunte Sententias.

Ponunt *Thomiste* nec de facto , neque de absoluta potentia , posse formam substantialem esse immediate operatiuam, sed operari medijs accidentibus, & qualitatibus.

Ità *Caietanus 1 p. q. 54. art. 3. & q. 59. art. 2. & q. 73. art. 1. & q. 115. art. 1. Ferrarien. 4. contra Gentes cap. 66. Ioan. a S. Thoma 10m. 1. Philes. q. 12. art. 2. Complutenses disput. 10. q. 4.*

vbi alios plures lege cit. Ex Recentioribus *Pereira lib.8. c.13. Ruuius 2. Phys. tract.4 q.4 Conimbric. ibidem Mazzotta in q. select. q.14.*

Ponit *Scotus*, ne dum absoluta potentia, sed etiam de facto, substantiam immediatè operari, & nullo modo concurrere accidens ad formæ substantialis productionem.

Ità habet in 3. dist. 16. q. 1. & in 4. d. 12. q. 2. 9. met. q. 7. *Scotum* sequuntur non modo eius *Discipuli*, sed famosæ Scholæ, *Durandi, Nominalium, & Recentiorum*; horum nomina lege apud *Ouid. cont. 9. puncto 4. Le Reës disp. art. 7. §. 1. Hurt. q. 9. met. sect. 5. §. 2. 3. Achillinus 3. de Elem. dub. 4. Valles. contr. 3. ad Tyrones. Barth. Amicus tom. 1. phys. tract. 12. q. 10. d. 3. ar. 7. conclus. 7.*

Conclusio; substantia est immediatè actiua, & productiua alterius substantiæ, non accidens.

Probari solet primò *Auct. 2. Philosophi 2. de Anima t. 24. vbi* definit animam esse principium, quo uiuimus, mouemur, & sentimus, 2. de Gen. 53. *materia est pati. forme agere, & t. 54. 55. illos arguit, qui formis substantialibus vim agendi negabāt; 7. met. t. 32. necesse est præexistere aliam substantiam actu existentem, quæ facit, ut putà animal, si animal sit.*

His; & alijs similibus auctoritatibus non multum fido; quia statim Respondebunt *Thomistæ*, per hæc, & similia verba denotari; animam, & alias formas substantiales, esse remotum, & radicale principium, non proximum, & immediatum.

Probatum igitur primo quia. nemo dat alteri, quod in se non habet, si enim quis quod in se non haberet, alteri daret, nil obstarèt, quo minùs nō ens esset productiuum entis, & ideò omnis causa debet esse vel perfectior, si eminenter, aut virtualiter contineat id, quod effectui tribuit; aut æquè perfecta, si actu, & formaliter contineat, id, quod effectui tribuit.

Hinc est, quod ex productione effectuum arguitur perfectio in causa maior, vel minor, prout maior, vel minor relucet perfectio in effectu producto, atque adeo ideò Deus esse omnium perfectissimus arguitur, quia omnium entium est vera causa; & nisi talis doctrina concedatur, non esset ratio, cur negaremus à musca, à culice, vel alio quocunque animalculo, aut ente imperfectissimo producta esse, & creata omnia. At accidens, neque est æquè perfectum, neque est perfectius forma substantiali, quia in quocunque statu,

& quacunq; ratione consideretur, semper est accidens, atque adeo in gradu inferiori, & infimo respectu formæ substantialis, ad cuius perfectionem, & gradum nunquam potest perungere, quia supremum infimi non potest attingere infimum supremi, ut concedunt communiter omnes, ergo accidens non potest immediate attingere, seu producere formam substantialem.

Respondetis primò, quòd causa instrumentalis non debet esse, perfectior aut æquè perfecta effectu suo, sed potest esse imperfectior, & iògè inferior, imò debet esse inferior, & imperfectior, quia ad aliud ordinata, & non per se expetibilis; atqui accidens est causa instrumentalis substantiæ, quia agit in virtute substantiæ, ideò benè potest attingere substantiam immediate, & immediate illam producere.

Sed contrà est primò, ergo, iam substantia & ipsa immediate concurrat, & ipsa quoque est immediate actiua, quod mordicus negant aliqui *Thomistarum*; non enim causa instrumentalis mouet, nisi mora, vnde & Deus qui medijs causis secundis plura producit, concurrat & ipse immediate, ut vel ipsi *Thomistæ* contrà *Durandum* aperitè concedunt, ergo. Pratercà si ipsa substantia immediate concurrat, ergo omninò superfluous est concursus accidentium, atque adeò est omninò negandus.

Contra secundò, quia ægrè à *Thomistis* explicatur, quid sit, accidens agere in virtute substantiæ, nam aliqui volunt accidenti communicari à substantia aliquam vim, & virtutem distinctam ab ipsorum entitate, per quam accidentia operentur, & agant. Alij volūt, ipsum accidens esse virtutem substantiæ, ità ut propria eorum entitas sit virtus substantiæ; & sanè quidquid dicatur, quomocumque explicetur, accidens agere in virtute substantiæ, semper accidens, remanet in genere, & ordine accidentali, ergo nunquam potest producere substantiam seipso perfectiorem, & ordinis superioris, & altioris.

Quòd si supponas Accidens à substantia eleuari, & fieri ordinis substantialis, sicuti intellectus eleuatur per lumen gloriæ, & sit ordinis supernaturalis; iam non accidens, sed entitas illa substantialis erit immediatum principium productiuum substantiæ.

Probatur secundò Conclusio quia; si substantia non influeret immediate, & immediate non concurreret ad productionem, alterius substantiæ, forma substantialis non esset vera, & propria Causa, probauimus *Disput. 2. Lectio 4.* imò communiter omnes

contrà *Durandum*, ideò concedimus, Deum immediatè concurrere ad effectus creatos, quia si Deus solum remotè, & per virtutem tributam causis secundis, concurreret ad illos effectus, non esset illatum vera, & propria Causa, ergo.

Respondebis. Accidentia esse virtutes substantiæ, non sic causæ secundæ respectu Dei, non enim causæ secundæ sunt virtutes actiuæ Dei.

Sed contrà quia, æquè causæ secundæ sunt instrumenta Dei, ac accidentia sunt instrumenta substantiæ, sed accidentia ideo sunt virtutes substantiæ, quia sunt eius instrumenta, ergo in eodem sensu causæ secundæ sunt virtutes actiuæ Dei, idest, eius instrumenta, quibus ad operandum vititur; ergo si substantia non concurrat immediatè, non est vera Causa.

Probatur tertio conclusio quia: accidens per aduers. habet vim, & virtutem immediatè productiuam substantiæ, ergo à fortiori eam virtutem habet forma substantialis; consequentia tenet, tum quia nulla potest assignari implicantia in eo, quòd ponatur substantia immediatè concurrere ad productionem substantiæ, quæ à fortiori non militet in eo quòd ponitur accidens immediatè concurrere, vt ex solutione earum implicantiarum mox patebit, tum quia quando causa superior concurrat simul cū inferiori ad eundem effectum, potest causa superior illum effectum sola producere non concurrente vllò modo causa inferiori, ità omnis effectus producibilis à Deo, & à causa secundæ potest à solo Deo produci, ergo forma substantialis, quæ de facto producit ab altera forma substantiali, & ab accidente, potest à sola forma substantiali produci.

Obijcies primò: Si forma substantialis esset immediatè actiua, iam esset ordinis diuini, & non differet à Deo, quod esse absurdum, planum est; sequela probatur quia, in forma substantiali esset identificata existentia cū actuali operatione, atque adeò in ea idem esset existere, & operari, quod est proprium Dei, probatur quia, in forma substantiali essent identificata hæc duo, potentia ad operandū & existentia, eadē enim forma substantialis ex sui entitate esset potēs ad existendum, & ex sui entitate esset potēs ad operandum, respiceret ergo eadem entitas substantiæ, vtrumque actum, existentiam, scilicet & operationem, & quidem tanquam quid vnum, & idem, sicuti ipsa est vna eadem, vnificatur enim potentia, & plurificatur ab actibus, ergo cū in eadem entitate formæ substantialis vnificatæ sint hæc duæ po-

tentia,

tentiæ, nempe potentia ad existendum, & potentia ad operandum, manifestè conuincitur, identificatam esse operationem, cum existentia per modum vnius, & eiusdem actus; quod ve dicebatur, proprium est Dei, & eorum, quæ sunt ordinis diuini.

Respondeo in primis; totum hunc discursum, & argumentum posse applicari accidentibus, quibus à *Thomistis* conceditur vis, & virtus immediata operandi, & agendi, nam in eadem vna, entitate accidentis esset identificata existentia, & actualis operatio per modum vnius, eiusdemque actus, atque ita accidens in Diuinam naturam, & sortem transcriberetur, & eleuaretur.

At dices. Accidens est virtus substantiæ, atque adeò dependeret à substantia, ideoque propter hanc imperfectionem dependentiæ ab alio non esset Deus, & ordinis Diuini.

Benè; sed, nunquid substantia, quia ponitur immediate actiua, non dependeret à Deo? quinimò nonne dependeret ab accidentibus, tanquam præuijs dispositionibus; à materia prima, tanquam à subiecto? Non ita facile est rem creatam esse hæc, & vili rerum materialium statu in diuinam transferre conditionem, & sortem.

Respondeo secundò directè ad principale argumentum. potentiam ad existendum, & potentiam ad operandum non esse identificatas formaliter, & quidditatiuè; esto identificatæ sint entitatiuè, quia in vna, eademque entitate formæ substantialis reperiuntur, vt iam supponimus omnes; at non sunt identificatæ formaliter, & quidditatiuè illæ duæ potentiæ, quia distinguuntur in suis conceptibus formalibus, & inuicem comparantur, vt prius, & posterius, prius enim est existere, posterius est operari, commune enim dictum est, & communiter receptum etiam, à *Thomistis*, operari sequitur ad esse, ergo iam posse existere, est quid prius ad posse operari; distinguuntur ergo formaliter, & quidditatiuè potentia ad existendum, & potentia ad operandum, & consequenter etiam existentia, & operatio formaliter realiter distinguuntur.

Dices; quæ distinguuntur formaliter realiter, debent se habere, vel vt potentia, & actus, vel vt genus, & differentia, distinctio enim formalis ponitur inter gradus metaphysicos, è iam in Sententia *Scoti*, at illæ duæ potentiæ non ita se habent. ergo.

Respondeo potentiam ad existendum esse quid prius potentia ad operandum, ac potentia est quid prius actu; patet ergo, quod potentia ad existendum verè se habet, ut potentia, & potentia ad operandum se habet, ut actu, quia omne posterius se habet, ut actus respectu eius, quod ad illud comparatur, ut prius, & ut quid præsuppositum.

Obijcies secundo: si accidentia non essent instrumenta substantiæ, & ijs mediantibus forma substantialis non operaretur, & ag. ret, frustra essent data à natura hæc accidentia, & qualitates, ergo accidentia debent esse immediata operativa.

Respondeo. Accidentia inferuntur tanquam prævias dispositione, quod sufficit ad hoc, ut non dicantur esse frustra data, & producta à natura; Præterea, si mediare ponantur agere, & operari, adhuc non essent frustra.

Obijcies tertio. *Ex Arist. 2 de Gen cap 8. lib. de sensu, & sensil. cap. 4.* ignem non agere quatenus ignem, nec terram quatenus terram, sed quatenus adest in ijs contrarietas, sed contrarietas habetur à qualitatibus, ergo qualitates sunt immediate operativa.

1. Respondeo: ijs verbis insinuare Philosophum, radicem, & originem generationis, & corruptionis rerum, esse contrarietatem qualitatum, quæ dum inuicem agunt, & reagunt, sunt in causa, ut veteres formæ substantiales corrumpantur, & novæ generentur. Vel etiam dico, ignem, & terram agere quatenus in ijs adest contrarietas, quia qualitates habentes contrarium sunt præviae dispositiones ad productionem formarum, calor enim, & siccitas sunt dispositio ad formam ignis, sicuti frigiditas, & humiditas ad formam aquæ.

Obijcies quartò, Sæpè producitur forma substantialis, quando sunt sola accidentia, & non adest vlla forma substantialis, quæ possit esse immediate operativa, ergo in tali casu à solo accidente producitur substantia. Antecedens patet, quia tantæ producuntur, & generantur ex putri materia, & non est assignabilis forma substantialis, à qua immediate producantur. Sæpè animal generatur ex semine de cunctis ab animali, vel absente, vel iam mortuo, à quo proinde non potest dici, quod generatur tale animal, quia quod non est, operari non potest, ergo ab accidente potest aliquando produci anima, ergo à fortiori quæcunque alia forma substantialis, quæ inferior est anima.

Neque enim potest fieri regressus ad causam primam cum

Anaxagora, quem propterea valdè reprehendit *Aristoteles* 8. *Phys. cap. 1. & 12. Met. 1.9.* eo quòd omnes effectus naturales refunderet in mentem, & causam primam.

Respondeo. quid quando deest Causa particularis, nullum inconueniens est, recurrere ad causas vniuersales, cuiusmodi est non solum Deus, sed etiam Sol, & astra, sicut enim de facto, generatio auri, & argenti in visceribus terræ tribuitur actioni Solis, & alij etiam effectus attribuantur occultis influentijs astrorum, ita & generatio Ranarum, & aliorum animalium, ex putri materia causis superioribus, & vniuersalibus possunt attribui.

Et quòd spectat ad generationem animalis, mortuo masculo, remanet scœmina, & semen masculi; Semen autem plures Medicorum volunt esse animatum anima uegetatiua, & sensitiua; sicuti etiam volunt matrem concurrere actiue ad generationem viuientis.

Ita *Vales. lib. 2. Medic. Consrou. cap. 6. & 18. Vega lib. 1. de arte medendi cap. 3. Phys.* idè adhuc stat, substantiam non ab accidente, sed à substantia generari.

Et quamuis ad Deum recurrere, tanquam ad causam effectiuam rerum naturalium, turpe sit in Philosophia, vt etiam ostendi *Disp. 2. Lect. 15. per tot.* idèque rationabiliter sit reprehensus ab *Aristotele Anaxagoras* locis citatis. tamen aliud est omnium effectuum naturalium causam assignare Deum, vt assignabat *Anaxagoras*, aliud est, ad Deum tunc solum, & in eo casu recurrere, quando alicuius effectus naturalis non suppetit causa naturalis peculiaris, & propria, vt accidit in casu nostro.

Præterea, vt benè notat *Scotus*, hic minus malum est, & minus absurdum, ad Deum recurrere, quàm admittere ab accidente substantiam produci; ex duobus ergo malis minus eligendum, ex duobus absurdis minus asseramus.

LECTIO II.

An idem possit agere in seipsum Actione equiuoca.

Sensu Questionis non est, de actione generatiua, aut productiua eiudem à seipso. nam quid probabilius dici possit in hoc sensu, obiter insinuaui *Disp. 3. lect. 3. in fine*, vbi etiam probabilè Nobilium Theologorum Sententiam adduxi.

Neque

Neque est sensus de actione augmentatiua, Aut loci acquisitiua, certum est enim Viuentia seipsis augeri per intrasusceptionem alimenti, eiusque conuersionem in propriam substantiam; sicuti etiam certum est, seipsis localiter moueri tum motu progressiuo, tum motu naturali partium, quarum vna mouet aliam, ita cor, & muscoli mouent reliquas partes animalis.

Tota ergo difficultas reducitur ad actionem alteratiuam; vtrū, scilicet idem possit alterare seipsum, & introducere in seipsum aliquam qualitatem; quod etiam intelligitur dupliciter.

Primò quidem, si ponatur agens introducere in seipsum qualitatem eiusdem speciei cum ea, quam supponitur habere, verbi gratia, agens calidum possit seipso augere calorem, seu vt alij loquuntur, an agens possit agere in seipsum actione vniuoca, & quidem in hoc sensu, quid probabiliter sustineri possit, dicam. *Lectione sequenti.*

Secundo, si ponatur agens agendo in seipsum introducere aliquam qualitatem diuersam specie ab ea, quam supponitur habere; seu vt alij loquuntur, an agens possit agere in seipsum actione equiuoca.

Rursus hæc actio æquiuoca duplex est, corruptiua, & perfectiua; illa est, qua acquiritur qualitas corruptiua, & destructiua ipsius agentis, vt quando per immoderatum cibum, & alimentum ageritudoines, & morbi generantur, & de hac actione nō est sermo in præsentī. Perfectiua actio, seu alteratio est, quando per eam acquiritur aliqua qualitas agenti connaturalis, & debita, ipsum complens, atque perficiens, ita cum à propria agentis essentia emanant proprietates, & passionēs; ab anima emanant potentiæ.

In hoc sensu querimus, an agens possit in seipsum agere, & seipsum perfectiue alterare.

Prima Sententia est *Thomistarum*, qui vt omnem prorsus vim immediatè agendi substantijs adimant, negant idem posse agere in seipsum actione perfectiua, negant ab essentia proprietates, ab anima potentias emanare, & fluere.

Ita *Capreolus in 1. d. 3. qu. 1. art. 3. Aegidius quodlib. 5. q. 16. & quodlib. 5. qu. 15. Ferrarinsis cap. 23. Soncias 9. met. qu. 8. Burl. 7. Phys. t. 1. nouissimè Bernard. Maxxiotta q. 14.*

Secunda Sententia affirmat, idem posse in seipsum agere actione, seu alteratione perfectiua, & quidem ab essentia emanare passionēs, & proprietates; ab anima potentias fluere, & deriuare:

Ita Scotus in 1. d. 3. q. 7. & in 2. d. 2. qu. 10. Scotum sequuntur non modò eius discipuli, sed etià Nominales, ut Greg. in 2. d. 6. qu. 1. art. 3. Mayronius ibidem; ex Recentioribus quàm plurimi, imò ferè omnes. Toletus 1. de Gen. tract. 5. dub. 2. artic. 2.

Conclusio. Idem potest agere, & de facto agit in seipsum actione, seu alteratione perfectiua.

Probatur primò. auctoritate Aristot. qui 2. Physic. 3. & alibi passim apertissimè docet, naturam esse principium motus eius, in quo est; quæ doctrina sicuti locum habet in alijs motibus, & actionibus, ita maximè verificatur de actione alteratiua tendente ad perfectionem corporis, seu agentis naturalis.

Probatur secundò. quia, communiter recipitur differentia, quæ ponitur inter viuentia, & non viuentia; quòd illa seipsis moueantur, non sic ista, quæ potius ab extrinseco motore, & principio mouentur, & alterantur. Confirm. quia anima rationalis seipsa intelligit, seipsa amat; elicit actum intellectionis, & actum amoris, quos & in seipsa recipit, idèque tales actus dicuntur immanentes, quia manent in eo principio, à quo eliciuntur, in ea potentia, à qua fiunt, & ita in ea manent, ut etiam perficiant, ergo.

Probatur tertio. quia proprietates ab essentia, potentias ab anima emanare, est aperta Sententia D. Thomæ 1. p. q. 77. art. 6. ex verba. *Compositum autem est in actu per animam, unde manifestum est, quid omnes potentie anime, siue subiectum earum sit sola anima, siue Compositum, fluunt ab essentia anime sicut a principio.* & in responsione ad 3. argum. *emanatio propriorum accidentium à subiecto non est per aliquam transmutationem, sed per naturalem resultantiam, sicuti ex uno aliud naturaliter resultat, ut ex luce color.*

Ergo veri Thomistæ non debent negare, idem agere in seipsum actione perfectiua; qualis est actio productiua potentiarum ab anima; coloris à luce; passionum, & proprietatum quarumcumque ab essentia, & natura, cuius sunt proprietates.

Neque dicas. Resultantiam, & emanationem non esse veram actionem, & consequenter proprietates ab essentia, potentias ab anima verè non produci, sed potius produci, & fieri à generante, & producente formas, qui enim dat esse, dat etiam consequentia ad esse.

Contrà enim est, quia generans, & produçens formas substantias.

stantiales non potest esse Causa, nisi remota, & mediata, proprietatum, & passionum naturaliter ad tales formas consequentium, ergo causa immediata, & proxima, debent esse ipsæmet essentialia formarum, imò essentialia sunt simpliciter, & vera causa, nam iuxta alibi dicta, causa remota non est verè, & propriè causa.

Fateor, resultantiam, & emanationem non esse ita propriè actionem, sicuti est actio transiens in externum subiectum, quia hæc est magis sensibilibis, & magis notabiliter immutat subiectum, non sic resultantia, & emanatio, quæ in eodem subiecto recipitur, à quo elicitur.

Obijcies primò, ex *Arist. 8 Phys.* per totum, quidquid mouetur ab alio mouetur, & non à seipso, ergo idem non potest agere in seipsum.

Responded. ex dictis *Disp. 5. Lect. 5.* satis sufficienter explicatum, & assignatum fuisse sensum, in quo debet illa propositio vniuersalis Aristotelica intelligi, nam omne, quod mouetur, quia creatum est, & ab alio factum agnoscit primum motorem, & primam causam, cui omnes alij motores, & omnes aliæ causæ subordinantur.

Obijcies secundò, si essentia produceret suas passiones, & anima produceret potentias, sequeretur, quòd essentia proprietates, anima potentias in se virtualiter, aut eminenter contineret, sed id, quod est virtualiter, aut eminenter tale, non potest fieri formalitèr tale. ut patet in Sole, qui cum sit virtualitèr calidus, non potest esse formalitèr calidus; Deus non potest in seipso producere ea omnia, quæ eminenter continet. Corpora calida, ut vinum, piper, & huiusmodi habent vim calefaciendi corpora, non tamen seipsa, ergo.

Responded. tunc, & in eo casu, quæ sunt virtualiter talia, non possè fieri talia formalitèr, quando non sunt capacia talis formalitatis, ita Sol non est capax caloris formalis. Deus non est capax, omnis eius, quod ad extra producit. incapax enim est accidentis, & cuiuscunque alterius peregrinæ, & extraneæ formæ. Piper verò, vinum non possunt recipere calorem maiorem, & intensiorem eo, quem de sua natura exigunt.

Obijcies tertio, inter agens, & passum datur relatio realis, ergo & distinctio realis, ergo idem non potest agere in seipsum.

Responded. inter agens, & passum esse relationem realem, &

distinctionem realem ratione potentiae productivae, & formae productivae, quae duo realiter distinguuntur, nam virtus productiva, est ipsa essentia productiva proprietatum, anima realiter distinguitur à potentia, in *Thomistarum* Sententia.

LECTIO III.

An idem possit agere in seipsum actione uniuoca.

Sensus est, an agens calidum ut quatuor, verbi gratia, possit seipsum intendere, & augere per productionem novi caloris, ut Lektionem superiori insinuauimus.

Et quidem certum videtur esse, idem non posse agere in seipsum, agens calidum non posse in seipso augere calorem actione directa, id est actione, quae ab ostaculo non impeditur, nè ulterius progrediatur. Patet tamen experientia, qua videmus nullam qualitatem à seipso, sed ab alio augeri, tum etiam ratione, quia si calor augeret seipsum, maxime quia produceret alium gradum caloris, quem vel prae haberet in potentia, vel actu; si actu, iam illum non produceret de nouo, quod enim iam existit, non potest amplius produci: si haberet in potentia

Contra est quia. Agens supponitur calidum, ut quatuor, sed calor ut quatuor non habet vim, & virtutem, seu potentiam ad ulteriorem gradum producendum, aliàs seipsum excederet, ergo.

Videamus; An data actione reflexa, possit calor, vel alia quaecunque qualitas seipsam augere, & intendere.

Vbi nomine actionis reflexae venit illa actio, quae fit ab Agente, quando iuxta ipsius sphaeram actiuitatis interponitur corpus aliquod, & obstaculum, in quod incidit actio, & impeditur ulterius progredi, tunc enim actio, quae debebat extendi ultra obstaculum, & explere totam sphaeram agentis, veluti duplicatur contra obstaculum; patet haec reflexio manifestè in motu locali, dum enim proiicitur pila in parietem, quia non potest parietem peruadere, & transire, resilit, & reflectitur citrà parietem; hac eadem ratione fit Echo, nam quando quis loquitur, & aërem vocem deferens impingit in aliquem locum concauum, retrorsum aer redit, & eandem refert vocem.

Simili ratione lumen diffusum à Sole, quando impingit in parietem, reflectitur, & citrà parietem duplicatur; idem dicas
de

de calore, & alia quacunque qualitate, contrà *Aresum* I. de *Gen. disp.* I. q. 42. *sect.* 9. vbi in solo lumine, & non in alijs qualitatibus agnoscit actionem reflexam, reuera tamen eadem ratio, & eadem experientia, quæ probant lumen intendi, probant etiam intendi calorem, & alias qualitates.

Prima ergo opinio in propositate difficultate est *Ouiedi* I. de *Gen. Contr.* 5. p. I. §. 4. vbi docet, actione reflexa qualitates non augeri, nec intendi.

Secunda opinio in oppositum est communis, & eam probant ratio, & experientia:

Ratio quidem, quia virtus animalis magis conatur, quando impingit in obstaculum, ergo & virtus naturalis maiores vires exerit, quando in obstaculum impingit, ergo maiorem effectum, & intensiorem producit; Confirmatur quia, si actio, putà calefactio, vltius extenderetur: calefaceret, verbi gratia, quatuor palmos aeris, ergo si transacto primo palmo, impingit in aliquod obstaculum, gradus caloris, quos aliàs non impedito obstaculo produceret in tribus palmis aeris calefaciendi, producit in primo palmo aeris, ergo iam in eadem parte subiecti sunt plures gradus caloris, ergo est intensior calor, intensio enim qualitatis tunc accidit, quando in eadem parte subiecti sunt plures gradus qualitatis, quæ aliàs possent esse, & extendi per plures, seu in plures subiecti partes.

Experientia plures doctrinam traditam confirmant, & declarant.

Prima sit, videmus in Luna aliquas partes magis, aliquas minus illuminatas, non nisi quia in ijs, quæ sunt magis densæ, magis reflectitur lumen, & ideo sit maius, & consequenter magis densæ partes, magis illuminantur. E contrà partes raræ minus illuminantur, quia ob earum raritatem, & tenuitatem lumen, non potest ita valdè reflecti, ideo minus est lumen, & illæ partes, quia raræ, minus apparent illuminatæ.

Secunda experientia est, æstate in prima parte aeris viciniore terræ maiorem calorem sentimus, non nisi ob reflexionem luminis, quæ maior est ob terræ obstaculum, & impedimentum, terra enim æstate directè respecta à Sole magis radios reflectit vsque ad secundam aeris regionem, quàm in hyeme, ob radios aliquos, quibus eo tempore respicitur à Sole.

Tertia experientia sit. Si intrà sphæram ignis apponatur lamina ferrea, maximum sentitur caloris augmentum in medio, &

apricantes ad Solem eò magis calefiunt, si parietem iuxta se collocent, quia ex pariete magis calor reflectitur.

Obijcies tamen primò : actio, qua diffunditur lumen, aut calor, est vniformis difformis, atque adeò subiectum illuminandum, aut calefaciendum, quò magis distat à corpore illuminante, aut calefaciente, debet esse minus illuminatum, & calidum, ergo propè obstaculum non videtur maius lumen, non sentitur maior calor.

Respondeo, experientiam esse in contrarium; & quidem si ab obstaculo non impediretur actio, vtiq; subiectum illuminandum, quò magis distaret à corpore luminoso, minus lumen reciperet, per accidens est, quòd illuminatio impingat in obstaculum, & ita lumen augeatur, quia multiplicatur, & illi gradus, qui vltcrius, & vltcrius deberent extendi intra obstaculum augentur, & intenduntur, quia multiplicantur.

Obijcies secundò : à natura est determinatus modus agendi in causis, ergo nisi natura mutetur, non potest modus agendi vniformis difformis mutari ob extrinsecam aliquam circumstantiam.

Respondeo; negando consequentiam, quia modus operandi à natura non est ita determinatus, vt nequeat immutari ad mutationem circumstantiarum, sæpè enim variatur actio ex diuersitate materiæ, applicationis, & ex alijs causis adiuuantibus; imò licèt sphaera actiuitatis causarum sit omninò determinata, tamen sæpè extenditur, & ampliatur, si vna causa naturalis cum altera coniungatur.

Obijcies tertio, si agens luminosum impeditum ab obstaculo augeat, & intendit lumen, vel id præstat, quia omnes gradus, quos produceret, si vltcrius extenderetur, producit in subiecto, quod est propè obstaculum, vel aliquos; non primum, quia est contra experientiam, neque enim Sol impingens in parietem, hunc A. verbi gratia, producit in illo omnes gradus caloris, quos produceret, si non impeditus à pariete, extenderetur, & produceretur vsque in Orientem. Sed neque secundum dici potest, quia non est maior ratio de aliquibus, quàm de alijs, ergo.

Respondeo, aliquos gradus luminis produci; cur potius hos, quàm alios, recurrerent ad causam primam cum *Anaxagora* illi, qui volunt causam secundam à Deo determinari ad produgendum hunc potius numero effectum, quàm alium; iuxta mea prin-

principia, dico, Solem seipso determinari, & ex sui natura ad producendos hos potius gradus, quàm alios.

Simile quid debent respondere *Aduers* si ab illis quærat, cur agens habens sphaeram quinque vlnarum, si impediatur statim post primam vlnam, non producat omnes gradus qualitatis à se producibiles, sanè nihil aliud possunt respondere aduersi nisi tale agens esse à natura determinatum, vt distribuat gradus à se producibiles in certa, & determinata mensura, & ita quando inuenit impedimentum, pauciores gradus producit, quando impedimentum non inuenit, producet plures.

L E C T I O I.

An qualitas per Antiperistasis intendatur.

Nomine Antiperistasis, (quæ Græca vox est,) venit circumobstentia, seu obsessio contrarij, & quidem qualitatem augeri, & intendi per antiperistasis, seu obstentiam, & obsessionem qualitatis contrariæ, concedunt Philosophi communiter omnes conuicti pluribus, iisque manifestissimis experientijs.

Quarum prima est. Aquæ subterraneæ tempore æstiuo, quo aer calore feruet, sunt frigidiores. at tempore hyemali, quo aer frigidus est, sunt notabiliter calidiores. Hanc experientiam adducit *Arist.* 1. *Met. sum.* 3. *cap.* 1. & 2.

Secunda experientia est. Ventriculi animalium hyemali tempore, & calidiores sunt, & cibum magis concoquunt; imò si manus glaciem, aut niuem prehendant, incalescunt magis; quam experientiam adducunt communiter Medicorum peritissimi, *Hipocrates sect.* 1. *Aphorif.* 14. *ibidem Galenus*, & *Alex.* lib. 2. *Natural.* 99.

Tertia experientia. Si in calcem, quam viuam appellamus, infundatur aqua frigida, tantus excitatur calor, vt aquam cogat ebullire, quæ experientia adducitur a *D. Augustino* lib. 21. *de Ciuit.* cap 4.

Quarta experientia est, sinus columbarum reclusus ita vehementer incalescit, vt aliquando ignem concipiat, testatur *Galenus* lib. 3. *de Temporum* cap. 2. Plures, qui desiderat experientias, legat *Amicum* 1. *de Gen. tract.* 5. q. 1. *dub.* 2. *art.* 1.

At sicuti certum est, Antiparistasi dari ex adductis experientijs, ita valdè incertum est, & dubium, quo modo ex obsessione, & circumobstantia contrariæ qualitatæ, qualitas intendatur, & augeatur, & quæ causa talem intensionem, & augmentum qualitatæ inducat obsistente contratio, & obsidente.

Primus modus dicendi, est *Fomponatij 4. de actione Reali art. 1. 2. & 3. Niph. de Gen. Com. 195. dub. 2. Tolet. 1. de Gen. 14.* Hi volunt, qualitates in Antiparistasi seipsis intendi, & augeri ex obsessione contrariæ qualitatæ, cum enim obsidente qualitate contraria nequeant se diffundere in totam spheram actiuitatis suæ, in se ipsas actiones conuertunt, ac se intendunt, & augent.

Sed contrà hunc modum dicendi est quia: sequeretur, quòd calor vt quattuor non habens quintum gradum caloris, adhuc illum produceret, atque adeò quòd daret subiecto id, quod in se non habet, neque enim obsistitia, seu obsessio contrariæ qualitatæ, potest dare calori vim, & virtutem augendi seipsum, cum talem vim de se calor non habeat, ergo.

Secundus modus est aliorum dicentium, qualitates in Antiparistasi intendi per præclusionem transpirationis, nam partes, quæ exhalare deberent, obsistente contrario non exhalant, ideòque condensantur, & qualitas augetur, quia in eadem parte subiecti vi condensationis sunt plures partes, & gradus qualitatæ. Ità *Hippocrat. de Natura Fetus. Flam. Nobilius 1. de Gen. cap. 7. dub. 12. Cardanus lib. 2. de subtilit. Scaliger. exercit. 54. & alij plures.*

Sed contrà hunc modum est quia, quando frigus obsidetur à calore, non potest dici, quòd augeatur frigus ex eo, quòd non possit transpirare, quia calor tantum abest, quod impediat, quin potius inuuet transpirationem, ratio est, quia transpiratio fit per meatus, quos calor aperit, non claudit, ideò tempore æstiuo, meatus, & pori sunt magis aperti. Præterea frigus non transpirat, nisi emittendo partes calidas, quarum emissio non impeditur à calore obsidente, sed potius inuatur.

Tertius modus est dicentium. Qualitates in Antiparistasi augeri, & intendi ab ipsamet contraria qualitate, vel à forma substantiali, cuius est qualitas obsessa, verbi gratia, calor obsessus à frigore augetur, & intenditur à forma ignis.

Sed contra est quia, vnum contrarium non producit aliud, sed potius destruit, nō ergo frigus potest producere, & augere calorem.

Deindè obsidente frigore calorem, & ignem non potest forma ignis calorem intendere, quia obsistente contrario qualitas minus valida, minus potens est.

Quartus modus est, dicentium; in Antiperistasi qualitates intendi per motum localem partium homogenearum, & similarium, quæ uniuntur, & simul expellunt partes etherogeneas; & sibi dissimiles, aut contrarias. Ita *Auersa tom. 2. Philos. q. 39. sect. 8. Amicus 1. de Gen. tract. 5. q. 3. dub. 3. art. 2. conclus. 4.*

Conclusio. In Antiperistasi qualitas intenditur per motum localem partium homogenearum, & similarium expulsis etherogeneis, & dissimilibus.

Probatur ratione quia. Vnum contrarium fugit aliud, & expellit virtute sua naturali ob antipatiam, natura enim omnibus indidit vim seruandi, & saluandi se à contrario; hoc autem sic dupliciter, resistendo, & fugiendo contrarium, seu illud expellendo; cum ergo calor obsidetur à frigore, omnes gradus, & partes caloris uniuntur, ut se defendant à frigore, ut illud vel fugiant, & expellant, vel resistant, sed partes caloris, & gradus vniri nihil est aliud, quam calorem intendi iuxta dicta à nobis supra de intensiōe qualitatis, ergo.

Quod autem partes frigida expellantur à subiecto calido, obsidente frigore

Probatur primò ratione; quia calor, ut se conseruet, contrarium sibi aliàs vicinum debet à se longè remouere, nè vnium frigus internum cum frigore, & hoste externo, fiat potentius, & validius, atque adeò calori machinetur destructionem, & interitum; ut in politicis ars, & prudentia militaris dicat, à Ciuitate obsessa ab inimicis, expelli foras hostes internos, nè cum hostibus externis vnatur in Ciuitatis obsessæ damnum, atque perniciem.

Probatur secundò multis experiētijs. Quarum prima sit. Aquæ gutta si cadat in siccam terram se colligit in globum, non sic autem, si cadat in terram humidam; neque enim dici potest, guttam illam se colligere in globum, quia aqua est figuræ globosæ; nam ista ratio militat etiam, quando gutta aquæ caderet in terram humidam; ideò ergo gutta aquæ cadens in terram siccam, colligit se in globum, quia vnitur eius humiditas ad resistendum siccitati sibi contrariæ.

Secunda, per motum, & agitationem niuis, frigit vinum
inclu-

inclusum in phiala, quia nimirum per eum motum congregantur partes calidæ niuis, quæ propterea incalescit, ut patet ex fumo, quem emitti, partes autem frigidæ niuis foras mittuntur, & cum non possit alio se recipere, in vinum phiala inclusum impingunt, illudque intrigunt.

Tertia sit, lumen, stante Borea, extra caminum emissus, conglomeratur, ut fugiat frigus sibi contrarium.

Quarta; quando manus calida mergitur in aquam frigidam, sursum sanguis mouetur, & se contrahit, ut frigus aquæ fugiat, & à se expellat.

Ex his redditur ratio experientiarum, quas initio huius Lectionis adduximus.

Et quidem ideo aquæ subterraneæ tempore æstiuo sunt frigidiores, quia partes aquæ frigidiores uniuntur expulsi calidioribus, ut ita fortius resistant ambienti extrinseco, & aeri calido. è contra tempore hyemali sunt calidiores, quia eius partes calidæ uniuntur expulsi frigidis, ut ita ambienti extrinseco, & aeri frigido resistant.

Similiter hyberno tempore ventriculi animalium incalescunt, quia in eo partes calidæ congregantur, expulsi frigidis, ut ita magis resistant ambienti extrinseco frigido.

Denique in calce viua, in fimo columbarum, in tritico incluso, excitatur sæpè ignis, quia partes calidæ uniuntur, & congregantur ad resistendum contrario.

LECTIO V.

An simile possit agere in subiectum sibi simile in qualitate, & gradu.

Sensus quæstionis, vel ex ipso titulo innotescit, queritur enim an agens, verbi gratia, calidum ut quatuor possit agere in subiectum, quod sit etiam calidum, ut quatuor. Si tamen agens supponatur esse aut quantitatiuè, & extensiuè maius, aut densius, quia alias ista quæstio faciliè posset solui ex dictis *Lect. 3.* si enim idem non potest agere in seipsum actione vniuoca, atque adeo agens calidum ut quatuor non potest in seipso augere, & intendere calorem; neque potest augere in alio subiecto à se distincto, quod supponatur æqualiter calidum.

At si agens calidum vt quatuor sit maius aut densius, videtur hoc esse satis probabile fundamentum, & sufficiens motuum, asserendi, posse agens simile agere in subiectum sibi cæteroqui in qualitate, & gradu qualitatis simile.

Conclusio prima. Agens naturale non potest agere in subiectum sibi omninò simile in qualitate, & gradu qualitatis, etiam si sit extensiuè maius, aut densius.

Ità Philop 1. meteor initio. Venetus 1. de Gen. 1. 52. Saxonia qu. 15. Paris. q. 3. de actione Buccas. 1. meteor 9. 1. de Gen. post 1. 55. ex Thomistis. Victoria Relect. de Aug. Carit Astudillo 1. de Gen. qu. 21. Banes qu. 10. ex Recentioribus Mazzotta q. sel. qu. 2. Amicus 1. Gen tract. 5. q. 2. dub. 3. Auerſa, Morandus, & alij ferè in numeri.

Contra Marſilium 1. de Gen. qu. 18. Niphum 195. Zim. Theor. 1. ex primo de Gen. Nobilium in c. 7. d. vlt. Sotum 2. Phys qu. 4. Toletum 1. de Gen. qu. 12,

Probatur conclusio quia. omne agens naturale ideò agit, vt assimilet sibi passum, seu subiectum, ergo si passum, & subiectum sit iam simile, non potest agens amplius agere in subiectum, & passum, cessante enim fine, cessat actio. Consequentia est clara.

Probatur Antecedens primò ex Arist. hic 1. 51. 3. Phys. initio 7 Phys. 35. 12. Met. 13. Met. Met. 30. vbi habet, omnem effectum esse ab vniuoco, quatenus omne agens intendit, & de facto facit subiectum sibi vniuocum, & simile.

Probatur secundò ratione quia: omne agens ideò agit in subiectum, quia producit in illo aliquem gradum qualitatis, quem in se habet actu, vel virtute, sed hoc nihil est aliud, quàm assimilare sibi passum, nam ex Arist. in predicam. c. de adaliquid. Similia sunt, quorum vna est qualitas, ergo.

Quòd autem agens si extensiuè maius passò, aut densius, non iuuat ad hoc, vt possit agere in passum sibi alias omninò simile; Ratio est quia, maior ista extensio, & densitas non auget virtutem, & actum formalem agendi, ergo quòd agens sit maius extensiuè, aut densius, nihil confert, aut iuuat ad actionem. Probatur antecedens quia licet agens calidum, vt quatuor, sit maius extensiuè, aut densius, non proinde est calidum, vt quinque, ergo non crescit eius virtus formalis agendi, seu non crescit id, per quod debet agens dare, & communicare passò.

Fateor; maiorem istam extensionem, & densitatem agentis iuuare

iuuare, & multum conferre ad hoc, vt agens citius, & velocius, vel in maiorem distantiam diffundat actionem.

Probatum quia, si agens calidum sit maius extensiuè, maior quoque est calor extensiuè, sed maior ista extensio caloris non iuuat ad intensius operari, ergo iuuat ad operari extensius, & in maiorem distantiam.

Similiter, quando agens calidum est densius, potest citius, & velocius agere, nam illa densitas non iuuat ad eius modum agendi, qui in eo consistit, vt agens citius, & celerius operetur; aliàs talis densitas maior esset omnino frustratoria in agente, quod est absurdum, quia natura nihil frustra facit.

Obijcies primò. Vbi est minor repugnantia, ibi maior potest esse actio, sed minor repugnantia est inter similia, quàm inter dissimilia, vt patet, ergo.

Respondeo ad hoc, vt actio sequatur, non solum esse attendendam non repugnantiam, sed maiorem actiuitatem agentis supra passum; eito igitur inter agens calidum vt quatuor, & passum calidum, vt quatuor minor sit repugnantia, imò nulla sit, vt reuera nulla est repugnantia, sed tamen in agente calido non est actiuitas maior supra passum, cum vtrunque supponatur calidum, vt quatuor.

Obijcies secundò. plures experientias, quarum prima est; Phiala frangit Phialam. Secunda est, duo specula eiusdem, omninò perfectionis inter se opposita agunt producendo sui species. Tertia flamma maior, & minor habent æquales gradus caloris ex *Arist. 3. Cæli 52.* & tamen videmus, flammam maiorem agere in minorem, nam illam consumit.

Quarta. lumen augetur ab alio simili lumine, & luminosum ab alio simili luminoso, vt lucerna ab alia lucerna.

Respondeo. Et quidem ad primam experientiam, illas phialas agere inuicem, non vt similes, sed vt dissimiles, habent enim impulsus contrarios; id est, in contrarias partes, etiam si sint æqualis intensiōis. Ad secundam de speculis, patet ea, specula esse inter se similia in ratione speculi, hoc modo non agunt ad inuicem, sed quatenus produciunt species intentionales, quæ sunt diuersæ, & inter se, & à speculis, à quibus produciuntur.

Ad tertiam, minorem flammam corrumpi à maiori, quia maior flamma corrumpit, & destruit pabulum, quo conseruatur flamma minor, quæ propterea extinguitur, non ergo flamma agit in flammam, cui est similis, sed flamma agit in alterius

flammæ pabulum, cui est diffusibilis, hinc *Aristot. in Problem. Sect. 1. qu. 58.* reddit rationem, cur in curatione febris quartanæ debeat augeri calor, vt, scilicet, maior calor consumat materiam, & pabulum, quo conseruator minor, & *qu. 8.* docet, ægritudines, quæ sunt à calore, curari ab humiditate, & quæ ab humiditate curari à calore, quia hic exsiccat humiditatem, & *sect. 2. q. 13.* calida magis in Sole, quàm in vmbra. in frigidari, quia minor calor à maiori absumitur.

Eodem modo docet; ignem minorem à maiori extinguere; & hunc modum extinctionis, seu corruptionis *lib. de Iuuentute, & senectute cap. 2.* appellat corruptionem per marcorem, ex quo oritur senectus, & mors animalium, quia, scilicet, calor naturalis rarefaciens humidum radicale facit illud euaporare, euaporato autem humido, quo calor naturalis depascitur, nisi aliud humidum subintret vi nutritionis, extinguatur calor, & cum calore vita.

Ad quartam experientiam dico; lucernas æquè luminosas non intendere, aut augere lumen, sed conseruare, nè ab aere circumfuso, & agitato exstinguatur; non eego vna lucerna æquè luminosa, ac altera producit lumen in alteram. Simili ratione, quæ dixi *disp. 2. lect. 19.* duas manus calidas mutuò se calefacere, non quia calorem in seipsas producant, sed quia mutuò se conseruant, resistendo contrariæ qualitati.

Obijcies tertio. Agens remissius; & minus intensum agit in passum intensius, & illud intendit, ergo multo magis æquale poterit intendere æquale, si enim actio potest oriri à proportionem minoris inæqualitatis, ergo etiam potest oriri à proportionem æquali, effectus enim perfectio plus excedit virantem primi agentis, quàm secundi. Probaturs antecedens in congelatione aquæ, quæ fit ab aere, & tamen aqua est frigidior aere.

Respondeo in primis. congelationem non fieri ab aere, sed ab ipsa forma aquæ, quæ expulsiis partibus, seu exhalationibus calidis, auget naturam sui frigiditatem.

Respondent alij, glaciem non esse frigidiorẽ aqua, sed sentiri frigidiorẽ ob maiorem densitatem, quæ est in glacie, & non in aqua.

Obijcies quarto; *Virtus vnita fortior est seipsa dispersa.* Axioma est communiter receptum, & sumitur ex *Arist. 1. Meteor. cap. 12.* at virtus addensata est magis vnita, ergo fortior, & actiuior ad agendum, ergo si agens simile passio sit densius,

poterit agere in passum. Confirmatur quia virtus, & actiuitas agendi fundatur in entitate, ergo si entitas agentis addensatione fiat maior, maior erit actiuitas, & virtus agendi, ergo non obstante similitudine cum passo, adhuc agens, si densius sit, poterit agere in passum sibi simile.

Respondeo. Axioma illud sic esse intelligendum, ut virtus vni sit fortior, quia citius, & celerius exit in actum, & quia magis resistit contrario; hinc est, quod licet in carbonibus accensis, & in flammis eadem sit virtus vrendi, & idem calor, adhuc tamen magis calefaciunt carbones, quam flamma, quia carbones sunt flammis densiores, in niue, & in aqua congelata magis sentitur frigus, quam in aere, & fluida aqua, quia nix, & aqua congelata sunt corpora magis densa.

Ad Confirmationem dico, actiuitatem fundari quidem in entitate tanquam in subiecto, non tamen ad augmentum entitatis actiuitatem crescere intensiue, & formaliter, id est, quoad vim agendi, quia materialiter crescit; quatenus in maius spatium, & maiorem sphaeram potest se extendere agens, quando supponitur se auctum quoad entitatem.

Obijcies quinto Plus potest agens multiplicatum, quam agens non multiplicatum, ergo si agens sit calidum, ut quatuor, & sit multiplicatum, plus potest, quam si non esset multiplicatum, sed si non non esset multiplicatum non posset agere in calidum, ut quatuor, ergo si sit multiplicatum, debet posse agere in calidum ut quatuor.

Respondeo. Agens multiplicatum plus posse materialiter, quia in ampliorem se sphaeram extendit, non plus formaliter, & intensiue; & sanè quando non est multiplicatum, æquè potest agere intensiue, & quando est multiplicatum; nisi fortè supponamus in agente non multiplicato, non esse applicationem ad agendum, sed non esse dispositum; contingere enim potest, quod duo agentia æqualis virtutis, putà æquè calida, vnum agat, & aliud non agat, quia vnum se applicat, & aliud non se applicat ad agendum, & ita etiam potest vnum magis agere, & magis exire in actum secundum, quam aliud eisdem virtutis cum illo, quia nimirum magis se applicat, vel magis se disponit, vel denique maiorem inuenit in subiecto dispositionem; hinc est, quod plures guttæ aquæ, quamuis sint eiusdem gravitatis, ac est vna gutta, excaveant lapidem, non sic vna tantum gutta.

LECTIO VI.

*An Agens naturale operari, & agere possit
in distans.*

Agens non operari in distans, seu debere agens esse appropinquatum, siue præsens passio, & subiecto in quod debet gere, & operari concedunt communiter omnes, qui proinde distinguunt, dupliciter agens posse esse præsens passio, seu subiecto; nempe præsentia suppositi, & præsentia virtutis; Tunc agens est præsens passio præsentia suppositi, quando inter entitatem agentis, & entitatem passi nihil inediat; tunc verò est præsens præsentia virtutis, quando agens inter, & passum medio spatium, per quod tamen agens diffundit sui virtutem, atque qualitatem aliquam, quam deinde passio, & subiecto tribuit, & communicat.

Uterius cuicunque agenti naturali Schola communis tribuit sphaeram finitam, & limitatam actiuitatis; nam designato circulo, seu sphaera, concipiunt Philosophi, agens esse veluti in medio, & centro, & quaquà versus, seu circum circa diffundere, & extendere actionem suam usque ad circumferentiam, seu peripheriam designatæ sphaeræ, seu circuli, & non ultra, quia limitata, & finita virtus, seu actiuitas agentis ulterius non extenditur; hæc autem sphaera maior est, & amplior, seu etiam minor, & magis limitata, prout maior, & amplior, seu etiam minor, & magis limitata est virtus, seu actiuitas agentis; non enim omnia agentia habent eandem actiuitatis sphaeram.

Res ita se habet de facto, an de possibili eodem modo philosophandum sit; diuersæ sunt Scholasticorum opiniones, & sententiæ. Et quidem quando dico de possibili, non intelligo de absoluta Dei potentia, & supernaturaliter, quia nullus ambigit supernaturaliter, & de absoluta Dei potentia posse agens agere in distans, sicuti & Humanitas Christi Domini plura miracula operata est in locis maximè se distantibus, & ignis inferni torquet Dæmones in hoc aere existentes.

De possibili igitur, sistens intra ordinem, & statum rerum naturalium, seu intra vires & facultatem naturalis potentie, quaeritur; an possit agens virtute naturali agere, & operari in subiectum

Atum à se longè distans, & remotum absque eo, quòd priùs agat in medium, seu absque eo, quòd priùs communicet qualitatem transfundendam, & passio communicandam medio, quòd agens inter & passum supponitur interiacere. Neque enim agens debet esse, nec de facto quidem approximatum passio, seu subiecto, approximatione, seu præsentia suppositi, quod etiam, certum, & communiter admissum est;

Primo ergo maior pars Nobilium Philosophorum negat, posse agens naturale diffundere, seu communicare aliquam, qualitatem subiecto à se distanti distantia suppositi, nisi prius vel illam eandem qualitatem, vel aliam communicet medio, posito agens inter, & subiectum, seu passum.

Ità *Capreolu. in 1. d. 37. ibidem Ric. artic. 1. Ferrarien. 3. contra gentes Bannes 1. de Gen. cap. 6 qu. 1. Venetus in summa de Gen. cap. 22. ex Recentioribus Suarez disp. 18. sect. 8. num. 10. dresius disp. 5. qu. 41. Ruuius 2. de Gen. cap. 6. cap. 1. qu. 10. Morandus 1. de Gen. tract. 3. conclus. 3. Spinula 1. de Gen. distin. 4. sect. 5. Hurtad disput. 9 sect. 6. Ouied. contr. 18. punct. 1.*

Secundò *Subtilis Doctor in 1. d. 47. qu. 1. §. Respondeo, concedit, posse agens naturales agere, & operari in subiectum à se distans, & remotum absque eo, quòd priùs agat in medium interiacens; dummodò tamen passum, seu subiectum sit inter sphæram actiuitatis, & virtutis agentis naturalis. Ita Scotus, ubi supra. Scotum sequuntur non modò eius discipuli, sed etiam Schola Nominalium; Gabriel Bassolius, & Maironius eadem distin. 37. Gulielmus Ocham, in 2. d. 18. & in 1. dist. 37. Gulielmus de Rub. qu. 2. ex Antiquis ità suò philosophari Alex. 2. Caeli Com 42. Auicenna 1. de anima pr. 4 cap. 4. Simplicius, 1. Celi 42. ex Thomistis videntur hanc sententiam sequi Durandus, & Heruicus dist. 47. quos citat, & sequitur, Amicus 2. de Gen. tr. 5. q. 4. dub. 4. art. 2.*

Ex Recentioribus, tenentur hanc Sententiam tueri omnes illi, qui volunt substantiam esse immediatè actiuam, & non agere mediantibus accidentibus, seu qualitatibus, si philosophari velint consequenter, vt benè notat *Amicus ubi supra art. 3. num. 20.*

Arriaga disp. 7. sect. 6. subsect. 2. concedit, agens agere in distans, quando medium est simile agenti.

Conclusio. Agens naturale potest agere in passum, seu subiectum

iectum à se distans, positum tamen intra sphæram actiuitatis suæ.

Probatur conclusio pluribus, & manifestis experiētijs, quibus probatur de facto agens naturale agere, & operari in subiectum à se longè distans, non agendo, & operando prius in medium, ergo à fortiori potest exerendo omnem sui naturalem vim, & virtutem agens operari in subiectum à se distans, & longè remotum non operando prius in medium.

Prima experientia est. Torpedo stupefacit manum piscatoris, & non rete; è contrà Magnes trahit ferrum, & non medium. Tertia. Sol generat mineralia in visceribus terræ, & in medium nihil producit, aut generat. Quarta. Sol trahit vapores ex terra, & non trahit medium. Quinta, obiecta, causant sensationem in sensibus, quam tamen non causant in medio. Sexta. Imaginatiua alterat membrum distans, & non intermedium. Septima. oculus menstruatæ inspicit speculum, & non aerem, intermedium. Octaua. vetula fascinat puerum, & non aerem. Nona, lupi aspectus mortem aspicientibus infert. Decima. in Apulia nascitur Stellionis genus, quod ad saltem certis anni temporibus mouet, quos semel momorderit. Vndecima. Ignis inflammat struppam, & non inflammat aerem intermedium.

Hinc argumento deducto ex allatis experimentijs non multum fido, quia facilè se expedient aduersarij, dicendo; hæc agentia per aliquas sui qualitates insensibiles, vel occultas prius agere, & operari in medium, deindè in subiectum distans, & remotum.

Et quidem torpedo in rete, & magnes in medium occultas qualitates prius transmittunt. Sol in medium, seu aerem diffundit prius lumen, quam calorem in visceribus terræ producat, & similiter trahit vapores, transmittendo prius lumen per aerem, seu medium. obiecta causant sensationes transmittendo species sensibiles ad sensus. Similiter & imaginatiua per species intentionales alterat membrum intermedium prius, quàm alteret per species sensibiles membrum aliud à se distans. oculus menstruatæ, vetula, lupi, & basilisci malignos, & mortiferos spiritus transmittunt, denique stellio vicariam sui qualitatem in membris eorum, quos momorderit, relinquit.

Sed neque experientia vltimo loco adducta conuincit intentum, quia facilè quis respondebit; aerem inflammati, sed non

ob sui tenuitatem non videri inflammatum : vel etiam, aerem non inflammari, non quia per illum non transeant exhalationes calidæ, quibus stупpa inflammatur, sed quia caret siccitate necessario requisita ad concipiendam flammam, quæ tamen siccitas reperitur in stупpa.

Probatur igitur efficaciter primò quia. Sol actione reflexa magis calefacit partem inferiorem aeris, à se longè distantem, quàm partem superiorem, & sibi magis propinquam, ergo etiam si nullum calorem produceret in parte, & regione superiori aeris sibi propinqua, posset calorem in parte inferiori à se longè distantem, producere; si enim potest maiorem calorem in parte remota producere, calore non producto in propinqua, quare non potest calorem simpliciter in parte remota producere eo non producto in parte sibi vicina, & propinquat imò in media regione aeris nullum producit calorem, quem tamen producit in infima.

Probatur secundò quia; passum, & subiectum supponitur esse iam intra sphaeram actiuitatis agentis naturalis, & ex alia parte calor productus in parte remota ab agente non dependet à calore producto in parte propinqua, & agenti vicina, ergo non est ratio; cur denegetur agenti virtus operandi in partem remotam, casu, quo aliquo impedimento detineatur, ne agat in partem passi sibi vicinam, & propinquam.

Probatur tertio quia: ideo agens naturale non potest agere in distans, quia est finitæ, & limitatæ virtutis, seu actiuitatis, sed posito passo intra sphaeram actiuitatis, & virtutis eiusdem agentis; iam agens naturale non excederet fines limitatæ suæ virtutis, & actiuitatis, quando ageret in partem remotam, & non in proximam, & sibi vicinam, ergo.

Obijcies primò. Agens, & passum debent esse simul ex *Arist. 7. Phys.* & hic d. 1. 43. usque ad 46. & 4. *Phys.* 1. 48. Confirmatur ex 2. *de anima* 1. 47. ubi agens contra Empedoclem admittentem vacuum, habet; si daretur vacuum inter duo corpora, non futuram actionem inter illa, ergo non potest dari actio in distans.

Respondeo, Aristotelem loqui casu, quo passum non sit intra sphaeram actiuitatis agentis naturalis; ceterum si posito vacuo, adhuc passum supponatur esse intra sphaeram actiuitatis agentis naturalis; non est ratio, cur agens naturale nequeat in passum à se remotum, & distans operari etiam interposito vacuo; vel
etiam

etiam Arist. loqui de agente naturali virtutis ita finitæ, & limitatæ, vt non possit in partem à se remotiorem agere, & operari producendo formam perfectiorem, nisi in parte sibi vicina producat formam imperfectiorem; qua etiam ratione agens naturale non potest generare, nisi prius inducat alterationem, vt bene notat *Scotus* vbi supra. Neque enim conclusio posita est vniuersalis, sed indefinita, quæ æquiualeat particulari, ideòque ad verificationem eius sufficit, si aliquod agens naturale possit extendere actionem suam ad subiectum à se longè distans, & remotum, si nimirum supponatur esse perfectum, & habere perfectiorem quandam actiuitatem, & virtutem.

Obijcies secundo: si agens posset agere in passum etiam interposito vacío, sequeretur, posse agere in subiectum à se distans in quacunque distantia, iam enim idem non requireretur ad agendum, ergo in quocunque loco etiam maxime distanti, passum ponatur, poterit agens in illud agere, & operari.

Respondeo: non omne agens habere eandem vim, & virtutem operandi, & agendi, neque cuiuscunque agentis eadem est actiuitatis sphaera, sicuti enim vnum agens naturale est alio perfectius in entitate, ita & actiuitate; hinc agens calidum est magis actiuum, quàm frigidum; plura potest Angelus, quàm Homo: esto igitur medium aliquando non requiratur ad agendum, indè non sequitur, posse actionem agentis se extendere ad quancunque distantiam, sed solum ad eam, ad quam potest attenda sui limitatâ virtute, & actiuitate.

Obijcies tertio, mediū se habet, vt vinculum connectentes agens cum passo, ergo si passum distet ab agente, debet prius actio recipi in medio, deindè in passo.

Respondeo: de facto, & regulariter ita contingere, & per medium connecti. & vniri agens cum passo: at hoc non obstat, quò minus possit dari agens amplioris, & perfectioris virtutis, quod se extendat in maiorem, & longiorem distantiam, absque eo, quòd indigeat medio, tanquam vinculo connectente ipsum cum passo.



LECTIO VII.

An detur Reactio.

Sensus est, an agens agendo in passum, aliquid à passo patiatur, quatenus passum reagat in agens, verbi gratia, si agens calidum applicetur subiecto frigido, & agat in frigidum calefaciendo; iterum passum frigidum reagat in agens calidum frigefaciendo.

In qua actione, & reactione plura interueniunt; interuenit primo agens principale, illud nimirum, quod est maioris virtutis. Secundo interuenit passum principale, illud, scilicet, quod opponitur agenti principali. Tertiò agens minus principale, quod, nimirum, est minoris virtutis, cui opponitur passum minus principale. Et quia agens principale non semper agit in totum passum, sed in vnam eius partem sibi debitè approximata agit; in aliam, vtpotè à se longè remotam, non agit, ideò pars, in quam agit, dicitur repassa; illa, in quam non agit, dicitur pars non repassa.

Porrò ad hoc vt agens repatiatur à passo, tres omnino conditiones requiruntur.

Prima est, vt agens, & passum communicent in subiecto, seu in materia prima affecta contrarijs qualitatibus, aliàs non sequitur reactio, hinc Sol agit in terram, sed à terra non repatitur; Angelus mouet lapidem, sed à lapide non repatitur, idcoque bene monuit Philosophus I. de Gen. 1.51. *neesse est agens, passum genere quidem simile esse, & idem, specie autem dissimile.*

Secunda conditio est, vt reactio fiat à proportionem maioris inæqualitatis; quod tunc accidit, quando vis actiua maior est, quàm sit resistentia, si enim vis actiua esset maior, aut æqualis cum resistentia passi, non sequeretur actio; nam commune est dictum, *acti sequitur ex victoria agentis supra passum*, hinc si gutta aquæ decidat in fornacem ignis, non dabitur reactio, quia gutta aquæ ob sui exiguitatem, & actiuitatem minorem non potest reagere in ignem, sed ab illo statim absumitur.

Tertia conditio est, vt agens, & passum habeant debitam approximationem, quæ enim longè adiuicem distant, non possunt

sunt inuicem agere, & reagere; & quidem si passum secundum vnā sui partem sit approximatum agenti, secundum alteram non; potest pati, & reagere secundum partem approximata, & non secundum alteram.

Noto autem, quod sicuti in agente, ut agat, attenditur eius virtus actiua; ita in passio, ut patiat, plus, minusue, attenditur eius resistentia, quæ duplex est; formalis, & effectiua; formalis resistentia est ipsamet adhærescentia, seu tenacitas forinæ in subiecto, qua fit, ut quam difficillimè possit expelli; accipe exemplum in lumine, & calore; lumen paruan, vel nullam, habet resistentiam, statim enim, & facile à subiecto expellitur; non sic calor, qui firmitus inhæret subiecto, à quo propterea difficillimè expellitur. Resistentia effectiua est actio, qua impeditur, nè contraria qualitas in subiectum introducatur, ita calor præexistens in subiecto agit in agens frigidum, & impedit, nè subingrediat frigus.

Natura igitur, ut sequeretur actio, & reactio inter qualitates contrarias, res ita disposuit, ut non omnes essent æqualiter actiuæ, æqualiter resistentiæ; & quidem quod ad actiuitatem hic ordo seruatur; Primò calor est maximè actiuus, deinde frigus, tum humiditas, denique siccitas; quod ad resistentiam verò, siccitas est maximè resistentiua, deinde humiditas, tum frigus; denique calor.

Conclusio. Datur actio, & reactio, & omne agens agendo repetitur.

Hæc doctrina communis est in vtraque Schola Medicorum, scilicet, & Philosophorum.

Ita ex Antiquis *Simplicius*, *Themistius* 3. lib. *Phys.* 1. 8. & alij *Interpretes Arist.* *Galenus* lib. 3. de causis *Sim.* 1. tom. cap. 2. *D. Thom.* 1. de Gen. *Leet.* 10. Ex Recentioribus *Suarez* disp. 47. *Met. sect.* 2. *Amicus* 2. de Gen. disp. 2. qu. 3. dub. 1. num. 4. *Ruuius* 1. de Gen. cap. 9. quæst. 9. *Auerſa*, *Toletus*, & *Conimb.*

Contrà *Nominales* in 1. dist. 17. vbi omnem prorsus reactionem negant; citantur à *Ruuius* 1. de Gen. cap. 9. q. 9.

Contrà *Riccardum Suisseth*, qui ob ingenij excellentiam dictus est *Calculator*, tract. 7. de reactione. *Gulielm. Hensſberum* in ult. *Sophis.* *Niphām* 1. de Gen. com 192. d. 2. *Nobilium* 1. de Gen. cap. 7. q. 11. Hi negant reactionem secundum eandem qualitatem, volunt enim calorem agere in frigus, repati verò à frigore.

Pro-

Probatur conclusio . Primò auctoritate *Arist. I. de Gen. t. 53. & t. 87. 4. de Gen. Animalium cap. 3.* non longè à principio ubi habet : *Omne agens patitur à patiente, ut quod secatur, habetur ab eo, quod secatur, quod calefacit, refrigeratur, denique quodcunque mouet excepto primo, mutuo mouetur aliquo motu ; & interdum etiam ita fit, ut quod agit, magis patitur, quàm agat, & refrigeretur, quod calefacit, & caleseat, quod frige facit.*

Probatur secundò . Experientia, patet enim ad sensum, quòd si manus calida tangat frigidam, eam calefacit, & à frigore eius calor temperatur . Si pruna accensa niuem tangat, ipsam liquefacit, & pruna ex parte infrigidatur, ferrum candens immersus in aquam, infrigidatur, & aqua incalescit .

Probatur tertio . Ratione à priori, quia ; si applicentur duo agentia habentia qualitates contrarias, habent vim, & virtutem agendi, & nil est, quod eorum actiones inuicem impediat, ergo inuicem agunt, & reagent, causæ enim naturales debite applicatæ, & non impediatæ ad agendum non possunt non agere, ergo .

Probatur quartò à posteriori quia, nisi admittantur actio, & reactio elementorum adinuicem, non fieret mixtum ; mixtum enim fit, & resultat ex mutua actione, & reactione, ex pugna mutua elementorum adinuicem, ergo omninò debet admitti actio, & reactio .

Obijcies primò . Actio, & Reactio non sequitur, nisi adsit victoria agentis suprà passum, sed talis victoria non est in passu principali, ergo passum principale non potest reagere . Probatur minor quia passum principale est minus agente principali quòd ad virtutem actiuam, & quòd ad resistentiam, ergo non habet victoriam supra agens, frigus enim sicuti in actiuitate superatur à calore, ita etiam in resistentia, calor enim secundum totam actiuitatem, quam habet, resistit contrariæ qualitati, & frigori, ergo si actiuitate superat frigus, superat etiam quòd ad resistentiam, quæ ab actiuitate oritur, & cum actiuitate commensuratur .

Respondeo . Frigus supra calorem habere victoriam quòd ad resistentiam formalem, licet enim ignis effectiuè magis resistat, quàm frigus, quia magis est actiuus, non tamen resistit magis formaliter, quia firmius, & tenaciùs subiecto adhæret frigus, quàm calor .

Ex quo soluitur alia obiectio, qua dicitur : si daretur reactio, idem vinceret, & vinceretur; vinceret enim, quatenus reageret, vinceretur quatenus pateretur ab agente principali, ergo idem vinceret, & vinceretur. Soluitur, inquam, hoc argumentum; quia idem vinceret secundum resistantiam, & vinceretur secundum actiuitatem.

Dices; actio, sicuti & reactio sequitur ex victoria agentis supra passum quoddam actiuitatem, at passum frigidum nunquam in actiuitate vincit calidum, ergo non potest in calidum vnquam reagere; esto frigus calorem illud superet, & vincat quoddam resistantiam.

Respondeo, quod resistantia maior, quæ est in frigore supra calorem, retundit, & minuit actiuitatem caloris non quidem in actu primo, sed in actu secundo, & inde fit, vt posita maiori resistantia possit frigus reagere in calorem, cuius virtus supponitur imminuta per resistantiam frigoris.

Obijcies secundo: si daretur actio, & reactio, idem moueretur motibus contrarijs, & idem simul calefieret, & frigeret, at hoc est absurdum, ergo. Sequela probatur quia: si agens calidum ageret in subiectum frigidum distans ab agente calido per vnum palmum loci, aer intermedius ab agente calido reciperet calorem transmittendum in subiectum frigidum, & simul reciperet frigus transmittendum in agens calidum; neque enim, agens calidum potest agere in subiectum frigidum, non transmittendo calorem per aerem intermedium, aliàs daretur actio in distans.

Respondeo, non esse absurdum; idem moueri motibus contrarijs, quando contrarietas non sit in summo, sed in remisso gradu, sicuti non est absurdum, qualitates contrarias esse simul in gradu remisso, vt patet in aqua tepida, quæ simul est calida, & frigida.

Obijcies tertio: si daretur reactio, eadem qualitas simul intenderetur, & remitteretur, quod est omnino impossibile, ergo.

Probatut sequela: quia sit agens calidum quadripalmare, agat in passum frigidum, certè non repatitur secundum omnes quatuor palmos, sed secundum quartum tantum, qui propterea solus est pars repassa; quo dato, calor in tali parte remittitur, & minuitur per reactionem passi frigidi, & intenditur per actionem agentis calidi, quod non ageret in passum frigidum, nisi trans-

transmittendū calorem per quartum sui palmum, quæ est pars repassa; in qua iam intenderetur calor, ergo iam in tali parte simul intenderetur, & remitteretur calor.

Respondeo in tali casu: Agens calidum non transmittere calorem per partem repassam, seu per quartum sui palmum, quia occupatum cum hoste externo, & in expulsionē frigoris, non curat dispendium, & diminutionem caloris in parte repassa, quia non potest simul ad duo attendere; nec inde sequitur, dari actionem in distans, quia licet agens non transmitteret calorem per partem repassam, & quartum sui palmum, adhuc tamen non esset distans à passio, quia esset illi approximatum per aliquam sui partem, nempe per partem illam repassam: Addo, non esse absurdum agens agere in subiectum distans, si tamen sit intra sphaeram actiuitatis.

L E C T I O V I I I.

An Qualitates contraria possint esse simul.

Communis Sententia docet duo, Primum est naturaliter, & de facto qualitates contrarias non posse esse simul in gradu intenso, sed posse esse simul, & in eodem subiecto in grada remisso. Secundum quod docet communis sententia, est. Supernaturaliter, & de absoluta Dei potentia posse esse simul duas contrarias qualitates etiam in summo gradu, calorem, ut octo, & frigus, ut octo.

Hac communi doctrina posita, Moueo duas difficultates; prima est, vnde oriatur contrarietas harum qualitarum, an ex entitate, & natura earum, an vero ex limitata subiecti, in quo esse supponuntur capacitate. Secunda est, qui addat Deus, aut quid auferat ab his qualitatibus contrariis, quando eas simul ponit in subiecto, in quo simul esse nequeunt naturaliter; & sanè, (ut mox patebit), solutio huius secundæ difficultatis dependet ex solutione primæ.

Arriaga igitur disp. 5. met. sect. 2. sub sect. 1. Aversa tom. 2. quest. 39. sect. 3. Ponunt contrarietatem qualitarum, & consequenter earum naturalem impossibilitatem oriri non ex earundem entitate, aut natura, sed ex subiecti limitata capacitate, quæ octo tantum gradus qualitatis potest in se admittere, non plures.

Sed contra est quia, Subiectū potest in se admittere octo gradus caloris, & simul octo gradus lucis, & octo gradus albedinis, ergo subiecti limitata capacitas non obstat, quo minus in se admittat simul octo gradus caloris, & octo gradus frigoris.

Respondebis. Subiecti capacitatem esse limitatam relatiuè ad qualitates contrarias, non relatiuè ad qualitates non contrarias. & disparatas, vti sunt calor, & lux, siccitas, albedo, & aliæ huiusmodi.

Sed contra est quia. iam non limitata capacitas subiecti, sed contrarietas qualitatum, obstat, quo minus in eodem subiecto sint calor, & frigus, vt octo, nam in illo subiecto benè possunt esse calor, siccitas, lux, albedo, & omnes vt octo, omnes in gradu intenso, quia in ijs non adest vlla contrarietas.

Respondebis adhuc, illam impossibilitatem oriri simul ex contrarietate Qualitatum, & ex limitata subiecti capacitate.

Optime, sed iam præcisa limitata capacitate subiecti aliqua est contrarietas in ipsis qualitativibus.

Respondebis cum *Barth. Amico 2. de Gen. tract. 5. q. 4. dub. II. num. 4.* vbi varijs adductis, & refutatis responsionibus docet. In qualitativibus ipsis esse repugnantiam, & contrarietatem in actu primo, & radicaliter, non in actu secundo, & formaliter, quæ est ab intensione graduali octo graduum.

Sed contrà quia; gradus isti sunt homogenei inter se, & cum qualitatis entitate; ergo si hi gradus habent repugnantiam formalem, & in actu secundo; eadem repugnantia, & contrarietas debet poni in entitate Qualitatis, in qua proinde non sufficit ponere solam repugnantiam, & contrarietatem radicalem, & in actu primo.

Replicabis cum eodem *Amico num. 5.* in graduali latitudine esse repugnantiam, quia formæ elementorum, & mixtorum, ad quas ordinantur contrariæ qualitates à natura, non exigunt illas in summo gradu, nam formæ elementorū, vnam qualitatem exigunt in summo gradu, alteram in remisso; formæ vero mixtorum exigunt habere qualitates retracts, & remissas.

Sed contra est quia; iam ergo radicalis repugnantia, & contrarietas in actu primo harum qualitativum non est ab entitate qualitativum, sed ab entitate formarum substantialium elementorum, & mixtorum contra id, quod *Amicus* docuerat *num. 4.*

Imò tota contrarietas Qualitatum refundenda esset in subiecti incapacitatem, vt ponunt *Arriaga*, & *Auerſa* vbi supra.

His difficultatibus preſſi, & conuicti *Paludanus in 3. d. 35. quaſt. 2. Scotus in 4. d. 10. quaſt. 1. art. 5. Aſtudiſſo 2 de Gen. qu. 25.* poſuerunt. Qualitates non eſſe contrarias, neque in gradibus intenſis. vt octo.

Sed contrà eſt quia: Communis Sententia eſt in oppoſitum.

Deindè, quando qualitates contrariæ ſunt in gradu remiſſo, pugnant adinuicem, & actu exercent natiuam contrarietatem, nituntur ſeſe ab eodem ſubiecto expellere, & deſtruere, ergo à fortiori ſi eſſent in gradu ſummo, & intenſo ſe ſe ab eodem ſubiecto expellerent, & deſtruerent, eſſent ergo contrariæ; nam contraria ſunt, quæ ſe ab eodem ſubiecto extrudunt ex *Ariſtot.* vbi ſupra, & ex communi omnium conceptu, & ſenſu.

Preſſi, & conuicti iſſdem difficultatibus *Arim. in 1. diſt. 17. quaſt. 3. art. 2. Soncin. 5. met. qu. 2. Durand. in Prol. qu. 2. diſt. 30. qu. 1. art. 5. Adam. in Prol. cap. 2.* poſuerunt, qualitates eſſe oppoſitas, & contrarias ex propria earum ratione formali, neque vnquam poſſe eſſe ſimul ſiue in gradu intenſo, ſiue in gradu remiſſo, & ſi quando in vno ſubiecto duæ qualitates contrariæ reperiuntur, oritur ex illis tertia qualitas ab illis diuerſa; ſicuti enim ex albo, & nigro oritur rubor, ità ex qualitatibus contrarijs oritur tertia qualitas diuerſa ab ijs, & de facto tepiditas in aqua eſt qualitas quædam tertia, orta ex calore, & frigore.

Sed contrà eſt quia: licèt id, quod primò ponunt hi *Auſtores* omninò approbem, & deſendam, nempe qualitates eſſe contrarias ex propria earum formalitate; non poſſum approbate ſecundum, quod addunt, nempe oriri tertiam qualitatem ex duabus contrarijs; quia poteſt optimè res componi abque poſitione tertiæ huius qualitatis, vt mox oſtendam, ergo cum entitates multiplicari non debeant abſque vrgenti neceſſitate, non eſt ponenda tertia iſta qualitas.

His etiam motus *Ioannes Baſſollius lib. 1. contra Ariſt. & lib. de actione met. 2.* negauit, qualitates eſſe inuicem contrarias, quia aliàs malè Natura res naturales compoſuiſſet ex qualitatibus contrarijs, & inter ſe inimicitias gerentibus, ſicuti malè eſſet compoſita Reſpublica ex partibus hoſtilibus inter ſe,

est substantialiter aqua, & ideo non potest permanere simul cum calore.

Dico igitur. Qualitates esse contrarias, contrarietate orta ex propria earum entitate, & natura.

Probatur quia. Contraria in omnium opinione, & sensu, illa sunt, quæ posita in eodem subiecto per mutuam actionem, & reactionem se excludunt ab illo, nec unquam est inter illa, quæ contraria sunt, pax vlla, aut quies, sed semper rixa, & pugna continuata, & nunquam intermissa, sed qualitates, quæ communiter dicuntur contrariæ, etiam si sint in gradu valdè remisso, calor, ut vnum, frigus, ut vnum, si in eodem subiecto ponantur, semper inuicem pugnant, agunt, & reagent, ut se excludant ab illo subiecto, & se destruant, ergo contrarietas omnis earum oritur ex propria earum natura, entitate, & naturali conditione.

Confirmatur quia: in communi sententia, ex mutua elementorum pugna oritur mixtum, sed non utraque qualitas elementaris est in summo, sed vna in summo gradu, altera in remisso, ergo pugnant, & contrariæ sunt qualitates etiam quando sunt in gradu remisso.

Confirmatur secundò, sensata, & satis nota experientia; patet enim, manum etiam frigidam, ut vnum, calefieri ab igne, expellitur ergo frigus ut vnum à calore, ut octo, imò & à calore ut vnum, nam aer calidus ut vnum adhuc calefaceret manum frigidam, ut vnum; oritur ergo caloris, & frigoris contrarietas ex propria ipsorum natura, & entitate, nam ut benè notat *Philosophus I. de Gen. 1. 54. non se extrudunt, quæ non contraria, neque ex contrarijs sunt.*

Hinc oritur resolutio secundæ difficultatis; quid, scilicet, addat Deus, aut quid auferat ab his formis, & qualitibus, quando eas ponit simul in eodem subiecto.

Nam in primis in sententia Bassò. Hæc difficultas locum non habet, quia negata qualitatum contrarietate, non est ad miracula recurrendum pro earum existentia in eodem subiecto.

Qui impossibilitatem harum qualitatum refundit in limitatam capacitatem subiecti, consequenter dicunt, Deum ponere, duas qualitates contrarias in eodem subiecto, extendendo, & ampliando capacitatem eiusdem subiecti, sicuti supra dixi, Deum ponere duas formas substantiales totales extendendo, & am-

pliando capacitatem materiæ, & subiecti.

Ego, qui impossibilitatem formarum, seu qualitatum re-fundo in propriam, & naturalem earum contrarietatem, & op-positionem.

Dico. Deum impedire earundem qualitatum mutuam actionem, & reactionem, qua impedita consistunt illæ duæ qualitates adinuicem, & non se destruunt.

Quod facile præstat Deus suspendendo suum concursum generalem, quo cum omni causa naturali concurrat ad productionem cuiuslibet effectus, & ad quancunque naturalem, & creatam actionem.

Dices. Si qualitates essent contrariæ, contrarietate orta ex propria ipsarum entitate, & natura, non possent esse simul naturaliter in gradu remisso, at hoc est contra experientiam, ergo.

Respondeo. Qualitates contrarias in gradu remisso esse simul in eodem subiecto, sed semper cum rixa, & pugna, non pacifice, & quierè, agunt enim, & reagunt adinuicem, & nituntur quantum possunt se excludere ab eodem subiecto, quinimò & se destruere, & verè utriusque destructio sequeretur, nisi omnium parens Naturas res ita providè disposuisset, ut nequeat vna qualitas superari, & vinci ab altera.

Dices secundò. Frigus habet naturaliter excludere calorem, sed naturalis illa exclusio supernaturaliter non potest impediri, ergo. Minor probatur, quia: lux habet naturaliter excludere tenebras, quæ naturalis exclusio à Deo supernaturaliter, nec impediri, nec suspendi potest, ergo.

Respondeo: exclusionem tenebrarum esse non solum naturalem, sed etiam essentialem effectum lucis, ideo non posse poni lucem, & non poni exclusionem illam, & negationem, tenebrarum; at exclusio caloris, non est essentialis frigori, ideo potest poni frigus in subiecto non posito calore; quòd verò exclusio tenebrarum sit essentialis luci, non sic exclusio caloris respectu frigoris ex eo convincitur, quia non potest intelligi lux absque exclusionem tenebrarum, exercere suum effectum formalem primarium, neque enim lux potest illuminare, nisi intelligantur exclusæ omnino, & remotæ tenebræ; at bene potest frigus exercere suum effectum primarium, & infrigidare subiectum, etiam si in eo sit aliquis gradus caloris; manus enim frigida semper retinet aliquid caloris naturalis, sicuti & aqua, quando fit calida, retinet aliquid frigoris naturalis.

DISPVATIO XIII.

DE ANIMA IN COMMVNI.

Disputatio hæc aliarum Disputationum est Anima, quia ratione obiecti, quod speculatur, & tractat, omnium est præstantissima. Plato Alcib. I. Delphicam illam inscriptionem, Nosce te ipsum. Anima cognitione, & notitia compleri, declarat exemplo oculi, sicut enim oculus, cum se ipsum visurus est, in oculum respicere debet, atque in eum oculi locum, in quo virtus est oculi, is autem visus, atque pupillæ acies est, eodem pacto, & Anima, ò Amice Alcibiades, si se ipsam noscere vult, in Animam intueatur, in eumque præcipuè locum animæ, in quo inest virtus Animæ, Sapientia. *Definitur Anima ab Aristot. lib. 2. de Anima tex. 6. quoddam sit actus corporis physici organici potentia vitam habentis; id est, forma substantialis dans formaliter vitam corpori physico, seu naturali, quo utitur tanquam instrumento, & organo ad exercendas functiones, seu operationes vite, ad quam habendam Corpus ipsum naturalem vim habet, & potentiam. Hinc pro eodem sumitur anima, & vita. Clarius tex. 13. tex. 24. definitur, Principium, quo vivimus, sentimus, mouemur & intelligimus; quibus verbis tres Animarum species, complectitur; nimirum, Vegetatiuam, quæ primò vivimus, Sensitiuam, quæ sentimus, & mouemur; intellectiuam denique, quæ cognoscimus, & intelligimus.*

Productio Anima definitur, origo viuientis à viuente à principio coniuncto in similitudinem naturæ, quia nimirum anima non producit, nisi ab agente viuente, & animato; quod bene dicitur principium coniunctum, quia viuens aliquam sui partem sibi arte coniunctam, imò & identificatam, debet abscindere, ut eam tribuat Viuenti, quod generat, & producit, & quidem in similitudinem naturæ, quia viuens non producit simile alteri viuenti in qualitate, nec in forma substantiali quacunque, sed in forma substantiali, quæ sit vita, vita autem antonemaslicè dicitur Natura, quæ

nimirum perfectius, quàm reliquæ formæ substantiales, participat Definitionem naturæ. ipsa anima magis propriè est principium motus in se, ideoque benè aduertit Philosophus I. de Anima tex. 19: Animatum ab inanimato duobus maximè differre videtur, motu, & sensu.

LECTIO I.

Quid sit Vita, & sic, & in Communi.

Non est Quæstio de vita, seù de ipso viuere substantiali, id enim per animam, quam diximus iam esse actum, seù formam substantialem, quæ dat formaliter viuens, seù ipsum viuere corpori, quod informat, & quo vititur, tanquam instrumento, & organo ad exercendas operationes vitales, non minus, ac artes vituntur suis instrumentis, exemplum est *Arist.* I. de Anima tex.

Est ergo quæstio de Vita, seù ipso viuere accidentali, seù ipsa operatione vitali in communi; Et quæstionis sensus est, quid, & quæ sit vitalis operatio; & per quid operatio vitalis differat ab operatione non vitali.

Et sanè communis conceptus, quem omnes habent de vitali operatione, est, quòd ea viuant, & vitaliter operentur, quæ seipsis, & non ab alio mouentur; hinc Argentum viuum vulgò dicimus, quod seipso, & non ab extrinseco mouetur; & animalia tandiù dicimus viuere, quandiù se mouent, cum verò non à se, sed ab alio mouentur, mortua dicimus: & quia seipso moueri, est elicere, et recipere motum in se, atque adeò immanenter operari, ideo communiter operationem immanentem, vitalem quoque appellamus.

Primò tamen contrà hunc communem conceptum est quia: Elementa seipsis mouentur, et non ab extrinseco, et tamen non dicuntur viuere, nec esse animata; imò vulgò dicimus, aquam vitam, et aquas viuas, quas tamen constat verè non esse animatas, et viuentes.

Secundò contrà est quia. Ex dictis *disp. 5 phys. lect. 5.* Verum est in sensu explicato Aristotelicum axioma illud; *omne quod mouetur, ab alio mouetur*, ergo iam nullum datur ens, seù corpus naturale, quod seipso moueatur, et non ab alio quod seip-

seipsum moueat , & immanenter operetur .

Tertiò contra est, quia Ostreae, Conchilia, & alia huius generis zoophita marina inter viuentia numerantur, & tamen non videntur se se mouere, non ergo ratio vitæ consistit in motu immanenter elicitò .

Quartò contra est quia . Omne corpus naturale constat ex duabus naturis, materia , & forma substantiali , & vtraque est principium motus intrinsecum, illa quidem passiuum, hæc actiuum, ergo habere intrinsecum principium motus, non est proprium viuentium, & animatorum ; vel si motus, inditium est vitæ , iam omnia creata viuerent, nam vt habet Arist. 8. *Phys. lect. 1. motus est , vt vita quedam natura existentibus omnibus .*

Quintò contra est quia, in Deo est vita , & quidem perfectissima, & tamen non se se mouet, nec localiter, nec alio motu; ergo viuere non est, se se moueri localiter, aut alio motu .

Sextò contrà est quia, partes animalium, abscissæ non viuunt, quia carent anima, & vita, & tamen se se mouent, ergo se se mouere, non est viuere .

Septimò contra est quia, omnis essentia immanenter operatur, quia ab essentia quacunque emanant proprietates, & passionibus, & tamen non omnis essentia est vita, ergo viuere , non est immanenter operari .

His difficultatibus moti , *Arriaga disp. 2. de anima per varias sect. Franciscus Le Reès disp. 1. de anima art. vlt. Stephanus Spinula disp. 1. de anima art. 1. & sequentibus .* Ponunt eas esse actiones vitales, per quas acquiritur aliquid indebitum viuenti, quæ doctrina satis clara est apud *D. Thomam 1. par. q. 18. art. 1. in responsione ad secundum* verba sunt . *Corporibus grauib, & leuib competit moueri secundum quod sunt extrâ dispositionē suæ naturæ, utpotè cū sunt extrâ propriū locum, enim quandò sunt in loco proprio, & naturali quiescunt ; sed plantæ , & alia res mouentur motu vitali secundum hoc, quod sunt in sua dispositione naturali .*

Quare, vt videtis, explicant hi authores vitalitatem actuum penès terminū, & quidem si terminus qui acquiritur vi actionis immanētis est debitus viuenti, tūc illa actio immanens est vitalis, at si talis terminus non sit debitus, tūc illa actio non est vitalis.

Sed contrà hunc modum explicandi vitalitatem actus, est quia . Nutritio, augmentatio , & generatio sunt veri actus vitales

tales in omnium sententia, quia sunt proprii, & naturales actus animæ vegetatiuæ, sed per tales actus non acquiritur aliquid, quod sit indebitum viuenti, imò potius aliquid acquiritur omnino, & ita connaturaliter debitum viuenti, vt sine eo diceretur esse in statu violento, ergo. Probatur minor, quia per nutritionem acquiritur noua pars materiæ, & substantiæ, quæ est omnino debita viuenti, aliàs enim viuens esset in statu violento, & in præuia dispositione ad corruptionem; per augmentationem, acquiritur noua pars quantitatis, sine qua viuens non haberet determinatum terminum suæ magnitudinis; denique per generationem habetur conseruatio speciei, quæ naturaliter appetitur, & exigitur à quolibet viutente, ergo.

Respondebis. Per actus vitales acquiri aliquid indebitum viuenti, seu non debitum in ipso primo instanti generationis, idè enim actus assignati nutritionis, augmentationis, & generationis sunt vitales, quia per eos acquiritur viuenti aliquid, quod licet sit simpliciter debitum, non tamen est debitum in primo instanti generationis viuents, neque enim viuens in primo instanti generationis suæ debet nutriri, augmentari, aut generari aliquid sibi simile in specie.

Sed contra primò est quia: non video, quid conferat ad vitalitatem actus aliquid esse indebitum in primo instanti; vel in alijs instantibus, dummodo enim aliquid sit indebitum viuenti, parum refert, aut saltem ad vitalitatem nequicquam conducit, quòd sit indebitum in primo instanti.

Contra secundò quia: Deus, & Angeli verè viuunt, & quidem vita perfectissima; & tamen illis debita est cognitio in primo instanti, seu statim, ac sunt, ita vt si non cognoscerent, essent in statu violento; & quidem quòd Deus esset in statu violento, si statim, ac est. non cognosceret, certum est, quia eius vita est formalissimè cognitio, & intellectio; de Angelo verò, esto de facto illi non sit debita cognitio in primo instanti creationis suæ, si tamen illi esset debita, non desineret esse viuens, imò perfectius viueret, sicuti perfectissimè viuunt Deus, cui est debita cognitio statim, ac est.

Replicabis; Deum, & Angelos non viuere vita physica, sed vita intentionali, idest, vita, quæ habetur per cognitionem, seu quæ consistit in cognitione.

Benè, sed vita intentionalis habetur formaliter, non obstante eo, quòd cognitio sit debita in primo instanti viuenti intellectu-
ctuali,

Equali, ergo saluatur vita physica formaliter, etiam si viuenti physico sit debitus terminus acquisitus per motum vitalem, & physicum, videtur enim esse æquitas rationis in vtraque vita.

Alij ergo, vitalem actus conati sunt explicare non ex parte termini acquisiti per actum, sed ex parte principij, à quo elicitur talis actus.

Primò ergo nonnulli cit. suppresso nomine ab *Arriaga ubi supra*; explicant vitalitatem actus ex parte principij, quatenus volunt nutritionem, verbi gratia, esse actum vitalem, quia potentia nutritiua, quæ nutritiua, positis omnibus requisitis ad immanenter operandum, non potest non operari.

Sed contra est quia; omnis forma, quamuis non sit vitalis vlllo modo, positis omnibus requisitis ad operandum non potest non operari, ergo vitalitas actus non benè explicatur ex parte principij eo modo.

Secundò alij, vt *Ouiedus hic Contr. 2. p. 9. ult. num. 27.* explicant vitalitatem actus ex parte principij sic; illa operatio est vitalis, quæ est immanens ex suo conceptu essentiali, & præter sui principium passiuum, & actiuum supponit aliquid aliud in eo, respectu cuius immanens dicitur.

Sed contra est quia: nulla est actio, quæ præter sui principia actiua, & passiuia non supponat aliquid aliud, omnis enim actio siuè immanens sit, siuè transiens, siuè vitalis sit, siuè non vitalis, supponit conditiones requisitas ad agendum præter virtutem actiuam, & passiuam agentis, ergo non benè explicatur vitalitas actionis vitalis eo modo, quo asserit *Ouiedus*.

Quare puto, sufficere ad actionem vitalem formaliter, eam esse essentialiter immanentem, itaut neque de absoluta Dei potentia possit fieri actio, seu actus vitalis, qui non maneat in eo principio, à quo fit.

Et quidem actionem vitalem esse essentialiter immanentem, asseritur ab *Ouiedo ubi supra*; non posse, neque de absoluta Dei potentia actum vitalem non manere in eo principio, à quo fit; clarè defenditur ab *Auersa tom. 1. Phys. disp. 48. sect. 1. d. Ruais lib. 3. de anima cap. 4. & 5.* vbi citatur *D. Thomas 1. p. q. 34. art. vbi* habet S. Doctor. *Ipsæ autem conceptus cordis de ratione sua habet, quod ab alio procedat, scilicet à notitia concipientis, & clariùs 2. 2. quest. 25. art. 1.* vbi docet actum Caritatis non posse fieri à solo Spiritu Sancto mouente voluntatem, itaut voluntas passiue se habeat.

Conclusio, actus vitalis in esse vitali, ut sic, & in communi habetur formaliter ex eo, quod sit actus essentialiter immanens modo explicato.

Probatur quia, sic explicata vitalitate actus cōtradistinguitur formaliter, & adæquatè actus vitalis à non vitali, ergo & eodè modo formaliter cōstituitur, cum idem formaliter sit principium distinctivum, & constitutivum; Antecedens probatur quia, nullus est assignabilis actus, qui sit vitalis, & non sit immanens, aut immanens & non sit vitalis, ergo ex eo, quod actus sit essentialiter immanens, constituitur formaliter in esse vitali, & cōtradistinguitur formaliter ab omni alio actu non vitali.

Quod autem nullus sit actus vitalis, qui non sit immanens, aut immanens, qui non sit vitalis; patet ex solutione eorum, quæ in contrarium adducta sunt initio præsentis Lectionis, nam quod dicebatur

Elementa seipsis moveri, atque adeò immanenter operari; imo & omnem formam, & naturam, esse intrinsicum, & immanens principium motus, & denique omnem essentiam esse principium immanens operationum, & proprietatum à se emanantium, facilè soluitur; dicendo, tales actus esse quidem immanentes, sed non essentialiter; hinc elementa possunt etiam ab intrinseco moveri, etiam quando sunt in suo loco naturali, sicuti de facto ab extrinseco moventur, & quando sunt in loco naturali, & quando sunt extra illum; aqua dicitur vitæ, & aquæ dicuntur viuæ per quandam similitudinem, & proportionem, quam habent, cum vera vita; quæ similitudo, & proportio consistit, vel in efficacia quadam, quæ est in aqua vitæ, vel in motu, ideoque quando aqua non movetur, sed stagnat in lacub. mortua dicitur.

Similiter & motum ita fieri immanenter à natura, ut possit etiam fieri ab extrinseco; denique proprietates ab essentia de facto Thomiste volunt, à generante fieri, non emanare immanenter ab essentia.

Ad aliud, quod dicebatur, partes abscissas à vivente, non vivere, quamvis se se moveant, planum est, eas non à se immanenter operari, & moveri, sed à spiritibus vitalibus in ijs ad modicum tempus relictis; Ostrea, Conchilia, Zoophita marina, quia non ita sensibilibus moventur, dicuntur animalia anticipis naturæ, vnde & dicuntur Plantanimalia.

Et denique ita verum est, omne quod movetur, ab alio moveri,

ueri, vt id non officiat principio vitali, dum enim nego, viuens ab alio moueri, non loquor de primo motore, cui sicuti viuens est subordinatum essentialiter, ita dependenter ab eo mouetur, & operatur, etiam si immanenter operetur.

Quòd denique actus vitalis sit essentialiter immanens, & non possit fieri nec de absoluta Dei potentia absque principio vitali

Probatur primò quia. Si actus vitalis, putà intellectio, aut amor fieret à solo Deo, & poneretur in lapide, iam lapis intelligeret, aut amaret, at hoc implicare, concedunt communiter omnes, ergo; & ex alia parte, non potest dici, quòd intellectio sit in lapide absque eo, quòd lapis intelligat, & mortuo modo, quia non potest esse, aut intelligi causa formalis sine suo effectu formali, à quo illa non distinguitur, ergo.

Dices. Potentia vitalis ad actum vitalem concurrit effectiuè, sed quidquid facit causa effectiua creata potest à solo Deo fieri, ergo actus vitalis potest à solo Deo fieri potentia vitali non concurrente.

Respondeo: benè posse Deum efficere, quidquid facit causa efficiens creata, dummodo non sit essentialis dependentia effectus à tali causa, at est essentialis dependentia actus vitalis à potentia vitali, vt patet ex ratione mox adducta, ideo actus vitalis non potest à solo Deo produci, & in quocunque subiecto etiam non vitali poni, & conseruari.

Præterea, actus visionis etiam effectiuè est à potentia visiva, & tamen de absoluta Dei potentia non potest produci visio, & poni in potentia auditiva, ita vt aures dicantur videre, sicuti nec auditio poni in oculo, & oculus dici, & denominari videns, id enim esset confundere essentias rerum, immutare, atque inuertere, non minus, ac si Deus hominem faceret irrationalem, & brutum rationale, & discursuum, quæ omnia implicare, negabit profecto Philosophorum nullus.



LECTIO II.

An Anima sensitiva indiuisibilis sit.

Sensus est, an de ratione animæ sensitivæ, vt sic, & in comuni sit indiuisibilitas in partes integrantes, ita vt licet anima sensitiva sit in corpore quanto, & extenso, ipsa tamen anima inextensa, & indiuisa remaneat, & à corpore extenso non inficiatur, vt Sol in luto non inficitur.

Dixi, an de ratione animæ sensitivæ, vt ad solam hanc animam difficultatem restringerem, cum aliàs certum sit apud Modernos Philosophos, & animam vegetatiuam plantarum diuisibilem esse, & animam rationalem hominum esse prorsus indiuisibilem, contrà quod sentiebant antiqui, ponentes, omnes animas diuisibiles, vt *Gerardus quidam* apud Argentinam in *1. d. 8. q. 2. art. 1.* aut indiuisibiles, vt *Plato* quem referunt *Auerſa hic*, *Ioan. de S. Thoma dic q. 2. art. 1.*

Quare non possum probare alium titulum, quo proponi solet ista difficultas, videlicet; An anima secundum se sit indiuisibilis, quia sub ista generalitate, & vniuersitate, videtur indubium reuocari diuisibilitas animæ vegetatiuæ plantarum, & indiuisibilitas animæ rationalis hominum, quam tamen indiuisibilem esse, sicuti & animam plantarum esse diuisibilem supponunt tanquam certum communiter omnes.

Restricta igitur difficultate ad solam animam sensitivam due sunt Recentiorum sententiæ.

Prima, defendit, animam sensitivam perfectorum animalium indiuisibilem esse; animalium verò imperfectorum esse diuisibilem.

Ità *Thomista Bannes 1. par q. 76. art. 8. ad 2. Complut. hic disp. 5.* vbi alios referunt *Ioannes de S. Thoma q. 1. art. 1.* ex Recentioribus *Suarez disp. 15. Met. sect. 1. num. 32. Ruuius 2. de Anima c. 3. q. 2. Conimb. & alij.*

Altera sententia ponit, animam sensitivam secundum se omnino diuisibilem, & extensam in partes integrantes, sicuti corpus, in quo est, extensum est, & diuisibile in partes integrantes.

Ita ex antiquis *Auer. 8. Phys. Com 78. & de substantia Orbis cap. 1. Soncin. 8. met. q. 11. Iauell. quest. Scotus in 4. dist.*

44. q. 11. *Durandus*, & *Aegydius ibidem* ; ex Recentioribus *Toletus 2. de anima quest. 5. Hurt. disp. 2. sect. 4. Auerſa , q. 46. sect. 3.*

Conclusio . Anima sensitua secundum se diuisibilis est , & extensa in partes integrantes .

Probatur primò ex *Arist. 1. de anima 93. & 94. & 2. de anima t. 21.* vbi solam animam rationalem probat, impartibilem esse . *De iuuentute, & senect. cap. 1. necesse est eandem esse, & vnā particulam , secundum quam viuit , & secundum quam appellamus ipsum animal .*

Probatur secundò quia, si anima sensitua secundum se non est diuisibilis , maximè quia animæ perfectorum animalium , puta Leonis, aut equi, verbi gratia , est indiuisibilis , vt patet, quia abscissa aliqua parte à reliquo corpore , hæc statim perit , & non viuit , non secus , ac abscissum membrum ab humano corpore , non viuit . contrà quod accidit in animalibus imperfectis, vt sunt lucertæ, & serpentes , hæc enim secta, & diuisa viuunt ; sed hoc non probat, animas perfectorum animalium esse indiuisibiles , ergo . Minor probatur, quia etiam lucertæ, & serpentes , si per spinam dorsi diuidantur, non viuunt , in ijs enim spina dorsi se habet, vt cor in animalibus perfectis.

Quando autem per alias partes contingit sectio , & diuisio, in tantum admittuntur lucertæ , et serpentes viuere , in quantum videntur moueri , sed etiam partes abscissæ animalium perfectorum videntur moueri, et in specie refert *Alb. in Summa de Homine qu. 2. art. 3.* detruncatum caput hominis , fuisse ad breue tempus morum , et tamen *Thomistæ* negant, animas perfectorum animalium, et præcipuè hominis, diuisibiles esse ; et hæc animalia perfecta secta viuere ; ergo quòd animalia imperfecta secta viuant , aut quòd secta non viuant , non est sufficiens inditium ad ponendam, aut negandam diuisibilitatem animæ sensitivæ .

Probatur tertio : quia excepta anima rationali, quæ ponitur spiritalis, ceteræ omnes formæ, siuè animatæ, siuè inanimatæ, corporeæ sunt, et materiales, sed eorum materialitas, et corporeitas, non aliter explicatur, quàm per extensionem partium integralium, & per earum diuisibilitatem , quia, licet de absoluta potentia plures Philosophi satis probabiliter defendant, posse formam esse spiritualement, quamuis careat indiuisibilitate, et posse esse formam materialem, quamvis careat diuisibilitate, et

extensione partium; de facto tamen nulla est forma materialis, quæ non sit diuisibilis; nec vlla est forma spiritualis, quæ non sit indiuisibilis, ergo cum anima sensitiua in quocunque animali siue perfecto, siue imperfecto materialis sit corporea, diuisibilis quoque est, et habens partes integrales.

Obijcies primò. ex *Aristot. 3. de Anima 1.94.* Anima dicitur indiuisibilis in utraque partium omnes inexistunt partes animæ, & eiusdem speciei sunt adinuicem, & toti & adinuicem quidem, tanquam quæ non separabiles sunt, toti autem animæ tanquam indiuisibili existeret.

Respondeo in primis, ex textu Græco, & vt legit *Ioannes Argyropolus*, non haberi, *indiuisibilis*, sed potius, *diuisibilis*. Sed præterea, data ea lectione, vt cit. cui vel cæco non patet, *Aristotelem* ibi loqui de Anima rationali? qui hanc auctoritatem opponunt, textum *Aristot.* non viderunt: igitur *Arist. tex. 90.* refert opinionem eorum, qui animam partibilem esse asserabant, & alia quidem intelligere, aut alia concupiscere; quam opinionem reiicit ibi *Philosophus*, quid igitur continent animam, si partibilis natura? Et denique concludit *tex. 94.* citato ab *Aduers.* eam esse indiuisibilem & ideò hunc locum *Arist.* adduxi supra ad probandam conclusionem, quia clarus est, & apertus locus pro solius animæ rationalis indiuisibilitate, cæteris animabus exclusis à priuilegio, & dote indiuisibilitatis.

Obijcies secundò: *D. Augustinus de Immortal. Animæ cap. ult.* ait si vermis pungatur in aliqua certa parte, totus comouetur, & per totum corpus se contorquet, ergo per totum corpus dolorem sentit, non secus, ac homo in capite percussus, languorem, & dolorem in cæteris quoque membris experitur, & sentit, sed in homine id accidit ex indiuisibilitate animæ rationalis, ergo etiam anima sensitiua vermium, & à fortiori animalium perfectorum, indiuisibilis est.

Respondeo cum eodem *D. Augustino lib. de Quantitate animæ cap. 41.* haberi, non esse de ratione animæ in communi indiuisibilitatem, ad exemplum adductum; dico, cum motum in vermibus, aut etiam serpentibus, oriri ex intima connexionne, & subordinatione partium, quarum vna percussa, etiam reliquæ dolorem sentiunt.

Obijcies tertio. negata indiuisibilitate animæ sensitiuæ in animalibus perfectis, non posset reddi ratio, cur eorum partes, & membra abscissa non vuerent, ergo asserenda est earum animarum indiuisibilitas.

Respōdet *Zabar. lib. de Partitione animæ c. 4.* partes à reliquo corpore diuifas, animalis perfecti non viuere, quia feperantur à corde, in quo principaliter confiftit vita eorū animalium.


Refpondeo fecundò. Animalia perfecta plura organa, & inftrumenta requirere ad eorum falutem, & vitam conferuandam, quàm animalia imperfecta, ideò hæc fefta, & diuifa à reliquo corpore viuunt, non illa.

Objicies quartò; data ea diuifibilitate animæ in partes non poffet explicari, an hæ partes fint etherogeneæ, vel homogeneæ, ergo talis anima diuifibilis non eft. Antecedens probatur quia; fi partes animæ dicantur homogeneæ, ergo in omnibus membris, & partibus corporis requirent eandem difpofitiones, & organizationes, at hoc eft aperte falſum, vt patet, ergò.

Si verò partes animæ diuifibilis ponantur eſſe etherogeneæ, id videtur gratis omnino dici, & abſque vlla neceſſitate etherogeneitatem huiusmodi inducere in rerum natura, nam anima rationalis, quamuis omnino indiuiſibilis, habet tamen in corpore, quod inſormat, diuerſas difpofitiones, & organizationes, ergo propter diuerſas difpofitiones, & organizationes viuētis, ſiue perfecti, ſiue imperfecti, non eſt neceſſe, ponere partium animæ diuifibilis etherogeneitatem.

Refpondeo. Verè partes animæ diuifibilis eſſe homogeneas, & ſimiliores, quamuis in corpore viuētis ſint diuerſæ ſpecie difpofitiones, & organizationes, nam talis diuerſitas, vel habetur à formis pbrtialibus, vt nos probauimus *diſ. 9. leſt. 4.* vel à diuerſis accidentibus non obſtante homogeneitate partium animæ, cum de facto anima rationalis, quamuis omnino homogenea, quia omnino indiuiſibilis in diuerſis partibus corporis exigat difpofitiones diuerſas.

Præterea, ſi partes elementorum, & non viuētium ſunt homogeneæ, à fortiori partes viuētium ſiue perfectorum, ſiue imperfectorum, debent eſſe homogeneæ, & ſimilares; vnde bene probatur, in argumento, gratis, & abſque vlla neceſſitate induci partium etherogeneitatem:



LECTIO III.

An Sanguis sit Animatus.

Suppono in corpore animato esse partes duplicis generis ; nempe duras, & solidas, vt ossa; molles, fluidas, vt sanguis, & reliqui tres humores, tanquam succi per totum corpus diffusi; videlicet, atrabilis, flauabilis, & pituita.

Iterum partes corporis aliæ sunt excrementitiæ, & aliæ sunt excrementa; hæc sunt, quæ natura tanquam prorsus inutilia respuit, illa sunt, quæ & sunt corporis ornamenta, & ad alios quoque vsus inferuiunt, vel ad ornamentum, vel ad armamentum, vt pili, ungues, cornua, cristæ, pennæ, squamæ, & si quæ sunt aliæ.

Queritur : an omnes hæc partes sint animatæ ; præcipua difficultas est de Sanguine.

Et quidem tam pro animatione sanguinis, quam pro eiusdem sanguinis exanimatione, acriter pugnant Recentiores Philosophi.

Ponunt ergo in primis aliqui, sanguinem esse animatum.

Ita *Caiet. 1. p. qu. 11. art. 1. q. 3. par. 9. 53. art. 3. Contrad. 1. 2. qu. 64. art. 1. Scaliger. exercit. 289. Augustinus Ruuius in disp. de spiritus vitalis animatione Toletus de anima 4. conclus. 3. Hurtad. disp. 1. de Anima sect 6.*

Mouentur his fermè Argumentis. Primum est, quia anima informat totum, & integrum corpus, sed ad totalitatem, & integritatem corporis spectat in primis sanguis, re vera enim sanguis est pars integralis corporis, ergo Minor probatur quia, illa est pars integralis, sine qua manet corpus mutilum, & mancum, & tunc sanè manet mutilum, & mancum, quando remanet inutile ad functiones corporis, sed sine sanguine remanet viuens inutile ad ad functiones vitæ, non secus, ac sine manibus, aut brachijs, quas constat esse partes integrales corporis, easque animatas, ergo.

Eadem illa minor probatur argumento Theologico, petito ex Authoritate Sacræ Scripturæ, Concilij Tridentini, Ephesini, & Innocentij Papæ III.

Ex quidem ex Scripturis habemus, partem hominis interio-

tem subdividi in corpus , & sanguineum, tanquam in duas partes; *Beatus est Simon Bariona, quia caro, & sanguis non reuelauit tibi, sed Pater meus, qui in Caelis est. Matth. 26. Leuit. 17.*

Ex Trident. sess. 34. cap. 3. Semper hæc Fides in Ecclesia Dei fuit, statim post consecrationem Domini Nostri Corpus, verumque eius Sanguinem sub panis, & vini specie vna cum ipsius Anima, & Diuinitate existere, sed Corpus quidem sub specie panis, & Sanguinem sub specie vini ex vi verborum, ipsum autem Corpus sub specie panis, & Sanguinem sub specie vini, animamque sub vtraque vi naturalis illius connexionis, & concomitantie, qua partes Christi Domini, qui iam ex mortuis resurrexit, non amplius moriturus, inter se copulantur.

Ex Concilio Ephesino epist. ad Nestorium, vbi habemus. A Verbo esse assumptam carnem, & Sanguinem, sed Christus Dominus assumpsit naturam Humanam, ergo de integritate eius est Sanguis.

Denique patet ex Auctoritate Innocentij III. in quadam extrauaganti de Celebratione Missarum; vbi habet Innocentius, Aquam, & Sanguinem fluxisse ex latere Christi, vt ostendatur, Christi Corpus habuisse quatuor humores, qui pertinent ad veram hominis constitutionem.

Secundum argumentum eius Sententie desumitur ex auctori. Arist. qui 1. de histor. animalium cap. 15. docet Sanguinem esse animatum, & 2. de Partibus animalium cap. 23. enumerat Sanguinem inter partes corporis similiores, & vltim. de partibus docet, sanguinem esse præditum sensu. ex alia parte constat, sanguinem incontinentem fluere, & se se per totum corpus mouere, motus autem est certissimum vitæ inditium, animatum enim ab inanimato in duobus, præcipue differre, sensu, & motu, ex eodem Arist. 1. de Anima tex. 19. habetur.

Ponunt secundò alij, Sanguinem non esse animatum.

Ità D. Bonau. in 5. distin. 44. qu. 1. art. 1. ad secundum, Riccardus art. 1. qu. 2. Durandus qu. 2. ad secundum Paludanus qu. 1. art. 2. nm. 28. Capreolus qu. 2. art. 3. ad quartum Scoti. Ex Recentioribus Suarez 1. tom. in 5. par. disp. 16. sect. 6. Vsq. ibidem Ruuius 2. de anima cap. 3. auersa tom. 2. Philos. lib. 1. de anima qu. 45. sect. 4. vbi pro se citat Scotum in 4. distin. 44. sed finè ibi Scotus negat solum, semen esse animatum, at de

sanguine nè verbum quidem facit. Citatur etiam *Scotus in 4. d. 10. qu. 1. art. 1. d. Complutensibus* hic, sed reuera *Scotus q. 1. art. 1.* non loquitur de animatione sanguinis Christi Domini, sed de veritate Corporis eius sub speciebus panis.

Mouentur his argumentis. Primum est, quia sanguis est alimentum viuents, ergo non debet esse viuens. aliàs non posset conuerti in substantiam viuents, alimentum enim debet esse dissimile viuenti, & non debet participare formam viuents, aliàs si iam esset viuens, & animatum, non posset in viuents substantiam conuerti, & transmurari.

Secundum argumentum est quia; sanguis non nutritur, quia generatur, & concoquitur in epate, vt cibus in stomacho, vt aqua in olla, sed neque augetur, quia crescit per iuxta positionem alimenti, non per intrasusceptionem, cum enim sit intra venas, non potest intrasuscipere alimentum, ergo.

Tertium argumentum desumitur ex *authoritate adducta Tridentini*, quia ex vi verborum ponitur, sub speciebus panis corpus, & non sanguis, ergo iam sanguis non est pars integralis corporis.

Quartum denique argumentum desumitur ex *authorit. Aristot. lib. 2. de Partibus animalium cap. 10.* vbi docet, sanguinem non esse partem animalis, nec sensu præditum esse. Huic difficultati lucem affert, & solutionem *D. Thomas quodlibet 3. art. 5.* Vbi distinguit, & diuidit sanguinem, ita vt alius sit purus, & naturalis, alius verò omnino impurus, & nutrimentalis. Sanguis purus, & naturalis est is, qui spectat ad integritatem corporis animati: Sanguis verò nutrimentalis, & impurus inferuit, solummodo ad nutritionem, & alimentum animati corporis, dicitur autem impurus, quia est parum decoctus, & elaboratus ad differentiam sanguinis naturalis, qui propterea dicitur purus, quia est per maiorem decoctionem, & elaborationem virtutis formatiue factus, & efformatus. Verba sunt.

Quamuis circa ea, quæ sunt de veritate humane nature, sit diuersa diuersorum opinio, secundum quolibet opinionem totus sanguis nutrimentalis, id est, qui ex cibis generatur, pertinet ad veritatem humane nature.

Hanc *D. Thomæ* doctrinam sequuntur Doctissimi Thomistarum *Caiet. 3. par. qu. 54. art. 2. Siluester in Rosa aurea qu. 33. Nazarius 3. par. qu. 5. artic. 1. Controu. unica Ban. I. de Gen. c. 3. q. 8. ar. 5. Nos. 2. Aluarez disp. 28. de Incarn. Comp. disp. 6. s. 2.*

Conclusio. Sanguis purus, & naturalis est animatus, sanguis impurus, & nutrimentalis non est animatus.

Probatur quia. data hac conclusione, facile conciliantur duæ extremæ sententiæ suprâ relatæ, nam argumenta Primæ sententiæ procedunt de sanguine nutrimentali. Conciliantur loca Conciliorum, quibus utraq; sententia utebatur in sui Confirmationem; Conciliantur etiam loca Aristotelis, quæ aliàs difficile saluabis à manifesta contradictione, nam affirmat sanguinem esse animatum, & negat esse animatum; affirmat in sanguine motum, & sensum, negat sanguine esse motum, & sensum & sanè posita distinctione, & diuisione sanguinis in naturalē, & nutrimentalem, omnis contradictio tollitur, & saluatur; sanguis enim nutrimentalis non est præditus sensu, & motu, & ideo non est animatus, sanguis verò naturalis, & purus præditus est sensu, & motu, & ideo est animatus.

Probatur secundò quia. Sicuti varijs dispositionibus, & formis etiam substantialibus imperfectioribus disponitur, & præparatur, materia antequam recipiat formam totius, & formam perfectam; ita antequam alimentum recipiat formam viuētis, & in viuētis substantiam conuertatur, debet prius in sanguinem impuriorem conuerti, ut deindè in sanguinem puriorem possit transmutari, & conuerti, consuevit enim natura ab imperfectis ad perfectiora procedere.

Obijcies primò. hoc quod est, vnum sanguinem esse puriorem altero, non arguit distinctionem essentialē, sed accidentalem, ergo non debet dici vnus sanguis animatus, alter non animatus. Confirmatur quia. totus sanguis est vnus continuus, ut ex sanguine effuso è venis patet ad sensum, & ideo totus erit viuus, & eiusdem speciei, ergo vel totus animatus, vel totus inanimatus.

Respondeo, quòd sicuti semen, species quædam sanguinis, est substantialiter diuersum à sanguine, ita sanguis naturalis est specie diuersus à sanguine nutrimentali, quia efficacissima, quadam decoctione formatus, specificam superinduit diuersitatem.

Ad confirmationem dicò; sanguinem reuera esse potius contiguum, quàm continuum, sed quia fluidus est, continuus apparet, sicuti si aqua, & vinum permisceantur, apparent esse quid continuum, reuera tamen continuitatem non habent, quia ethereogæna sunt, & diuersæ speciei, sed contiguitatem.

Obijcies secundò. Sanguis impuratus, & parum decoctus inferuit ad nutritionem, ergo à fortiori ad eandem nutritionem, inferuit sanguis purus, & magis decoctus.

Respondeo, negando consequentiam, quia sanguis, quò magis purus, & decoctus, est magis similis substantiæ viuenti, non est ergo magis, sed minus aptus nutritioni, quæ in contrarium, & in omninò dissimile viuenti agit, vt illud conuertat, & transmutet in substantiam viuentis, ideòque benè ait Philosophus 2. de Anima tex 43. *contrarium contrario alitur.*

Obijcies tertio. Sanguis naturalis, & purus non exercet operationes vitæ, & quidem in homine non cognoscit, aut intelligit, ergo non viuit vita hominis.

Respondeo, inde sequi, sanguinem non viuere vita rationali, & intellectiua; at non sequi, non viuere vita vegetatiua, quia nutritur *Arist. lib. 3. de hist. & viuere animalium c. 19* vita sensitua, quia mouetur ex eodem Aristot. ibidem *Palpitat intra venas sanguis animalium omnium, plusque simul vndique mouetur, solusque omnium humorum sparsus per totum corpus animalium, & semper quandiu vita seruatur sanguis vnus animatur, & feruet.*

Ex his patet, quid dicendum sit de animatione aliarum partium viuentis, quæ vel sunt excrementa, vel excrementitiæ partes ad ornatum, aut ad armamentum aptæ natæ; nam in primis excrementa nullatenus viuunt, vnde natura reijcit illa, omninò, & à se tanquam extranea repellit; partes verò excrementitiæ, quia sunt ad ornatum, vel armamentum, vtique non sunt ad exercendas operationes vitales ordinatæ, non ergo viuunt.

Excipio semen, quod esse animatum anima vegetatiua, & sensitua, ex eo mihi videtur esse satis probabile, quia absente, vel etiam mortuo generante, causat, & generat viuens, vtraque vita vegetatiua, & sensitua; at nemo dat, quod non habet, viuunt ergo semen vtraque illa vita. Præterea animal ex emissionem feminis debilitatur, non secus, ac ex emissionem sanguinis, adeò vt si talis emissio erubrit fit, & immoderata, mortem animalis causat, & interitum, quod non accidit ex inuentione, aut deperditione capillorum, dentium, vnguium, squamarum, aut cornium, ergo semen substantia viua est, non mortua.

Confirmatur ex *Arist. lib. 2. de gener. animalium cap. 1. Semen*

men habere animalium, & esse potentia palam est. Vide
 pluta apud Sennesium hic cap. 6. & seq. ubi fuse probat semen
 viuere, & apud Epiphanium Ferdinandum Teor l. b. 3. 35.

LECTIO IV.

An potentia ab Anima, & inter se realiter
 distinguantur.

Suppono, quod sicuti anima alia est materialis, & diuisibilis;
 ut vegetatiua, & sensitiua; alia est spiritualis, & indiuisi-
 bilis, ut anima rationalis; ita potentia duplicis sunt generis;
 alia sunt materiales; nempe vegetatiua, ut sunt generatiua,
 augmentatiua, nutritiua, sensitiua verò loco motiua, & poten-
 tia sensitiua, seu sensus quinque interni, & quinque externi.
 Alia sunt potentia spirituales, nempe intellectuua, volitiua, &
 memoratiua.

De omnibus his potentijs eodem modo philosophandum est,
 quia eadem de omnibus militat ratio; ideò omninò reiicienda
 sunt sententia media eorum Auctorum, qui volunt aliquas ex
 his distingui realiter ab anima, aliàs non distingui realiter, sed
 ratione, & per intellectum; ita Durandus in 1. dist. 3. q. 2. po-
 nit potentias vegetatiuas non distingui realiter ab anima: sen-
 sitiuas verò, & rationales distingui realiter. Suarez 2. de ani-
 ma cap. 9. Solam potentiam nutritiuam non distinguit ab ani-
 ma. His ergo sententijs medijs omninò reiectis, ad extremas
 deuenio.

Prima est Thomistarum vniuersaliter affirmantium. Poten-
 tias ab anima, & inter se realiter distingui.

Ità Caiet. par. 1. q. 77. art. 1. Capreol. in 1. dist. q. 41. Scotus
 in 4. dist. 8. q. 2. art. 5. Ferrárien. 5. contra gentes cap. 65. Her-
 uaeus Natalis quodlibet. 1. q. 9. Ioan. d. S. Thoma 1. de anima
 q. 2. art. 2. & plures alij, quos citant, & sequuntur Compluten.
 8. lib. Phys. disp. 10. Auerfa tom. Phylos. q. 47. sect. 1. ex Re-
 centioribus, qui hanc sententiam defendunt Conimb. cap. 3. q. 4.
 Toletus quaest. 9. Fonseca 5. Met. cap. 5. q. 1. sect. 5. Suarez lib. 2.
 de anima cap. 1.

Secunda sententia est negantium, potentias ab anima, & in-
 ter se realiter distingui, sed huius sententiae Auctores diuisi-

sunt inter se ; *Nominales* enim ponunt potentias ab anima, & inter se distingui ratione ratiocinata, ita *Greg. in 2.d.16.Gabr. ibidem, Ockam in 2.q.14. Marsilius q.16. & 22.*

Sed melius, & omninò probabilius *Scotus in 2. dist.16 q.1. per totam, & in 4.d.12. q. 5.* ponit potentias ab anima distinguere realiter formaliter, seu quidditatiuè.

Scotum sequuntur, non modo *Scotistæ*, sed etiam *D. Bonau. in 1.dist.3.q.3. Thomas de Garzia in summa tract.5.q.2. art.3. Franciscus Le Reès de anima disp.1.art.8. l. 1. Morandus 1. de anima q.13. Marcellus in lib. de anima c.75.*

Probatum primò ; & quidem, quod distinguantur formaliter, & quidditatiuè, quia potentia nullo intellectu cogitante, vel fluunt, & emanant ab anima, vel generantur, & producuntur à generante, & producente animam, sed in signo posteriori ad animam, iuxta illud ; *qui dat esse, dat consequentia ad esse*, potentia ergo in tantum, vel emanant ab anima, vel à generante animam generantur, in quantum ad animam consequuntur, sed & quæ vel emanant ab anima, vel ad animam consequuntur, ante omnem operationem intellectus, debent ab illa plusquam sola ratione distingui, & ex alia parte non possunt distinguere realiter, ut mox ostendam, ergo distinguuntur ex natura rei, seu formaliter, & quidditatiuè.

Probatum secundò quia. Anima dicitur constituere formaliter viuens, non intellectus ; intellectus dicitur intelligere, & cognoscere, non voluntas ; de qua etiam dicitur, quod velit, non de intellectu ; & id ante omnem cognitionem intellectus, ergo potentia ab anima, & inuicem plusquam ratione, seu ex natura rei formaliter distinguuntur. Confirmatur quia, diuersæ sunt quidditates, & formalitates animæ, & potentialium, & eundem potentialium adinuicem, ut patet ex earum diuersis definitionibus ; ergo distinguuntur formaliter, quidditatiuè, & ex natura rei.

Probatum tertio, quia illud est ponendum in natura, quod est melius, si sit possibile ; ut patet ex 2. de gen. tex. 50. 3. *Phys. textu 35. 48. 50. id quo est melius, desiderat natura semper.* Sed est possibile, quod ab vna anima sint plures actus absque distinctione potentialium, sicut ab vna potentia sunt plures actus absq; eo, quod ea potentia dicatur multiplex, & ex alia parte certum est ab vna anima eos plures actus produci, ut patet, quia ens nobilissimum, ut est Deus per unicam sui essentiam

omnia, eaque quamvis innumerabilia producit; ergo.

Confirmatur quia: ordinatum ad finem, quanto immediatius attingit finem, tantò maioris probitatis, & perfectionis est, sed anima ordinatur ad actus, ergo quanto illos immediatius, & seipsa, & non per potentias attingit, nobilius, melius, & perfectius attingit; hinc est, quòd Deus immediatè seipso omnes effectus creatos attingat, atque producat.

Probatur quartò quia, sequeretur, quòd anima non esset capax meriti, vel demeriti, & consequenter etiam beatitudinis, nisi per accidens; quia illa non est perfectio, vel imperfectio propria alicuius, quæ in illo non recipitur, nisi prius recipiatur in alio realiter diuerso, in quo etiam reciperetur, si esset ab illo separatum, v. g. color non est perfectio propria substantiæ corporeæ, quia non recipitur in illa, nisi mediante quantitate, quæ realiter distinguitur ab illa, & reciperetur in quantitate etiam separata à substantia, idèò substantia est colorata per accidens, sed meritum, & demeritum non recipiuntur in anima, nisi mediante voluntate, quæ realiter distinguitur ab anima, & in qua etiam realiter separata, essent meritum, & demeritum; similiter visio beatifica reciperetur in intellectu realiter distincto ab anima, & in quo reciperetur etiam separato ab anima, ergo iam anima per accidens esset capax meriti, & demeriti, visionis beatificæ, & gloriæ, non ergo ipsa anima esset sancta, & beata, sed voluntas esset sancta, intellectus esset beatus.

Imò simpliciter anima non deberet dici sancta, aut beata, quæ enim sunt talia per accidens, simpliciter talia non sunt; nequidem homo dicitur simpliciter albus, aut niger, sed benè dicitur simpliciter rationalis, quia esse album, est accidens, esse rationale est essentia respectu hominis. Imò sequeretur, operationes animæ non esse vitales, quia pro sui principio non haberent vitam, sed animam, essent etiam immediatè à potentijs, quæ non sunt vita.

Quòd verò istæ potentiæ non distinguantur realiter.

Probatur primò, quia ad multiplicandas entitates non sufficit qualiscunque necessitas, & congruentia, sed necessitas talis, quæ nos cogat entitates multiplicare, & distinguere, sed nulla est necessitas, quæ nos cogat, admittere huiusmodi distinctionem realem potentialium, vt ex solutione argumentorum in oppositum patebit, ergo.

Probatur secundò. Auctoritate D. Augustini in *serm. de Ima.*

Imagine, & lib. 10. de Trin. cap. 11. & lib. de Spiritu, & Littera 4. & 13. vbi docet; animam secundum diuersas sui functiones, & operationes sortiri diuersa nomina, verba sunt; Dicitur anima, dum vegetat, spiritus, dum contemplatur, sensus dum sentit, animus dum sapit; dum intelligit mens, dum discernit, ratio, dum recordatur, memoria, dum vult, voluntas, & tamen non differunt in substantia, quemadmodum in nominibus, quoniam omnia ista una anima est, proprietates quidem diuersæ, sed essentia una. Eodem modo loquuntur D. Isidorus lib. 21. Aethimol. & D. Bernardus serm. 11. in Cantica, & de interiori domo cap. 67.

Probatur tertio. Auctoritate *Arist. 1. de anima 65. vbi intellectum vocat substantiam, & lib. 2. t. 21. Intellectum, & speculatiuam potentiam ait esse genus animæ. Denique definit, animam esse principium, quo viuimus, mouemur, & intelligimus, ergo non habet potentias à se distinctas, quibus assignatas operationes exerceat, ergo: imò 1. de anima tex. 23. approbat dictum Democriti asserentis, idem esse animam, & intellectum.*

Obijcies primo: Auctoritatem *Diui Augustini lib. 15. de Trin. cap. 17: vbi cum dixisset, in essentia, & tribus potentijs inueniri imaginem Trinitatis, subdit differentiam, quia Personæ Diuinæ non differunt à Diuina Essentia, at potentiæ nostræ differunt ab essentia animæ. Confirmatur quia ex communi Theologorum sententia, intellectus, & voluntas sola ratione distinguuntur in Deo, ergo in creaturis debent distingui plusquam ratione, idest, realiter.*

Respondeo: velle ibi *D. Augustinum*, quod sicuti Diuinæ Personæ non distinguuntur distinctione formali absoluta, quia constituuntur formaliter per Diuinas Relationes; ita nostræ potentiæ distinguuntur ab anima distinctione formali absoluta, non relatiua. contra nonnullos, qui ponebant, potentias realiter distingui inter se, & ab anima vi relationis, quam dicunt ad actus, & ad obiecta, realiter, aut formaliter diuersa. Alij Sancti Patres, & Doctores, si quando asserunt potentias ab anima distingui, intelligendi, & pie explicandi sunt de distinctione formali, non de distinctione reali simpliciter.

Obijcies secundo, ex *Arist. lib. de memoria, & reminiscencia cap. 10. Memoriam vocauit passionem, & habitum, sed habitus est qualitas, non substantia, ergo. Confirmatur quia*

I. de Anima tex. 64. habet, dicere autem anima irasci simile est, ac si quis dicat, animam texere, aut edificare; non ergo est anima, quæ irascitur, sed potentia irascibilis, ac propterea anima, & potentia realiter distinguuntur.

Respondeo, primo loco, Arist. nomine memoriæ intelligere memoriā actualem, & obiecta memorabilia, vnde & subdit, *primum igitur accipiendum est, qualia sunt memorabilia, sepè enim decipit hoc.* Et nota citata verba non haberi cap. 10 sed cap. 1. quia liber ille de memoria quatuor capitibus concluditur.

Ad secundum locum dico, denotari ab Arist. ea locutione animam non denominari operari, sed ipsum totum, quo eodem sensu dixit **I. de anima** tex. 64. *non ambulat humanitas, sed Socrates.*

Obijcies tertio, omnia mixta, imò & elementa operantur medijs qualitatibus, quibus vtuntur, tanquam instrumentis, ergo etiam anima operatur medijs potentijs à se distinctis realiter. Confirmatur quia; dantur quædam potentiæ omninò materiales, & organicæ, quæ certis organis affixæ sunt, sed hæ non possunt esse idem cum anima saltem rationali, quæ spiritualis est, imò & actus elicitī ab his potentijs sunt omninò materiales, ac proindè non possunt recipi in subiecto spirituali; quale est anima rationalis, ergo immediatè recipitur in potentijs materialibus, à quibus eliciuntur, ergo.

Respondeo. Ex illa paritate mixtorum, & elementorum, arguuntur, esse quædam congruentiam ad ponendas similes qualitates in anima, sed non argui necessitatem, quæ cogat, aut illa non est ratio efficax, quæ persuadeat; imò potest retorqueri argumentum; mixta, & elementa indigent qualitatibus, vt operentur, ergo anima, quæ est forma omnino perfectior, qualitatibus non indiget, vt non indiget instrumentis Deus, qui est perfectissimum agens.

Ad confirmationem dico, falsò supponunt, materialitatem harum potentialium, nam anima est, quæ illis organis vtitur tanquam instrumentis; concedo tamen actus, qui deindè eliciuntur, esse materiales, sed recipi tùm in materia, tùm in anima rationali, tanquam in duobus subiectis inadæquatis, neque enim est absurdum, entitatem materiale[m] recipi in subiecto spirituali, sicuti, & entitas spiritualis recipitur in materia, vt patet de anima rationali; imò necessarium est omninò sensationes ma-

teriales recipi in anima, aliàs anima non posset denominari, sentire, videre, audire, & tamen reuera anima denominationes huiusmodi habet, vnde *1. de anima* benè ait *Arist.* *Si senex haberet oculum iuuenis, videret vt iuuenis.*

Obijcies quartò, actus, & potentia pertinent ad idem genus, sed actus est accidens, ergo & potentia debet esse accidentalis. Confirmatur quia. Anima est actus, si ergo potentia non distinguitur ab anima, Potentia esset actus, & semper esset in actu, atque adeò semper operaretur.

Præterea, potentia sunt diuersæ iuxta diuersitatem actuum, sed in anima non est vlla diuersitas, ergo.

Respondeo, actum, & potentiam pertinere ad idem genus in hoc sensu, quia nimirum idem ens, quod prius est in potentia, deindè est in actu, nam idem homo est, qui potens est currere, & qui actu currit; non verò sensus eius propositionis est, quod actus, & potentia debeant esse, aut vtrumque substantia, aut vtrumque accidens, nam vt benè aduertit *Scotus hic*, potentia realiter distinctæ in sententia *Thomistarum*, recipiuntur in substantia animæ, tanquam in principio passiuo, seu passiuæ potentia, & tamen non sunt eiusdem generis.

Ad confirmationem dico. Animam esse actum, & semper esse in actu operandi, nam in quantum anima est actus essendi, se habet, vt causa formalis, quæ non est sine suo effectu formali; ac in quantum est principium operandi se habet, vt causa efficiens; quæ benè potest esse sine suo effectu, non enim efficiens semper actu operatur.

Ad vltimum, quod additur, dico. non debere esse tantam distinctionem in potentijs, quanta est in actibus, licet aliqua sit diuersitas, nam vna potentia visua est plurium colorum, & data potentia realiter distincta ab anima, nunquid tot sunt potentia intellectiua, quot sunt intellectiones?

Obijcies quintò, ea distinguuntur formaliter ex natura rei, quæ comparantur ad inuicem, tanquam gradus essentialis inferiores, & superiores, vt sunt in homine animal, & rationale, sed hæ potentia non ita se habent respectu animæ, ergo.

Respondeo. *Scotum*, qui auctor fuit, & inuentor distinctionis formalis ex natura rei, talem distinctionem ponere nonolum in his, quæ dicto modo, vt gradus essentialis superiores,

& inferiores comparantur, sed etiam in ijs, quæ vt posteriora, & proprietates in vna entitate vnitiuè se habent, & ita docet vbi supra passiones entis distinguui formaliter ex natura rei ab ente; eodem ergo modo distinguuntur potentia animæ, non vt gradus superiores, & inferiores, sed vt posteriores proprietates ad animam, in qua existant vnitiuè, idest, in qua simul vniuntur ad faciendam vnā rem, seu entitatem physicā.

LECTIO V.

A quo potentia, & actus specificentur.

Quamuis Potentiæ non sint diuersæ res, sed diuersæ formalitates, tamen in eo, quod formaliter distinguuntur, videamus, vnde earum formalis, & quidditatiua diuersitas definitur; & quidem certum est, earum intrinsecam diuersitatem sumi ex propria earundem formalitate, verum quia potentia dicunt ordinem essentialem ad quædam sibi alias extrinsecas, puta ad actus, & ad obiecta, & ad proprias essentias, à quibus fluunt, incertum est, & controuersum in scholis, vnde, & ex quo extrinseco desumeoda sit potentiarum formalis, & specifica diuersitas.

Quoad potentias igitur. Sententia communis docet, potentias specificari ab actibus.

Sed contra est quia: intellectus Angeli, & intellectus hominis formaliter quidditatiuè distinguuntur penes actus speciei diuersos, quia iidem actus elicibiles ab intellectu humanos sunt etiam elicibiles ab intellectu Angelico, & è contra, ergo aliunde petenda est eorum specifica distinctio.

Alij ergo ponunt. Potentias distinguui ratione ab essentia, à qua fluunt, & ideo intellectum hominis distinguui ab intellectu Angeli, quia intellectus hominis fluit à natura humana, intellectus verò Angeli fluit à natura Angelica.

Sed contrā est quia. Potentia comedendi paleas eadem specie est in equo, & boue, & tamen fluit à natura equina, & bouina, quæ differunt specie; lux eadem specie est, siue à Sole siue ab igne fluat, & oritur; in re Theologica, idem specie, lumen gloriæ est, siue exigatur à gratia sanctificante, habituali, siue ab vnione hypostatica, quæ tamen sunt inter se diuersa

uersa specie, ergo neque ab essentia, & à principio, à quo fluunt, suffieienter desumitur diuersitas specifica potentiarum.

Alij igitur ponunt, potentias differre specie, quia vna ab altera notabiliter dissimilis, & notabiliter diuersa.

Sed contrà est. quia hoc est, quod queritur, vnde habeatur notabilis diuersitas, & dissimilitudo vnius potentiae ab altera; ab actibus quos producant, an ab essentia, & natura, à qua fluunt an ex aliquo alio capite.

Respondebis. id esse iudicandum iuxta arbitrium prudentis viri, nam duo differre specie, non consistit in aliquo indiuisibili, sed patitur latitudinem aliquam.

Sed contra quia; ista responsio, rem alioquin merè physicam reducit ad morale iudicium prudentis viri; sanè iudicium, & arbitrium viri prudentis locum habet in re morali, non in re physica.

Puto dicendum; potentias specificari simul ab actibus, quos eliciunt, & ab essentijs, à quibus fluunt.

Probatnr quia: Potentiae non specificantur solum ab actibus, neque ab essentijs solum, vt instantiae adductae conuincunt, ergo specificantur ab actibus, & potentijs simul, nam ex nullo alio capite videtur posse desumi potentiarum specifica diuersitas.

Hinc intellectus Angelij, & intellectus Hominis specie distinguuntur, quia non solum sunt à diuersis naturis, sed etiam, quia non omnes actus elicibiles ab humano intellectu, sunt elicibiles ab Angelico, nam Angelus, vel omninò non elicit discursum, vel merè per accidens est, quod discurrat, è contrà intellectus humanus essentialiter exigit, esse discursuum. Ceterum virtus comedendi paleas est quidem in diuersis essentijs, sed vnum habet actum. de calore verò, & lumine gloriae est alia ratio, quia non se habent, vt actus.

Hinc etiam ab eadem potentia possunt esse actus specie diuersi, quia illa potentia fluit ab eadem essentia, seu est in eodem supposito, & principio, à quo fluit.

Quoad secundum de actibus. Communis doctrina ponit, actum specificari ab obiecto formali.

Sed contrà est, quia: est assignare duos actus tendentes ad idem obiectum, nē in materiale, sed etiam formale, qui tamen actus sunt inter se specie diuersi, & in re quidem Theologica, plures nobiles Theologi defendunt, supposita reuelatione myste-

steriorum Fidei , posse intellectum humanum credere illa mysteria ob motuum supernaturale diuinæ Reuelationis actu merè naturali, & actu supernaturali .

Imò actus , quo quis largitur eleemosynam propter amorem Dei, & actus, quo quis vitam profundit propter amorem Dei , specie distinguuntur, & tamen habent idem obiectum formale , & idem motuum , ergo ab obiecto formali actus non specificantur .

Alij ergo ponunt , actus specificari à potentijs , à quibus fluunt .

Sed contrà est quia ; simplex apprehensio eadem specie est , siue eliciatur ab intellectu Angelico, siue intellectus humano, ergo actus non specificantur à potentijs .

Puto dicendum, Actus specificari simul ab obiecto formali, & à potentia, seu principio, à quo fluunt, seu vt alij loquuntur, actus specificantur non tantum à ratione formali, quæ, se tenens ex parte obiecti , sed etiam ex ratione formali sub qua se tenent ex parte potentie, itaque adæquatum specificationum actus simul est obiectum formale, & potentia .

Probatum quia. Actus non specificantur solum ab obiecto formali , non solum à potentia, ergo ab utroque simul, nullum enim aliud restat principium, ex quo possit eorum specificatiueritas desumi . Confirmatur quia. actus dicit essentialem ordinem ad utrumque, scilicet, ad potentiam, & ad obiectum formale, ergo ab utroque desumit suam specificationem .

Verum quidem est, quod (vt alibi notavi;) ad hoc vt actus sit vnus specie , requiritur vnitas vtriusque, potentie, scilicet, & obiecti formalis ; vt sit diuersus specie , sufficit diuersitas vel potentie vel obiecti formalis , ratio est , quia vnitas comparatur bono, diuersitas malo ; bonum autem est ex integra causa, malum est ex vnico defectu .

Dices. Potentie non sunt specie distincte ex sola distinctione essentialium , à quibus fluunt, aut ex sola distinctione specifica actuum, ergo actus non sunt distincti specie ex sola distinctione potentialium, aut ex sola distinctione obiecti formalis .

Respondeo, negando consequentiam . disparitas est quia. instantie adducte ad distinctionem potentialium probandam, conuincunt , non sufficere distinctionem specificam , vel essentialium , à quibus illæ fluunt, vel actuum, quos producant ; sed utrumque requiri; contrà vero non habetur instantia, qua probetur,

betur, ad distinctionem specificam actuum requirit distinctionem specificam, tum potentiarum, tum obiecti formalis, sed potius instantiæ adductæ conuincunt vnā, vel alteram distinctionem sufficere.

Dices secundò. Actus dicit essentialē ordinem non minus ad obiectum formale, quàm ad obiectum materiale, ergo non minus ab vno, quàm ab altero specificatur. Confirmatur quia in actibus supra assignatis de ratione elemosynæ, & profusione vitæ, pro amore Dei, adest specifica diuersitas, non aliunde petita, quàm ex obiecto materiali, illi enim sunt ab eadem potentia, & habent idem obiectum formale, quia vterque fit propter amorem Dei,

Respondeo. tam principali argumento, quàm eius Confirmatione, probari, obiectum materiale esse specificatiuum actus inadæquatum, non adæquatum, quod est mihi satis probabile, sicut enim compositum naturale non solum diuersum specie est ratione diuersæ materiæ, ita actus specie diuersificatur, & ratione obiecti formalis, & etiam ratione obiecti materialis.

DISPVATIO XIV.

DE ANIMA VEGETATIVA.

Animarum prima, vegetatiua est; ut habet Aristot. 2. de Anima 1.34. Vegetatiua anima, & alijs inest, & prima, & maximè communis potentia est animæ, secundum quam inest ipsum viuere omnibus, cuius sunt opera, generare, & alimento uti. Hac anima viuunt Arbores, & Planta. Tres sunt potentia anima Vegetatiuæ, Generatiua alterius sibi similes in specie, nutritiua, & augmentatiua suis ipsius; Hic potentijs correspondent tres actus; Generatio, Nutritio, & Augmentatio. Et quidem primus, & præcipuus actus est generatio, ita docet Aristot. loco cit. Naturalissimum operum, quæ in viuentibus quæcunque perfecta, & non mutilata sunt, aut generationem spontaneam habent; est facere aliud, quale ipsum,

animal quidem animal, planta autem plantam *Necessitas* pōnendi tres istas potentias in quolibet viuente est quia vita, & salus viuentium in humido, & calido naturali consistit, at calidum, & humidum inuicem agunt, & reagunt in propriam perniciem, & destructionem; & sanè destruerentur tandem, nisi per alimentum repararetur, quidquid calidi, aut humidi ex illa pugna deperditur; id autem fit per potentiam nutritiuam, & nutritionem. Verum quia ab initio ortus sui non habet viuens omnem illam molem, & magnitudinem, quæ illi est debita, data est illi d' Natura potentia augmentatiua. Denique viuens deberet aliquando interire, quia ex contrarijs compositum; & quia non semper reparatur totum id, quod deperditur vi caloris naturalis per alimentum, ideo viuens, ut se conseruet secundum sui esse specificum (cum se conseruare non possit secundum esse indiuiduale, & numericum) data est illi potentia generatiua, & vis producendi, quæ le ipsum, ut species conseruaretur.

LECTIO I.

An Mater ad generationem concurrat actiue.

DE Potentia Generatiua nil est, quod speciale poscat exāmen; verum de eius actu, qui est generatio, quæritur, an ad illum mater actiue concurrat; & quidem questio procedit de viuentibus, quæ generantur virtute seminis, & per seminis emissionem, ut Leo, Equus, Homo; non de iis viuentibus, & animalibus, quæ ex putri materia generantur, ut Anguillæ, de quibus *Aristot. 6. de histor. Anim. cap. 17.* aut de ijs, quæ quandoque ex semine, & partu, quandoque ex putri generantur, ut mures, & vespeæ, de quibus etiam *Aristot. loc cit.*

Et sanè idem est quærere, an mater ad generationem concurrat actiue, ac quærere, an mater emittat semen, sicuti è contra cōcurrere ad generationem passiuè, nihil aliud est, quàm concurrere recipiendo semen.

Porrò denominatio Patris, & Matris ex vsu, & phrasi Scolastica non attribuitur nisi viuentibus vita rationali, sicuti etiam

denominatio filij, neque enim Schola appellat plantam, aut equum generantem, patrem, & equum genitum, filium, ut patet ex communi modo loquendi; & ideo proposita difficultas præcipuè militat de generatione hominis.

Quòd igitur spectat ad huius difficultatis solutionem; quia certum est patrem concurrere actiue, difficultas restringitur ad matrem.

Thomista cum primis ponunt, matrem ad generationem concurrere passiuè, recipiendo semen à viro, non emittendo. Ita colligunt ex *D.Th. 3. par. qd. 71. art. 4.* & volunt hanc sententiam esse Aristotelis, & communem Philosophorum.

Scotus in 3. d. 2. qu. 2. per totum, & Medicorum schola communiter docent, etiam matrem concurrere actiue, emittendo semen; pro hac sententia stare Aristotelem, mox ostendam. An vero sententia opposita sit Communis inter Philosophos, mihi est valde incertum; apud Recentiores quæstio ista, vel omittitur omnino, vel quam breuissimè expeditur, *Scoti* sententiam sequuntur Medici, quibus in re propria maior Fides est adhibenda, & non modo *Scotista*, sed plures ex Recentioribus, *Franc. Reès de Anima disp. 1. sect. ultima ar. 2. Conimb. de Gen. q. 27. ar. 1. Hurtad. de Gen. disp. 2. sect. 6. Morandus 2. de anima tr. 2. q. 12. nu. 240. Palud. de gen. cont. 2. puncto 7. num. 4.* & plures Theologi apud *Suarez 10. 2. in 3. par. disp. 10. sect. 2. S. hæ rationes. Arriaga 1. de gen. disp. 1. sect. 6. nu. 6.*

Conclusio, mater ad generationem concurrat actiue emittendo semen.

Probatur primo ex *Arist. de hist. animalium cap. 3. num. 50. Quæ modo gignere animal possint, aut in se ipso semen prolificum emittunt, aut in alterum; fœmina, quod in se mittit: appellatur mas, quod in alterum, cap. 19. num. docet fœminas testes intus habere, & à maribus solo utero differre. § 2. de gen. animalium cap. 2. num. 50. & 60. loquens de semine, id autem quemadmodum ex mare, et fœmina prodeat nequaquam latere potest, & paucis interiectis. Matrem namque id animal dicimus, quod in alio gignit. Fœminam quod in seipsa. Ergo ex mente Aristotelis fœminæ quoque emittunt semen.*

Probatur secundò ex anatome, quia fœminæ habent eadem vasa semen deferentia, concoquentia, & seruantia; non secus ac viri, constat enim ex anatome fœminas, quæ diu se à Vene-

re abstinuerunt, multo semine redundare, secus verò, quibus familiaris est Venus.

Probatur tertio experientia, quia feminae etiam sine congressu cum maribus semen emittunt, & eo emissio refrigerantur, non secus, ac viri, ergo.

Probatur quarto quia. Non minus pater, quàm mater dicitur generare, sed generare importat actionem, ergo non magis pater, quàm mater actiue ad generationem concurrit. Confirmatur quia generatio est actus assimilatiuus, sed semper filius magis assimilatur matri, quàm patri; inò semper mater magis diligit filios, quàm pater, vnusquisque enim naturaliter diligit opus suum, quàm è contrà, vnde & benefaciens plus afficitur beneficio, quàm è contrà. ex 8. *Aeth. cap. 8. & 12.* ergo si non magis, saltem æquè actiue concurrit mater, ac concurrit pater. tenet consequentia, quia principium actiuum est principium distinguendi, & assimilandi, & magis ea, quæ facimus nos, quàm ea, quæ patimur, amamus, atque diligimus, ergo.

Probatur quinto quia. sœmina, & mas sunt eiusdem speciei, ergo habere debent easdem potentias actiuas, ergo vtrumque habet vim actiuam generandi,

Probatur sexto argumentis petitis è re Theologica.

Primum est. Soler esse quæstio inter Theologos morales, & Summistas, an maritata post congressum maritalem possint prouocare ad emittendum semen; & qui sententiam affirmatiuam sequuntur, vt *Bonac. mat. qu. 1. pun. 6. Prop. 2. num. 15.* mouentur eo fundamento, quia putant, semen mulieris esse necessarium ad generationem prolis.

Secundum desumitur ex materia Incarnationis, quia si Beata Virgo ad temporalem generationem Christi Domini passiuè tantum mouè se habuisset, & solam materiam ministrasset, non esset vera mater Christi Domini, quia se habuisset, vt terra, & minera in generatione auri; se habuisset, vt Pinus, ex quo fit ignis, sed neque terra, aut minera dicitur producere ignem, inò Christus Dominus natus esset ex Deipara, æquè ac anguilla, & vespæ ex putri materia; solum esset differentia, quia anguilla, & vespæ non sunt eiusdem speciei; sed hæc patet esse absurda, & hucusque inaudita; ergo. Confirmatur ex auct. *D. Dam. 48. virtutem tribuens susceptiuam, simul autem, & generatiuam; at Beata Virgo solum suscepisset à Spiritu San-*

Est materiam congregatam, actiue autem non concutisset, non tribuisset virtutem generatiuam, ergo. Vide *Hurt. disp. 2. de gen. & corrupt. sub sect 3.*

Dices; emitti à muliere non semen, sed humorem quendam flacidum, aut emitti semen, sed infecundum.

Contrà est quia, Semen à femina emissum in colore, & alijs accidentibus non est dissimile à semine masculi, ergo, gratis negatur non esse semen, vel non esse fecundum, sicuti est semen masculi; imò si est infecundum, ergo esset superflue datum à natura, quod est absurdum.

Obijcies primò. Fæminæ sunt similes pueris voce, & impubertate, at pueri semen emittunt, ergo. Confirmatur, quia. Fæminæ sunt similes spadonibus voce, & pilis, ergo sunt infecundæ, ut illi.

Respondeo negando consequentiam, nam etiam fæminæ sunt similes puellis, at hæ sunt infecundæ, non sic autem fæminæ adultæ ætatis. Dico igitur, eam similitudinem inter pueros, spadones, & fæminas non oriri ex defectu feminis, aut infecunditate, sed aliunde. Adde plures esse vilas fæminas viris similes, barba, voce, & robore.

Obijcies secundò. Fæminæ sæpè congregiuntur cum viris sine voluptate, ergo semen non emittunt, quia in emissionem seminis voluptas est, Confirmatur quia fæminæ usu Veneris non macrescunt, nec elanguent, secus viri, qui semen emittunt, ergo.

Respondeo; sæpiùs fæminæ, quando congregiuntur, voluptatem sentiunt, ergo semen emittunt. Cæterum quando voluptatem non sentiunt, id non oritur ex eo, quòd semen non emittant, sed ex eo, quòd vel sunt ægræ, vel ob immoderatam Venerem, sensus temperamentum amittunt. Ad confirmationem dico. Fæminas emittere, & simul recipere semen proprium, & virile; at viri semen emittunt, sed non recipiunt nec proprium, nec fæmineum.

Obijcies tertio. In omni actione dari debet principium, actiuum, & passiuum, ergo in generatione fæmina, quæ tota est ad patiendum, erit principium passiuum, mas, qui totus est ad agendum, debet esse principium actiuum, alias confunderentur munera vtriusque parentis, quia vterque actiue concurreret.

Respondeo, Fæminam esse quidem principium passiuum, sed
non

non solum passiuum , imò etiam actiuum ; neque officia confunduntur , quia pater solum actiue , mater actiue simul , & passiuè concurrit .

Obijcies quartò . Auctoritatem Arist. *de gen. animalium c. I* ubi negat Philosophus , à foeminis semen emitti & *4. lib. cap. I* ponit , semen mulieris infœcundum esse ad generationem , ergo quia ex Arist. foeminæ , vel semen non emittunt , vel si emittunt , illud est infœcundum , manifestè concluditur , fœminas non concurrere actiue ad generationem .

Respondeo . Reuera semen à foeminis non emitti , quia ex ita vterum non egreditur , vt semen maris ; clara sunt verba tex. *Indicio etiam est semen non emitti à femina , quòd cum per coitum seminis voluptas contrectatione loci eiusdem , atque maribus veniat , tamen humor ille non hic emittitur ; patet ergo semen foemineum non emitti è loco ubi effunditur ; & ad alium tex. Dico ; semen seminarum infœcundum esse quia se solo non potest partum edere , & generare .*

Obijcies quintò Ex mysterio Incarnationis . Christus Dominus dicitur natus ex Virgine , at si Beata Virgo concepisset semen , & facta fuisset eiusdem seminis resolutio , imminuta fuisset eius Virginitas , minuitur enim Virginitas ex quacunque seminis resolutione , & effusione licèt non sit ex coitu cum viro , sicuti & in viro minuitur virginitatis ex sola seminis effusione , licèt non sit cum foemina , ergo . Confirmatur quia , canit Ecclesia de Christo Domino , *procedens homo sine semine* . Denique *D. August. 1. 3. lib. 10. de gen. ad Litt. cap. 20. docet . Christum Dominum non fuisse in lumbis Adæ secundum rationem seminis , sed secundum substantiam corporis .*

Respòdeo , Beatā Virginem fuisse spiritu , & corpore Virginem : spiritu quidem , quia non solum nunquam appetijt honestos viri cōgressus , sed etiam Voto recusauit , ideo in ea semper fuit habitus virginitatis . Corpore quidem , quia virginitas corporis non amittitur , nisi per ruptionem vteri , aut genitalium , per congressum cum viro , neutrum accidit in Beata Virgine , quia Christus Dominus eius vterum penetrauit , sicuti & Cœlos ; semen virginis absque vllò prorsus sensu voluptatis constitutum est miraculosè , & subito in eius vtero , quin deferretur per consuetos naturæ meatus , in viris , sicuti & in foeminis , corrumpitur virginitas effusione seminis ratione voluptatis , & delectationis .

tionis, at si delectatio desit, & inuoluntaria sit seminis effusio, nullo modo virginitas læditur. Denique *D. August.* loquitur de semine viri, non de semine mulieris.

L E C T I O II.

De Potentia nutritiua, & eius actu.

Quia calor naturalis continuò absumit humidum radicale; quo tamen absumpto, viuens inarcesceret, interiret; ideo data est animæ vegetatiuæ à natura vis, & facultas reparandi humidum radicale per sumptionem cibi, & potus, extimulante viuens ad talem sumptionem fame, & siti. Porro vis ista reparandi humidum radicale, dicitur potentia nutritiua: est autem fames ex *Aristot. I. de Anima t. 28.* appetitus calidi, & sicci; non ita tamen fames dicitur esse appetitus sicci; quasi necesse sit, cibum esse notabiliter siccum, vita enim seruetur humido, sed quia debet esse calidus, & consequenter moderatè siccus, ut ità distinguatur à potu. Similiter fames est appetitus calidi, non quia cibus non possit esse frigidus, sed quia valdè frigida offendunt ventriculum, nec possunt concoqui. Sitis verò est appetitus frigidi, & humidi, ut temperetur calor naturalis, vnde potus non debet esse nimis frigidus, aliàs calor naturalis omninò extingueretur, & tamen vita etiam moderato calido seruetur. Fames, & sitis, causantur à quodam doloris sensu, qui excitatur in orificio ventriculi ex diuisione partium eius in se inuicem confligentium propter inanitatem, quia exinanitæ partes diuellunt, trahuntque ventriculum ratione caloris cibum, & potum postulantis.

Quæritur modo, quid sit potentia nutritiua, quæ per famem, & sitim extimulata cibum quærit, & potum, in beneficium, & conseruationem viuentis.

Primò nonnulli, ponunt potentiam nutritiuam non distinguì à calore naturali. Ità *Auers. 4. met. cap. 2. Zimara Theor. 73.* & Receniores aliqui, quos suppreffo nomine citant, *Ruuius lib. 2. de Anima tract. de poten. anim. qu. I. num. 12. Compluten. disp. 8. qu. 4. §. 1.*

Sed contrà est quia, actus potentie nutritiue est nutritio, idest, conuersio alimenti in substantiam viuens, at talis conuersio

non

non potest fieri à solo calore naturali ; talis enim conuersio consistit in eo, quod in alimento producat^{ur} substantia, à forma viuentis, at substantia non potest ab accidente produci, vt patet ; ergo. Confirmatur ex *Arist. de Anima* t. 41. *Ignis causa quidem quoddammodo est, non tamen simpliciter causa, sed magis anima.*

Alij ponunt ; potentiam nutritiuam non distingui à temperamento, & combinatione primarum qualitat^{um}. Ita *Suarez* 2. 10. *Theol. tr. 3. lib. 2. c. 9. apud Compluten. ubi suprà.*

Sed contrà est quia. Temperamentum, & combinatio primarum qualitat^{um} accidens est, sed accidens non potest producere substantiam neque vt instrumentum, vt cum *Scoto* probauimus *disp. 12. lect. 1.* ergo.

Thomistæ ponunt ; potentiam nutritiuam esse realiter distinctam ab anima vegetatiua ; vt patet ex generali eorum doctrina distinguente realiter omnes potentias ab anima, tum ex *Ruuo, & Compluten. loc. cit.*

Sed contra hanc sententiam facit quia. hæc potentia nutritiua debet conuertere alimentum in substantiam aliti, atque adeo debet producere formam substantialem viuentis in materia alimenti, sed accidens non potest propria virtute producere substantiam, vt *Leff. cit.* probauimus ergo.

Conclusio sit. Potentia nutritiua ab anima non distinguitur realiter, sed formaliter, seu quidditatiuè.

Probat^{ur} quia, ità saluatur in alimento produci animam, ab anima, sicut ignis ab igne, homo producit^{ur} ab homine, & ex alia parte, aliud est, animam vegetatiuam constituere viuens vegetatiuum, & aliud sanè est, inducere formam vegetatiuam in alimentum, ergo aliqua distinctio formalis, & quidditatiua est inter animam vegetatiuam, quæ constituit viuens vegetatiuum, & potentiam nutritiuam, quæ inducit formam vegetatiuam in alimentum.

Colligite ex his primò : eodem modo potentiam generatiuam, & augmentatiuam, non distingui realiter ab anima, distinguì vero formaliter, & quidditatiuè.

Colligite secundò ; omne viuens indigere alimento, si tamen sanum sit, ratio est quia. omne viuens constat ex humido radicali, & calore naturali absumente humidum, quod propterea debet continuò, & incessanter per nutritionem reparari ; hinc miraculo adscribitur, quòd Christus Dominus, Moyses, &

Elias per 40. dies cibo abstinuerint, nam, vt benè notat *Hypocrates*, inedia per hebdomadam homini letalis est.

Dixi si tamen sanum sit. nam si denuus hominem pigrum, somnolentum, pituita crassa, viscidaque refertum, non dubito, illum dici posse viuere sine cibo, & potu. Refert enim *Albertus* foeminam per triginta dies cibo abstinuisse; & quidem patet, animalia imperfecta diù viuere sine cibo, vt glires, & aliqui mures tota hyeme cibo abstinent, & somno pinguescunt.

An possit esse nutritio ex elemento puro. Docet *Galenus lib. 3. de ratione victus cap. 17.* Ordinarium alimentum viuentis esse aliquod mixtum licet aliquando quædam animalia nutriantur elemento puro, ita Camaleon acre, Serpentes terra, Pisces aqua, Salamandra igne viuunt. *Arist. 2. de Gen. 1. 52. & lib. de sensu, & sensili cap. 5.* negat, animalia posse nutriri odore, contra quod sentiebant Pythagorici.

LECTIO III.

De Potentia augmentatiua, & eius actu.

DVæ quæstiones sunt hic breuiter resoluendæ. Prima est, an potentia augmentatiua distinguatur à nutritiua. Secunda est, an actus augmentationis sit continuus, & non interruptus per morulas, seu vt alij loquuntur, per instantia interpolata.

Quoad primam quæstionem.

Posuerunt aliqui. Potentiam augmentatiuam non distingui à nutritiua;

Ita *Durandus in 1. d. 3. q. 2. num. 19. Conimb. lib. 2. de An. cap. 4. art. 2. Suarez 2. de anima q. 9. Toletus q. 10.*

Thomistæ ponunt, distingui realiter. Ita *Iandunus 2. de Anima q. 13. Iauellus q. 18. & alij 1. par. q. 78. art. 2. Albertus 2. de anima tract. 2. Apoll. quæst. 9. Paulus Ven. circa 10m. 50.*

Sentio cum *Scoto* vniuersaliter asserente, potentias animæ, tam ab anima, quàm adinuicem distingui formaliter, & quidditatiuè, nutritiuam, & augmentatiuam, & quò ad istas duas potentias cum *Scoto* sentiunt *Marsilius 1. de Gen. qu. 10. Conimb. Toletus, Durandus locis mox cit.*

Conclusio. Potentia augmentatiua, & nutritiua non distinguuntur realiter, sed formaliter quidditatiuè.

Quòd non distinguantur realiter, patet, tum quia non possunt separari, neque enim datur posse augimentari, & non posse nutriri, aut è contra, & ex alia parte nulla est necessitas multiplicandi potentias realiter distinctas; cum sufficiat, eas formaliter, & quidditatiuè distinguere; & hoc iam probo; quia, potentia augmentatiua tendit in acquisitionem quantitatis; nutritiua verò in acquisitionem substantiæ, ergo iam diuersa est quidditas, & formalitas potentiæ augmentatiuæ, & nutritiuæ, & consequenter formaliter quidditatiuè distinguuntur. Confirmatur ex *Arist. I. de Gen. t. 41. differunt nutrimentum, & augmentatio ratione*, idest, quidditate.

Quòd secundam quæstionem.

An augmentatio sit motus continuus, an verò discretus, & momentaneus, idest per momenta, seu instantia interpolata, & per morulas interruptus.

Ponunt aliqui; augmentationem fieri per morulas, quatenus in vno instanti, seu in momento producitur aliquid quantitatis totum simul; deindè cessat augmentatio per aliquod tempus, seu momentum quo elapso iterum fit augmentatio, & acquisitio quantitatis, & sic deinceps. Ita discurret *Auers. 3. Phys. com 8. Albertus 8. Phys. circa t. 23. Ferrarien. q. 6. Soncinas 8. met. q. 22. Pomponius lib. 1. de nutrit. & augment. cap. 9. Tol. lib. 1. de Gen. q. 11,*

At augmentationem esse motum continuum, & successiuum, ponunt. *Burleus 2. Phys. circa tex. 6. Caiet. Thiennensis 5. Phys. q. 3. Sotus item q. 3. Iandunus lib. 8. & alij*, quos citat, & sequitur *Auersa de anima q. 50. sect. 7.*

Conclusio augmentatio fit successiuè, & continuò, itaut non interrumpatur per morulas, aut instantia interpolata.

Probatum quia quantitas, & qualibet eius pars est diuisibilis, ergo non potest in momento tota simul introduci, sed potius debet introduci successiuè, & per partes post partes, alias non distingueretur à generatione, quæ est instantanea, & fit tota simul. Ex alia parte non est, cui semel incepta augmentatione, debeat anima motum interrompere, & morari, iam enim est debitè applicata materiæ preparatæ iam, & dispositæ, ergo continuabit inceptam actionem, & non interrumpet per morulas, agens enim naturale applicatum passo disposito, & à fortiori, si ceptæ sit actio

actio, non potest, non continuare; simili ratione, qua si igni applicetur pulvis sulphureus longo tramite deductus, utique ignis continua, & non interrupta actione, & combustionem sibi materiam illam aggregabit, & in se conuerteret.

Fateor, augmentationem non esse continuam, quia non fit toto tempore vitæ; quia non semper viuens augetur; datur enim status consistentiæ, & status decrementi, ut alibi ex *Arist.* adnotauimus.

Similiter non esse continuam, quia non fit simul in omni parte viuentis, sed prius in vna parte, deinde in alijs, prout alimentum prius in vna, deinde in alijs diffunditur.

Dices primò; ex *Arist. 8. Phys. 23. neque augeri, neque minui possibile est continuè, sed est medium.*

Respondeo. Augmentationem non fieri continuè; idest, semper, & toto tempore vitæ, dantur enim ex *Arist.* & in omnium sententia status consistentiæ, & decrementi.

Dices secundò: dantur in quolibet viuente minima naturalia, idest, partes ita minimæ, ut minores esse nequeant, sed in ijs alimentum, & consequenter etiam quantitas ponitur tota simul, ergo augmentatio fit in instanti, rursus illa minima naturalia ita se habent, ut quælibet sit intra suum porum inclusa, at pori non sunt continuati, quia diuersæ rationis, ergo augmentatio in ijs non potest fieri continuatiuè, sed necessariò debet interrumpi, quando augmentatio transit de vno poro ad alium.

Respondeo in primis, non dari ea minima naturalia, sed indiuisibilia, quia omnia indiuisibilia fuscè alibi impugnauiamus. Deinde dico. Poros illos, & cavitates esse continuatas, non interruptas; alias viuentis partes essent discontinuatæ, ac in frustra concisæ; & sanè qui nuda ossa diligenter obseruauerit, plures in ijs cavitates inueniet, non interruptas, sed continuatas.



DISPVATIO XV.

DE ANIMA SENSITIVA.

Hac Anima constituitur animal, ut sic, quod est principium sentiendi ut sic, & in genere, commune bruto, & homini, non arboribus, aut plantis. Tres potentie huic animae conueniunt. Sensitiua, qua assimilatur intellectui, Appetitiua, qua assimilatur voluntati. Denique locomotiua, de qua est dubium, an conueniat animae rationali.

Subdiuiditur potentia locomotiua in perfectam, qua anima secundum se tota mouetur de loco ad locum, & imperfectam, qua mouetur secundum aliquam partem intra suum locum. Potentia appetitiua subdiuiditur in irascibilem, & concupiscibilem; haec est, qua brutum tendit in bonum sub ratione boni simpliciter; Illa est, qua brutum tendit in bonum sub ratione ardui, & difficilis, quia nimirum tendit ad tollendas difficultates, & impedimenta, qua occurrunt in ratione boni concupiti. Plures actus potentiae utriusque enumerare, & explicare, non ad naturalem, sed ad moralem Philosophum spectat.

Denique potentia sensitiua diuiditur in externam, & internam; externa sunt quinque sensus notissimi, Visus, Auditus, Odoratus, Gustus, & Tactus, qui quidem sensus dicuntur externi, quia habent organa exterius apparentia, ut sunt oculi, nares, aures; interna habet organa intrinsecus latentia, & occulta. Haec etiam subdiuiditur in quinque, nimirum sensum communem, imaginatiuam, aestimatiuam, seu cogitatiuam, phantasiam, & memoriam.

Has potentias distingui formaliter ex natura rei, mihi ex eo redditur probabile, quia si Anatomistis fides est, distincta organa pro his potentijs notata, & diligenter obseruata sunt; & praeterea habent distincta munera, & officia. Sensus enim communis habet, spiritus animales transmittere ad sensus externos, ut sensatio fiat; & rursus recipere species a sensibus externis, Imaginatiua habet species istas sensatas conseruare.

Cogitativa, seu estimativa habet apprehendere species non sensatas, sic ouis vidit lupo, & fugit, apprehendit enim illum esse sibi inimicum, inimicitia autem est species non sensata.

Phantasia habet species istas siue sensatas, siue insensatas coniungere. Memoria denique habet species non sensatas retinere.

Et sanè tanta est similitudo inter potentiam sensitivam brutorum, & intellectum hominis, ut plures ex antiquis Philosophis non dubitauerint, rationem, & intellectum brutis concedere, ut refert Arist. 2. Phys. 30. In sensibus internis non immerito, quia de illis graues difficultates non occurrunt.

LECTIO I.

De Obiecto Sensibili.

Objectum, ut sit sensibile, debet in primis esse corporeum, incorporea enim, ut anima rationalis, Angelus, Deus sensibilia non sunt. Secundò debet esse reale, non entia enim, negationes, & priuationes rerum haud sensibus percipiuntur. Tertiò debet esse singulare, quia vniuersalia abstrahunt à sensibus, denique debet esse accidens, substantia enim latet sub accidentibus, & ideò non nisi mediatè, mediantibus, scilicet, accidentibus innotescit.

Diuiditur obiectum sensibile, ita ut aliud sit sensibile proprium, & aliud sensibile commune. Sensibile proprium est, quod vno sensu percipitur, ut albedo, quæ solo visu percipitur. Sensibile commune duobus, aut pluribus sensibus percipitur, sic rosæ magnitudo percipitur visu, & tactu; sensibilia communia enumerantur quinque. Quies, motus, numerus, figura, & magnitudo. Ad motum reducitur vbi, actio, & passio. Ad figuram reducitur situs, asperitas, lenitas, mollities, durities; denique ad magnitudinem reducuntur densitas, & raritas.

Iterum aliud est sensibile per se, & aliud est sensibile per accidens. Sensibile per se est illud, quod per propriam sui speciem, & imaginè representatur; sensibile per accidens, quod per

imaginem, & speciem alterius innotescit, & patet.

Solet esse quaestio. An sensibile commune propriam sui speciem, & imaginem habeat, in qua representetur. Tres sunt in hac quaestione opiniones diuersae.

Prima defendit. Sensibile commune sentiri per imaginem sensibilibus propriis, non per propriam sui imaginem, & speciem. Ita Ferra. 2. de anima q. 11. Caiet. & Palatius ibidem c. 6. Fonseca lib. 2. c. 2.

Sed contra est; quia si sensibile commune propriam sui imaginem non haberet, non distingueretur à sensibili per accidens, quod ex Arist. de Anima 1. 6. non habet propriam sui speciem, sed sentitur per speciem, & imaginem alterius.

Secunda opinio ponit, sensibile proprium representare sensibile commune, seu esse id, quo sentitur sensibile commune, & consequenter sensibile proprium esse obiectum primum, & formale, sensibile verò commune esse secundarium, & materiale, hinc est, ut non videatur albedo, ut sic, sed albedo talis, idest, tanta, & tanta.

Ita Ruuius 2. de Anima cap. 7. quest. 11. & pro se affert D. Thomam 2. de Anima lect. 13. Ban. Philop. Thienensem Paulum Venetum cap. 11. lib. 2. de Anima q. 14.

Sed contra est, quia licet de facto non videatur albedo, nisi quanta, nec videatur quantitas, nisi colorata, quae tamen repugnantia est in hoc, quod videatur albedo, absque eo, quod videatur quanta, & sentiatur quantitas absque eo, quod videatur albedo? Albedo enim est color, ergo est de se visibilis praecisa quantitate, quia color de se est formale obiectum visus, neque enim est visibilis ratione quantitatis; esto de facto, & naturaliter non sit, nisi in quantitate; ex alia parte quantitas est sensibile commune, ergo se sola, & praeciso colore potest videri, & tangi, quamuis de facto, & naturaliter non sit quantitas, nisi colorata, non ergo color est obiectum primum, & formale, quantitas obiectum secundarium, & materiale, sed utrumque est obiectum primum, utrumque est obiectum formale sensationis.

Quod autem possit sentiri sensibile proprium absque sensibili communi; sanè hoc esse possibile naturaliter, & praecipue Corpus Christi Domini Sacramentatum, quamuis extensione locali nudatum, posse naturaliter videri, docent Ocham in 4. dist. 10. q. 5. art. 2. Maior q. 5. Gabr. lect. 45. in Canone Missae; & de

de absoluta potentia id esse possibile, & præcipuè Corpus Christi Domini posse videri ab oculo glorioso, docent cum *D. Th. in 4. dist. 10. q. 4. art. ult. Thomista* communiter, & ibidem, cum *Scoto* eius discipuli: imò *Scotus q. 9.* docet, quòd si lux esset punctualis, adhuc esset visibilis, & videretur. Ratio est, quia color est obiectum formale visus, ergo, ut videatur, non dependet per se à quantitate, aut alio sensibili communi.

Confirmatur quia, per aduersarios sensibile proprium est obiectum primum sensus, quantitas est obiectum secundarium, & obiectum primum non dependet à secundario quoad sentiri, vel non sentiri, ergo.

Ex alia parte, etiam sensibile commune potest sentiri sine sensibili proprio, quia si sensibile commune non potest sentiri, nisi tunc, & in eo casu, quo sentitur sensibile proprium, sequeretur, sensibile commune sentiri per accidens, idest, sentiri, quantum est accidens sensibilis proprii, atqui falsum est omnino, vel ipsis aduersariis vltro fatentibus, sensibile commune esse sensibile per accidens, ergo.

Confirmatur quia, potest quis manu tangere Cælum, in quo est sola quantitas, & nullum sensibile proprium, nullam enim habet Cælum qualitatem tangibilem, seu contrariam, quia cum incorruptibile sit, caret contrariis, ergo solum sentitur eius magnitudo, & quantitas.

Denique redditur ratio à priori, quia sensibile commune est obiectum formale plurium sensuum, non minus, ac color est obiectum formale unius sensus, idest, visus, ergo æquè potest solum videri sensibile commune, ac possit solum videri sensibile proprium.

Tertia denique sententia ponit, sensibile commune transmittere propriam sui speciem contradistinctam à specie sensibilis proprii. Ita *Scotus in 4. dist. 10. qu. 9. Henricus de Gandauo lib. 2. de Anima q. 17. Aegydius eodem lib. ad t. 65. dub. 2. Iandunus q. 18. & alij.*

Probatum primò quia, si sensibile commune non transmitteret propriam sui speciem, esset sensibile per accidens, at hoc est absurdum, ergo.

Probatum secundò quia: sensibile commune est diuersæ omnino entitatis à sensibili proprio, ergo non potest representari per speciem sensibilis proprii sicuti per speciem, & imaginem, Petri non potest representari Paulus, aut equus, vel Angelus, ergo

ergo per speciem sensibilis proprii non potest sentiri, & percipi sensibile commune .

Probatur tertio quia , ex dictis potest sentiri sensibile commune, & non sensibile proprium, ergo saltem tunc, & in eo casu non potest sentiri sensibile commune per speciem sensibilis proprii .

Probatur quarto quia, sæpè accidit sensibile proprium videri per propriam speciem, & variari sensibile commune, cum quo simul videbatur, vt si videatur album sub figura triangulari, & hæc postea fiat quadrangularis; tunc, vel est mutata species, qua videbatur album, vel non est mutata; si talis species est mutata cum supponatur esse mutata figura, & non albedo, iam figura transmittit propriam speciem: si species non est mutata, ergo non videtur figura quadrangularis, non enim potest eadem species utranque figuram, & triangularem, & quadrangularem representare .

Probatur quinto quia, sensus dicuntur decipi circa sensibile commune, & non decipi circa sensibile proprium, ergo non eadem specie utrumque videtur, aliàs circa utrumque contingeret error, aut circa neutrum .

Dices primo, non sunt multiplicanda entia sine necessitate, ergo non est, cur pro sensibili communi debeat poni species distincta, potest enim representari per eandem speciem sensibilis proprii .

Respondeo, necessitatem ostendi ex rationibus adductis ad probandam Conclusionem, præsertim vero ex illa, quia per imaginem vnius entitatis omninò distincta, & diuersa representari non possunt .

Dices secundò, si sensibile commune transmitteret propriam sui speciem, de facto posset videri sensibile commune sine sensibili proprio, hoc videtur absurdum, ergo; probatur sequela, quia sit charta nigro colore depicta, deinde intendatur nigredo, sanè nigredo magis intensa longiùs videbitur, quàm antea, quando erat remissa, ergo longiùs videbitur, quàm charta, videbitur ergo sensibile proprium absque sensibile communi .

Respondeo; casum adductum fauere conclusioni positæ, nam plures ex Auctoribus pro ea conclusione volunt, de facto videri, etiam Turrin, verbi gratia, non viso aliquo eius colore, & consequenter de facto videri, & sentiri sensibile commune, figuram, & magnitudinem Turris, non viso sensibili proprio,

ergo etiam facile concedunt illi Auctores, posse videri sensibile proprium non viso sensibili communi in aliquo casu, licet regulariter, & ut plurimum utrumque simul sentiat, quia adest naturalis connexio inter sensibile proprium, & commune.

LECTIO II.

Aliæ Quæstiones Resoluuntur.

Prima quæstio solet esse. An sensus errent circa obiectum sensibile.

Academici ex Antiquis putant, sensus semper falli, & semper indigere, ut corrigantur ab intellectu.

Epicurei asseriebant. Sensus nunquam falli, & nefas esse, dubitare de eorum fidelitate, ita referunt *Tullius in q. Acad. D. Augustinus lib. 8. de Ciuit. Dei cap. 7.*

Aristoteles, & cum eo Philosophi communiter omnes media via, & cum distinctione procedunt, nimirum, sensus circa sensibile proprium, vel nunquam, vel raro decipi; at circa sensibile commune, aut etiam sensibile per accidens frequenter decipi, verba sunt 2. de Anima t. 161. *sensus propriorum quidem est verus, aut quàm paucissimum habens falsum, secundo autem eius, cui accidunt, & hæc, ut hic iam contingit, ut falsus fit. & paucis interiectis. Tertio autem communium, & consequentium, ea quæ accidunt ijs, insunt propria, dico autem, ut virtus, & magnitudo, quæ accidunt sensibilibus, circa, quæ maxime iam est decipi secundum sensum.*

Hanc *Aristotelis* doctrinam confirmat experientia; in primis enim circa magnitudinem contingit error in visu quando propter distantiam res magnæ apparent parvæ, & exiguæ, ita Stellæ apparent minores terra, cum tamen quælibet vel minima, stella sit maior terra, secundo circa figuram, nam turris quadrata eminus apparet rotunda. tertio circa motum, & quietem; ut cum soluentibus è portu litora, videntur moueri, cum enim non deprehendant motum, quo ipsi rapiuntur, putant litora ipsa moueri, è contra Planetæ, quamuis citissimo motu ferantur, nobis videntur stare, & quiescere. denique circa numerum contingit error, quando speciei reflexione in speculo diuiso, vel polypono

lygono repræsentatur obiectum, vt multiplex.

Dices. experientia quoque patet, sensum decipi circa sensibile proprium, nam ægris dulcia videtur amara; similiter manus, verbi gratia, si per vitrum rubrum videatur, apparet rubra; denique, si obiectum visus nimium distet, repræsentatur, ac si esset fuscum, vel nigrum, quamuis reuera sit album.

Respondeo. sensum non decipi circa sensibile propriū, dummodo concurrant tres conditiones; prima est, vt organum non sit prauè dispositum; defectu huius conditionis, quia ægri lingua infecta est humore bilioso, dulcia videntur amara; secunda est, vt medium sit sincerum, & extraneis qualitatibus minimè obnoxium, defectu cuius conditionis manus visa per medium rubrum, apparet rubra. tertia, vt adsit proportionata distantia, defectu cuius conditionis facies eminèns fusca apparet.

Replicabis, si adsint tres assignatæ conditiones, sensus non potest errare neque circa sensibile commune, ergo eodem modo se habet sensus circa sensibile commune, ac circa sensibile proprium.

Respondeo. defectum earum conditionum frequentius accidere circa sensibile commune, quàm circa sensibile proprium, idèò frequentius errat sensus circa sensibile commune, quàm circa sensibile proprium.

Questio secunda solet esse, an verum sit commune dictum, *Sensus læditur à vehemēti sensibili*. nam in primis videtur tale dictum non verificari, quia sensus naturaliter inclinatur ad obiectum sensibile, non ergo potest ab eo lædi, nulla enim potentia inclinatur naturaliter ad id, à quo damnum patitur, & læditur. Imò quemadmodum intellectus à nobiliori obiecto potius perficitur, quàm lædatur, ita & sensus à vehementiori obiecto non læditur, imò potius perficitur.

Experientia autem suadet oppositum, nam intuentes Solem ob nimiam lucem excæcantur; oculi niuem intuentium maximè læduntur: ob nimium strepitum, & vehementem sonitum aures obsurdescunt, ob nimium acutos odores maximè offenditur odoratus, & ratio huius experientiæ est quia; vehemens sensibile lædit sensorium, idest, organum, in quo exercetur sensatio, læso autem organo, intelligitur quoq; & sensus læsus, ideoque benè ait *Galenus lib. I. Aphorism. 20. omnis excessus deijcit actum propriæ virtutis*.

Ad rationes in oppositum, dico, per accidens esse, quòd à suo

obiecto læditur, & offendatur sensus, ob exuperantiam, vt loquitur Aristoteles 2. de Anima t. 123. manifestum autem ex his, & propter quid sensibilibus exuperantia corrumpunt sensoria. de intellectu longe diuersa est ratio, quia intellectio non fit per aliquod organum, aut corporeum instrumentum, ideoque quia excellens obiectum non habet organum, quod lædat, neque lædit intellectum.

Quæstio tertia solet esse, an ipsa sensatio sentiatur, & sit obiectum sensus.

Responderetur communiter, proprium esse intellectus posse reflectere supra suos actus, & suas cognitiones cognoscere, & ratio est quia, intellectus habet pro obiecto omne ens, at ipsa eius cognitio, & intellectio est ens, ideo per actum reflexum, ab intellectu cognoscitur, & intelligitur; at sensus non potest supra seipsum reflectere, quia non potest attingere omne ens, sed tale ens determinatum, quod sit coloratum, sonabile, & huiusmodi, quæ formales rationes propriæ obiectorum cuiusque sensus non conueniunt sensationi; ideo sensatio ipsa nequit esse obiectum sensus; deinde patet experientia, nemo enim videt suam visionem, aut suam auditionem exaudit.

I. E C T I O I I I.

An dentur Species .

V Traque Schola Philosophorum, scilicet, & Theologorum tres nouit species; nempe impressam, quam appellat sensibilem, si ponatur in sensu externo; appellat intentionalem, si ponatur in sensu interno; intelligibilem, si ponatur in intellectu; alia species, quam Schola nouit, & assignat, est species obiectiua; denique est species expressa.

Nomine speciei impressæ, siue intelligibilis dicatur, siue sensibilis, venit quædam qualitas producta ab obiecto intelligibili, vel sensibili, & ad potentiam suæ intellectiuam, siue sensitiuam transmissa, eo fine, vt simul cum potentia concurret ad eliciendam intellectionem, vel sensationem, vult enim Schola, potentiam se sola non esse sufficiens principium productiuum intellectionis, seu sensationis, ideo requirere, vt adiueretur ab obiecto, ab eoque complectatur in ratione principij, & quia obiectum est

est absens, loco sui transmitti speciem, tanquam sui vicariam, quæ præstat id ipsum, quod aliàs præstaret obiectum, si esset præsens, & ideo talis species dicitur etiam semen obiecti, quia est quoddam veluti instrumentum obiecti, ut semen in animali est instrumentum generationis alterius animalis, & viventis.

Nomine speciei obiectivæ venit Idolum quoddâ, seu Imago quædâ, quæ visa, & cognita ducit nos in visionem, & cognitionem obiecti, sicuti imago Cæsaris in carta, vel tabella varijs coloribus depicta, & expressa, est species obiectivæ Cæsaris, quia ipsa visa facit nos videre Cæsarem.

Nomine denique speciei expressæ venit ipsa formalis representatio, vel est ipsa formalis sensatio, aut intellectio, vel terminus ipsius sensationis iuxta varias sententias.

In præsentī non est sermo de specie expressâ, neque de specie obiectivâ, nam de his intra, cum de intellectione sermo erit, & disputatio.

Restringitur difficultas ad solam speciem impressam, quæ absolute, & simpliciter venit nomine speciei. De specie igitur ista impressâ communis sententia tria potissimum docet; & quidem

Docet primo: Hanc speciem impressam dari in sensibus externis, & internis respectu obiecti sensibilis, & in intellectu respectu obiecti intelligibilis.

Docet secundo; hanc speciem, tanquam vicariam, & semen obiecti ab ipso obiecto produci, & transmitti ad potentiam, in qua species præstat duos effectus; Primus est unire, seu appropinquare cum potentia obiectum, quod est longè distans à potentia: alter effectus est, complere potentiam, & simul cum illa concurrere ad formalem expressionem, seu representationem obiecti, quæ formalis representatio in sensu dicitur sensatio, & in intellectu, dicitur intellectio.

Docet tertio: hanc speciem impressam appellari imaginem representationem obiecti, quia simul cum potentia concurrat ad representationem, & exprimendum obiectum.

Sed contra hanc communem sententiam, & doctrinam primo facit; quia species impressâ non videtur posse dici, & appellari imago obiecti, nam imago est, quæ cognita, & visa ducit nos in cognitionem, & visionem obiecti, denominatio enim imaginis desumpta est ex analogia ad imaginem exter-

nam v. gr. statua Cæsaris est imago Cæsaris, quia ipsa visa ducit nos in visionem Cæsaris, at species impressa non ita se habet, ut ipsa visa ducat nos in visionem obiecti, ergo non meretur nomen imaginis.

Respondebis, esse imaginem non quidem obiectiuam, sed effectiuam, quia ipsa effectiuè concurrit ad sensationem, quæ est expressa, & formalis imago obiecti.

Sed contra est, etiam potentia concurrit ad expressam, & formalem representationem obiecti, ergo concursus effectiuus, quem exercet potentia in ordine ad eliciendam sensationem; non sufficit ad dandam denominationem imaginis.

Replicabis adhuc; disparitatem esse, quia species se tenet ex parte obiecti, & ideo potest dici eius imago; at potentia non se tenet ex parte obiecti, & ideo non potest dici eius imago.

Sed contra est quia. Speciem se tenere ex parte obiecti, nihil est aliud, quam effici ab obiecto, tanquam à causa; at non omne quod ab alio efficitur, est imago respectu illius, neq; enim calor est imago ignis, quamvis ab igne fiat; filius est, & dicitur imago patris, non quia fiat quomodocunque à patre, sed quia est illi similis in natura, & sæpè etiam in externis lineamentis, aut etiam in temperie, & complexionem naturali. Hinc filius apud Hispanos dicitur *ijos*, quod Græcis est imago.

Secundo principaliter contra hanc communem doctrinam facit, quia non potest adduci ratio, quæ efficaciter probet, necessitatem harum specierum, & quæ earum existentiam conuincat, ergo non est, cur huiusmodi species multiplicentur, non enim sine urgente necessitate debent entia multiplicari.

Nam in primis, si quæ ratio probaret, dandas esse species, esset, quia ad producendam sensationem non solum debet concurrere potentia, sed etiam obiectum, iuxta illud *D. August. l. 9 de Trinit. cap. 12. ex obiecto, & potentia paritur notitia.*

Sed obiectum sæpè est absens, sæpè etiam est improporcionatum potentia, consequenter non potest seipso concurrere; concurrit ergo media sui specie, quæ propterea dicitur Vicaria, & semen obiecti.

At hæc ratio non suadet, dandas esse species, cur enim debet concurrere obiectum ad sui sensationem, vel notitiam? nonne voluntas seipsa, & non per aliquam speciem concurrit ad amandum obiectum suum, ergo eodem modo intellectus seipso, &

non per speciem obiecti concurrat ad cognoscendum obiectum suum.

Respondebis. Obiectum fieri præsens voluntati per actum, intellectus proponentis tale obiectum; at obiectum est longè distans ab intellectu, ideò debet illi fieri præsens per speciem.

Sed contrà est quia. non potest produci species ab obiecto, nisi iam præsupponatur præsens, species enim produciuntur ab obiecto in potentia, comparantur ergo obiectum, & potentia, tanquam agens, & passum; & hæc debent esse approximata, & & inuicem præsentia, ut agant, ergo ut ab obiecto intelligatur produci species, debet prætelligi obiectum iam præsens.

Neque enim species ab obiecto produciuntur, & per motum localem transmittitur ad potentiam, aliàs migraret accidens de subiecto in subiectum, produceretur enim species ab obiecto in parte aeris, seu medij sibi vicina, & ex ista species illa migraret in aliam, & aliam, quousque perueniret ad potentiam, & sic species migraret de subiecto in subiectum; produciuntur ergo species ab obiecto, & immediatè imprimitur potentia, ergo iam in obiecto præsupponitur præsens, alias daretur actio, & productio speciei in distans.

Respondebis. Species debere poni ad determinandam potentiam, ut feratur potius in hoc obiectum, quàm in aliud, de se enim potentia indifferens est ad percipiendum siue hoc, siue illud obiectum.

Sed contrà est quia. Hi, qui ponunt causam secundam ad hunc numero effectum potius producendum, quàm alium, determinari à Deo, & causa prima, coherentè Philosophantes, refundent talem determinationem potentia ad percipiendum, hoc potius obiectum, quàm aliud in Deum, & causam primam. In mea sententia, quia pono causam secundam de sui natura esse determinatam ad hunc potius numero effectum, quàm alium, refundiur talis determinatio potentia in eius naturam, & conditionem.

At probabilius posset dici; potentiam determinari ad hoc potius obiectum percipiendum, quàm aliud, ab eodem ipso obiecto, quod illi occurrit, & sit præsens, quàm ad aliud, quod illi non occurrit, nec est præsens; hæc enim differentia ponitur ex communi sententia inter causam, seu potentiam necessariam, & liberam, quòd libera non ab obiecto, sed seipsa determinatur ad operandum, at vero causa, & potentia necessaria determinatur

ab obiecto ; non est ergo recurrendum ad species pro illa determinatione potentia ad percipiendum hoc potius numero obiectum,quàm aliud.

Denique datis etiam speciebus adhuc illa indifferentia , & determinatio potentia non tolleretur , quia in eadem potentia essent plures species solo numero diuersae, non esset ergo maior ratio,cur potentia potius vna earum specierum vteretur,& non alia , ergo per admissionem specierum non tollitur illa indifferentia,& indeterminatio potentia .

Respondebis , species requiri ad eliciendam sensationem , quia nimirum sensatio habet duo , & quod sit vitalis , & id habet à potentia vitali , & quod sit imago , & repræsentatio obiecti , & id habet à specie tanquam vicaria , & semine obiecti , nam de ratione imaginis est oriri , & nasci ab eo , cuius est imago , sensatio ergo quod sit imago obiecti , non habet à potentia , sed nec ab obiecto immediatè , ergo à specie ; quod autem imago debeat oriri ab eo , cuius est imago , patet , quia tam in Diuinis , quam in creatis ; ideo filius est imago patris , quia oritur , & nascitur à patre .

Sed contra hanc responsionem est : quia cognitio Dei , qua Deus cognoscit creaturas , est imago creaturarum repræsentatiua , sed illa cognitio non producitur à creaturis , ergo .

Præterea scientia , & cognitio infusa , quam habuerunt Christus Dominus , & Adam de obiectis naturalibus non fuit producta ab obiectis , sed fuit immediatè producta à solo Deo , & tamen illa cognitio est formalis obiectorum naturalium repræsentatio .

Denique species productæ ab obiecto sunt qualitates , & mera accidentia ; non ergo possunt concurrere ad repræsentanda substantialia , & quidditatiua obiecti , imò species ipsæ obiecti non habet cum illo maiorem similitudinem , quàm habeat aliud quodcumque obiectum omninò diuersum , verbi gratia , species equi non habet maiorem similitudinem cum equo , quàm habeat , homo v. gr. sed homo non concurrat ad repræsentandum equum , ergo species equi non concurrat ad repræsentandum equum , sanè probabilius poneremus , equum immediatè seipso simul cum potentia concurrere ad seipsum repræsentandum , quàm ponere , quod obiectum concurrat mediante aliqua qualitate , seu specie .

Respondebis demum cum *Arriaga disp. 4. de Anima sect. 3.*

Species

species esse ponendas, ut reuelent, & manifestent formalitates obiecti potentia, cui sunt occultae, & prorsus absconditae; debet ergo vel obiectum concurrere, quod habet in se tales formalitates, vel species, quae loco obiecti, & veluti semen illius, continet illas formalitates.

Sed contra est, quia species sunt accidentia, ergo non possunt formaliter continere formalitates obiecti, quae sunt substantiales, sed neque possunt continere virtualiter, quia continentia virtualis est perfectior continentia formali, si ergo ut *Arriaga* ultro concedit, species formaliter non continent formalitates obiecti; multo minus continent virtualiter.

Deinde in casu, quo intellectus, v. gr. habet pro obiecto cognitionem suam directam, aut reflexam, quae formalitas est in tali cognitione, quae sit occulta, & abscondita intellectui, quae proinde debeat illi reuelari, & manifestari à speciebus? fortasse intellectus adeò cœcus est, ut non videat formalitates eius cognitionis, quâ ipsemet elicit, & in sinu suo quodammodo fouet, & tenet? at eiusdem conditionis sunt species intelligibiles, respectu intellectus; & species sensibiles respectu sensus, ergo neque intelligibiles, neque sensibiles species debent aduitti ad reuelandas formalitates obiecti.

LECTIO IV.

Aliae Rationes pro Speciebus refutantur.

Superfunt duae aliae rationes, seu argumenta, quibus conantur specierum impressarum Assertores, earum existentiam euincere, & demonstrare.

Et primum quidem argumentum desumitur ex auctoritate Aristotelis, qui varijs suae doctrinae locis, videtur species huiusmodi aperte concedere, in primis 7. *Phys.* t. 1. 2. *ipsi sensus alterantur, tantumue enim, vetus enim ipsorum motus est per corpus, patiente aliquid sensu.* & 2. de *Anima* t. 121. *sensus est id, quod est susceptiuum formarum sine materia. sicuti Cera recipit in se figuram anuli aurei, vel ferrei,* & t. 133. *unumquodque sensorium susceptiuum est sensibilis sine materia.* Denique lib. de mem. & reminisc. c. 2. *manifestum est factam esse per ipsum sensum in anima, & in parte corporis*

habente ipsam passionem, velut picturam quandam, factus enim motus imprimit veluti figuram sensibilibus, sicuti sigillantis anuli.

Sed contra est primò, quia. nec in tex. cit. nec in alijs, quamuis semel, & iterum Aristotelis volumina euoluerim, inueni istum terminum formalem, *speciem sensibilem, aut intelligibilem*, ideò tex. citati faciliè possunt explicari de specie obiectiua, quæ visa ducit nos in visionem obiecti, & fauet tum exemplum, quod adducit de Cera, quæ est species, & repræsentatio obiectiua anuli aurei, vel ferrei, tum etiam exemplum, quod adducit de pictura externa, quæ & ipsa est repræsentatio obiectiua, & potest tota hæc doctrina valde confirmari tertio exemplo, quod adducit 3. *meteor. cap. 3.* de quodam homine, qui ante præferebat sinitmet ipse simulachrum, & obiectiuam imaginem, verba sunt; *accidit cuidam passio debilitè, & non acutè videnti, semper enim simulachrum videbatur præcedere ambulantem ipsum ex opposito respiciens ad ipsum.*

Vel etiam faciliè explicari potest Aristoteles de specie formali, & sensatione ipsa, quam recipiendo potentia sensitiua patitur, & immutatur.

Secundò solet asserri auctoritas D. Augustini 11. de Trinit. c. 5. *visionis, quæ fit in sensu cernentis, quasi parens quedam, est species corporis, ex qua fit, sed parens non propriè, & verè, unde nec ista vera proles est, sed quasi proles* 12. de Trin. c. nē dubitare quidem permittit de speciebus.

Sed eodem modo faciliè explicari potest D. Augustinus de Specie, vel obiectiua, vel formali, seu expressa, neque enim D. Aug. speciem impressam nominauit, vt patet ex lib. 9. de Trin. cap. 12. lib. 11. cap. 2. quibus locis solum ait, *à cognoscente & cognito paritur notitia, ex visibili, & vidente gignitur visio.*

Tertio solet adduci auctoritas Commentatoris 3. de anima 2. 5. vbi asseritur, *ex obiecto, & potentia fieri magis vnum quàm ex materia, & forma.* quæ verba cæteroqui metaphoricè prolata sic rigorosè nonnulli Thomistarum accipiunt, & intelligunt, vt velint omninò fieri magis vnum ex obiecto, seu specie impressa, & potentia, quàm ex materia, & forma: quod sanè ex eo deprehenditur falsum, quia ex potentia, & specie non potest fieri, nisi vnum accidentale, quod est omnino minus, quàm vnum substantiale ex materia, & forma; debet ergo Commen-
sator

tator intelligi, & explicari, vt explicauimus Aristotelis verba mox adducta.

Alterum argumentum desumitur ex varijs experièntijs.

Et prima quidem est quia; patet, nos videre in speculo ea, quæ verè ibi non sunt, tamen repræsentantur, & conspiciuntur, sed id non aliter accidit, nisi ex reflexione specierum, quæ fit in speculo; vndè ex speculo redit species, & reflectitur ad oculum videntis, ideòque videtur in speculo obiectum ratione speciei.

Sed contra hanc experientiam est quia, plures ex illis, qui species impressas concedunt, ponunt in isto casu species obiecti, uas, quæ visæ dicunt nos in visionem obiecti.

Ita *Auerroes lib. de sensu, & sensili cap. I. Iandunus eod. lib. q. 9. Capreolus in I. dist. 35. q. 2. art. I. Caietanus I. par. q. 56. art. 3. & quod caput est, vel ipse D. Thomas q. 8. de verit. art. 5. & 15. Scotus in 2. d. 13. quest. 1. & fauere etiam D. Augustinum lib. 15. de Trinit. cap. 8. testatur Auerſa t. 2. q. 53. sect. 7. ergo adducta experientia, quæ sanè est omnium maxima, & efficacior omnium, quæ solent adduci pro speciebus, non probat existentiam specierum impressatum; quare in speculo ideò videntur obiecta, quæ ibi non sunt, quia adsunt ibi species obiectiuæ eorum obiectorum, quæ visæ faciunt nos videre ea obiecta, vt suprà etiam retulimus ex Arist. Hominein, qui semper ante se proprium simulacrum, & speciem obiectiuam aspiciebat.*

Et confirmatur quia; quando intuemur obiectum in speculo, non tam videmus illud prout est in se, quàm potius iuxta dispositionem speculi, nempe, vel magnum, vel paruum; item multiplex in diuersis partibus speculi fracti; insuper eo colore imbutum, quo forte vitrum speculi inuenitur affectum, & in speculo concauo apparet obiectum inuersum, ergo iam in speculo videtur imago, idolum, & simulacrum obiecti, seu species obiectiua, quam etiam supra ab Arist. ostendimus appellari picturam, quæ visa facit videre obiecta depicta, & delineata, quò etiam spectat famosum illud Arist. dictum, intellectum hominis similem esse tabulæ rasæ, in qua nihil est depictum 3. de Anima, cap. 2.

Alia experientia est de inspicillis, qui enim visus debilitate laborant, vtuntur inspicillis, quibus sanè eorum visus ita iuuatur, vt melius obiecta videant, vel vt videant, quæ antea nullo modo

modo videbant, non nisi quia inspicillis vniuntur species impressæ, & sic visus iuuatur.

Sed contrà est quia, visio in tali casu non iuuatur, quia vniuntur species sensibiles impressæ, sed quia inspicillis vniuntur virtus visiva, & non dispergitur, seu distrahitur, ergo adducta experientia species non probat.

Tertia experientia est, quia posito corpore opaco, & denso inter visum, & obiectum, non fit visio, non nisi quia ab obiecto non possunt eiaculari species, quæ corpus opacum permeent, & peruadant.

Sed contrà est quia, visio in tali casu non fit, quia impediens corpore opaco, & denso visus non potest se ultra illud extendere, deberet enim parietem, aut aliud corpus opacum interiacens penetrare, quod cum impossibile sit, non fit visio.

Quarta experientia, in magna distantia obiecta non videntur, quia species non possunt ab obiecto emitti.

Sed contra est, quia ea obiecta non videntur, quia visio non potest in obiecta nimis remota se extendere ob limitatam sui virtutem, & actiuitatem, quam habet.

Quinta experientia, cum diuiculè inspexerimus aliqua luminaria, si oculos claudamus, adhuc lucidos quosdam colores inueniuntur, ergo eorum luminarium species remanserunt.

Sed contra est quia, ista experientia adducta à *D. Augustino II. de Trinitate cap. 2.* Manifestè probat species obiectiuas, quæ remanent remoto obiecto, at species sensibiles cum in suo esse, fieri, & conseruari ab obiecto dependeant, remoto obiecto non remanent, vnde qui species impressas admittunt, & negant obiectiuas, volunt in hoc casu, sensus illudi; & negant talia obiecta videri per species.

LECTIO V.

Quæstio de Speciebus resoluitur.

Difficultates propositæ, & hoc modo superioribus Lectiõibus explanatæ, mouerunt plures tum ex Antiquis, tum ex recentioribus Philosophis ad negandas species impressas.

Et quidem ex Antiquis species negarunt *Porphirius lib. de sensu, & sensibili. Plotinus antea de 4. lib. 7. de Hipocr. & Pla-*

tonis Decr. Plato in sensu visus loco specierum posuit radium visualem . Durandus in 2. dist. 3. q. 6. Gab. q. 2. Ockham in 2. q. 14. & q. 17. ex Recentioribus Hieronymus Prouenzalis lib. de sensibus part. 1. cap. 7. Thomas Gianninus in disput. de Lumine cap. 27. Dandinus 2. de Anima digres. 31. Bassonus lib. de visu Intent. 2. Thomas de Garbo lib. 1. q. 63. Arriaga disp. 4. de Anima sect. 1. subsect. 5. concedit species in visu , & auditu, negat in reliquis sensibus externis .

Sententiam meam duabus Conclusionibus aperio .

Conclusio prima, non dantur species impressæ, quæ, vel compleant potentiam in ratione principij , vel determinent ad percipiendum hoc potius obiectum , quàm aliud .

Probatur communi , & familiari Nominalium argumento , quia non sunt multiplicanda entia sine necessitate , sed nulla est necessitas ponendi species , quæ compleant potentiam in ratione principij efficientis sensationem , quia ipsa se sola est sufficiens , neque , quæ determinet potentiam ad percipiendum hoc potius obiectum , quàm aliud , quia determinatur à præsentia obiecti , ergò .

Conclusio secunda . Dantur species obiectiuæ , quæ nimirum visæ , & perceptæ ducunt nos in visionem , & perceptionem , obiecti .

Probatur conclusio quia , experientia illa notissima , & sensibilissima de speculo manifestè conuincit , dari speciem , quæ visa ducat nos in visionem obiecti , ergo negata specie impressa , non potest negari species , quæ visa ducat nos in visionem obiecti ; an verò talis species debeat dici species formalis , vel species obiectiua , quæstio de nomine ; puto tamen , potius dicendam , esse obiectiuam , quàm formalem , quia in quæstionibus de nomine standum est communi acceptioni , & locutioni , vt prudenter monet Arist. 2. Top. 2. vt quod nuncupationibus quidem res appellare oportet quemadmodum multi , quæ autem res tales sint , vel non tales , non amplius tribuendum multis . Sed communiter , & in communi phrasi Scholasticorum species , quæ visa ducit nos in visionem obiecti , appellatur species obiectiua , ergo .

Confirmatur , quia si appellatur species formalis , non distingueretur à sensatione , quæ est formalis repræsentatio , & imago obiecti , ideoque etiam solet dici species formalis , vt ergo distinctè loquamur , & confusio omnis tollatur , species hæc , quæ

visa ducit nos in visionem obiecti debet dici species obiectiua.

D. species ista obiectiua est accidens, & inferioris omnino conditionis, & ordinis, ac sit obiectum, ergo non potest ipsa, visa ducere in visionem obiecti, species enim obiectiua debet esse eiusdem conditionis, & perfectionis cum obiecto.

Respondeo: statuam Cæsaris esse longè inferioris conditionis, ac sit Cæsar, & tamen est eius species, & imago obiectiua, creaturæ sunt imago Dei iuxta illud Apostoli *1. Corinth. 3. videmus nunc per speculum in enigmate*, & tamen creaturæ sunt inferioris omnino conditionis, non ergo ad speciem obiectiuam requiritur, quod sit eiusdem conditionis, & perfectionis cum obiecto à se representato.

Dices secundò, non potest assignari, à quo species istæ producantur, & conseruentur, ergo: Antecedens probatur, quia istæ species non producantur, nec conseruantur ab obiectis, sapè enim obiecta non sunt, & adsunt species representantes obiecta; sed neque producantur, aut conseruantur à potentia, quia imago debet produci ab imaginato, ergo.

Respondeo, species obiectiuas in suo quidem produci dependere ab obiecto, at in conseruari, si sit species sensus externi, conseruatur in sensu illo externo, ad quem species est directa, & transmissa; si sit species sensibilis interior, conseruatur in memoria sensitiua, quæ est specierum conseruatorium; denique si sit species intelligibilis, conseruatur in memoria intellectiua, quæ est earum specierum receptaculum ad id à natura destinatum, & ordinatum.

Dices tertio, istæ species neque sunt diuisibiles, neque indiuisibiles, ergo non dantur, & quidem non sunt indiuisibiles, quia obiecta, à quibus fiunt, & quæ representant, sunt diuisibilia, & extensa; sed neque non sunt diuisibiles, quia indiuisibiliter, & totum simul obiectum representant, ergo.

Respondeo, has species esse diuisibiles in essendo, quia non solum, vt benè probat argumentum, prodeunt ab obiecto materiali, & extenso, sed etiam quia recipiuntur in subiecto materiali, idest, in potentia materiali; esse tamen indiuisibiles in representando; patet enim in pupilla, quæ minima pars est oculi, representari totum obiectum, quamuis valde magnum, & ingens, vt esset, verbi gratia, magnus aliquis mons, quod non aliter contingeret, nisi quia species representatiua montis est indiuisibilis in representando.

LECTIO VI.

Potentia visiva, eius obiectum, & organum.

Potentia visiva aliarum potentiarum, & externorum sensuum nobilior est; eius actus proprius, nempe visio, adeo certior est actibus aliorum sensuum, ut vel ipsamet intellectio, & cognitio in utraque Schola, Philosophorum scilicet, & Theologorum, sæpe nomen, & vocabulum visionis usurpet. De obiecto huius potentia

Communis doctrina duo docet, primum est: lumen, & colorem esse ex æquo formale obiectum potentia: secundum est, lumen videri absque colore, at non videri colorem absque lumine; patet hoc experientia, quia noctu, & in tenebris colores non videntur; videntur astra, & caelestia corpora, quia lucida, licet colorata non sint.

Hæc duo mihi non videntur cohærere: nam si, ut experientia docet, lumen se ipso videtur, & non per colorem, color autem non videtur, nisi per lumen, & mediante lumine, manifestè sequitur, lumen esse obiectum formale, colorem verò obiectum materiale; in communi enim conceptu, & sensu, id, quod attingitur ratione alterius dicitur obiectum materiale, & id, ratione cuius aliud attingitur, dicitur obiectum formale, ita obiectum formale Physicæ est naturalitas, hæc enim ratione sui attingitur à Physica, nam cetera, quæ à Physica considerantur, & attinguntur, attinguntur ratione illius, & sub formalitate naturalitatis: in re Theologica Mysteria credita sub obiectum materiale, Divina revelatio est obiectum formale, quia nimirum Mysteria creduntur ratione Divinæ revelationis, seu quia revelata sunt; quia ergo color videtur ratione luminis, lumen se habebit ut ratio formalis, color ut ratio materialis.

Denique quia ignis non calefacit, nisi sit approximatus, approximatio se habet, ut conditio sine qua non, ipsa verò virtus ignis, ut ratio formalis agendi, ergo quia color non videtur, nisi adsit lumen, color erit ratio formalis, lumen non est ratio formalis, sed potius ut conditio sine qua non, ut est approximatio respectu ignis.

Quare aut color est obiectum materiale, & lumen obiectum

ormale, visus, aut si mauis, colorem ponere obiectum formale, profectò lumen erit conditio sine qua non; & ita quodcumque ponas, & dicas, non ex æquo lumen, & color sunt obiectum visus.

Dices, lumen videtur sine colore, at approximatior non calefacit sine igne; lata est ergo disparitas inter approximationem respectu calefactionis, & lumen respectu visionis.

Respondeo, lumen sine aliquo colore saltem apparenti non videri, astra enim, & corpora caelestia videntur, non quia lucida, sed quia colorata, & alba, non albedine, & colore reali, sed albedine, & colore apparente.

Replicabis, colores apparentes non differre à luce, lux enim prout diuersimodè reflectitur, & refrangitur, est in causa, vt varij colores appareant, vt patet in Iride, & collo columbae.

Benè, ergo iam astra videntur, quia lucida, idem enim est, astra esse lucida, & colorata colore apparenti, & consequenter iam habeo, lumen esse rationem formalem videndi, colorem verò rationem materialem, non ergo ex æquo lumen, & color sunt obiectum visionis; sed vnum ex duobus dicendum est, aut colorem esse obiectum materiale, & lumen rationem formalem; aut colorem esse obiectum formale, & lumen conditionem, sine qua non.

Verùm quid sint lux, & color, non est vna omnium Philosophorum sententia, & concors opinio.

Opinati sunt antiqui, lucem, seu lumen esse corpus. Ita *Empedocles apud Aristotelem 2. de Anima 1.70. Lucretius lib. 4. de rerum natura, Simplicius 2. Caeli com. 79. & nuper Sebastianus Bassolius lib. 2. de Caelo intent. 2.*

Sed contra est quia, lumen est in eodem loco cum aere, ergo non est corpus; aliàs duo corpora, nempe lumen, & aer essent in eodem loco, & consequenter naturaliter daretur corporum penetratio.

Alij opinati sunt, lucem esse substantiam spirituales. Ita *Balianus tract. de pestilentia c. 14.*

Sed contra est quia, substantiae spirituales effugiunt sensum, at verò lux, & est visibilis, & est ratio, cur alia videantur, & sentiantur.

Alij apud *D Thom. 1. p. q. 67. art. 3.* dixerunt, lucem esse formam substantialem.

Sed contra est quia: lux de facto, & naturaliter producitur
in

in aere, simul est ergo cum forma aeris in eiusdem aeris materia, at in eadem materia naturaliter non possunt esse duæ formæ substantiales, ergo lux non est forma substantialis.

Opinati sunt alij, lucem esse formam accidentalem, non, quidem realem, sed intentionalem, & quodammodo spirituaalem. Ita *Aegypt. 2. de Anima circa tex. 76. Tien. circa tex. 71. Buridana q. 17. Scaliger exercit. 298.* citatur etiam pro hac sententia *Scotus in 2. d. 13.*

Sed contrà est, quia lux videtur, & sentitur, non ergo est qualitas spiritalis, verum à *Scoto* appellatur qualitas intentionalis, quia non solum lux ipsa videtur, sed est ratio, & intentio, cur alia videantur, ita explicat, & intelligit *Scotus, Laurentius Fasanius lib. 5. Arcanorum Scoti.*

Gaspar Aragonius in Enchiridio, posuit, lucem esse calorem unitum, unde vbi calor magis unitur, ibi maior est lux; unitur autem magis calor, vbi est maior reflexio.

Sed contra est quia, lux est qualitas carens contrario, est enim qualitas perfectiua, non corruptiua, at calor habet contrarium, non ergo lux est calor unitus.

Communis ergo, & vera sententia docet, lucem esse qualitatem realem, & materialem.

Probatur ex *Arist. 2. de Anima t. 6.* vbi lux definitur actus perspicui, id est, forma accidentalis constituens perspicuum, & diaphanum actu perspicuum, & diaphanum, nam sine luce corpora quidem diaphana sunt, & perspicua, sed in potentia, quia possunt permeari à luce, at quando à luce actu permeantur, tunc sunt actu perspicua, & actu diaphana.

Pater autem definitionem istam, seu potius descriptionem lucis traditam esse per effectum formalem secundarium; nam eius effectus primarius, est, reddere corpus, seu subiectum, in quo est, formaliter lucidum.

Quoad Colorem.

Antiqui, vt *Plato in Timæo, Auicenna*, ceterique Arabes posuerunt, colorem à lumine non distingui, sequuntur hanc sententiam ex Modernioribus *Capr. in 2. d. 14. q. 1. ad 1. Albertus in sum. de homine q. de substantia coloris, Andraas Casalpini lib. 5. Perp. quæst. q. 7. Scaliger exercit. 325. art. 5. Vidus Antonius Scarmilionus lib. 1. de coloribus art. 5.* omnium nouissimus *Thomas Campanella in Atheism. c. 8. n. 7.*

Communis sententia, ponit duo colorum genera, nam alios do-

docet esse colores apparentes, alios veros, & reales, & quidem colores apparentes non distinguit à luce, nam secundum diuersam incidentiam, reflexionem, ac refractionem lucis, & corporum, in quibus lux ipsa recipitur, varij fiunt, & oriuntur colores, tales sunt colores in Iride, & collo columbæ.

Color verò realis est, qui ex varia temperie, & crassi primarum qualitatum fit, & oritur. Color realis manet remoto lumine, licet ob defectum luminis non videatur; color apparens remoto lumine perit, & euanesceit.

Probatut communis hæc sententia quia, veri colores semper eodem modo conspiciuntur in suis subiectis, quamuis lux diuerso modo se habeat, & videatur, ergo veri colores distinguuntur à luce, & sunt qualitates reales, & permanentes.

Dices primò. Ablata luce nullus videtur color, ergo non differt à luce.

Respondeo negando consequentiam, nam ablata approximatione non est calefactio, & tamen calefactio, non est idem cum approximatione; dico igitur, colores videri dependentes à luce, qua ablata non auferuntur colores, sed absconduntur, & exaltantur.

Dices secundò, ex *Arist. 2. de Anima 1.73.* color est motuum perspicui secundum actum, actus autem perspicui lumen est, sed idem esse videtur motuum perspicui, & actus perspicui, ergo color, & lumen idem sunt.

Respondeo; hanc coloris definitionem, seu veriùs descriptionem, traditam esse per effectum eius secundarium, nam effectus primarius coloris est reddere subiectum, vel etiam medium diaphanum, & perspicuum coloratum; ex hoc autem sequitur, quod moueat, seu immutet perspicuum, & medium diaphanum, vel dando illi esse coloratum, vel immittendo, seu transmittendo per illud speciem obiectiuam; qua data doctrina non sequitur, idem esse colorem, & lucem, diuerso enim modo mouetur, seu immutatur perspicuum, seu medium diaphanum per lucem, & per colorem; nam per lumen, seu lucem immutatur, quatenus fit actu diaphanum, & perspicuum, per colorem verò immutatur, recipiendo colores, vel speciem obiectiuam à colore immisissam.

Sensorium, seu organum potentie visuæ est oculus, cuius miram fabricam, & structuram describunt Atonomistæ; sufficiat Philosopho naturali scire, in pupilla, seu humore chrySTALLINO,

præcipuè fieri , & exerceri actum visionis . Ita docent *Aristot.* lib.1. de gen. animalium cap.5. & de hist. animal. c.9. *Celanus* lib.8. de usu partium c.6. & lib.10. c.1. Hos sequuntur communiter Philosophi, & Medici omnes .

LECTIO VII.

Potentia auditiva, eius obiectum, & organum .

O Biectum potentie Auditivæ est Sonus , de quo sunt tres difficultates . Prima est, quid sit sonus, secunda quodnam sit subiectum sonus . Tertia demum, quid requiratur in corporibus, ut sonantia sint, & sonum edant .

Quoad primam difficultatem .

Sonum esse motum corporum se percutientium, vel collidentium, asseruerunt ex Antiquis *Themistius*, & alij Græci interpretes, ex Recentioribus *Toletus* hic qu. 19. *Morandus* 2. de Anima disp. ultim. q. 79. conclus. 5.

At communis sententia ponit, sonum esse qualitatem productam ex percussione, & collisione corporum, quæ collisio, & percussio non fit sine motu aliquo locali corporum se collidentium, & percutientium : moventur ergo localiter corpora prius, tum se percutiunt, & collidunt ; denique percussio ipsa, & corporum collisio sonum producit, & edit .

Ratio est, quia motus localis non est productivus, nisi ubi, ergo sonus non à motu locali, sed ab alia actione producitur, quæ actio benè potest dici alteratio, & quidem perfectiva, non corruptiva, quia est motus ad qualitatem carentem contrario.

Dices *Arist.* hic, t. 78. sonum vocat istum, & percussionem t. 86. & lib. de sensu, & sensibili sonum, ait, esse motum, vel motionem eius, quod potest moveri .

Respondeo, *Arist.* cit. locis loqui in sensu causali, non formali, verè enim sonus non causatur, nisi localis motus interueniat corporum se collidentium, & percutientium; sicuti etiam definiri solet Eclipsis, interpositio Terræ inter Solem, & Lunam, idest, obumbratio Lunæ ex illa interpositione præueniens, & ita sonus definitur esse collisio, & percussio corporum .

Quoad secundam difficultatem .

Certum est, ad sonum requiri ad minus tria corpora, quorum

duo se verberent, percutiant, & collidant, tertium verò sonum excipiat, & in se recipiat, clara sunt verba *Arist. 1. 78.* sit autem secundum actum sonus semper alicuius ad aliquid, & in aliquo.

Dices, ex sola scutica in aere percussa pater sonum fieri, ergo.

Respondeo, fieri percussionem aeris ab vna parte scuticæ in aliam eiusdem partem.

Ceterum, ut corpora se percutiant, & sonum edant; quinque conditiones potissimum requiruntur. Prima est, ut sint dura, & solida, qualia sunt ferrum, æs, talia non sunt sint lana, & spongia. Secunda, ut sint polita, & plana. Tertia, ut sint rara. Quarta, ut sint apta tremiscere, hinc enim fit, ut campana, suspensa melius efficiat sonum, quàm si humi iaceret. Quinta, ut corpora se percutientia sint aerea, cum aliqua tamen siccitate, hinc argentum melius sonat, quàm plumbum, pariterquè fagus, quàm quercus.

Corpus tertium, quod excipit, & recipit in se sonum, cōmuniter deputatur aer, qui propterea dicitur Dominus soni, & ab antiquis vacuum dicebatur audiendi Dominus, quia nomine vacui aerem intelligebant.

An aqua sonum excipiat, res est controuersa. *Hurtad. disp. 17. sect. 2. Conimbi cap. 8. q. art. 1.* negant aquam esse soni capacitatem *Arriag. hic, Ouedus, Antonius Scajñus, Le Reès,* cum communi sententia, docent, aquam esse soni capacitatem, sed tamen minus, quàm aerem.

Probatur secundo ratione, quia illud corpus est receptivum soni, quod est fluidum, friabile, quodque compressum, & attritum per collisionem corporum solidorum aptum est resiliere, sed hæ omnes conditiones sunt in aqua, ergo.

Probatur tertio experientia, refert enim Boterus in *Relat. à nautis*, Vrinatores demitti ad fundum maris per transuersum ligatos fune, cui campanula appensa est; altera manu canistrum tenentes, quod cum conchis, (quibus includuntur vniones) repleuerint, campanulæ sono nautas admonent, & sursum attolluntur, ergo in aqua fit sonus.

Probatur quarto alia experientia, nam si quis in fluuium se demittat, illicque collidat lapides, sanè ea lapidum collisione aqua compressa sonitum quendam edet licet obrusum; pisces ad strepitum in ripa fluuij, vel litore maris factum, distingunt, & ideo

& ideò refert *Arist.* 4. de hist. *Anima* cap. 8. dum Piscatores retia piscibus tendunt , altum silentium sibi adstantibus imponunt , & demum insidijs aptè compositis , strepitu magno pisces in retia compellere nituntur ; vidi sæpius in hoc nostro mari Neapolitano , Piscatores hasta longa marinas aquas percutere , & verberare ; interrogari , cur ita marinas aquas percuterent , & verberarent ; responderunt , pisces illo strepitu , & sonitu aquarum verberatarum à somno excitari , & exurgere , atque ita facile deinde retibus capi .

Hinc *Franciscus Le Reer* sect. 4. art. I. docet , etiam ignem , & terram esse subiecta soni capacia , sed omnium maximè soni capax est aer ob summam eius humiditatem cum frigiditate coniunctam .

Sensorium , seu organum potentiæ auditivæ sunt aures , in quibus aptè natura tot cavitates posuit , & anfractus , quia in concavo aptius redditur sonus . Auditio præcipuè fit in aere quodam congenito , & innato , idest , substantia quadam tenui ad modum aeris in auriû cavitatibus inclusa , vt clarè docet *Arist.* hic t. 83. & de partibus animal. cap. 10. & ratio est , quia ideò natura talem substantiam tot cavitatibus inclusit , aufractibus providè obvallavit , quia de organo auditus valdè erat sollicita .

LECTIO VII.

Alia Potentiæ Sensitiuæ externæ .

Objectum potentiæ olfactivæ est odor ; de hoc est controversia , an sit substantia exhalata , an potius qualitas .

Odorem esse substantiam exhalatam , seu fumidam exhalationem opinati sunt aliqui apud *Conimb.* hic q. I. c. 6. & antiqui apud *Arist.* lib. de sensu , & sensibili cap. 5.

Opinio communis , & vera ponit , odorem esse qualitatem , non substantiam . Probat , quia in speciebus sacramentalibus remanet odor panis , & non remanet substantia , substantia enim sensibilis non est , ergo . Confirmatur , quia odor est obiectum sensus olfactus , sed obiectum sensus non est substantia , substantia enim sensibilis non est , ergo . Cæterum odor est secunda qualitas , quæ oritur ex certa crassi , & temperie primarum præ-

bus docet, quòd gustus, & tactus insequitur omnia animalia necessàriò.

Reuerà tamen valdè differunt gustus, & tactus, vt pater ex obiecto, nam obiectum gustus est sapor, qui est secunda qualitas, obiectum tactus sunt omnes primæ quatuor qualitates, quæ ob id dicuntur qualitates tangibiles, pater etiam talis diuersitas ex diuersitate organi, quia organum gustus est lingua, organum tactus est totum corpus, caro, scilicet, & nerui per totum corpus animalis dispersi, atque diffusi.

Tactus ergo vltimus omnium sensuum exteriorum dignitate, prius est necessitate, quia maximè necessarius est ad vitam animalis tuendam, & noxia declinanda, quia per ipsam sentitur læsio, qua primarium qualitatum temperamentum, quod maximè vitam seruat, dissoluitur.

Docet *Arriaga hic disp. 5. sect. 5. num. 63.* hoc sensu homines excellere cetera animantia: sed hæc doctrina non est vniuersaliter vera, aranea enim vincit hominem quòdā sensum hunc tactus, sicut Simia gustu, vultur odoratu, aper auditu, Lynx visu, vndè illud.

*Nos aper auditu, nos vincit aranea tactu,
Vultur odoratu, Lynx visu, simia gustu.*

DISPUTATIO XVI.

DE ANIMA RATIONALI.

Anima Rationalis, seu intellectuā forma est hominis essentialiter constitutiuā, & ea assimilatur homo Angelis, & Deo; propterea cæterarum omnium formarum nobilissima est; spiritualis enim est, & à materia prima facie semotā; vtpotè immediatè à Deo creata, & corpori simul infusa, vt ea tanquam instrumento vteretur, & tanquam organo ad aliquas sui operationes inferioris generis exercendas. Id, quod se primò, & præcipuè offert speculandum,

dum, & contemplandum, est eius immortalitas, de qua fit.

LECTIO I.

*Immortalitas Animæ probatur Fide, Ratione
Naturali, & Morali.*

A Nimam Rationalem incorruptibilem esse, & immortalem, atque adeò corrupto, & destructo corpore incolumem seruari, & incorruptam, est vnus ex præcipuis Articulis Catholice nostræ Religionis, & fidei, & quidem argumentis ex ipsa Fide Diuina petitis.

Probatur primò, quia, vt habetur *Matth. 22.* arguens Christus Dominus contrà Sadducæos, negantes animæ immortalitatem, assuinit illud *Exod. 3.* *Ego sum Deus Abraham, Deus Isaac, & Deus Iacob*, at Deus non est Deus mortuorum tantum; sed etiam viuorum, ergo iam Abraham, Isaac, & Iacob viuunt, atqui certum erat, Sanctos illos Patriarchas multo iam tempore fuisse mortuos quòd corpus, viuebant ergo quòd animam, atque adeò eorum, tanquam viuorum Deus dicebatur Deus.

Confirmatur primò, ex illo eiusdem *Matth. 10.* *Nolite timere eos, qui occidunt corpus, animam autem non possunt occidere, & ex illo Ioan 10. qui odit animam suam in hoc mundo, in vitam eternam custodit eam;* eadem veritas clarè habetur *Iob. 21. Luc. 16. Apoc. 6. 1. ad Corinth. 15. Eccl. 12. Sap. c. 2. vsque ad 5.*

Confirmatur secundò quia, vt habetur ex *Apost. 1. ad Corint. si in hoc mundo tantum sperantes essemus, miserabiles cunctis hominibus essemus.* Incarnatio, & mors Christi nobis non proficeret, quia Lege, & Fide Christiana iubemur spernere præsentia, & sperare futura, quibus sola anima frui potest, non corpus, quod corrumpitur.

Probatur secundò ex definitionibus Conciliorum, & in primis in *Concilio Later. 3. sess. 8. sub Leone X.* habetur expresse hoc Decretum. *Damnamus, & reprobamus omnes, asserentes animam intellectiuam mortalem esse, & hoc in dubium ver-*
tentes

tentes cum illa non solum verè per se, & essentialiter humani corporis forma existat, verum & immortalis, quod manifestè constat ex Euangelio.

Confirmatur primò ex Concilio Trid sess. 25. in Decreto de Purgatorio, vbi habetur; *Animas Fidelium ibi detineri*, & *iuuari Orationibus viuorum*, & in Decreto de Inuocatione, Sanctorum sancitum est; *Sanctorum animas in Cælo una cum Christo Domino viuere, & regnare*.

Confirmatur secundò ex Bulla Leonis Decimi edita anno 1513. in publica sessione in Lateranen. Basilica celebrata, vbi definitum est; animam rationalem immortalem esse, atque incorruptibilem, & contrarium docentes damnantur tanquam, detestabiles hæretici, & infidoles, atque ità denunciantur, vt vitandi, & omninò puniendi. Denique hoc ipsum definitum, & decretum est in Concilio Vienn. sub Clemente V. vt patet in Clementin. I. de summa Trinit. & fide Catholica.

Antequam ad rationes naturales veniam; suppono, immortalitatem animæ rationalis posse; & debere probari ratione naturali, nam in citata Bulla Leonis Decimi præcipitur omnibus Philosophis in vniuersitatibus studiorum, & alibi publicè legentibus hanc veritatem Catholicam de animæ immortalitate docere, explanare, & soluere argumenta in contrarium, quia verè solubilia sunt, cum enim verū vero minimè cōtradicat. si fides, quæ omninò vera est, docet animæ immortalitatē, ergo lumine, & ratione naturali, quæ etiam ad verum tendit, non potest oppositum ostendi, & demonstrari; difficultas est in assignanda ratione speciali, qua immortalitas, & incorruptibilitas animæ rationalis, proberur.

Prima ergo ratio, quæ solet afferri, est, quia anima rationalis est spiritualis, & independens à corpore, ergo immortalis, & incorruptibilis, idè enim brutorum animæ mortales sunt, & corruptibiles, quia sunt materiales, & corporeæ, ergo quia anima rationalis immaterialis, & spiritualis est, immortalis quoque est.

Respondebis primò: intellectio est res spiritualis, & immaterialis; & tamen non est incorruptibilis ergo ex animæ immaterialitate, & spiritualitate non licet inferre eius immortalitatem.

Sed contrà est; quia intellectio est accidens, at nullam inueniens substantiam, quæ sit spiritualis, & immaterialis, quæ

tamen sit corruptibilis, & mortalis.

Respondebis secundò: verè anima rationalis dependet à corpore, & materia, non enim potest operari, & intelligere, nisi dependeat à corpore, & materia, cum commune sit dictum, *oportet intelligentem phantasmata speculari*. Si ergo nobilissima animæ rationalis operatio, quæ est intellectus, dependet à corpore, etiam ipsa anima dependet à corpore quoad esse, nam *modus operandi sequitur modum essendi*.

Sed contra est quia, intellectus licet, ut plurimum à phantasmate, & speciebus dependeat, sæpe tamen sit intellectus phantasmatibus, & speciebus non concurrentibus, quando enim intellectus intelligit seipsum, vel propriam intellectionem, non præhabet species, aut phantasmata, ergo verè intellectus independens est à corpore, & phantasmate; & sic *modus operandi sequitur modum essendi*, sed operatio animæ, quæ est intellectus, est independens à corpore, ergo & ipsa anima est independens à corpore.

Quinimò dato etiam, quòd esset à corpore inseparabilis, non proinde sequeretur, eam esse corruptibilem, & mortalem, nam etiam forma Cæli est à materia Cæli inseparabilis, & tamen non est corruptibilis, & mortalis, sed immortalis, & incorruptibilis.

Secunda ratio naturalis est. *Quidquid corrumpitur, à contrario corrumpitur*, idè enim cœleste corpus ponitur incorruptibile, quia caret contrarijs, sed anima rationalis caret contrarijs, non enim componitur ex qualitibus contrarijs, neque est illorum temperies, ut falsò aliqui existimarunt, ergo.

Sed contra est, quia multæ sunt qualitates, quæ non habent contrarium, & tamen corrumpuntur, ita sunt lux, sonus, & aliæ similes, ergo ex eo, quòd anima rationalis contrarijs qualitibus careat, non benè arguitur eius immortalitas.

Verù hæc non obstant, quia lux, sonus, sunt qualitates, at nullam inveniunt substantiam non affectam contrarijs qualitibus, quæ sit corruptibilis, ergo ratio adducta manet in suo robore.

Tertia ratio desumitur ex innato appetitu immortalitatis, quem omnes habemus, frustrà enim esset talis appetitus, nisi posset exsatiari animæ immortalitate.

Respondebis, sæpè nos appetere impossibilia, & quæ nulla ratione consequi possumus, ergo ex appetitu immortalitatis, non benè

benè deducitur, talem appetitem esse sariandum, & explendum animæ immortalitate.

Sed contrà est, quia appetitus, qui fertur in impossibilia non est innatus, & naturalis, sed elicitus; non est rationalis, sed irrationabilis, ideò benè ex appetitu innato immortalitatis deducitur animæ rationalis immortalitas.

Quarta ratio desumitur ex eo; quia anima rationalis attingit spiritualia, incorruptibilia, & immortalia per actum suæ intellectionis, ergo ipsa est eiusdem naturæ, & conditionis, nulla enim causa potest eleuari suprà effectum, vnde eleganter *Seneca lib. 1. natæ qu. Hoc habet argumentum Diuinitatis suæ, quia illum Diuina delectant.*

Respondebis. Animam cognoscere infinita, & tamen non benè ex hoc deduces, eam esse infinitam. Præterea in sententia *Thomistarum* accidens producit substantiam, ergo iam causa elenatur suprà effectum suum.

Sed contrà est quia, ideò anima non est infinita, quamuis infinita cognoscat, quia aliundè habemus infinitatem illi, aut repugnare, aut naturaliter non cōuenire; at ex nullo capite probari potest, animæ rationali aut repugnare, aut non conuenire immortalitatem, ideò lata est disparitas. Præterea anima cognoscit infinitum modo finito, ideòque indè non deducitur, eam esse infinitam: ad id, quòd affertur ex sententia *Thomistarum* respondebunt hi, accidens producere substantiam non virtute propria, sed vjrtute substantiæ.

Quinta ratio naturalis desumitur ex auctoritate, & probato testimonio Sapientum, quia omnes omnium Classium Doctores Philosophi, ac Theologi, Antiqui, & Recentiores, Barbaræ omnes nationes, populorum, & gentium omnium sensus, & opinio animam rationalem posuerunt immortalem, ergo verè illa immortalis est.

Respondebis, veritatem non esse dijudicandam ex pluralitate, aut paucitate Auctorum, sed ex ipsa rei ratione intrinseca, & natura, nisi fortassè quæstio sit de nomine, monitum est *Arist. 2. Top. 2. quod nuncupationibus quidem appellare oportet, quemadmodum multi, qua autem res tales sint, vel non tales, non amplius tribuendum multis, uti salubre quidem, quia est effectuum sanitatis.*

Sed contra est, quia non sola auctoritate probatur talis immortalitas, sed auctoritate fulcita rationibus; Præterea ex eodem

Arist.

Arist. 1. Top. 8. id est probabile, quod videtur vel omnibus vel pluribus, vel sapientibus, ergo cum animæ immortalitas videatur omnibus, certum est omnino, eam immortalem esse.

Venio tandem ad rationes morales. Quarum prima deducitur ex Diuina prouidentia, & Iustitia; videmus enim iustos, & probos viros tribulationibus vexari, infortunijs, & miserijs esse subiectos; scelestos vero, & impios abundare opibus, prosperitatibus triumphare, ergo ad Diuinam iustitiam, & Prouidentiam spectat, tempus assignare, quo iustis bona, tanquam præmia, & scelestis mala tanquam pœnæ distribuuntur. at hoc tempus aliud non est, quàm altera vita, qua mortuo, & destructo corpore viuat anima, ergo. Hoc argumentum sub forma huius breuissimi Enthymematis reduxit olim D. Petrus, vt habetur apud Clementem lib. 3. *Recog. Deus est iustus, ergo anima est immortalis.*

Respondebis: sufficiens præmium dari iustis, sufficientes pœnas scelestis, si post hanc vitam corporalem, quæ vix ad octoginta annos extenditur, & protrahitur, iustis præmia, scelestis pœnæ per mille annos taxentur, & assignentur, ergo non est, cur ex illo argumento inferatur æternitas, & immortalitas animæ rationalis.

Sed contrà est, quia dato semel, quòd anima per aliquod tempus separata sit à corpore, non est, cur debeat postea interire, & non ita in æternum conseruari, atque durare. Adde, quòd iustorum boni mores, & mali scelestorum duraturi erant per æternitatem, si tandùm vixissent, ergo Deus, qui cor, & futura intuetur, sicut præsentia, debet æterna præmia iustis, æterna supplicia scelestis deputare.

Altera ratio moralis est: quia hi, qui animam posuerunt immortalem, sunt numero plures, probitate illustres, sapientia, & doctrina insignes; at è contra qui animam posuerunt mortalem, fuere pauci, & hi vel impij, vt apud Græcos *Diagoras*, apud Romanos *Caius Imperator*, vel ignaui, & molles, vt *Sardanapalus*, & *Epicurus*, vel insani. vt *Lucretius*, & *Auerroes* ex Iudæo Christianus, ex Christiano Mahumetanus, ergo.

LECTIO II.

Argumenta in contrarium solvuntur .

EX Scripturis , & ex naturali lumine quædam eruantur argumenta , quæ videntur animæ immortalitatem infringere , ac labefactare , adducamus ergo , & solvamus .

Ex Scripturis igitur .

Obijcias primò ; Ecclesiastici 3. idem est interitus hominum , & iumentorum , & æqua utriusque conditio , ergo anima rationalis est mortalis , sicuti mortales sunt animæ Brutorum . Confirmatur quia , in 6. *Synodo Generali in epist. Sopbronij* , intellectiva , & invisibilia dicuntur incorruptibilia per gratiam Dei , ergo anima rationalis non est immortalis ex natura sua .

Respondeo : eundem esse interitum hominum , & iumentorum quoad dissolutionem corporis , non quoad mortalitatem formæ . Ad confirmationem dico , eo argumento probari etiam , Angelos non esse immortales , & incorruptibiles ex sui natura ; explicandus est igitur locus ille de gratia Dei , prout est donum naturale , quo sensu etiam creatio , & conservatio solent apud Theologos non modo , sed & in communi , & familiari phrasi loquendi , appellari gratia Dei ; non ergo accipitur ibi gratia Dei pro dono aliquo supernaturali .

Obijcies secundò : ex *Apostolo 1. ad Thimoth. 6.* dicitur de Deo , *qui solus habet immortalitatem* ; ergo anima rationalis non est immortalis .

Respondeo ; in primis eo argumento deduci neque Angelos esse immortales ; solus enim Deus est immortalis . Præterea solum Deum dici immortalem immortalitate independente ab alio , tanquam à principio effectivo , in quo sensu etiam solus Deus dicitur bonus ; nemo bonus , nisi solus Deus , *Luc. cap. 18.* at nõ dici solum Deum immortalem , quasi dependenter à Deo , tanquam à causa effectiva , non possit aliquis dici formaliter . & intrinsecè immortalis , uti de actō dicuntur animæ rationales .

Obijcies tertio ; *Sapientiæ 2.* ex nihilo nati sumus , & post
hæc

hec erimus tanquam non fuerimus, & I. Ecclesiast. 2. significatur, nihil amplius superesse homini post mortem de labore suo, quo laborat sub sole, ergo.

Respondeo: ea verba dici in persona scelestorum, qui loqui introducuntur; vel etiam dico, nihil de labore suo remanere homini post mortem, quia nihil remanet commodi, aut utilitatis, & iucunditatis temporalis, non quia præmium iustis, pœna impijs post mortem non remaneat, aliàs non esset iustus Deus.

Ex Lumine naturali.

Obijcies quartò: Anima rationalis pendet à corpore non minus, ac anima brutorum, sed hæ sunt corruptibiles, & mortales, ergo & illa; Antecedens probatur, quia intellectio, quæ est præcipua hominis operatio, dependet à corpore, tanquam ab organo, vnde læso cerebro non elicitur intellectio, ergo.

Respondeo: intellectionem pendere à corpore per accidens, & ratione vnionis, quam habet cum corpore, ideòq; læso cerebro non fit intellectio, non simpliciter, & per se.

Obijcies quintò: anima est essentialiter forma informans, ergo essentialiter petit vniri corpori, & corpus informare, adeò vt etiam quando est separata à corpore petat essentialiter vniri corpori, ergo si ratione vnionis pendet à corpore, per se, & essentialiter pendet à corpore.

Respondeo in primis, quòd sicuti forma Cæli licet sit essentialiter vnita materię Cæli, adhuc tamen est incorruptibilis, ità quamuis anima rationalis esset essentialiter vnita corpori, adhuc tamen incorruptibilis, & immortalis est.

Respondeo secundò: ità essentialiter in actu primo animam rationalem petere vnionem cum corpore, vt petat etiam posse à corpore separari; & ità esse essentialiter formam informantem, vt tamen adhuc sit forma per se subsistens, & ideò non ità pendet à corpore, vt si ab illo separaretur, intereat, & destruat.

Obijcies sextò: morientes tenui madore persunduntur, ergo anima tunc in vapores resoluitur, & tandem euanescit.

Respondeo, madorem illum non ab anima rationali, sed à corpore proficisci, vt patet, quia nemo dicit, sudorem hominis oriri ab anima, quæ in illum humorem resoluitur, & non à corpore.

LECTIO III.

Probatur Animæ Rationalis immortalitas Auctoritate Aristotelis.

Aristotelem pro animarum mortalitate stetisse plerique existimant; sed maior, & melior pars Philosophorum mortuus, & constantissimè defendit, clarum esse in Aristotelis doctrina, animam fore incorruptibilem, & immortalem.

Ità ex antiquis *Theophrastus*, Aristotelis præcipuus, & diuturno tempore auditor; *Themistius I. Simplicius Ammonius, Philoponus, Olimpiodorus, Auerroes*; ex modernioribus, *Albertus Magnus, Aegidius, D. Thomas, Durandus, Ferrariensis, Eugubinus*, ex Nouissimis *Conimbricen. Martinez, Dandinus, Suarez, Lessius, Petrus Nicolaus Faentinus, Iacobus Antonius Maria, Bartholomæus de Spina*; & alij plures, quarum nomina, & locos cit. *Auersa hic qu. 57. sect. 5.*

Imò plures ex Philosophis composuere tractatus peculiare, quibus ex professo probant Aristotelis doctrinam esse pro animæ immortalitate.

Ita *Thomas Gianinus, Iulius Vincentius, Hieronymus Pontanus, Antonius Grataro, Andreas Camusius, Petrus Diataleui, Ambrosius Lemosenis, Piccolomineus*, quos citat *Auersa, ubi supra*, & sequitur instituendo peculiarem disputationem de mente Arist., quam ostendit, esse pro animæ immortalitate.

Addo. *Claudium Buccaferreum in tract. peripat. de anima rationali, Card. Oregium in tract. de Angelis, Honorium Tbotum in sua Theolog. sensata. Honophrium Romanum in tr. de Anima, Antonium Scaynum in qu. Miscellaneis.*

Hinc benè *Philoponus I. Anima circa t. 65. & 66.* Calumniatores Aristotelis, & dementes vocauit eos, qui suspicantur, illum fecisse animam mortalem.

Conclusio. Aristoteles animam esse immortalem agnouit, & asseruit. Possent innumeri Aristotelici textus adduci, sed eligam clariores.

Primus sit 2. de Anima t. 2. refert, & approbat dictum antiquissimi Philosophi *Alcmaeonis*, asserentis animam esse immortalem. *Alcmaeon dicit, animam immortalem esse, propterea quod*

quod assimilatur immortalibus, hoc autem inesse ipsi, in aquam semper motæ, & 1.34. approbat dictum Anaxagoræ: Anaxagoras autem solus impassibilem esse dicit intellectum, & nihil commune ulli aliorum habere.

Secundus sit. 1. de anima 1.65. Intellectus videtur innasci, substantia quadam existens, & non corrumpi, & 1.66. ipsum igitur intelligere, & speculari marcescit alio quodam interius corrupto, ipsum autem impassibile est, & rursus. Intellectus autem fortassis Diuinum quid, & impassibile est.

Tertius lib.2. de Anima 1. 21. & 22. de Intellectu autem, & speculatiua potentia nihil adhuc manifestum esse, sed videtur genus aliud animæ esse, & hoc solum posse separari, sicuti perpetuum à corruptibili, reliquæ autem species animæ manifestum est ex his, quod separabiles non sunt.

Quartus sit 3. de anima 1.4. necesse est (Intellectum nimirum) quia omnia intelligit, immixtum esse, & 1.19. & hic intellectus separabilis est, & immixtus & impassibilis, & 1.20. & hoc solum immortale est, atque perpetuum.

Obijcies primò. Aristoteles posuit Mundum ab æterno, & ex alia parte negauit infinitum actu, ergo non posuit animas hominum immortales, quia si hæ forent immortales, iam actu daretur infinita earum multitudo, nisi velis dicere, Aristotelem, unicam animam in hominibus omnibus posuisse; quod est damnatum in citata Bulla Leonis Decimi, aut posuisse animarum transmigrationem cam Pythagora, quod sane omnino alienum est ab Aristotelis mente.

Respondeo, vel cum *Auersa*, minus malum esse, admittere, Aristotelem locutum fuisse inconsequenter, & non coherenter ad sua principia, nam ponens, Mundum esse ab æterno, non poterat infinitum actu negare, quam illi imponere, quod animam posuerit mortalem; vel dico. Aristotelem negasse infinitum actu in rebus successiuis, non in rebus permanentibus, ut sunt animæ rationales.

Denique dico. Posito Mundo ab æterno, non sequitur necessario fore infinitum numerum animarum, quia de facto non est anima sine materia, at non est possibilis infinita materia, ergo nec essent infinitæ animæ. Adde, animas liberè esse à Deo, si ergo repugnat infinitum, Deus tale infinitum non crearet.

Obijcies secundò: 3. de Anima 1.30. & 39. docet Aristot. oportet, intelligentem phantasmata speculari; atque adeò ope-

rationem nobilissimam animæ esse dependentem à corpore, nam *modus operandi sequitur modum essendi* .

Respondeo, Aristotelem ibi loqui de intelligente prout vni-
to corpori, & sensibus externis , non de intelligente in statu se-
parationis . Vel etiam dico cum eruditissimo *Tolet*o hic q. 21.
non semper animam in statu vnionis cum corpore indigere
phantasmatibus, quando enim anima eleuatur ad contemplatio-
nem rerum sublimium, suspenditur omnis operatio sensuum .

Obijcies tertio 3. *de Anima* t. 20. docet, intellectum passiuum corruptibilem esse, sed intellectus non distinguitur realiter ab anima, ergo .

Respondent Auerroes, & D. Thomas, nomine intellectus ibi, sensum internum intellexisse, nam eodem libro t. 48. Imaginationem vocat intellectum : en verba, *si quis imaginationem ponat, ut intellectum quandam, multa enim præter scientiam sequuntur imaginationes* .

LECTIO IV.

Quid senserit Galenus de Animæ Immortalitate.

Nemesius *lib. de natura hominis* , & Antonius Musa Bra-
uasolus in Indice cum communi sententia, ponunt, *Gale-
num* stetitisse contra animæ rationalis immortalitatem .

Vindicant ab hac calumnia *Galenum* Epiphanius Ferdinan-
dus *lib. 1. Theor.* 58. & 59 Franciscus Mirandulanus *lib. 4. Exa-
minis cap. 9.* Ruuius in *tr. de Anima* q. 3. n. 40. ubi refert, *Gale-
num* in libro de tremore, & rigore, asserere ; non decipi eos,
qui animam immortalem ponunt.

Conclusio, Galenus non posuit animam mortalem , sed im-
mortalem .

Probatur primò, quia vnicum fundamentum, quo communi-
ter mouentur hi , qui opinionem de animæ mortalitate , impo-
nunt Galeno, est , quia Galenus posuit , animam non esse sub-
stantiam, sed consistere in crasi , & temperie primarum quali-
tatum, at Galenus non posuit animam consistere in crasi, & tem-
perie primarum qualitatum , ergo : Minor probatur, quia libro,
quòd animi morbi corporis temperamentum sequantur cap. 5.
sic loquitur ; *Profecto si corporis similis species anima est, ab*
eius

cuius substantia firmissimū argumentum sumemus, sed si ipsam immortalem esse propria, ut Plato volebat, natura præditam pro certo habuerimus, aut saltem eam corpori subijci, ac obtemperare, & cap. 3. eiusdem libri habet: inter has autem totius animæ species, partesque rationalem esse immortalem, Platonem sibi persuasisse visus est, ego verò sit, aut non sit, quid aduersus ipsum obijciam, non aperio; eodem modo loquitur lib. 7. de usu partium cap. 8. lib. de utilitate Respirat. in principio, lib. 9. de Hipocr. & Plat. cap. 9. & lib. de formatione fœtus in fine ita loquitur. Caterum sicuti dixi, cum nullam inueniam opinionem scientiam efficientem demonstratione aliqua confirmatam, fateor, me de substantia animæ dubitare, nec vel probabile quicquam habere, quod asseram; ex quibus patet, conditionatè, & dubitatiuè Galenum loqui de substantia animæ, non verò quicquam certi, & determinati asserere ex proprio sensu, sit nec nē substantia, an crasis quædam primarum qualitatum.

Probatut secundò; quia alijs suæ doctrinæ locis apertè se declarans Galenus, posuit animam immortalem, nam lib. de substant. facult. natural. ait, ipsam de foris in corpora immigrare, & corporeis naturis ancillari, & lib. an animal sit, quod in utero est, sic loquitur; Anima autem ab uniuersis animis, & celesti choro delapsa scientiam accipit, semper verò viam, qua ad simile ducit sequens, terram quidem superat, ab erroribus aquæ se auertit, transcendit aera, sit igne superior, & celestem diuinitatem attingit, sæpeque trans celestem locum intuetur. rerum omnium Domino assistit, & super has res circumlabitur.

Dices primò. Galenus lib. de Rig. de Trem. & Palpit. docuit, animam esse ipsum calidum, ergo posuit, animam consistere in aliqua qualitate contraria, & corruptibili, cuiusmodi est calor.

Respondeo: ibi Galenum fuisse locutum in sententia Stoicorum ad inuestigandam frigoris generationem, vel etiam, ut se opponeret alijs antiquis, qui animam putabant esse frigus, ut restatur Arist. lib. 1. de Anima num. 35. vnde & eam appellabant Græco vocabulo *Psychin*, idest, frigus.

Dices secundò; lib. 3. de locorum affection. c. 7. habet Galenus, aut anima est temperamentum actiuarum qualitatum, aut ipsarum temperamento alteratur, lib. cit. quòd animi inor-

bi cap. 3. cum dixisset, animam esse temperamentum qualitatum, refert Platonis sententiam de animæ immortalitate his verbis: *Si anima immortalis est, ut Plato voluit, rectè sanè fecisset, si quemadmodum, & alia de animæ natura literis mandauit, huius quoque causam retulisset; cur videlicet, refrigerato cerebro, aut siccato, aut calefacto, ipsa migrat è corpore; cur sanguinis copiosa euacuatio, & cicuta potus, & exurens febris animam disungata corpore, à Platone utique ipso, si vitam degeret, omninò discere dignum putarem.*

Respondeo: Galenum loqui dubitativè, & conditionatè, ut patet ex particula conditionali, *Si*, non verò effectivè ponere animam consistere in crasi, & temperie primarum qualitatum. Rationes verò dubitandi, quas adducit Galenus: facilè solvuntur non à Platone, sed ab alijs Philosophis, anima enim licèt formaliter non consistat in crasi, & temperie primarum qualitatum; quandiu tamen est in corpore, seu in suo conservari quòdàd esse unitum corpori, dependet ab illa temperie, & primarum qualitatum crasi, & hæc est ratio, cur exsiccato, aut nimium calefacto cerebro exeat à corpore anima, de se ceteroqui immortalis, & quòdàd suum esse simpliciter omninò independens à corpore.

LECTIO V.

Faciliora quadam de Potentijs Animæ Rationalis expediuntur.

TRes enumerantur potentia, seu facultates animæ Rationalis, intellectus, voluntas, & memoria, quas coherenter ad ea, quæ de alijs potentijs dicta sunt, pono ab anima rationali, & adinvicem nec realiter, nec sola ratione distingui, sed potius quidditativè, & formaliter.

Obiectum materiale intellectus est ens siue reale, & positivum, siue rationis, & negativum: obiectum verò formale est verum, aut falsum iuxta duplicem actum, quem habet intellectus, nempe actum assensus, & actum dissensus, nam per actum assensus intellectus fertur in verum tanquam in obiectum formale, & per actum dissensus intellectus fertur in falsum, tanquam in suum formale obiectum.

Recipio communem distinctionem intellectus in eum, qui dicitur agens, & in eum, qui dicitur intellectus passibilis, qui species impressas admittunt, nomine intellectus agentis intelligunt eum, qui deputtando phantasmata, eaque à crassitie, & materialitate abstrahendo, species intelligibiles, & spirituales producit: sicuti nomine intellectus passibilis intelligunt eum, qui species recipit impressas.

Qui verò species impressas negant, nomine intellectus agentis, necesse est, intelligant eam potentiam, quæ dicit actum cognitionis, & intellectionis; è contrà nomine intellectus passibilis intelligunt eam potentiam, quæ recipit speciem obiectiuam, & actum intellectionis.

Quodnam sit primò cognitum, acriter pugnant Scotistæ cum Thomistis; volunt hi, primò cognitum esse vniuersale, contendunt illi; primò cognitum esse singulare, & indiuiduum. Conciliari faciliè possunt posita distinctione duplicis cognitionis, confusæ, scilicet, & distinctæ; & quidem cognitione confusa primò cognoscitur vniuersale, nam à longè videntes Petrum, verbi gratia, primò cognoscimus esse ens, deindè esse hominem, deinnum esse Petrum; at cognitione distincta, & clara primò cognoscimus Petrum, tum de Petro cognoscimus hominem, animal, ens.

Memoria est facultas, & potentia, quæ est conseruatorium specierum obiectiuarum, vnde fit, vt intellectus obiecta iam præterita intelligat, & cognoscat, atque adeò anima dicatur recordari, & præteritorum reminisci.

Voluntas, seu appetitus rationalis sequitur ad cognitionem, & ad actum intellectus, sicuti appetitus sensituius sequitur ad cognitionem sensituiam.

Obiectum materiale voluntatis est ens: formale aut est bonum, aut malum; bonum quidem est obiectum formale voluntatis quoad actum amoris, & prosecutionis; malum est obiectum voluntatis quoad actum odij, & fugæ; sicuti enim prosequitur, & amat bonum, ira odit, & fugit malum.

Voluntas rationalis libera est; ita est certum ex Fide Catholica, & præterea patet tum experientia, tum ex communi sensu, tam Aethnicorum, quam Catholicorum Philosophorum, est autem libertas duplex, nempe libertas in actu primo, & libertas in actu secundo: libertas in actu primo est ipsamet potentia libera: libertas in actu secundo est actualis operatio liberè

elicitā : libertas in actu primo definitur, quæ positis omnibus requisitis ex parte actus primi ad agendum, adhuc potest agere, & non agere ; hæc libertas dicitur libertas contradictionis, seu exercitij ; sicuti è contra libertas contrarietatis, seu specificationis est, cum positis omnibus requisitis ad agendum, voluntas potest agere, siue hoc, siue illud, elicere siue hunc, siue illum actum.

Plura de libertate voluntatis persequi non est Philosophi, sed Theologi, plura enim, & fusè de ea tractantur in materia de actibus humanis, & in celebri Controversia de efficacia Divinæ gratiæ.

Vtra potentia, intellectus, an voluntas sit nobilior, acerrimè pugnant Scotistæ, & Thomistæ inuicem.

Thomistæ in primis cum D. Thoma 1. p. q. 82. art. 3. & 1. 2. q. 3. art. 4. ponunt intellectum esse nobiliorem voluntate. Ex Recentioribus hæc sententiam sequuntur Suarez lib. 5. de Anima cap. 6. Conimb. lib. 3. cap. 13. q. 2. Morand. 3. de Anima quæst. 13. concl. 3. Vafq. tom. 2. disp. 11. Complut. hic disp. vlt. q. 4. § 2.

Scotus in 4. dist. 49. q. 4. & 5. ponit voluntatem esse perfectiorem intellectu, quam sententiam docuerant prius Alensis 3. p. q. 80. memb. 1. Henricus quodlib. 1. qu. 14. Albertus in 1. quæst. 14. Albertus in 1. d. quæst. 14. & sequitur Bonau. in 4. dist. 49.

Probant excellentiam voluntatis supra intellectum hæc fermè rationes. voluntas est libera : movet alias potentias, quibus tanquam domina, & Regina dominatur, & imperat : Habet pro obiecto suo bonum absolutè, & adæquatè sumptum, & à tali bono homo denominatur simpliciter bonus, ponitur in voluntate habitus, & virtus omnium perfectissima, quæ est Charitas, unde & dicitur actus Charitatis omnium perfectissimus ; huic actui ex diverso opponitur actus odij erga Deum, qui actus est omnium pessimus. Denique supremus Angelorum Chorus est Seraphim, quibus attribuitur amor, & hic est actus voluntatis.

Probant excellentiam intellectus supra voluntatem hæc fermè rationes ; intellectus dirigit, & illuminat voluntatem, quæ aliàs de se est potentia cæca ; intellectus trahit ad se obiectum, at voluntas ab obiecto trahitur, & quodammodo extra se exit : intellectus habet pro obiecto verum, quod est magis abstractum ab existentia, quam sit bonum, Denique habitus intellectus est lu-

men gloriæ, à quo adiutus intellectus, & eleuatus elicit actum beatificæ visionis omnium perfectissimum, cum sit nostrum, summum bonum, & eius priuatio est summa miseria, ergo.

Diuus Augustinus lib. 10 de Trin. cap. 11 omnes huiusmodi rationes expendens, relatas sententias cæteroqui oppositas concordat, atque conciliat, ponens memoriam, intellectum, & voluntatem esse potentias in perfectione simpliciter æquales, quamuis vna alteram secundum quid, & ex parte vincat, & superet.

Huic decisioni, & resolutioni *D. Augustini* subscribo cum doctissimo *Auersa* q. 58. sect. 7.

LECTIO VI.

Quid sit intellectio, & de verbo mentis.

Celebris, & notabilis difficultas est, quid formaliter intellectio sit, & cognitio, actio ne productiua alicuius termini, qui dicatur, verbum mentis, ducta similitudine à verbo exteriorius prolato, quo cum alio loquimur, & secreta manifestamus, videtur enim sibi met loqui intellectus, dum elicit intellectiōnem productiuam verbi, quo manifestatur, & innotescit obiectum: an verò potius intellectio qualitas quædam sit formaliter expressiua, & representatiua obiecti.

Prima sententia ponit, intellectiōnem formaliter esse actionem productiuam termini distincti, qui sit formalis imago expressiua, & representatiua obiecti.

Ita Caiet. & Bagnez 1. p. q. 27. art. 1. & q. 34. art. Ferrar. 4. contra gent. cap. 11. *Montesinus* 1. 2. disp. 3. qu. 5. *Fons* 5. met. c. 15. q. 10. sect. 2. *Gonzales* 1. p. q. 12. art. 2. d. 15. sect. 4. *Compluten.* hic d. 21. q. 1. S. 11, & q. 2. §. 2.

Secunda sententia ponit, intellectum formaliter consistere in qualitate, quæ sit formaliter representatiua, & expressiua obiecti, ideoque à verbo mentis non distinguitur.

Ita Scotus in 2. d. 3. q. 6. art. hic sunt, & inferius ad argumenta principalia ad 1. & 3. & ibidem q. 8. S. ad argumenta opinionum in 8. cum Scojo sentiunt *Durandus* in 1. d. 27. q. 4. *Nominales Ocham, & Gabriel* ibidem q. 2. Recentiores *Vasq.* 1. par. disp. 38. cap. 2. *Suarez* in met. disp. 42. sect. 5. *Aegydius*

Lufitanus 1. 2. lib. 4. de Beatit. quæſt. 2. art. 4.

Imò hæc videtur expreſſa ſententia *D. Thomæ in 1. d. 3. q. 4. & p. 1. q. 18. art. 1.* *D. Thomam* ſequuntur *Complat. loc. cit.* ubi alios plures Thomiſtas adducunt, diſtinguunt enim duplex genus actionis, vnum quod eſt propriè actio, & ſpectat ad prædicamentum actionis; alterum, quod eſt actio ſolum grammaticaliter, & quoad ſonum vocis, reuera tamen eſt qualitas ſpectans ad primâ ſpeciẽm, nempe ad diſpoſitionem; & hæc qualitas dicitur operatio, ſeu etiam diſpoſitio; volunt ergo *D. Thomam*, intellectiõnem formaliter ponere in primâ ſpecie qualitatis, quæ ſit diſpoſitio, ſeu operatio.

Mihi quidem duo videntur eſſe certa, & neceſſariò concedenda. Primum eſt, intellectiõnem formaliter, eſſe qualitatem formaliter expreſſiuam, & repræſentatiuam obiecti, atque adeò non diſtingui à verbo mentis. Secundum eſt, hanc qualitatem produci per aliquam actionem: quare intellectio de formali qualitatẽ importat, de cauſali, ſeu materiali actionem, ſic enim videntur poſſe conciliari relatæ ſententiæ exteroqui oppoſitæ. *Conimb. hic c. 8. q. 3. art. 3. 9. ſunt, qui aliam.*

Concluſio prima: intellectio non eſt formaliter actio. Probatum quia; ſi intellectio eſſet formaliter actio, vel iſta actio eſſet productiua termini, vel non; non poteſt dici primum, quia in intelligibilis eſt actio, quæ nõ ſit termini productio, actio enim eſt ipſum fieri termini. Si verò actio iſta ponatur eſſe productio termini, vel iſte terminus eſt imago, & expreſſa repræſentatio obiecti, vel non; ſi ſecundum, ergo non pertinet ad intellectiõnem, hæc enim eſt formalis imago, & expreſſa repræſentatio obiecti, quòd ſi talis terminus ponatur expreſſa repræſentatio obiecti, omninò ſuperflue ponitur talis terminus, quia ipſa actio poteſt eſſe expreſſa repræſentatio, & imago obiecti, ergo non eſt, cur ſine neceſſitate terminus iſte multiplicatur.

Concluſio ſecunda, intellectio formaliter eſt qualitas eſſentialiter, & formaliter repræſentatiua obiecti, ita tamen vt qualitas iſta per actionem producat.

Probatum Concluſio: quia intellectio vel eſt formaliter actio, vel eſt formaliter qualitas; ſed non eſt actio, vt patet ex prima Concluſione; ergo eſt qualitas.

Reſpondebis: intellectiõnem formaliter eſſe actionem, ſeu operationem immanentem, hæc enim non eſt productiua ter-

mini, & ex alia parte est formalis representatio obiecti, ergo intellectio formaliter non est qualitas.

Sed contra est, quia nomine actionis, ut sic, & in genere venit productio, & ipsum fieri termini, ergo statim, ac dicis actionem, debes dicere terminum productum vi actionis, quare si operatio immanens continetur sub generica ratione actionis, verè debet esse productiva termini, & assignati debet terminus productus vi talis actionis, quod si operatio immanens assignetur sine termino, iam non est actio, & productio, sed aliquid aliud, non nisi qualitas, ergo.

Hinc benè, & subtiliter more suo *Scotus loc.cit. §. sed intellectio*, ex eo probat, intellectionem non esse actionem, aut passionem, sed potius qualitatem, quia actio, & passio sunt alicuius termini accipientis esse per ipsas, sed operationes immanentes sunt ultimi termini, quibus nihil est assignare, quod accipiat esse, non anima, nec obiectum, ergo est de genere qualitatis.

Quod autem ista qualitas producat per actionem, probatur, quia sola actio se ipsa fit, & non per actionem, ergo cum ista qualitas, verè sit qualitas, & non actio, non fit seipsa, sed per actionem.

Maneat ergo, quod sicuti manus, verbi gratia, fit formaliter calida per calorem, qui tamen calor producit per calefactionem, ita anima fit formaliter intelligens per intellectionem, quæ est qualitas producta per actionem.

Colligite ex his; verbum mentis non esse quid distinctum, & diuersum ab intellectione ipsa, & à qualitate formaliter representatiua obiecti, nam nomine verbi mentis, seu verbi mentalis nil aliud intelligitur, quàm manifestatio interna obiecti, sicuti verbum vocale est externa manifestatio conceptus, & obiecti interni.

Obijcies primò: vel tota essentia intellectionis saluatur in sola qualitate vnita intellectui sine actione, vel non? si primum, ergo non est, cur præter qualitatem ponamus actionem concurrere ad intellectionem, si tota essentia intellectionis non est in sola qualitate, ergo actio spectat formaliter, non causaliter, aut materialiter ad intellectionem.

Respondeo: totam essentiam intellectionis consistere in qualitate, requiri verò actionem, non quia actio spectet ad formalitatem intellectionis, sed quia qualitas illa, quæ est tota formalitas

litas intellectiōnis, non potest seipsa prodire, aut oriri ab intellectu : debet ergo dari actio , per quam fiat , & producat̃ illa qualitas .

Obijcies secundò : intellectus communiter dicitur causa , & principium intellectiōnis ; intellectio ipsa communiter dicitur operatio , & actio immanens, ergo verè intellectio formaliter in actione aliqua consistit .


Respondeo: intellectiōnem esse actionem non physicam , sed intentionalem, vel intellectiōnem dici actionem merè grammaticaliter, & quòad sonum vocis, non Philosophicè, vel denique cum *D. Thoma loco ubi supra*, dico actionem immanentem esse de genere qualitat̃is .

Obijcies tertio : si qualitas ista , in qua formaliter consistit intellectio, poneretur in intellectu, verè intellectus denominaretur intelligens , ergo actio nullo modo requiritur ad intellectiōnem .

Antecedens probatur quia , sicuti si calor poneretur in manu absque calefactione, adhuc manus diceretur calida , ita si intellectio poneretur in intellectu , adhuc intellectus denominaretur intelligens .

Respondeo in primis, negando antecedens , lata enim disparitas est inter denominationem manus calidæ, & intellectus intelligentis, quia manus non fit calida vitaliter, seu vitali modo , at intellectus est , & denominatur intelligens vitali modo ; ideòque intellectio debet fieri à principio intrinseco, & per aliquam intrinsecam actionem , si ergo ab extrinseco , & de foris adueniat intellectio ; non denominabitur intelligens, esto manus à calore extrinsecus , & de foris adueniente, denominetur calida .

Præterea dico : ex hoc argumento sequi, actionem non spectare formaliter ad intellectiōnem , quod vltro concedo , sed non probari, non requiri actionem, tanquam id, quo fiat, & causetur intellectio , seu qualitas, in qua consistit formaliter intellectio .



LECTIO VI.

*An in Potentijs Animæ Rationalis dentur
Habitus.*

Nomine Habitūs hic venit qualitas acquisita ex frequentis actibus addiuuans potentiam ad facilius, & promptius operandum. Et quidem dari habitum huiusmodi in potentijs animæ rationalis, intellectu, nimirum, & voluntate, est sententia in vtraque Schola, Philosophica, & Theologica adeo communis, vt eam esse extra controuersiam, asserat *Suarez disp. 44. met. sect. 1.* & in Theologia habere peculiarem certitudinem ex habitibus insulis.

Arriaga hic disp. 9. sect. 3. subsect. 1. duos tantum, vel tres Recentiores huic communi doctrinæ contradicere, testatur; omnium Nouissimi negant habitus *Ouiedus hic contr. 14. p. 3. q. 2. Spinula hic disp. 3. sect. 3.*

Sed ante hos Recentiores negarunt Habitūs ex Nominalibus *Ioannes Maior in 4. d. 1. q. 1. prop. 1. ad 1. contra 1. conclus.* Ex Thomistis, *Soncinas 6. met. q. 9. Aureolus apud Cap. in 1. distin. 13. qu. 1. art. 2.* Hi loco habituum ponunt species confirmatas, & coordinatas, atque ad id mouentur auctoritate *D. Thome qu. 25. de verit. art. 4. ad 9.* vbi docet, habitum intellectus esse habitum ordinationis specierum, & *1. 2. q. 50. art. 2.* videtur supponere habitus nihil aliud esse, quam species intelligibiles, ideoque in voluntate ponit habitus, quia in ea sunt aliqua habentia analogiam cum speciebus. Denique *Ioannes Salas 1. 2. tract. 10. disp. 1. sect. 1.* docet, non esse rationem, quæ conuincat dari habitum, sed tamen sentiendum esse, & loquendum esse cum doctis, & indoctis, qui omnes ponunt habitus.

Vetus est ergo opinio exorbitans à communi sententia, asserente habitus, cum qua

Conclusio est: verè dantur habitus in potentijs Animæ rationalis, intellectu, scilicet, & voluntatē; dixi in potentijs animæ rationalis, quia in alijs potentijs sensitivis, & vegetatiuis tam hominum, quam brutorum eadem communis sententia negat habitus,

Probatur Conclusio primò ; experientia sensata apparet , & & quilibet in seipso experitur post frequentatos actus facilitatem quandam in eliciendis actibus similibus, ità qui frequenter se in disputationibus exercet, in conficiendis, & soluendis argumentis, sentit se promptum, & expeditum ad disputandum , experitur se facile , & magna cum alacritate proponere , & soluere argumenta, sed talis alacritas , facilitas , & promptitudo non nili à qualitate habituali acquisita per frequentatos actus potest oriri, & originari, ergo datur habitus.

Respondebis ; eam facilitatem , & alacritatem oriri ex speciebus coordinatis, & confirmatis , vt loquuntur *Thomistæ*, vel à speciebus clarioribus, & intensioribus, vt volunt *Recentiores*.

Sed contrà est quia : si talis facilitas, & alacritas, quam communis sententia tribuit habitui , proueniret à speciebus , siuè coordinatis , siuè clarioribus , non esset ratio, cur in potentijs sensitiuis siuè brutorum , siuè hominum non ponerentur habitus, nam etiam in ijs dantur species sensibiles, quæ possunt coordinari , & confirmari , aut reddi clariores, & intensiores, sed hi Auctores, contrà quos agimus, in potentijs sensitiuis negant habitum cum communis sententia, ergo cum eadem communi sententia negare debent , species esse substitutas, & subrogatas loco habituum, & ab ijs oriri eum effectum facilitatis , & promptitudinis , quem oriri ab habitu, docet communis sententia.

Contrà secundò ; quia aliud est simpliciter apprehendere terminos, & aliud est ferre iudicium de terminis , nam aliqui sunt ad apprehendendum valde arguti , & perspicaces, qui tamen non pollent iudicio ; esto facilitas, & promptitudo ad apprehendendos terminos habeatur à speciebus, vel coordinatis , vel clarioribus, sed facilitas, quam experimur , in ferendo iudicio, & in eliciendis argumentationibus non erit à speciebus, sed ab habitu.

Contrà tertio : quia sæpè habemus facilitatem circa aliqua obiecta , de quibus nullas habemus species , nam quando intellectus cognoscit seipsum , vel reflectit suprà suas cognitiones , non præhabet de seipso, aut de suis cognitionibus aliquas species, & tamen qui sæpiùs , & frequentius reflectens suprà suos actus sibi comparasset consuetudinem reflectendi suprà proprios actus, sentiret facilitatem ; & promptitudinem quandam in suis reflexionibus, ergo talis facilitas non potest refundi in species quomodocumque explicatas.

Contrà quartò: in intellectu Angeli sunt clariores species, quàm in intellectu hominis, & in intellectu Theologi sunt clariores, & intensiores species mysteriorum Fidei, & rerum Fidei Diuina credendarum, quàm in intellectu rustici, & tamen in utroque intellectu idem est habitus Fidei, nam *unus Dominus, una Fides, unum Baptisma*, ad *Ephes. 4.* non ergo species sunt habitus, imò respectu mysteriorum Fidei præter species omnino debent admitti habitus supernaturales, ergo etiam circa obiecta naturalia præter species admitti debent habitus; consequentia videtur tenere ab æquitate rationis.

Contrà quintò est quia, vt eruditè notat *Suarez loco cit.* Habitus non ponitur, quasi necessarius simpliciter ad actum, alias non distingueretur à potentia, sed ponitur ad melius esse; vel non ponitur habitus ad substantiam actus, sed ad modum actus, idest, ad habendam illam facilitatem, alacritatem, & promptitudinem, quam, vel inuiti experimur in nobis post frequentatos actus, at species sunt simpliciter necessariae ad actus, & omnino requiruntur ad substantiam actus, non ergo ille effectus facilitatis, & promptitudinis refundi debet in species quomodocunque explicatas, quia etiam quando sunt coordinatæ, & confirmatæ, vel clariores, & intensiores concurrunt ad substantiam actus, & non ad modum actus, tardiora enim ingenia, nisi habeant species clariores, & intensiores, quàm de iisdem obiectis habent ingenia perspicaciora, nullo modo elicient actus cognoscitiuos circa talia obiecta, ergo species etiam quâdo ponuntur clariores, & intensiores, necessariae sunt simpliciter, & ad substantiam actus.

Probatur secundò conclusio auctoritate *Aristot. 9. met. cap. 5. & 8.* vbi assignat quasdam potentias, quæ non possunt haberi, nisi per actus, & exemplum ponit in arte; & *cap. cit. 8.* docet *actum priorem esse potentia, & generatione, et tempore*; quod sanè non potest intelligi, nisi de habitu; nam potentia simpliciter, quia causa est actus, prior est actu, & generatione, & natura, & tempore. Imò non solum in naturalibus, sed in moralibus nihil frequentius apud Aristotelem, & alios Philosophos, & naturales, & morales, quàm mentio de habitibus bonis, aut malis, quibus ad virtutes, aut ad vitia inclinatur.

Obijcies primò; non sunt multiplicanda entia sine necessitate, at nulla necessitas est, ponendi qualitates habituales, facilitas

cilitas enim, & alacritas ad operandum optimè potest saluari per species, ergo.

Respondeo; ostendisse nos supra necessitatem ponendi, & adstruendi has qualitates habituales; & dato etiam, quòd per species, siuè confirmatas, siuè clariiores, & intensiores saluetur aliquo modo illa facilitas, quam pult frequentatos actus in nobis ipsis experimur, tamen meliùs saluatur per habitus, hi enim se tenent ex parte potentiae, qua est facilitas illa, & alacritas ad operandum, species se tenent potiùs ex parte obiecti, in quo nò est alacritas illa, & facilitas; at id, quod est melius, & congruentius, asserendum est naturali Philosopho; id enim *quod est melius, desiderat natura semper ex Arist. 2. de Gen. 1. 9.*

Obijcies secundo: facilitas, & alacritas ad operandum, quam ostendit experientia in potentijs sensitivis brutorum, & hominum saluantur, per solas species ordinatas, confirmatas aut etiam clariiores, & intensiores. ergo facilitas, quam ostendit experientia in alijs potentijs, intellectiva, scilicet, & volitiva, simili modo saluatur per species.

Respondeo. Potentiam volitivam, & intellectivam esse ex genere suo magis perfectas, ideò exigere naturaliter modum operandi meliorem, & perfectiorem, at modus operandi alacriter, & facilè, melius, & perfectius habetur per habitum, quam per species, ideò communis sententia ponit habitum in potentia intellectiva, & volitiva, negat in alijs potentijs sensitivis, siue hominum, siue brutorum.

Præterea, potentia sensitiva non est capax habitus, cuius tamen capax est potentia, tum intellectiva, tum volitiva; probatur ex eo, quia habitus supernaturales ponuntur in intellectu, & volitiva; at non ponuntur in potentijs sensitivis, ergo signum est evidens, potentiam intellectivam capacem esse habitus; incapaces esse eiusdem habitus potentias sensitivas.

Obijcies tertio, si daretur habitus in ordine ad habendam istam facilitatem, & alacritatem, vel habitus daret istam facilitatem effectivè, vel formaliter, nò formaliter quia aliàs semper, & etià nobis dormientibus experiremur eam facilitatem, sicuti planū est, nos esse albos etiam dormientes, quia sumus albi formaliter ab albedine, causa enim formalis, si unita sit subiecto, semper, & omni tempore tribuit illi suum effectum formalem; sed neq; potest dare istam facilitatem effectivè, quia totus actus, tota entitas actus est à potentia, neque enim, quia habitus concurrir,

potentia minus concurrir, ergo.

Respondeo in primis : hoc argumentum posse applicari speciebus clarioribus, & intensioribus, atque adeo retorqueri posse facile in Aduers. nam vel species clariores, & intensiores concurrunt ad illam facilitatem, (quam experientia conuicti admittimus omnes :) formaliter, vel effectiue ; non formaliter, quia sequitur idem absurdum, quod infertur ex positione habitus ; vel concurrunt effectiue, & hoc etiam non potest dici, quia tota entitas actus est à potentia, neque enim quia species concurrunt, ipsa minus concutrit, ergo ; idem argumentum potest instari de actu visionis beatificæ, qui totus est à lumine, & tamen ad eundem actum etiam intellectus concurrir. Ita *Henricus quodlib. 4. quæst. 22.*

Dico igitur, secundum aliquos, habitus facilitatem illam, & promptitudinem esse quendam modum, qui à solo habitu producit, & ita non concurrir ad substantiam actus, sed tantum ad illum modum ; Verum dato, eam facilitatem non esse modum distinctum à substantia actus ; Dico, totam entitatem actus, totam substantiam actus esse, & ab habitu, & à potentia, sicuti actus visionis beatificæ totus est à lumine gloriæ, & totus est ab intellectu, & sicuti in sententia Auctorum, contra quos agimus, totus est actus à potetia, & totus à speciebus quomocumque explicatis, & quomocumque positis, siue confirmatis, siue clarioribus, & intensioribus ; ita tamen res se haberet, vt sine potentia nequeat elici actus, possit tamen elici sine habitu,

LECTIO VIII.

Habituum, Productio, & Destructio.

Habitum naturalem produci, & non innasci, aut infundi potentia æquè certum est, ac sit certum, habitum supernaturalem infundi potentia.

A quo producat, à potentia ipsa, vel ab actibus, & quomodo; varæ sunt sententiæ Philosophorum.

Primò *Durandus in 2. d. 34. qu. 2.* ponit, habitum produci à potentia, quæ tamen prius sit disposita per actus, atque adeo actus esse dispositionem præuiam ad habitum.

Sed contra : est quia si actus essent præuia dispositio ad produ-

ductionem habitus, transacto actu non remaneret habitus, nam dispositio necessaria ad introducendā formā in subiecto, est etiā necessaria ad conseruationem eiusdem formæ, ideòq. recedente illa dispositione, forma desineret esse in subiecto, sic recedente calore, desinit forma ignis, quia calor est dispositio ad introducendā formam ignis in subiecto, & consequenter est etiam dispositio ad conseruandam eandem formam; at patet experientia, transacto actu remanere habitum, est enim habitus qualitas in subiecto firmiter radicata, ergo.

Secundò alij, vt *Burid. 2. Aeth. qu. 3.* ponunt habitum produci à potentia per actum, tanquam per actionem, & causalitatem.

Sed contra est, quia actio, quæ est causalitas respectu effectus, & termini producendi, non potest esse sine termino, actio enim est ipsum fieri termini; at est actus sine habitu, vt patet, non ergo actus est actio, per quam producatur habitus.

Scotus in 1. d. 17. qu. 2. et in 4. 49. qu. 2. ponit habitum produci ab actibus, tanquam ab vnica, & vera causa effectiua, Scotum sequuntur non modò Scotistæ, sed doctissimi Recentiores *Suarez disp. 44. met. sect. 8. Vsq. 1. 2. disp. 79. cap. 9. Auerſa hic qu. 49. sect. 5.* & alij plures.

Probatur primò ex Aristor. qui passim supponit habitum ab actibus in hoc genere causæ effici, & produci; & quidem aperte id asserit, *2. eth. cap. 1.* vbi habet; *ut verbo dicam, ex similibus operationibus habitus fiunt*: hinc factum est commune dictum ab omnibus receptum; *ex frequentatis actibus fit habitus*.

Probatur secundò; quia si habitus non efficeretur ab actibus, maxime quia efficeretur à potentia, sed etiam si à potentia ponatur effici habitus, adhuc ipsi actus debent concurrere, tanquam concausa, & conprincipium effectiuum; patet enim à sola potentia non produci habitum, ergo.

Dices: actus non est perfectior habitu, neque est æquè perfectus, ergo neque est causa æquiuoca, neque vniuoca respectu habitus; quòd non sit perfectior patet, quia aliàs habitus non posset actus consequentes producere, hi enim sunt similes in specifica perfectione ijs, à quibus ipse est productus; quòd non sit æquè perfectus, patet, quia habitus ordinatur ad actus tanquam imperfectius ad perfectius, actus enim est finis habitus, & non è contra, ergo.

Respondeo: esto habitus sit imperfectior actû, tamen nō ipse solus producit actus consequentes, hi enim producuntur simul ab habitu, & à potentia; remanet ergo actum esse perfectiorem habitu, & consequenter esse eius causam æquiuocam.

Verum quidem est, quòd regulariter ad producendum habitum requiruntur plures, & frequentati actus, iuxta illud, ex *frequentatis actibus fit habitus*, dixi regulariter, quia si ponamus in aliquo casu particulari fieri actum adeò intensum, qui æquiualeat pluribus, tunc per vnum actum fieret habitus.

Colligite ex his, etiam per actum intensiorem intendi, & augeri habitum; sicuti enim habitus simpliciter producit per actum, ita per actum perfectiorem, & intensiorem, intenditur, perficitur, & augetur habitus.

Quod ad habitus destructionem.

Hi, qui ponunt habitum in suo conseruari, dependere ab actibus, consequenter docent per absentiam, aut per mēram cessationem ab actibus, habitum paulatim minui, & tandem corrumpi. Itā *Ocham in 4. qu. 12. ad primum, Gab. in 2. d. 23. q. 1. art. 3. dub. 6. Salas p. 2. r. 10. d. 6. sect. 3.*

At hi, qui ponunt habitum in suo conseruari non dependere ab actibus, vt reuera non dependet, quia sæpè est inuenire habitum sine actibus, negant, habitum destrui per cessationem ab actibus: Ita *D. Thomas 1. 2. qu. 53. art. 3. quem sequuntur Thomistæ, & præterea Suarez d. 44. Met. sect. 12. Hur d. 16. de anima sect. 6 et alij plures.*

Hi ponunt, habitum destrui formaliter per alium habitum oppositum; Ratio est quia, *quidquid corrumpitur à contrario corrumpitur*, sed vni habitui alter habitus opponitur; ex gr. habitus intemperantiæ opponitur habitui téperantiæ, ergo iam vnus habitus corrumpitur per alium habitum sibi oppositum, & contrarium.

Dices primò, habitui non solum opponitur alter habitus contrarius, sed etiam actus, verbi gratia, temperantiæ, non solum opponitur habitus intemperantiæ, sed etiam opponitur actus intemperantiæ, ergo à tali actû corrumpitur, & destruitur.

Respondeo, actum esse contrarium habitui non formaliter, & immediatè, sed effectiuè, quatenus efficit alium habitum contrarium; aliàs si habitui esset contrarius actus, cum non possit negari, esse illi contrarium etiam habitum, iam vni duo essent con-

contraria, quod esse contra rectum naturæ ordinem probat
Arist. I. Celi t. 33.

Dices secundò ; per cessationem ab actibus, pater experientia, paulatim minui, & tandem corrumpi habitum, si quis enim acquisito habitu Logicæ, non se exerceat frequenter in disputationibus, amittit facilitatem disputandi, quam iam acquisierat, ergo.

Respondeo : per cessationem ab actibus corrumpi habitum per accidens, quia qui cessat ab actibus, dat aditum, ut vel eliciantur actus contrarij, vel ut producat habitus contrarius, à quo deindè expellitur formaliter habitus ; vel etiam dico, per cessationem ab actibus, evanescere species obiectorum, circa quæ versatur habitus, indè sequi corruptionem, & abolitionem habitus, qui sine suo obiecto nequit conservari.

Dices tertio : impetus impressus mobili seipso evanescit, & perit absque eo, quod à contratio ponatur destrui, & corrumpi, quamvis diù permanferit in potentia.

Respondeo ; in primis virtutem impressam lapidi, verbi gratia, ut se moueat sursum, corrumpi à granitate, quæ est illi contraria, & est naturalis proprietas lapidis, deindè dico, disparitatem esse, quia virtus impressa non est qualitas firmiter in subiecto radicata, qualis est habitus, idèò evanescit illa, postquam aliquandiu permanferit in mobili ; non sic habitus, qui est qualitas firmiter in subiecto radicata.

LECTIO IX.

An Anima separata distinguatur ab Angelo.

Sententia Communis ponit animam rationalem separatam specie differre ab Angelo, & videtur clarè deduci ex Scripturis, præsertim ex illo *D. Pauli, Angelos non apprehendit, semen Abrahæ apprehendi ad Hebr. 2.* & ex illo *Psal 8. minuisti eum paulominus ab Angelis* : si ergo homo minor est Angelo, sine dubio eius anima separata distinguitur ab Angelo, sed

Primò huic communi doctrinæ videntur contradicere nonnulli ex Sanctis Patribus, & quidem *D. Augustinus lib. de lib. Arbitrio cap. 3.* manifestè habet, *Angelus, & anima sunt natura pares; officio verò impares, D. Bernardus lib. de consider.*
ad

ad Eugenium Papam ; *optimum Tui , & Angeli ratio est*, sed nomine optimi , venit natura specifica ; ergo. denique D. Gregorius Homilia 29. in Euangelia , *omnis Creatura aliquid habet homo, habet enim commune esse cum lapidibus, viuere cum arboribus, sentire cum animalibus, intelligere cum Angelis.*

Secundò communi doctrinæ opponitur : non posse assignari , ex quo capite oriatur specifica differentia , atque diuersitas inter animam separatam & Angelum , æque enim animam rationalis, ac Angelus est creatura rationalis, & spiritalis, prædita intellectu , & voluntate , ergo nulla videtur esse specifica differentia inter animam separatam, & Angelum.

Respondent aliqui cum *D. Bon. in 2.d.qu.2.* differentiam, inter Angelum, & animam separatam esse, quia anima licet separata est vnibilis corpori , & apta nata facere quid vnum, cum illo, at Angelus non est vnibilis corpori , neque est aptus natus facere quid vnum cum corpore .

Sed contrà est : quia esse vnibilem , vel non vnibilem , est quid posterius ad esse , & naturam , ergo prius est , esse animam rationalem , aut Angelum , quàm sit , animam esse vnibilem , vel non vnibilem ; prius quid est , animam separatam esse talis , vel talis naturæ , quàm sit, eam esse vnibilem , vel non vnibilem ; at differentia specifica, vtpotè essentialis, consistit in priori , non in aliquo prædicato posteriori ad esse , & naturam rei , ergo non benè assignatur differentia specifica, animæ rationalis ab Angelo per esse vnibilem , vel non vnibilem .

Contra secundò quia : etiam Angelus potest vniri corpori , quod sæpè assumit , & quo vitur tanquam instrumento, & organo ad exercendas plures operationes vitales , videmus enim Angelos in corporibus assumptis ambulare , loqui , comedere , & bibere, clarum est in Angelo, qui Tobix filio comes fuit in itinere, & peregrinatione .

Præterea sæpè vidimus, homines arreptos, rudes caterequi, & ignaros, Latine , & Græcè loqui , quæ sanè locutio non potest esse ab anima eorum hominum, sed à malignis spiritibus, & malis Angelis, à quibus supponuntur esse arrepti; sæpè etiam ab arreptis hominibus ausus sunt , qui humanas vires exuperant, ac proinde à spiritibus, qui vel eorum corpora infornant, vel ijs assistunt, & localiter præsentés sunt , tales ausus pron-

niunt, ergo Angelus non secus, ac anima corpori vnitur, & corpore vitur tanquam instrumento ad exercendas operationes vitales.

Respondebis. Angelum per accidens assumere corpora, vel corpora arripere; anima separata de sua natura petit vniri corpori, & per accidens est, quòd aliquando separatur, & separata existat.

Sed contrà est; quia anima non ità petit de sua natura corpori vniri, vt si ab illo separatur, dicatur in statu violento, æquè enim anima connaturaliter exigit statum vnionis, ac exigit statum separationis. Ità defendit doctissimi Philosophi *Quied. hic controu. 16. punct. 2. Ruuius tract. de anima separata qu. 6. num. 81. Scotus in 4. d. 45. q. 2.* docet, magis esse connaturalem animæ statum separationis, quam sit status coniunctionis, & ratio est: quia anima est per se subsistens, & immortalis æquè, ac sit forma informans, sed quia immortalis, & per se subsistens exigit statum separationis à corpore, ergo æque connaturaliter exigit vniri corpori, quia forma informans, ac exigit, & petat separari, quia immortalis, & per se subsistens.

Denique aliqui ex grauissimis Theologis, vt *Caietanus in illa verba D. Pauli 2 ad Ephes. principem potestatis aeris huius, Augustinus Eugubinus in illud Psal. 103. qui facit Angelos suos spiritus, & lib. 3. de perenni Philosophia c. 27. D. Dionysius Areopagita cap. 4. de diuinis nominibus*, cuius auctoritas tanta est in hac materia, vt instar omnium censi debeat, docent, Angelum constare ex corpore tenui, & subtili, ergo data ea sententia etiam Angelus est vnibilis corpori, non secus, ac anima separata.

Respondent alij cum *Alex. de Alef. 1. 2. collat. de substantia Angeli q. 2. Henrico quodlib. 1. 2. quodlib. 8. D. Thom. p. 1. qu. 76 art. 7.* differre animam separatam ab Angelo, quia anima separata est discursiua, non sic Angelus, qui simplici intuitu attingit obiectum; sicut enim in ente sensitivo, quia sunt diuersi gradus sentiendi, constituuntur diuersæ species brutorum, Leo nimirum, & equus, ita quia in esse intellectiuo sunt diuersi gradus intelligendi, nempe per discursum, & sine discursu, ideò constituuntur diuersæ species creaturarum intellectiuarum, nimirum, anima separata, & Angelus.

Sed contra est: quia anima separata æquè apprehendit obiecta simplici intuitu, ac apprehendat Angelus, ea enim obiecta,

quæ in se clara sunt, & euidencia, sola terminorū simplici apprehensione innotescunt animæ separatae æquè, ac Angelo: quæ autem obscura sunt, & difficilia non possunt, nisi per discursum attingi æquè ab anima separata, & ab Angelo, qui sanè secreta cordis, & futura etiam cognitione coniecturali non attingit, nisi per discursum. Præterea in anima deberent assignari duæ intellectualitates specie diuersæ, quia circa aliqua obiecta discurret, circa alia non; & denique etiam Beatifica Visio Hominis, & Angeli deberet esse specie diuersa, atque distincta, quia ab intellectu specie diuerso, atque distincto eliceretur.

Respondebis adhuc contra principalem impugnatiōem; plura esse obiecta, quæ simplici intuitu attingit Angelus, quàm sint ea, quæ attingit anima separata; nam si secreta cordis, & futura excipias, cætera omnia obiecta Angelus attingit simplici intuitu; non sic anima separata, quæ solum pauca quædam prima, principia simplici intuitu attingit, cætera omnia per discursum.

Sed contrà est, quia esse pauciora, vel plura obiecta, quæ attingantur simplici apprehensione, aut discursu, non inducit differentiam specificam, sed numericam, nam animæ rationales, quamuis omnes vnius speciei, quamuis omnes sint eiusdem perfectionis specificæ, sunt tamen diuersæ perfectionis individualis, & vna perfectius altera cognoscit, vti de facto videmus, vnum hominem pollere perspicaciori ingenio, quàm polleat alius; ergo esse plura obiecta, quæ attingat Angelus simplici intuitu, quàm sint ea, quæ attingat anima rationalis, non sufficit ad asserendam specificam diuersitatem Angeli, & animæ separatae.

Contrà responsionem *D. Thomæ* secundò principaliter est quia; etiam si ponatur in anima, & Angelo eadem intellectualitas; seu idem gradus, & modus intelligendi, adhuc aliundè posset peti distinctio specifica animæ separatae ab Angelo, nam eadem est potentia visiva Leonis, & Equi, & tamen Leo, & Equus differunt specie, præterea lumen gloriæ æquè est debitum gratiæ habituali, ac sit debitum vnioni hypostaticæ, & tamen gratia habitualis, & vnio hypostatica differunt specie, ergo eadem intellectualitas potest esse in anima separata, & Angelo absque eo, quod inde arguatur identitas specifica vtriusque, atque adeò sicuti ex identitate specifica intellectualitatis non arguitur identitas specifica animæ separatae, ita neque ex diuersa intellectualitate potest, aut debet argui diuersitas specifica animæ separatae, & Angeli.

Contrà tertio principaliter est, quia ex eodem principio possunt oriri diuersæ operationes, vt ex intellectu actus assensus, & dissensus; ex voluntate amor, & odium: ex eadem anima diuersæ potentiae: ex eadem essentia diuersæ proprietates, ergo cum diuersa intellectualitate in Angelo, & anima separata, potest stare identitas specifica Angeli, & animæ separatæ.

His tamen non obstantibus à communi Sententia non est recedendum, & omninò asserendum est, Angelum specie differre ab anima separata, licet enim assignatæ hucusquæ differentiæ non sint traditæ per conceptus priores, & per rationes primò distinctiuas, sunt tamen signa, quæ à posteriori specificam diuersitatem Angeli, & animæ separatæ satis probabiliter suadent.

Differunt ergo anima separata, & Angelus, tanquam per conceptus priores, & rationes primò distinctiuas, per proprias eorum essentias, & naturas, alia enim est quidditas, & essentia Angeli, alia est quidditas, & essentia animæ rationalis.

Ex hac distinctione omnium prima, omnium prior; oritur deinde, quòd anima separata sit inibilis ad corpus, non item Angelus; quòd anima separata sit principium intellectiōis diuersæ, ac sit Angelus; simili ratione, qua Sol habet virtutem generandi plantam, & alia mixta, ac planta talem virtutem non habet.

Si autem quæras, per quid differat Sol à planta, non benè assignabis pro tali differentia, quia Sol habet virtutem generandi plantam; nam si hæc virtus diuinitus plantæ communicaretur, & posset planta generare alteram plantam, adhuc specie differret Sol à planta; prima ergo distinctio, per quam Sol à planta distinguitur, est, quia forma Solis est talis forma, & forma plantæ est talis, & ad hoc sequitur, quòd talis forma possit esse principium talium operationum, & alia non; ita in casu nostro Angelus, & anima separata distinguuntur specie, quia Angelus est talis naturæ ad se, & anima separata est talis natura ad se; inde oritur, quòd hæc sit vnibilis, ille non; hæc sit principium harum operationum, ille aliarum, & omninò diuersarum.

Ita subtilissimè discurret *Scotus in 2. d. 1. q. 5.* quem sequuntur *Scotistæ communiter*, omnium nouissimè *Fasani lib. 2. Arcanorum Scoti.*

Ad auctoritates SS. Patrum facilè responderetur, & in primis ad illud *D. Augustini*, dico, homines, & Angelos esse pares in natura generica intellectiua, non in natura specifica, vel esse
natura

natura pares, quia vterque, homo, videlicet, & Angelus non possunt, nisi in obiecto infinito, quietari.

Ad auctoritatem *D. Gregorij* dico, hominem communicare, cum Angelo in hoc, quod est intelligere, tanquam in ratione, & gradu generico, qui etiam dici potest quid optimum in homine, & in Angelo comparatiue ad alias creaturas, quæ carent vita rationali, & intellectiua; atque ita manent etiam soluta, & explicata verba *D. Bernardi*, quæ videbantur probare hominem, & Angelum specie non differre.

F I N I S.









